

Dīghanikāye Mahāvaggaṭṭhakathāya

Atthavaṇṇanābhūtā

Bhadantācariyadhammapālattherena katā

Mahāvaggaṭṭikā



Buddhavasse 2552

Marammavasse 1370

AD. 2008

Romanized from Myanmar version published in 1961

© Buddhasāsana Society

Ṭikā Series 11

First published in 2008 by Ministry of Religious Affairs

Yangon, Myanmar

THE PĀLI ALPHABET
IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

က ka	ခ kha	ဂ ga	ဃ gha	င ṅa
စ ca	ဆ cha	ဇ ja	ဈ jha	ည ṇa
ဋ ta	ဌ tha	ဍ ḍa	ဎ ḍha	ဏ ṇa
တ ta	ထ tha	ဒ da	ဓ dha	န na
ပ pa	ဖ pha	ဗ ba	ဘ bha	မ ma

ယ ya ရ ra လ la ဝ va သ sa တ ha ဠ ḷa ၵ ṁ

VOWELS IN COMBINATION

-၁ ၵ = ā ၵ = i ၵ = ī ၵ - ၵ = u ၵ - ၵ = ū - = e -၁ ၵ = o

က ka	ကာ kā	ကိ ki	ကိ kī	ကု ku	ကု kū	ကေ ke	ကော ko
ခ kha	ခါ khā	ခိ khi	ခိ khī	ခု khu	ခု khū	ခေ khe	ခေါ kho ...

CONJUNCT-CONSONANTS

ကက kka	ဃ န္ဂha	ဏ န္ဓha	ဈ သ္ဃa	ဠ ပာ	ဣ လာ
ကွ kka	ဣ င္ဂa	ဣ န္ဓa	ဣ သ္ဃa	ဣ ပာ	ဣ လာ
ကျ kya	ဣ င္ဂa	ဣ န္ဓa	ဣ န္တa	ဣ ဗ္ဃa	ဣ လာ
ကြ kri	ဣ ဣa	ဣ န္ဓa	ဣ န္တva	ဣ ဗ္ဃa	ဣ ဝာ
ကလ kla	ဣ ဣာ	ဣ တa	ဣ န္ဓha	ဣ ဗာ	ဣ တာ
ကွ kva	ဣ ဣာ	ဣ တa	ဣ န္ဓa	ဣ မာ	ဣ တာ
ချ khya	ဣ ဣာ	ဣ တa	ဣ န္ဓra	ဣ မာ	ဣ တာ
ခွ khva	ဣ ဣာ	ဣ တa	ဣ န္ဓha	ဣ မာ	ဣ တာ
ဂွ gga	ဣ ဣာ	ဣ တာ	ဣ န္ဓa	ဣ မာ	ဣ တာ
ဣွ ggha	ဣ ဣာ	ဣ န္ဓa	ဣ န္ဓa	ဣ မာ	ဣ တာ
ဂျ gya	ဣ ဣာ	ဣ န္ဓa	ဣ န္ဓa	ဣ မာ	ဣ တာ
ဂြ gra	ဣ တာ	ဣ သ္ဃa	ဣ ပာ	ဣ မာ	ဣ တာ
ကံ ṅka	ဣ တာ	ဣ သ္ဃa	ဣ ပာ	ဣ ယာ	ဣ တာ
နံ ṅkha	ဣ သ္ဃa	ဣ သ္ဃa	ဣ ပာ	ဣ ယာ	ဣ တာ
ဂံ ṅga					

၁	၂	၃	၄	၅	၆	၇	၈	၉	၀
1	2	3	4	5	6	7	8	9	0

Mahāvaggaṭikā

Mātikā

Piṭṭhaṅka

Mahāpadānasutta

Pubbenivāsaṭṭaṣaṃyuttakathāvaṇṇanā	1
Jātiparicchedādivaṇṇanā	8
Bodhiparicchedavaṇṇanā	11
Sāvakayugaparicchedavaṇṇanā	11
Sāvakasannipātaparicchedavaṇṇanā	12
Upaṭṭhākaparicchedavaṇṇanā	12
Sambahulavāraṇṇanā	15
Sambahulaparicchedavaṇṇanā	15
Bodhisattadhammatāvaṇṇanā	18
Dvattimsamahāpurisalakkhaṇavaṇṇanā	34
Vipassīsamaññāvaṇṇanā	42
Jiṇṇapurisavaṇṇanā	45
Byādhipurisavaṇṇanā	46
Kālakatapurisavaṇṇanā	46
Pabbajitavaṇṇanā	46
Bodhisattapabbajjāvaṇṇanā	46
Mahājanakāya-anupabbajjāvaṇṇanā	47
Bodhisatta-abhinivesavaṇṇanā	48
Brahmayācanakathāvaṇṇanā	57
Aggasāvakayugavaṇṇanā	66
Mahājanakāyapabbajjāvaṇṇanā	73
Cārikā-anujānanaṇṇanā	73
Devatārocanaṇṇanā	77

Mātikā

Piṭṭhaṅka

2. Mahānidānasutta

Nidānavañṇanā	79
Ussādanāvañṇanā	83
Pubbūpanissayasampattikathāvañṇanā	83
Titthavāsādivañṇanā	84
Paṭiccasamuppādagambhīratāvañṇanā	84
Apasādanāvañṇanā	88
Paṭiccasamuppādavañṇanā	91
Attapaññattivañṇanā	108
Na attapaññattivañṇanā	109
Attasamanupassanāvañṇanā	109
Sattaviññāṇaṭṭhivañṇanā	114
Aṭṭhavimokkhavañṇanā	118

3. Mahāparinibbānasutta

Rāja-aparihāniyadhammavañṇanā	123
Bhikkhu-aparihāniyadhammavañṇanā	125
Sāriputtasīhanādavañṇanā	136
Dussīla-ādīnavavañṇanā	136
Sīlavanta-ānisaṃsavañṇanā	137
Pāṭaliputtanagaramāpanavañṇanā	138
Ariyasaccakathāvañṇanā	140
Anāvattidhammasambodhiparāyaṇavañṇanā	140
Dhammādāsadhammapariyāyavañṇanā	142
Ambapālīgaṇikāvattuvañṇanā	143
Veḷuvagāmaṃvassūpagamanavañṇanā	144
Nimittobhāsakathāvañṇanā	147
Mārayācanakathāvañṇanā	150

Mātikā	Piṭṭhaṅka
Āyusaṅkhāra-ossajjanavaṇṇanā	152
Mahābhūmicālavaṇṇanā	154
Aṭṭhapaṇṇasavaṇṇanā	158
Aṭṭha-abhibhāyatanavaṇṇanā	159
Aṭṭhavimokkhavaṇṇanā	163
Ānandayācanakathāvaṇṇanā	163
Nāgāpalokitavaṇṇanā	164
Catumahāpadesavaṇṇanā	165
Kammāraputtacundavatthuvaṇṇanā	169
Pānīyāharaṇavaṇṇanā	170
Pukkusamallaputtavatthuvaṇṇanā	170
Yamakasālavaṇṇanā	174
Upavāṇattheravaṇṇanā	177
Catusarīvejanīyatṭhānavaṇṇanā	178
Ānandapucchākathāvaṇṇanā	179
Ānanda-acchariyadhammavaṇṇanā	179
Mahāsudassanasuttadesanāvaṇṇanā	181
Mallānaṃvandanāvaṇṇanā	182
Subhaddaparibbājakavatthuvaṇṇanā	182
Tathāgatapacchimavācāvaṇṇanā	184
Parinibbutakathāvaṇṇanā	186
Buddhasarīrapūjāvaṇṇanā	187
Mahākassapaṭṭhavaṇṇanā	188
Sarīradhātuvibhajanavaṇṇanā	190
Dhātuthūpapūjāvaṇṇanā	191

4. Mahāsudassanasutta

Kusāvatarīrajadhānīvaṇṇanā	193
Cakkaratanavaṇṇanā	193

Mātikā	Piṭṭhaṅka
Hatthiratanavaṇṇanā	196
Assaratanavaṇṇanā	197
Maṇiratanavaṇṇanā	197
Itthiratanavaṇṇanā	197
Gahapatiratanavaṇṇanā	199
Pariṇāyakaratanavaṇṇanā	199
Catu-iddhisamannāgatavaṇṇanā	199
Dhammapāsādapokkharavaṇṇanā	199
Jhānasampattivaṇṇanā	200
Bodhisattapubbayogavaṇṇanā	201
Caturāsītinagarasahassādivaṇṇanā	201
Subhaddādevi-upasaṅkamanavaṇṇanā	201
Brahmalokūpagamanavaṇṇanā	202

5. Janavasabhasutta

Nātikiyādibyākaraṇavaṇṇanā	204
Ānandaparikathāvaṇṇanā	204
Janavasabhayakkhavaṇṇanā	205
Devasabhāvaṇṇanā	205
Sanaṅkumārakathāvaṇṇanā	206
Bhāvita-iddhipādavaṇṇanā	208
Tividha-okāsādhigamavaṇṇanā	211
Catusatipaṭṭhānavaṇṇanā	214
Sattasamādhiparikkhāraṇavaṇṇanā	215

6. Mahāgovindasutta

Devasabhāvaṇṇanā	218
Aṭṭhayathābhuccavaṇṇanā	220

Mātikā		Piṭṭhaṅka
Sanāṅkumārakathāvaṇṇanā	...	224
Govindabrāhmaṇavatthuvaṇṇanā	...	225
Rajjasamvibhajanavaṇṇanā	...	226
Kittisadda-abbhuggamanavaṇṇanā	...	226
Brahmunāsākacchāvaṇṇanā	...	227
Reṇurāja-āmantanāvaṇṇanā	...	229
Chakhattiya-āmantanāvaṇṇanā	...	229
Brāhmaṇamahāsālādīnaṃāmantanāvaṇṇanā	...	230
Mahāgovindapabbajjāvaṇṇanā	...	230

7. Mahāsamayasutta

Nidānavaṇṇanā	...	232
Devatāsannipātavaṇṇanā	...	235

8. Sakkapañhasutta

Nidānavaṇṇanā	...	246
Pañcasikhagītagāthāvaṇṇanā	...	248
Sakkūpasaṅkamanavaṇṇanā	...	250
Gopakavatthuvaṇṇanā	...	251
Maghamāṇavavatthuvaṇṇanā	...	253
Pañhaveyyākaraṇavaṇṇanā	...	254
Vedanākammatṭhānavaṇṇanā	...	258
Mahāsivattheravatthuvaṇṇanā	...	266
Pātimokkhasaṃvaravaṇṇanā	...	269
Indriyasaṃvaravaṇṇanā	...	272
Somanassapañilābhakathāvaṇṇanā	...	275

9. Mahāsatipañṭhānasutta

Uddesavārakathāvaṇṇanā	...	278
------------------------	-----	-----

Mātikā

Piṭṭhaṅka

Kāyānupassanā

Ānāpānāpabbavaṇṇanā	299
Iriyāpathapabbavaṇṇanā	303
Catusampajaññapabbavaṇṇanā	306
Paṭikkūlamānāsikārapabbavaṇṇanā	307
Dhātumanāsikārapabbavaṇṇanā	307
Navasivathikapabbavaṇṇanā	309

Vedanānupassanāvaṇṇanā	311
-------------------------------	-----	-----	-----

Cittānupassanāvaṇṇanā	313
------------------------------	-----	-----	-----

Dhammānupassanā

Nīvaraṇapabbavaṇṇanā	315
Khandhapabbavaṇṇanā	320
Āyatanapabbavaṇṇanā	320
Bojjhaṅgapabbavaṇṇanā	323
Catusaccapabbavaṇṇanā	336
Dukkhasaccaniddesavaṇṇanā	336
Samudayasaccaniddesavaṇṇanā	340
Nirodhasaccaniddesavaṇṇanā	341
Maggasaccaniddesavaṇṇanā	342

10. Pāyāsirājaññasutta

Pāyāsirājaññavatthuvaṇṇanā	350
(1) Candimasūriya-upamāvaṇṇanā	351
(2) Cora-upamāvaṇṇanā	352
(3) Gūthakūpapurisa-upamāvaṇṇanā	352
(6) Gabbhinī-upamāvaṇṇanā	353
(7) Supinaka-upamāvaṇṇanā	353

Mātikā		Piṭṭhaṅka
(8) Santatta-ayoguḷa-upamāvaṇṇanā	...	353
(9) Saṅkhadhama-upamāvaṇṇanā	...	354
(10) Aggikajaṭila-upamāvaṇṇanā	...	354
(11) Dvesatthavāha-upamāvaṇṇanā	...	355
(13) Akkhadhuttaka-upamāvaṇṇanā	...	355
(14) Sāṇabhārika-upamāvaṇṇanā	...	355
Saraṇagamanavaṇṇanā	...	356
Yaññakathāvaṇṇanā	...	356
Uttaramāṇavavattuvaṇṇanā	...	357
Pāyāsīdevaputtavaṇṇanā	...	357

Mahāvaggaṭikāya mātikā niṭṭhitā.

Dīghanikāya

Mahāvaggaṭīkā

Namo tassa Bhagavato Arahato Sammāsambuddhassa.

1. Mahāpadānasutta

Pubbenivāsapaṭisaṃyuttakathāvaṇṇanā

1. Yathājātānaṃ karerirukkhānaṃ ghanapattasākhāviṭapehi maṇḍapasāṅkhepehi sañchanno padeso “**karerimaṇḍapo**”ti adhippeto. **Dvāreti** dvārasamīpe. Dvāre ṭhitarukkhavasena aññatthāpi samaññā atthīti dassetum “**yathā**”ti-ādi vuttam. Katham pana Bhagavā mahāgandhakuṭiyam avasitvā tadā karerikuṭīkāyam vihasīti? Sāpi¹ Buddhassa Bhagavato vasanagandhakuṭi evāti dassento “**antojetavane**”ti-ādimāha. **Salaḷāgāranti** devadārurukkhehi katageham. **Pakatibhattassa pacchatoti** bhikkhūnam pākatikabhattakālato pacchā, ṭhitamajjhanhikato uparīti attho. **Piṇḍapātato paṭikkantānanti** piṇḍapātabhojanato apētānam. Tenāha “**bhattakiccan**”ti-ādi.

Maṇḍalasaṅṭhānā māḷasaṅkhepena katā nisīdanasālā “**maṇḍalamāḷan**”ti adhippetāti āha “**nisīdanasālāyā**”ti. **Pubbenivāsapaṭisaṃyuttāti** ettha pubbasaddo atītavisayo, nivāsa-saddo kammasādhano, khandhavinimutto ca nivasitadhammo natthi, khandhā ca santānavaseneva pavattantīti āha “**pubbenivutthakkhandhasantānasaṅkhātena pubbenivāsenā**”ti.

yojetvāti visayabhāvena yojetvā. **Pavattitāti** kathitā. Dhammūpasañhitattā dhammato anapetāti **dhammī**. Tenāha “**dhammasaṃyuttā**”ti.

Udapādīti paduddhāro, tassa uppannā jātāti iminā sambandho. Tam panassā uppannākāraṃ pāḷiyaṃ saṅkhepatova dassitaṃ, vitthārato dassetuṃ “**aho acchariyaṃ**”ti-ādi āraddhaṃ. Tattha **ke anussaranti, ke nānussarantīti** padadvaye paṭhamāṃyeva sappapañcanaṃ, na itaranti tadeva puggalabhedato, kālavibhāgato, anussaraṇākārato, opammato niddisantena “**titthiyā anussarantī**”ti-ādi vuttaṃ. **Aggappattakammavādinoti** sikhāppattakammavādino “atthi kammaṃ atthi kammavipāko”ti¹ evaṃ kammassakatāñṇe ṭhitā tāpasaparibbājakā. **Cattālīsaṃyeva kappe anussarantīti** brahmajālādīsu² Bhagavatā tathā paricchijja vuttattā. **Tato paraṃ na anussarantīti** tathāvacanañca diṭṭhigatopaṭṭhakassa tesāṃ ñāṇassa paridubbalabhāvato.

Sāvakāti mahāsāvaka³. Tesañhi kappasatasahassaṃ pubbābhinihāro. Pakatisāvakā pana tato ūnakameva anussaranti. Yasmā “kappānaṃ lakkhādhikaṃ ekaṃ, dve ca asaṅkhyeyyānī”ti kālavasena evaṃparimāṇo yathākkamaṃ aggasāvakapacecekabuddhānaṃ puññañṇābhinihāro, sāvakabodhipacecekabodhipāramitāsambharaṇaṃ, tasmā vuttaṃ “**dve aggasāvakā -pa- kappasatasahassañcā**”ti. Yadi bodhisambhārasambharaṇakālaparicchinnō tesāṃ tesāṃ ariyānaṃ abhiññāṇāvibhavo, evaṃ sante Buddhānampissa saporicchedaṭṭā āpannāti codanaṃ sandhāyāha “**Buddhānaṃ pana ettakanti paricchedo natthi, yāvatakaṃ ākaṅkhanti, tāvatakaṃ anussarantī**”ti “yāvatakaṃ neyyaṃ, tāvatakaṃ ñāṇaṃ”ti⁴ vacanato. Sabbaññutaññāṇassa viya hi Buddhānaṃ abhiññāṇānampi savisaye paricchedo nāma natthi, tasmā yaṃ yaṃ ñātum icchanti, te taṃ taṃ jānanti eva. Atha vā satipi kālaparicchede karuṇūpāyakosallapariggahādinā sātisayattā mahābodhisambhāraṇaṃ paññāpāramitāya pavatti-ānubhāvassa paricchedo nāma natthi, kuto tannimittakānaṃ abhiññāṇānanti vuttaṃ “**Buddhānaṃ -pa- natthī**”ti.

1. Khu 9. 271 piṭṭhe. 2. Dī 1. 14 piṭṭhe. 3. Theragāthā-Ṭṭha 2. 541 piṭṭhe vitthāro.
4. Khu 7. 278; Khu 8. 176; Khu 9. 376 piṭṭhesu.

Khandhapaṭipāṭiyāti yathāpaccayaṃ anupubbapavattamānānaṃ khandhānaṃ anupubbiyā. **Khandhappavattinti** vedanādikkhandhappavattim. Tesañhi anubhavanādi-ākāraggahaṇamassa sātisaṃ, taṃ saññābhava tattha tattha anussaraṇavasena gahetvā gacchantā ekavokārabhave alabhantā “na passantī”ti vuttā, jāle patitā viya sakuṇā, macchā viya cāti adhippāyo. **Kuṇṭhā viyāti** dandhā viya. **Paṅgulā viyāti** pīṭhasappino viya. **Diṭṭhim gaṇhantī**ti adhiccasamuppannikadiṭṭhim gaṇhanti. Yaṭṭhikoṭihetukaṃ gamaṇaṃ **yaṭṭhikoṭigamaṇaṃ** khandhapaṭipāṭiyā amuñcanato.

Evaṃ santepīti kāmaṃ buddhasāvakaṃpi asaññābhava khandhappavattim na passanti, evaṃ santepi **te** Buddhasāvakaṃ asaññābhavaṃ laṅghitvā parato anussaranti. “**Vaṭṭe**”ti-ādi tathā tesāṃ anussaraṇākāradassanaṃ. **Buddhehi dinnanaye ṭhatvāti** “yattha pañcakappasatāni rūpappavattiyeva, na arūpappavatti, so asaññābhavo”ti evaṃ Sammāsambuddhehi desitāyaṃ dhammanettiyaṃ ṭhatvā. Evañhi antarā cutipaṭisandhiyo apassantā **parato anussaranti seyyathāpi āyasmā sobhitoti**¹. So kira pubbenivāse ciṇṇavasī hutvā anupaṭipāṭiyā attano nibbattaṭṭhānaṃ anussaranto yāva asaññābhava attano acittakapaṭisandhi, tāva addasa, tato paraṃ pañcakappasataparimāṇe kāle cutipaṭisandhiyo adisvā avasāne cutim disvā “kiṃ nāmetan”ti āvajjayamāno nayavasena “asaññābhavo bhavissatī”ti niṭṭhaṃ agamāsi. Atha naṃ Bhagavā taṃ kāraṇaṃ aṭṭhuppattim katvā pubbenivāsaṃ anussarantānaṃ aggaṭṭhāne ṭhapesi¹. “**Cuti paṭisandhim oloketvā**”ti idaṃ cutipaṭisandhivasena tesāṃ ñāṇassa saṅkamanadassanaṃ, tena sabbaso bhava anāmasitvā gantuṃ na sakkontīti dasseti.

Taṃ tadeva passantīti yathā nāma saradasamaye ṭhitamajjhanhikavelāya caturatanike gehe cakkhumato purisassa rūpagataṃ supākaṭameva hotīti lokasiddhametaṃ, siyā pana tassa sukhumataratirohitādibhedassa rūpagatassa agocaratā. Na tveva Buddhānaṃ ñātuṃ icchitassa ñeyyassa agocaratā, atha kho taṃ ñāṇālokena obhāsitaṃ hatthatale āmalakaṃ viya supākaṭaṃ suvibhūtaṃ

1. Theragāthā-Ṭṭha 1. 367 piṭṭhe vitthāro.

hoti tathā ñeyyāvaraṇassa suppahīnattā. Tenāha “Buddhā pana attanā vā parehi vā diṭṭhakatasutaṃ, sūriyamaṇḍalobhāsasadisaṃ”ti ca ādi.

Tathā sāvakā ca paccekabuddhā cāti ettha **tathā**-saddena “attanā diṭṭhakatasutameva anussaranti”ti idaṃ upasaṃharati, tena sappadesameva nesam anussaraṇam, na nippadesanti nidasseti.

Khajjopanaka-obhāsasadisaṃ ñāṇassa ativiya appānubhāvātāya. **Sāvakānanti** ettha pakatisāvakānaṃ pākatikapadīpobhāsasadisaṃ. Mahāsāvakānaṃ¹ mahāpadīpo bhāsasadisaṃ. Tenāha **visuddhimagge**² “ukkāpabhāsadisaṃ”ti. **Osadhitarakobhāsasadisaṃ** ussannā pabhā etāya dhīyati, osadhīnaṃ vā anubalappadāyakattā “osadhī”ti evaṃ laddhanāmāya tārakāya pabhāsadisaṃ. **Saradasūriyamaṇḍalobhāsasadisaṃ** sabbaso andhakāraavidhamaṇato. Apaṭubhāvahetuko visayaggahaṇe cañcalabhāvo **khalitaṃ**, kuṇṭhibhāvahetuko visayassa anabhisamayo **paṭighāto**. **Āvajjanapaṭibaddhamevāti** āvajjanamattādhīnaṃ, āvajjitamatte eva yathicchitassa paṭivijjhanakanti attho. Sesapadadvayepi eseva nayo.

Asaṅga-appaṭihataṃ pavattamānaṃ Bhagavato ñāṇaṃ lahutarepi visaye, garutare ca ekasadisamevāti dassetuṃ “**dubbalapattapuṭe**”ti-ādinā upamādvayaṃ vuttaṃ. Dhammakāyattā Bhagavato guṇaṃ ārabha pavattā “**Bhagavantaṃyeva ārabha uppannā**”ti vuttaṃ. **Taṃ sabbampīti** taṃ yathāvuttaṃ sabbampi pubbenivāsapaṭisaṃyuttakathaṃ. Titthiyānaṃ, sāvakānaṃca pubbenivāsānussaraṇaṃ Bhagavato pubbenivāsānussaraṇassa hīnudāharaṇadassanavasenettha kathitaṃ. Evañhi Bhagavato mahantabhāvo visesato pakāsito hotīti. **Saṅkhepatoti** samāsato. Yattakopi pubbenivāsānussatiñāṇassa pavattibhedo attano ñāṇassa visayabhūto, taṃ sabbaṃ tadā yathākathitaṃ te bhikkhū saṅkhipitvā “**itipī**”ti āhaṃsu. Tassa ca anekākāratāya āmedītavacanaṃ, pi-saddo sampiṇḍanatto, “iti kho bhikkhave sappaṭibhayo bālo”ti-ādīsu³ viya ākāratto **iti**-saddoti dassento “**evampī**”ti tadatthamāha.

1. Theragāthā-Ṭṭha 2. 541 piṭṭhe vitthāro.

2. Visuddhi 2. 41 piṭṭhe.

3. Ma 3. 107; Am 1. 100 piṭṭhesu.

2-3. **Vuttamevā**ti ettha ca idha pāṭhe yaṃ vattabbaṃ tena pāṭhena sādharmaṇaṃ, taṃ vuttamevāti adhippetāṃ, na asādharmaṇaṃ apubbapadaavaṇṇanāya adhikatattāti taṃ dassento “**ayameva hi viseso**”ti-ādimāha. “**Assosī**”ti idaṃ savanakiccanipphattiyā vuttaṃ saddaggahaṇamukhena tadatthāvabodhassa siddhattā. Tattha pana pāḷiyāṃ “imaṃ saṃkhiyadhammaṃ viditvā” icceva¹ vuttaṃ. Ime bhikkhū mama guṇe thomenti, kathaṃ? Mama pubbenivāsañāṇaṃ ārabbhāti yojanā. **Nipphattinti** kiccanipphattiṃ, tena kātabbakiccasiddhanti attho. **Noti** pucchāvācī nu-iti iminā samānattho nipātoti vuttaṃ “**iccheyyātha nū**”ti. **Nanti** bhagavantaṃ. “Yaṃ Bhagavā”ti ettha yaṃ-saddena kiriyāparāmasanabhūtena “dhammiṃ kathaṃ katheyvā”ti evaṃ vuttaṃ dhammikathākaraṇaṃ parāmaṭṭhaṃ “etassā”ti padassa atthoti āha “**etassa dhammikathākaraṇassā**”ti, ādaravasena pana taṃ dvikkhattuṃ vuttaṃ.

4. **Suṇāthāti** ettha itī-saddo ādi-attho, pakārattho vā, etena “manasi karoṭhā”ti padaṃ saṅgaṇhāti. **Sotāvadhānaṃ** sotassa odhanaṃ, sussūsāti attho. Chinnaṃ upacchinnāṃ vaṭumaṃ saṃsāravaṭṭaṃ etesanti **chinnavaṭumakā**, sammāsambuddhā, aññe ca khīṇāsavā, idha pana sammāsambuddhā adhippetā. Tesañhi sabbaso anussaraṇaṃ itaresaṃ avisayo. Tenāha “**aññesaṃ asādharmaṇa**”ti. **Paccattavacane dissati yaṃ-saddo** kammaṭṭhadīpanato. **Upayogavacane** dissati yaṃ-saddo pucchanakiriyāya kammaṭṭhadīpanato. **Tanti** ca upayogavacanameva pucchati-saddassa dvikkammakabhāvato. **Yanti** yena kāraṇenāti ayamettha atthoti āha “**karaṇavacane dissati**”ti. **Bhummeti daṭṭhabboti** yathā yaṃ-saddo na kevalaṃ paccatta-upayogesū eva, atha kho karaṇepi dissati, evaṃ idha bhummeti daṭṭhabbo. **Dasasahassilokadhātunti** jātikkhettabhūtaṃ dasasahassacakkavāḷaṃ. **Unnādentō uppajji** anekacchariyapātubhāvapaṭimaṇḍitattā buddhuppādassa.

Kālassa bhaddatā nāma tattha sattānaṃ guṇavibhūtiyā, Buddhuppādaparamā ca guṇavibhūtiṃ tabbahulatā yassa kappassa bhaddatāti āha “**pañcabuddhuppādapaṭimaṇḍitattā sundarakappe**”ti, tathā sārabhūtaguṇavasena

1. Dī 1. 2 piṭṭhe.

“**sāraḥkappe**”ti. “Imaṃ kappam thomento evamāhā”ti vatvā imassa kappassa tathā thometabbatā anaññasādharaṇāti dassetuṃ “**yato paṭṭhāyā**”ti-ādi vuttam. Tattha **yato paṭṭhāyā**ti yato pabhuti. **Abhinīhāro katoti** manussattādi-aṭṭhaṅgasamannāgato abhinīhāro pavattito. Saṃsārassa anādibhāvato imassa Bhagavato abhinīhārato puretaram uppannā sammāsambuddhā anantā aparimeyyāti tehi uppannakappe nivattento “**etasmim antare**”ti āha. Kāmaṃ Dīpaṅkarabuddhuppāde ayaṃ Bhagavā abhinīhāramakāsi, tassa pana Bhagavato nibbatti imassa abhinīhārato purimatarāti vuttam “**amhākaṃ -pa- nibbattimsū**”ti.

Asaṅkhyeyyakappapariyosāneti mahākappānaṃ asaṅkhyeyyapariyosāne. Esa nayo ito paresupi. “**Iti tiṃsakappasahassānaṃ uparī**”ti etena Padumuttarassa Bhagavato, Sumedhassa ca Bhagavato antare ekūnasattatikappasahassāni Buddhasuññāni ahesunti dasseti. “**Iti aṭṭhārasannaṃ kappasahassānaṃ uparī**”ti iminā Sujātassa Bhagavato, Atthadassissa ca Bhagavato antare ekenūnāni dvādasakappasahassāni Buddhasuññāni ahesunti dasseti. “**Iti catunavute kappe**”ti iminā Dhammadassissa Bhagavato, Siddhatthassa ca Bhagavato antare chādhikanavasatuttarāni sattarasakappasahassāni Buddhasuññāni ahesunti dasseti. “**Ekatimse kappe**”ti iminā Vipassissa Bhagavato, Sikhissa ca Bhagavato antare saṭṭhi kappāni Buddhasuññāni ahesunti dasseti. Te sabbepi Padumuttarassa Bhagavato oraṃ Sumedhādīhi uppannakappehi saddhim samodhāniyamānā satasahassā kappā honti, yattha mahāsāvakaḍḍayo¹ vivaṭṭūpanissayāni kusalāni sambharimsu. Buddhasuññepi loke Paccakabuddhā uppajjitvā tesam purisavisesānaṃ puññābhisandābhībuddhiyā paccayā honti. “**Evamayan**”ti-ādi vuttamevattham nigamanavasena vadati.

“**Kim panetan**”ti-ādi pubbanimittavibhāvanatthāya āradham. Tattha **etanti** Buddhānaṃ uppajjanaṃ. **Kappasaṅṭhānakālasinti** vivaṭṭakappassa saṅṭhahanakāle. **Ekamasāṅkhyeyyanti** saṃvaṭṭaṭṭhāyim sandhāyāha. **Ekaṅgaṇaṃ hutvā thiteti** pabbatarukkhaḅacchādīnaṃ, meghādīnaṅca abhāvena vivaṭam aṅgaṇaṃ hutvā thite.

1. Theragāthā-Ṭṭha 2. 541 piṭṭhe vitthāro.

Lokasannivāseti bhājanalokena sannivisitabbaṭṭhāne. Vīsati yaṭṭhiyo **usabharṇ**. “Usabhamattā, dve usabhamattā”ti-ādinā paccekāṃ mattāsaddo yojetabbo. **Yojanasahassamattā hutvāti** patamānāva udakadhārā yojanasahassamattāṃ ākāsaṭṭhānaṃ pharivā pavattiyā yojanasahassamattā hutvā. **Yāva avinaṭṭhabrahmalokāti** yāva ābhassarabrahmalokā, yāva subhakiṇhabrahmalokā, yāva vehapphalabrahmalokāti attho.

Vātavasenāti saṭṭhisahassādhikanavayojanasatasahassubbedhassa sandhāarakavātamaṇḍalassa vasena. **Mahābodhipallaṅkoti** Mahābodhipallaṅkappadesamāha. Tassa pacchā vināso, paṭhamāṃ saṅṭhahanaṅca dhammatāvasena veditabbarṇ. **Tatthāti** tasmim padese. **Pubbanimittāṃ hutvāti** Buddhuppādassa pubbanimittāṃ hutvā. Pubbanimittasannissayo hi gaccho nissitavohārena tathā vutto. Tenāha “**tassā**”ti-ādi. **Kaṇṇikābaddhāni hutvāti** ābaddhakaṇṇikā viya hutvā. **Suddhāvāsabrahmāno attamanā -pa-** gacchantīti yojanā. Vehapphalepi subhakiṇhe saṅgahetvā “**nava brahmalokā**”ti vuttaṃ. Tathā hi te catutthim yeva viññāṇaṭṭhitim bhajanti. **Nikkhamantesūti** mahābhinikkhamanaṃ abhinikkhamantesu. Abhijāti panettha jātibhāvasāmaññena gabbhokkantiyāva saṅgahitā. Nimīyati anumīyati phalaṃ etenāti **nimittāṃ**, kāraṇaṃ. **Ñāpakampi** hi kāraṇaṃ disvā tassa abyabhicārībhāvena phalaṃ siddhameva katvā gaṇhi, yathā taṃ asito isi abhijātiyaṃ Mahāpurisassa lakkhaṇāni disvā tesāṃ abyabhicārībhāvena Buddhaguṇe siddhe eva katvā gaṇhi, evaṃ pana gayhamānaṃ tannimittakaṃ phalaṃ tadānubhāvena siddhaṃ viya vohariyati tabbhāve bhāvato. Tenāha “**tesāṃ nimittānaṃ ānubhāvenā**”ti-ādi. Tathā cāha Bhagavā “so tena lakkhaṇena samannāgato -pa-. Rājā samāno kiṃ labhati, buddho samāno kiṃ labhati”ti¹ ca evamādi. **Imamatthanti** pañca buddhā imasmim kappe uppajjissantīti imamatthaṃ yāthāvato **jānimsu**.

1. Dī 3. 119, 121 piṭṭhādīsu.

Jātiparicchedādivaṇṇanā

5-7. **Kappaparicchedavasenā**ti “ito so ekanavute kappe”ti-ādinā yattha yattha kappe te te buddhā uppannā, tassa tassa kappassa paricchindanavasena pariḷānāvasena. “Idaṃ taṃ”ti hi niyametvā paricchijja jānanāṃ paricchindanaṃ **paricchedo**. **Parittanti** ittaraṃ. **Lahukanti** sallahukaṃ, āyuno adhippetattā rassanti vuttaṃ hoti. Tenāha “**ubhayametaṃ appakasseva vevacanan**”ti.

“**Appaṃ vā bhiiyo**”ti avisesajotanaṃ “vīsaṃ vā tiṃsaṃ vā”ti-ādinā aniyamitavaseneva yathālābhato vavatthapetvā ayañca nayo apacuroti dassento “**evaṃ dīghāyuko pana atidullabho**”ti āha. Idaṃ taṃ visesavavatthāpanaṃ puggalesu pakkhipitvā dassento “**tattha visākhā**”ti-ādimāha.

Yadi evaṃ kasmā amhākaṃ Bhagavā tattakampi kālaṃ na jīvi, nanu Mahābodhisattā carimabhava ativiya uḷāratamena puññābhisankhārena paṭisandhiṃ gaṇhantīti? Saccametanti. Tattha kāraṇaṃ dassetuṃ “**vipassī-ādayo panā**”ti-ādi vuttaṃ. Tattha abhijātiyā mettāṭhānatāya abhisankhāraṇaṃ mettāpubbabhāgatā¹. Tadanugūṇaṃhi tesāṃ visesato paṭisandhivīññāṇaṃ. Tassa visesato bahulaṃ khemavitakkūpanissayatāya somanassasahagatatā, anaññasādhāraṇaparopadesarahitañāṇavisesūpanissayatāya ṇāṇasampayuttatā, asaṅkhārikatā ca veditabbā, **asaṅkhyeyyaṃ āyu** ādhāravisesato, nissayavisesato, paṭipakkhadūrībhāvato, pavatti-ākāravisesato ca aparimeyyānubhāvātāya kāraṇassa. Tattha cirataraṃ kālaṃ santānassa pāramitāparibhāvitatā **ādhāravisesatā**. Alobhajjhāsayaḍi-āsayasampadā **nissayavisesatā**. Lābhamacchariyādipāpadhamavikkhambhanaṃ **paṭipakkhadūrībhāvo**. Sabbasattānaṃ sakalavaṭṭadukkhanissaraṇatthāya āyūhanā **pavatti-ākāraviseso** veditabbo.

Ayañca nayo sabbesaṃ mahābodhisattānaṃ carimabhavābhiniḃbattakakammāyūhane sādāraṇoti tassa phalenāpi ekasadiseneva

1. Mettāpubbabhāgatāya (Ka)

bhavitabbanti āha “**iti sabbe Buddhā asaṅkhyeyyāyukā**”ti,
asaṅkhyeyyakālāvattānāyukāti attho.

Asaṅkhyeyyāyukasamvattanasamattam paṛicitaṃ kammaṃ hoti, Buddhā
pana tadā manussānaṃ paramāyuppaṃāṇānurūpameva kālaṃ ṭhatvā
parinibbāyanti tato paraṃ ṭhatvā sādhetabbapayojanābhāvato,
dhammatāvesāti vā veditabbā. **Aṭṭhakathāyaṃ** pana tato paraṃ pana
aṭṭhānassa “utubhojanavipattiyā”ti¹ kāraṇaṃ vuttaṃ, “taṃ lokasādhāraṇaṃ
loke jātasamvuddhānaṃ Tathāgatānaṃ na hotī”ti na sakkā vuttuṃ. Tathā hi
nesaṃ rogakilamathādayo hontiyeva. **Utubhojanavaseṇāti** asaṃpannassa,
saṃpannassa ca utuno, bhojanassa ca vasena yathākkamaṃ **āyu hāyatipi
vaḍḍhatipi**. **Āyūti** ca paramāyu adhippetam. Tatha yaṃ vattabbaṃ, taṃ
Brahmajālādiṭṭikāyaṃ² vuttameva.

Idāni tamattam samudāgamato paṭṭhāya dassetuṃ “**tattha yadā**”ti-ādi
vuttaṃ. Dhamme niyuttā **dhammikā**, na dhammikā **adhammikā**, himsādi-
adhammapasutā. **Adhammikameva hoti** issarajanānaṃ anuvattanena,
paresaṃ diṭṭhānugati-āpajjanena ca. **Uṇhavalāhakā devatāti** uṇha-utuno
paccayabhūtameghamālāsamuṭṭhāpakā devaputtā. Tesam kira tathā
cittuppādasamakārameva yathicchitaṭṭhānaṃ uṇhaṃ pharamānā
valāhakamālā nātibahalā ito cito nabhaṃ chādentī vitanoti. Esa nayo
sītavalāhakavassavalāhakāsu. **Abbhavalāhakā** pana devatā sītuṇhavasasehi
vinā kevalaṃ abbhapaṭalasseva samuṭṭhāpakā veditabbā. **Tāsanti** ettha
“mittā”ti padaṃ ānetvā yojanā. Kāmaṃ heṭṭhā vuttā sattavidhāpi devatā
cātumahārājikāva, tā pana tena tena visesena vatvā idāni tadaññe
paṭhamabhūmike kāmāvacaradeve sāmāññato gaṇhanto “**Cātumahārājikā**”ti
āha. **Tāsaṃ adhammikātāyāti** rājūnaṃ adhammikabhāvamūlakena uparājādi-
adhammikabhāvaparamparābhatena tāsaṃ devatānaṃ adhammikabhāvena.
Visamaṃ candimasūriyā pariharantīti bahvābādhatādi-
aniṭṭhaphalūpanissayabhūtaṃ yathāvutta-adhammikātāsaññitassa
sādhāraṇassa pāpakammaṃ balena visamaṃ vāyantena vāyunā pīḷiyamānā
candimasūriyā sineruṃ parikkhipantā visamaṃ parivattanti yathāmaggena

1. Dī-Ṭṭha 2. 7 piṭṭhe.

2. Dī-Ṭṭi 1. 156 piṭṭhe.

nappavattantīti. Assidaṃ yathā candimasūriyānaṃ visamaparivattanaṃ visamavātasāṅkhobhahetukaṃ, evaṃ utuvassādivisamappavattīti dassetuṃ “vāto yathāmaggena na vāyati”ti-ādi vuttaṃ. **Devatānanti** sītavalāhakadevatādivivatānaṃ. Tenāha “sītuṇhabhedo utū”ti-ādi. **Tasmim̄ asampajjanteti** tasmim̄ yathāvutte vassabījabhūte utumhi yathākālaṃ sampattim̄ anupagacchante.

“Na sammā devo vassati”ti saṅkhepato vuttamatthaṃ vivaranto “**kadācī**”ti-ādimāha. Tattha **kadāci vassatīti** kadāci avassanakāle¹ vassati. **Kadāci na vassatīti** kadāci vassitabbakāle na vassati. **Katthaci vassati, katthaci na vassatīti** padesaṃmāha. “**Vassantopī**”ti-ādi “kadāci vassati, kadāci na vassati”ti padadvayasseva atthavivaraṇaṃ. **Vigatagandhavaṇṇarasādīti ādi**-saddena nirojataṃ saṅgaṇhāti. **Ekasmim̄ padese**ti bhattapacanabhājanassa ekapasse. **Uttaṇḍulanti** pākato ukkantataṇḍulam. **Tihākārehīti** sabbaso aparīṇataṃ, ekadesena pariṇataṃ, dupariṇatañcāti evaṃ tihākārehi **paccati** pakkāsayaṃ upagacchati. **Appāyukāti** ettha “dubbaṇṇā cā”tipi vattabbaṃ. **Evaṃ utubhojanavasena āyu hāyati** hetumhi aparikkhīṇepi paccayassa paridubbalattā.

“**Yadā panā**”ti-ādisukkapakkhassa attho vuttavipariyāyena veditabbo.

Vaḍḍhitvā vaḍḍhitvā parihīnanti veditabbaṃ. Kasmā? Na hi ekasmim̄ antarakappe aneke buddhā uppajjanti, eko eva pana uppajjatīti. Idāni tamatthaṃ vitthārato dassetuṃ “**kathan**”ti-ādi vuttaṃ. **Cattāri thatvāti** accantasamyoge upayogavacanaṃ. **Yamyam̄ āyuparimāṇesūti** yattakayattakaparamāyupparamāṇesu. **Tesampīti** Buddhānaṃ. **Tam̄ tadeva āyuparimāṇam̄ hoti**, tattha kāraṇaṃ heṭṭhā vuttameva.

Jātiparicchedādivaṇṇanā niṭṭhitā.

1. Avassitabbakāle (?)

Bodhiparicchedavaṇṇanā

8. **Mūleti** mūlavayavassa samīpe. Taṃ pana tassā heṭṭhāpadeso hotīti āha “**pāṭalirukkha**ssa heṭṭhā”ti. **Taṃ divasanti** attanā jātadivase, **taṃ divasanti** vā taṃ Bhagavato abhisambodhidivase. So kira bodhirukkho sālakalyāṇī viya pathaviyā abbhantare eva puretaraṃ vaḍḍhento abhisambodhidivase pathaviṃ ubbhijjivā uṭṭhito ratanasataṃ ucco, tāvadeva ca vitthato hutvā nabhaṃ pūrento aṭṭhāsi. Ayampi kiretassa rukkhabhāvena viya aññehi vemattatā. Ghanasaṃhataṇāvaṇṇatāya **kaṇṇikabaddhehi viya pupphehi**. **Ekasañchannāti** pupphānaṃ nirantarātāya ekajjhaṃ sañchannā. **Tattha tattha nibaddha -pa- samujjalanti** taṃ taṃ olambitakusumadāmehi ceva taṃ taṃ khittamālāpiṇḍīhi ca ito cito vippakiṇṇavividhavaṇṇamuttapupphehi ca sammadeva ujjalaṃ. **Aññamaññaṃ sirīsampattāni**ti aññamaññaṃ siriyaṃ sobhāya sampannāni. **Buddhaguṇavibhavasirinti** sammāsambuddhehi abhigantabbaguṇavibhūtisobhaṃ. **Paṭivijjhamānoti** adhigacchanto.

Setambarukkhoti setavaṇṇaphalo ambarukkho. **Tadevāti** pāṭaliyā vuttappamāṇameva. **Ekato**ti ekapasse. **Surasāni**ti sumadhurarasāni.

Ekova pallaṅkoti ekova pallaṅkappadeso. **So so rukkho “bodhī”ti vuccati** bujjhanti etthāti katvā.

Sāvakayugapariṇchedavaṇṇanā

9. **Sāvakapariṇchedeti** sāvakayugapariṇchede. “Khaṇḍatissan”ti dvepi ekajjhaṃ gahetvā ekattavasena vuttanti āha “**khaṇḍo ca tisso cā**”ti. Buddhānaṃ sahodaro, vemātikopi vā jeṭṭhabhātā na hotīti “**ekapitiko kaniṭṭhabhātā**”ti vuttaṃ. **Avasesehi** puttehi. “Paññāpāramiyā matthakaṃ patto”ti vatvā tassa matthakappattaṃ guṇavisesaṃ dassetuṃ “**sikhinā bhagavatā**”ti-ādi vuttaṃ.

Uttaroti uttamo. Puna **uttaroti** therāṃ nāmena vadati. **Pāranti** parakoṭimatthakaṃ. **Paññāvisayeti** paññādhikāre. Pavattiṭṭhānavasena hi pavattiṃ vadati.

Sāvakasannipātaparicchedavaṇṇanā

10. Uposathanti āṇāpātimokkhaṃ. **Dutiyatatiyesūti** dutiye, tatiye ca sāvakasannipāte. **Eseva nayoti** caturāṅgikataṃ atidisati. **Abhinīhārato paṭṭhāya vatthuṃ kathetvā pabbajjādīpetabbā**, sā pana yasmā **Manorathapūraṇiyaṃ** Aṅguttaraṭṭhakathāyaṃ¹ vitthārato āgatā, tasmā tattha vuttanayeneva veditabbāti.

Upaṭṭhākaparicchedavaṇṇanā

11. Nibaddhupaṭṭhākabhāvanti ārambhato paṭṭhāya yāva parinibbānā niyata-upaṭṭhākabhāvaṃ. Aniyatupaṭṭhākā pana Bhagavato paṭhamabodhiyaṃ bahū ahesuṃ. Tenāha **“Bhagavato hī”**ti-ādi. Idāni Ānandatthero yena kāraṇena Satthu nibaddhupaṭṭhākabhāvaṃ upagato, yathā ca upagato, taṃ dassetuṃ **“tattha ekadā”**ti-ādi vuttaṃ. **“Ahaṃ iminā maggena gacchāmi”**ti āha anayabyasanāpādakena kammunā codiyamāno. **Atha naṃ Bhagavā** tamatthaṃ anārocetvāva khemaṃ maggaṃ sandhāya **“ehi bhikkhu iminā gacchāmi”**ti āha. Kasmā panassa Bhagavā tamatthaṃ nārocesīti? Ārocitepi asaddahanto nādiyissati. Tañhi tassa hoti dīgharattaṃ ahitāya dukkhāyāti. **Teti te gamaṇaṃ, “tan”**ti vā pāṭho.

Anvāsattoti anubaddho, upadduto vā. Dhammagāraṇanissito saṃvego **dhammasaṃvego** “amhesu nāma tiṭṭhantesu Bhagavatopi īdisaṃ jātan”ti. “Ahaṃ upaṭṭhahissāmi”ti vadanto dhammasenāpati atthato evaṃ vadanto nāma hotīti **“ahaṃ bhante tumhe”**ti-ādi vuttaṃ. **Asuññāyeva me sā disāti** asuññāyeva mama sā disā. Tattha kāraṇamāha **“tava ovādo buddhānaṃ ovādasadiso”**ti.

Vasituṃ na dassatīti ekagandhakuṭiyaṃ vāsaṃ na labhissatīti adhippāyo. **Parammukhā desitassāpi dhammassāti** suttantadesanaṃ sandhāya vuttaṃ. Abhidhammadesanā panassa parammukhāva pavattā pageva yācanāya. Tassā vācanāmaggopi sārīputtattherappabhavo. Kasmā? So niddesapaṭṭisambhidā

1. Am-Ṭṭha 1. 204 piṭṭhe.

natthi, yena dīpaṅkarato paṭṭhāya, tato vā pana purato Buddhē ārabha pubbenivāsaṃ katheyya. Tasmā na ettha Buddhavaṃsadesanāyaṃ¹ viya pubbenivāso vitthārito. Yasmā ca Buddhānaṃ desanā nāma desanāya bhājanabhūtānaṃ puggalānaṃ ñāṇabalānurūpā, na attano ñāṇabalānurūpā, tasmā tattha aggasāvakanānaṃ, mahāsāvakanānaṃ², tādisānaṃca devabrahmānaṃ vasena desanā vitthāritā. Idha pana pakatisāvakanānaṃ, tādisānaṃca devatānaṃ vasena pubbenivāsaṃ kathento sattannaṃ eva Buddhānaṃ pubbenivāsaṃ kathesi. Tathā hi ne Bhagavā palobhanavasena samuttejetuṃ sappapañcatāya kathāya desanaṃ matthakaṃ apāpetvāva gandhakuṭiṃ pāvīsi. Tathā ca imissā eva desanāya anusārato āṭānāṭiyaparitta³ desanādayo pavattā.

Apicettha Bhagavā attano suddhāvāsacārikāvibhāviniyā uparidesanāya saṅgahatthaṃ vipassī-ādīnaṃ eva sattannaṃ sammāsambuddhānaṃ pubbenivāsaṃ kathesi. Tesameva hi sāvakā tadā ceva etarahi ca suddhāvāsabhūmiyaṃ ṭhitā, na aññesaṃ parinibbutattā. “Siddhatthatissaphussānaṃ kira Buddhānaṃ sāvakā Suddhāvāsesu upapannā upapattisamanantameva imasmiṃ sāsane upakādayo viya arahattaṃ adhigantvā nacirasseva parinibbāyimsu, na tattha tattha yāvatāyukaṃ aṭṭhaṃsū”ti vadanti. Tathā yesaṃ sammāsambuddhānaṃ paṭivedhasānaṃ ekaṃsato nicchayena ajjāpi dharati, na antarahitaṃ, te eva kittento vipassī-ādīnaṃyeva bhagavantānaṃ pubbenivāsaṃ imasmiṃ sutte kathesi veneyyajjhāsavāsena. Apubbācarimaniyamo pana aparāparaṃ saṃsaraṇakasattavāsavasena ekissā lokadhātuyā icchitoti na tenetaṃ virujjhatīti daṭṭhabbaṃ. **Nirantaram matthakaṃ pāpetvā**ti abhijātito paṭṭhāya yāva pātimokkhuddeso yāvatā buddhakiccasiddhi, tāva matthakaṃ sikkhaṃ pāpetvā. Na tāva kathitoti yojanā.

Tantinti dhammatantiṃ, pariyattinti attho.

Puttapputtamātuyānavihāradhanavihāradāyakādīnaṃ sambahulānaṃ atthānaṃ vibhāvanavasena pavattavāro **sambahulavāro**.

1. Khu 4. 299 piṭṭhe. 2. Theragāthā-Ṭṭha 2. 541 piṭṭhe vitthāro. 3. Dī 3. 158 piṭṭhe.

Sambahulavāraṇṇanā

Kāmañcāyaṃ pāliyaṃ anāgato, aṭṭhakathāsu āgatattā pana ānetvā dīpetabboti taṃ dīpento “**sabbabodhisattānañhī**”ti-ādimāha. **Kulavaṃso** kulānukkamo. **Paveṇī**ti paramparā. “**Kasmā**”ti puttuppattiyā kāraṇaṃ pucchitvā taṃ vissajjento “**Sabbaññubodhisattānañhī**”ti-ādimāha, tena tesam jātanagarādi paññāyamānaṃ ekaṃsato manussabhāvasañjānanattham icchitabbaṃ, aññathā yathādhippetabuddhakiccasiddhi eva na siyāti dasseti, yato mahāsattānaṃ carimabhava manussaloke eva pātubhāvo, na aññattha.

Sambahulaparichedavaṇṇanā

Candādīnaṃ sobhāvisesaṃ raheti cajāpetīti **Rāhu**, rāhuggaho, idha pana Rāhu viyāti **Rāhu**. **Bandhananti** ca anattuppattiṭṭhānataṃ sandhāya vuttaṃ. Tathā Mahāsattena vuttavacanameva gahetvā kumārassa “**Rāhulo**”ti nāmamakāmsu. **Athāti** nipātamattaṃ. **Rocinī**ti rocanasīlā, ujjalarūpāti attho. **Rucaggaṭī**ti rucāṃ pabhātaṃ āgatibhūtā, ga-kārāgamaṃ katvā vuttaṃ. Itthiratanabhāvato manussaloke sabbāsaṃ itthīnaṃ bimbapaṭicchannabhūtāti **bimbā**.

Jhānā vuṭṭhāyāti pādakajjhānato vuṭṭhāya.

Aṭṭhaṅgulubbedhāti aṭṭhaṅgulappamāṇabahalabhāvā. **Cūlāmsena** chādetvāti tiriyabhāgena ṭhapanavasena sabbāṃ vihāraṭṭhānaṃ chādetvā. **Suvaṇṇayaṭṭhiphālehī**ti phālappamāṇāhi suvaṇṇayaṭṭhihi. **Suvaṇṇahatthipādānī**ti pakatihatthipādaparimāṇāni suvaṇṇakhaṇḍāni. **Vuttanayenevāti** cūlāmseneva. **Suvaṇṇakaṭṭhī**ti suvaṇṇakhaṇḍehi. **Salakkhaṇānanti** lakkhaṇasampannānaṃ sahasārānaṃ.

Bodhipallaṅkoti abhisambujjhanakāle nisajjattānaṃ. **Avijahitoti** Buddhānaṃ tathānisajjāya anaññatthabhāvībhāvato apariccatto. Tenāha “**ekasmimyeva ṭhāne hotī**”ti. **Paṭhamapadagaṇṭhikāti** pacchime sopānaphalake ṭhatvā ṭhapiyamānassa dakkhiṇapādassa patiṭṭhānaṭṭhānaṃ. Taṃ pana yasmā daḷhaṃ thiraṃ kenaci abhejjaṃ hoti, tasmā “**padagaṇṭhī**”ti vuttaṃ.

Yasmiṃ bhūmibhāge idāni jetavanamahāvihāro, tattha yasmiṃ thāne purimānaṃ sabbabuddhānaṃ mañcā paññattā, tasmimyeva padese amhākampi Bhagavato mañco paññattoti katvā “cattāri mañcapādaṭṭhānāni avijahitāneva hontī”ti vuttaṃ. Mañcānaṃ pana mahantakhuddakabhāvena mañcapaññāpanapadesassa mahantāmahantatā appamāṇaṃ, Buddhānubhāvena pana so padeso sabbadā ekappamāṇoyeva hotīti “cattāri mañcapādaṭṭhānāni avijahitāneva hontī”ti vuttanti daṭṭhabbaṃ. **Vihāropi na vijahitoyevāti** etthāpi eseva nayo. Purimaṃ vihāraṭṭhānaṃ na pariccajatīti hi attho.

Visiṭṭhā mattā vimattā, vimattāva **vemattaṃ**, visadisatīti attho. **Pamāṇaṃ** āroho. **Padhānaṃ** dukkarakiriyā. **Rasmīti** sarīrappabhā.

“Sattānaṃ pākatikahatthena chahattho majjhimapuriso, tato tiguṇaṃ Bhagavato sarīrappamāṇanti Bhagavā aṭṭhārasahattho”ti vadanti. Apare pana bhaṇanti “manussānaṃ pākatikahatthena catuhattho majjhimapuriso, tato tiguṇaṃ Bhagavato sarīrappamāṇanti Bhagavā dvādasahattho upādinnakarūpadhamavasena, samantato pana byāmamattaṃ byāmappabhā pharātīti upari chahatthaṃ abbhuggato, bahalatarappabhārūpena saddhiṃ aṭṭhārasahattho hotī”ti.

Addhaniyanti dīghakālaṃ.

Ajjhāsayaapaṭibaddhanti bodhisambhārasambharaṇakāle tathāpavattajjhāsayaḍhīnaṃ, tathāpavattapatthanānurūpaṃ vipulaṃ, vipulataṇṇa hotīti attho. Svāyamattho cariyāpiṭakavaṇṇanāyaṃ¹ vuttanayeneva vedītabbo. Ettha ca yasmā sarīrappamāṇaṃ, padhānaṃ, sarīrappabhā ca buddhānaṃ visadisatīti idha pāḷiyaṃ anāgatā, tasmā tehi saddhiṃ vemattatāsāmaññena āyukulānīpi idha āharitvā dīpitāni. **Paṭividdhaguṇesūti** adhigatasabbaññuguṇesu. Nanu ca bodhisambhāresu, vencyyapuggalaparimāṇe ca vemattaṃ natthīti? Saccaṃ natthi, tadubhayaṃ pana buddhaguṇaggahaṇena gahitameva hotīti na uddhaṭṭaṃ. Yadaggena hi sabbabuddhānaṃ buddhaguṇesu vemattaṃ natthi, tadaggena nesaṃ sambodhisambhāresupi vemattaṃ natthīti. Kasmā? Hetu-anurūpatāya

1. Cariyāpiṭaka-Ṭṭha 282 piṭṭhe.

phalassa, ekanteneva veneyyapuggalaparimāṇe vemattabhāvo vibhāvito. Mahābodhisattānañhi hetu-avatthāyaṃ sambhatūpanissayindriyaparipākā veneyyapuggalā carimabhava arahattasampattiyā paripositāni kamalavanāni sūriyarasmisamphassena viya tathāgataguṇānubhāvasamphassena vibodhamupagacchantīti dīpesuṃ aṭṭhakathācariyā.

Nidhikumbhoti cattāro mahānidhayo sandhāya vadati. **Jāto cāti ca-**saddena katamahābhinihāro cāti ayampi attho saṅgahitoti daṭṭhabbo. **Vuttañhetam Buddhavaṃse**—

“Tārāgaṇā virocanti, nakkhattā gaganamaṇḍale.

Visākhā candimāyuttā, dhuvam Buddhō bhavissatī”ti.¹

“Eteneva ca sabbabuddhānam visākhānakkhatteneva mahābhinihāro hotī”ti ca vadanti.

13. **Ayam gatīti** ayam pavatti pavattanākāro, aññe pubbenivāsam anussarantā iminā ākārena anussarantīti attho, yasmā cutito paṭṭhāya yāva paṭisandhi, tāva anussaraṇam ārohanam atīta-atītatarā-atītataṃmādi jātisankhāte pubbenivāse ñāṇassa abhimukhabhāvena pavattīti katvā. Tasmā paṭisandhito paṭṭhāya yāva cuti, tāva anussaraṇam orohanam pubbenivāse paṭimukhabhāvena ñāṇassa pavattīti āha “**pacchāmukham ñāṇam pesetvā**”ti. **Cutigantabbanti yam pana idam** cutiyā ñāṇagatiyā gantabbam, tam gamanam bujjhananti attho. **Garukanti** bhāriyam dukkaram. Tenāha “**ākāse padam dassento viyā**”ti. **Aparampi kāraṇanti** chinnavatūmanussaraṇam pacchāmukham ñāṇapesanato aparam acchariyabbhutakāraṇam. **Yatrāti** paccattatthe, **nāmāti** acchariyatthe nipāto, **hi-saddo** anattthako. Tenāha “**yo nāma tathāgato**”ti. Evañca katvā “yatrā”ti nipātavasena visum yatra-saddaggaṇam samatthitam hoti. Papañcenti sattasantānam saṃsāre vitthārentīti **papañcam**. **Kammavaṭṭam vuccatīti** kilesavaṭṭassa papañcaggaṇena, vipākavaṭṭassa dukkhaggaṇena gahitattā. **Pariyādinnavatṭeti** sabbaso khepitavaṭṭe. “Maggasilena phalasilena”ti vatvā tayidam maggaphalasilam lokiyasilapubbakam,

1. Khu 4. 314 piṭṭhe.

buddhānañca lokiyasīlampi lokuttarasīlam viya anaññasādhāraṇamevāti dassetuṃ “**lokiyalokuttarasīlenā**”ti vuttaṃ. **Samādhipaññā**supi eveda nayo. **Samādhipakkhā**ti samādhi ca samādhipakkhā ca samādhipakkhā, ekadesasarūpekaseso daṭṭhabbo. Tenāha “**maggasamādhinā**”ti-ādi, “**vihāro gahito vā**”ti ca. **Samādhipakkhā** nāma vīriyasati-ādayo.

Sayanti attanā. **Nīvaraṇādīhī**ti nīvaraṇehi ceva tadekaṭṭhehi ca pāpadhammehi, vitakkavicārādīhi ca. “**Vimuttattā vimuttīti saṅkhyarṇ gacchantī**”ti iminā vimuttisaddassa kammāsādhanaṃ āha aṭṭhasamāpatti-ādivisayattā tassa. Vimuttattāti ca “vikkhambhanavasena vimuttattā”ti-ādinā yojetabbarṃ. **Tassa tassāti** aniccānupassanādikassa. **Paccanīkaṅgavasenāti** pahātabbapaṭipakkha-aṅgavasena. **Paṭippassaddhante uppannattāti** kilesānaṃ paṭippassambhanam **paṭippassaddham**, so eva **anto** pariyosānabhāvato, tasmim sādhetabbe nibbattattā, taṃtaṃmaggavajjhakilesānaṃ paṭippassambhanavasena pavattattāti attho. Kilesehi nissatātā, apagamo ca nibbānassa tehi vivittattā evāti āha “**dūre ṭhitattā**”ti.

16. **Dhammadhātūti** Dhammānaṃ sabhāvo, atthato cattāri ariyasaccāni. **Suppaṭividdhāti** suṭṭhu paṭividdhā savāsanānaṃ sabbesaṃ kilesānaṃ pajahanato. Evañhi sabbaññutā, dasabalaññādayo cāti sabbe Buddhaguṇā Bhagavatā adhigatā ahesuṃ. Arahattaṃ **dhammadhātūti** keci. Sabbaññutaññānti apare. **Dvīhi padehīti** dvīhi vākyehi. **Ābaddhanti** paṭibaddham taṃ mūlakattā uparidesanāya. **Devacārikakolāhalanti** attano devaloke cārikāyaṃ suddhāvāsadevānaṃ kutūhalappavattim **dassento suttantapariyosāne**¹ **vicāressati**, atthato vibhāvessatīti yojanā. **Ayam desanāti** “ito so bhikkhave”ti-ādinā² vitthārato pavattitadesanamāha. **Nidānakaṇḍeti**-ādito desitaṃ uddesadesanamāha. Sā hi imissā desanāya nidānaṭṭhāniyattā tathā vuttā.

Bodhisattadhammatāvaṇṇanā

17. “Vipassīti tassa nāman”ti vatvā tassa anvatthataṃ dassetuṃ “**tañca kho**”ti-ādi vuttaṃ. **Vividhe attheti** tirohitavidūradesagatādike

1. Dī-Ṭṭha 2. 70 piṭṭhe.

2. Dī 2. 2 piṭṭhe.

nīlādivasena nānāvidhe, tadaññe ca indriyagocarabhūte te ca yathūpagate, vohāravinicchaye cāti nānāvidhe atthe. **Passanakusalatāyāti** dassane nipuṇabhāvena. Yāthāvato ñeyyaṃ bujjaṭīti **bodhi**, so eva sattayogato **bodhisattoti** āha “**paṇḍitasatto bujghanakasatto**”ti. Sucintitacintitādinā pana paṇḍitabhāve vattabbameva natthi. Yadā ca panānena mahābhinihāro kato, tato paṭṭhāya mahābodhiyaṃ ekantaninnattā bodhimhi satto **bodhisattoti** āha “**bodhisāṅkhātesū**”ti-ādi. Maggañānapadaṭṭhānañhi sabbaññutaññānaṃ, sabbaññutaññānapadaṭṭhānañca maggañānaṃ “**bodhi**”ti vuccati. “Sato sampajāno”ti iminā catutthāya gabbhāvakkantiyā okkamīti dasseti. Catasso hi gabbhāvakkantiyo idhekacco gabbho mātukucchiyaṃ okkamane, ṭhāne, nikkhamaneti tīsu ṭhānesu asampajāno hoti, ekacco paṭhame ṭhāne sampajāno, na itaresu, ekacco paṭhame, dutiye ca ṭhāne sampajāno, na tatiye, ekacco tīsupi ṭhānesu sampajāno hoti. Tattha paṭhamā gabbhāvakkanti lokiyamahājanassa vasena vuttā, dutiyā asītimahāsāvakanāṃ¹ vasena, tatiyā dvinnāṃ aggasāvakanāṃ, paccakabuddhānañca vasena. Te kira kammajavātehi uddhampādā adhosirā anekasataporise papāte viya yonimukhe khittā tālacchiggaḷena hatthī viya sambādhena yonimukhena nikkhamantā mahantaṃ dukkhaṃ pāpuṇanti, tena nesaṃ “**mayāṃ nikkhamāmā**”ti sampajāññaṃ na hoti. Catutthā sabbaññubodhisattānaṃ vasena. Te hi mātukucchimhi paṭisandhiṃ gaṇhantāpi pajānanti, tattha vasantāpi pajānanti, nikkhamanakālepi pajānanti. Na hi te kammajavātā uddhampāde adhosire katvā khipitum sakkonti, dve hatthe pasāritvā akkhīni ummīletvā ṭhitakāva nikkhamantīti. **Ñāṇena paricchinditvāti** pubbabhāge pañcamahāvilocanañāṇehi ceva “**idāni cavāmi**”ti cutiparicchindanañāṇena ca aparabhāge “**idha mayā paṭisandhi gahitā**”ti paṭisandhiparicchindanañāṇena ca paricchijja jānitvā.

Pañcannaṃ mahāpariccāgānaṃ, ñātattacariyādīnañca satipi pāramiyā pariyāpanabhāve sambhāravisesabhāvadassanatthaṃ visum gahaṇaṃ. Tattha aṅgapariccāgo, nayanapariccāgo, attapariccāgo, rajjapariccāgo, puttadārapariccāgoti

1. Theragāthā-Ṭṭha 2. 541 piṭṭhe vitthāro.

ime **pañca mahāpariccāgā**. Tatthāpi kāmāṃ aṅgapariccāgādayopi dānapāramīyeva, tathāpi pariccāgavisesabhāvadassanattahañceva sudukkarabhāvadassanattahañca mahāpariccāgānaṃ visuṃ gahaṇaṃ. Tato eva ca aṅgapariccāgatopi visuṃ nayanapariccāgaggahaṇaṃ, pariccāgabhāvasāmaññepi¹ rajjapariccāgaputtadārapariccāgaggahaṇaṃ kataṃ. Nātīnaṃ atthacariyā **ñātattacariyā**, sā ca kho karuṇāyanavasena. Tathā sattalokassa diṭṭhadhammikasamparāyikaparamatthānaṃ vasena hitacariyā **lokatthacariyā**. Kammassakatāññāvasena, anavajjakammāyatanasippāyatanavijjāṭṭhānavasena, khandhāyatanādivasena, lakkhaṇattayādītiraṇavasena ca attano, paresaṅca tattha satipaṭṭhānena ñāṇacāro **buddhacariyā**, sā panatthato paññāpāramīyeva, ñāṇasambhāravisesatādassanattamaṃ pana visuṃ gahaṇaṃ.

Buddhacariyānanti bahuvacananiddesena

pubbayogapubbacariyādhammakkhānādīnaṃ saṅgaho daṭṭhabbo. Tattha gatapaccāgatavattasaṅkhātāya pubbhāgapaṭipadāya saddhim abhiññāsamāpattinipphādanāṃ **pubbayogo**. Dānādīsuyeva sātisayapaṭipatti **pubbacariyā**. “Yāva cariyāpiṭaka²saṅgahitā abhinīhāro **pubbayogo**, kāyādivivekavasena ekacariyā **pubbacariyā**”ti keci. Dānādīnañceva appicchatādīnañca saṃsāranibbānesu ādīnavānisamsānañca vibhāvanavasena, sattānaṃ bodhittaye paṭiṭṭhāpanaparipācanavasena ca pavattakathā **dhammakkhānaṃ**. **Koṭim patvā**ti parapariyantaṃ paramukkaṃsaṃ pāpuṇitvā. **Satta mahādānānī**ti aṭṭhavassikakāle “hadayamaṃsādīnīpi yācakānaṃ dadeyyan”ti ajjhāsayaṃ uppādetvā dinnadānaṃ, maṅgalahatthidānaṃ, gamanakāle dīnaṃ sattasattakamahādānaṃ, maggaṃ gacchantena dīnaṃ assadānaṃ, rathadānaṃ, puttadānaṃ, bhariyādānanti imāni satta mahādānāni³ **datvā**.

“Idāneva me maraṇaṃ hotū”ti adhimuccitvā kālakaraṇaṃ **adhimuttikālakiriya**, taṃ bodhisattānaṃyeva, na aññesaṃ. Bodhisattā kira dīghāyukadevaloke ṭhitā “idha ṭhitassa me bodhisambhārasambharaṇaṃ na sambhavaṭī”ti katvā tattha vāsato nibbindamānasā hontī, tadā vimānaṃ pavisitvā akkhīni nimiletvā “ito uddham me jīvitaṃ nappavattatū”ti cittaṃ adhiṭṭhāya nisīdanti, cittādhiṭṭhānasamanantameva maraṇaṃ hoti.

1. Pariccāgabhāvasāmaññenapi (?)

2. Khu 4. 385 piṭṭhe.

3. Khu 4. 392; Khu 6. 316 piṭṭhādīsū vitthāro.

pāramidhammānañhi ukkaṃsappavattiyā tasmim̄ tasmim̄ attabhāve abhiññāsamāpattīhi santānassa visesitattā attasinehassa tanubhāvena, sattesu ca mahākaruṇāya uḷārabhāvena adhiṭṭhānassa tikkhavisadabhāvāpattiyā bodhisattānaṃ adhippāyā samijjhanti. Citte, viya kammesu ca nesam̄ vasībhāvo, tasmā yattha upapannānaṃ pāramiyo sammadeva paribrūhanti. Vuttanayena kālaṃ katvā tattha upapajjanti. Tathā hi amhākaṃ mahāsatto imasmim̄yeva kappe nānājātisu aparihīnajjhāno kālaṃ katvā brahmaloke nibbatto, appakameva kālaṃ tattha ṭhatvā tato cavitvā manussaloke nibbatto, pāramīsambharaṇapasuto ahosi. Tena vuttaṃ “bodhisattānaṃyeva, na aññesan”ti. **“Ekena attabhāvena antarena pāramīnaṃ sabbaso pūritattā”**ti iminā payojanābhāvato tattha ṭhatvā adhimuttikālakiriyā nāma nāhosīti dasseti. Apica tattha yāvatāyukaṭṭhānaṃ¹ carimabhava anekamahānidhisamuṭṭhānapubbikāya dibbasampattisadisāya mahāsampattiyā nibbatti viya, buddhabhūtaṃ asadisadānādivasena anaññāsādhāraṇalābhuppatti viya ca “ito paraṃ mahāpurisassa dibbasampatti-anubhavaṇaṃ nāma natthī”ti ussāhajātassa puññasambhāraṇassa vasenāti daṭṭhabbaṃ. Ayañhettha dhammatā.

Manussagaṇanāvasena, na devagaṇanāvasena. **Pubbanimittānīti** cutiyā pubbanimittāni. **Amilāyitvāti** ettha amilātaggaṇeṇeva tāsāṃ mālānaṃ vaṇṇasampadāyapi gandhasampadāyapi sobhāsampadāyapi avināso dassitoti daṭṭhabbaṃ. Bāhirabbhantarānaṃ rajojallānaṃ lepassapi abhāvato devānaṃ sarīragatāni vatthāni sabbakālaṃ parisuddhappabhassarāneva hutvā tiṭṭhantīti āha **“vatthesupi eseva nayo”**ti. **Neva sītaṃ na uṇhanti** yassa sītassa paṭikārasena adhikāraṃ seviyamānaṃ uṇhaṃ, sayameva vā kharataraṃ hutvā abhibhavaṇaṃ sarīre sedāṃ uppādeyya, tādisaṃ neva sītaṃ, na uṇhaṃ **hoti**. **Tasmim̄ kāleti** yathāvuttamaraṇāsannakāle. **Bindubinduvasenāti** chinnaṃsuttāya āmuttamuttāvaliyā nipatantā muttaguḷikā viya bindu bindu hutvā. **Sedāti** sedadhārā **muccanti**. Dantānaṃ khaṇḍitabhāvo **khaṇḍiccam̄**. Kesānaṃ palitabhāvo **pāliccam̄**. **Ādi-saddena** valittacataṃ saṅgaṇhāti. **Kilantarūpo attabhāvo hoti**, na pana

1. Yāvatāyukaṃ adhiṭṭhānaṃ (Ka)

khaṇḍiccapāliccādīti adhippāyo. **Ukkaṇṭhitā**ti anabhirati. Sā natthi uparūpari uḷāruḷārānameva bhogānaṃ visesato duvijānanānaṃ upatiṭṭhahanato. **Nissasantī**ti uṇhaṃ nissasanti. **Vijambhantī**ti anabhirativasena vijambhanaṃ karonti.

Paṇḍitā evāti buddhisampannā eva devatā. Yathā devatā sampatijātā “kīdisena puññakammena idha nibbattā”ti cintetvā “iminā nāma puññakammena idha nibbattā”ti jānanti, evaṃ atītabhave attanā kataṃ, aññadāpi vā ekaccaṃ puññakammaṃ jānantiyeva mahāpuññāti āha “**ye mahāpuññā**”ti-ādi.

Na paññāyanti ciratarakālattā paramāyuno. **Aniyyānikanti** na niyyānāvahaṃ sattānaṃ abhājanabhāvato. Sattā na paramāyuno hontī nāma pāpussannatāyāti āha “**tadā hi sattā ussannakilesā hontī**”ti. Etthāha—kasmā sammāsambuddhā manussaloke eva uppajjanti, na devabrahmalokesūti? Devaloke tāva nuppajjanti brahmacariyavāsassa anokāsabhāvato, tathā anacchariyabhāvato. Acchariyadhammā hi buddhā bhagavanto, tesamā sā acchariyadhammatā devattabhāve ṭhitānaṃ na pākaṭā hoti yathā manussabhūtānaṃ, devabhūte hi sammāsambuddhe dissamānaṃ buddhānubhāvaṃ devānubhāvato loko dahati, na buddhānubhāvato, tathā sati “sammāsambuddho”ti nādhimuccati na sampasīdati, issaraguttaggāhaṃ na vissajjeti, devattabhāvassa ca cirakālādhiṭṭhānato ekaccasassatavādato na parimuccati. **Brahmaloke nuppajjantī**ti etthāpi eseva nayo. Sattānaṃ tādīsaggāhavinimocanattāñhi Buddhā Bhagavanto manussasugatiyaṃyeva uppajjanti, na devasugatiyaṃ. Manussasugatiyaṃ uppajjantāpi opapātikā na hontī, sati ca opapātikūpapattiyaṃ vuttadosānativattanato, dhammaveneyyānaṃ dhammatantiyā ṭhapanassa viya dhātuveneyyānaṃ dhātūnaṃ ṭhapanassa icchitabbattā ca. Na hi opapātikānaṃ parinibbānato uddhaṃ sarīradhātuyo tiṭṭhanti. Manussaloke uppajjantāpi mahābodhisattā carimabhava manussabhāvassa pākaṭabhāvakaraṇāya pana dārapariggahampi karontā yāva puttamukhadassanā agāramajjhe tiṭṭhanti, paripākagatasīlanekkhammaṃpaññādīpāramikāpi¹ na abhinikkhamantīti. Kim vā

1. ...pāramitāpi (Ka)

etāya kāraṇacintāya “sabbabuddhehi āciṅṇasamāciṅṇā, yadidaṃ manussabhūtānaṃyeva abhisambujjhanā, na devabhūtānaṃ”ti. Ayamettha dhammatā. Tathā hi tadattho mahābhinihāropi manussabhūtānaṃyeva ijjhati, na devabhūtānaṃ.

Kasmā pana sammāsambuddhā jambudīpe eva uppajjanti, na sesadīpesu? Keci tāva āhu “yasmā pathaviyā nābhībhūtā, Buddhānubhāvasahitā acalaṭṭhānabhūtā¹ Bodhimaṇḍabhūmi Jambudīpe eva, tasmā Jambudīpe eva uppajjanti”ti, tathā “itaresampi avijahitaṭṭhānānaṃ tattheva labbhanato”ti. Ayam panettha amhākaṃ khanti—yasmā purimabuddhānaṃ, Mahābodhisattānaṃ, Paccekabuddhānaṃca nibbattiyā Sāvakabodhisattānaṃ sāvakabodhiyā abhīnīhāro, sāvakaṭṭhānaṃ sambharaṇaṃ, paripācanaṃca Buddhakhettabhūte imasmiṃ cakkavāḷe Jambudīpe eva ijjhati, na aññattha, veneyyānaṃ vinayanattho ca Buddhuppādoti aggasāvakamahāsāvakādi² veneyyavisesāpekkhāya etasmiṃ jambudīpe eva Buddhā nibbattanti, na sesadīpesu, ayaṅca nayo sabbaBuddhānaṃ āciṅṇasamāciṅṇoti. Tesāṃ uttamapurisānaṃ tattheva uppatti sampatticakkānaṃ viya aññamaññūpanissayato aparāparaṃ vattatīti daṭṭhabbaṃ, eteneva imaṃ cakkavāḷaṃ majjhe katvā iminā saddhiṃ cakkavāḷānaṃ dasasahassasseva khettabhāvo dīpito ito aññassa Buddhānaṃ uppattiṭṭhānassa teṭṭhake Buddhavacane anupalabbhanato. Tenāha “**ūsu dīpesu buddhā na nibbattanti, jambudīpeyeva nibbattantīti dīpaṃ passi**”ti. Iminā nayena desaniyāmepe kāraṇaṃ nīharitvā vattabbaṃ.

Idāni ca khattiyakulaṃ lokasammataṃ brāhmaṇānampi pūjanīyabhāvato. “**Rājā pitā bhavissati**”ti kulaṃ passi pituvasena kulassa niddisitaḥḥato.

“**Dasannaṃ māsānaṃ upari satta divasāni**”ti passi, tena attano antarāyābhāvaṃ aññāsi. Tassā ca tusitabhāve dibbasampattipaccanubhavanaṃ.

Tā devatāti dasasahassicakkavāḷadevatā. Kathaṃ pana tā devatā tadā Bodhisattassa pūritapāramibhāvaṃ, kathaṅcassa Buddhabhāvaṃ jānantīti?

1. Buddhābhāvamahā-acalaṭṭhānabhūtā (Ka)

2. Theragāthā-Ṭṭha 2. 541 piṭṭhe vitthāro.

mahesakkhānaṃ devatānaṃ vasena, yebhuyyena ca tā devatā abhisamayabhāgino. Tathā hi Bhagavato dhammadānaṃsaṃvibhāge anekavāraṃ dasasahassacakkavāḷadevatāsannipāto ahoṣi.

“**Cavāmī**”ti jānāti cuti-āsannajavanehi nāṇasahitehi cutiyā upaṭṭhitabhāvassa paṭisaṃviditattā. **Cuticittaṃ na jānāti** cuticittakkhaṇassa ittarabhāvato. Tathā hi taṃ cutūpapātañāṇassapi avisayova. **Paṭisandhicittepi** eseva nayo. **Āvajjanapariyāyoti** āvajjanakkamo. Yasmā ekavāraṃ āvajjitamattena ārammaṇaṃ nicchinituṃ na sakkā, tasmā tamevārammaṇaṃ dutiyaṃ, tatiyaṃ āvajjitvā nicchayati. Āvajjanasīsenā cettha javanavāro gahito. Tenāha “**dutiyatatiyacittavāre eva jānissatī**”ti. Cutiyā puretaraṃ katipayacittavārato paṭṭhāya “maraṇaṃ me āsannaṃ”ti jānanato “**cutikkhaṇepi cavāmīti jānāti**”ti vuttaṃ. Paṭisandhiyā pana apubbabhāvato **paṭisandhicittaṃ na jānāti**. Nikantiyā uppattito parato “**asukasmirṃ me thāne paṭisandhi gahitā**”ti jānāti. **Tasmirṃ kāleti** paṭisandhiggahaṇakāle. **Dasasahassilokadhātu kampaṭīti** ettha kampaṇakāraṇaṃ heṭṭhā Brahmajālavaṇṇanāyamaṃ¹ vuttameva. Atthato panettha yaṃ vattabbaṃ, taṃ parato Mahāparinibbānaṇṇanāyamaṃ² āgamissati. Mahākāruṇikā Buddhā Bhagavanto sattānaṃ hitasukhavidhānatappaṭāya bahulaṃ somanassikāva hontīti tesāṃ paṭhamamahāvīpākacittena paṭisandhiggahaṇaṃ **aṭṭhakathāyamaṃ**³ vuttaṃ. Mahāsivatthero pana yadipi mahākāruṇikā Buddhā Bhagavanto sattānaṃ hitasukhavidhānatappaṭāva, vivekajjhāsayaṃ pana visāṅkhāraṇinā sabbasaṅkhāresu ajjupekkhanabahulāti pañcamamahāvīpākacittena paṭisandhiggahaṇamāha.

Pure puṇṇamāya sattamadivasato paṭṭhāyāti puṇṇamāya pure sattamadivasato paṭṭhāya, sukkapakke navamito paṭṭhāyāti attho. **Sattame divaseti** navamito sattame divase āsalhipuṇṇamāyamaṃ. **Idaṃ supinanti** idāni vuccamānākāraṃ. **Majjhimaṭṭhakathāyamaṃ** pana “anotattadahaṃ netvā ekamantaṃ aṭṭhamsu. Atha nesāṃ deviyo āgantvā manussamalahaṇaṭṭhaṃ

1. Dī-Ṭī 1. 187 piṭṭhe.

2. Dī-Ṭītha 2. 148 piṭṭhe.

3. Dī-Ṭītha 2. 23; Abhi-Ṭītha 1. 307; Ma-Ṭītha 4. 124 piṭṭhesu.

nhāpetvā”¹ti vuttam. Tattha **nesam deviyoti** mahārājūnam deviyo. **Caritvāti** gocaram carivā.

Haritūpalittāyāti haritena gomayena kataparibhaṇḍāya. “**So ca kho purisagabbho, na itthigabbho, putto te bhavissati**”ti ettakameva te brāhmaṇā attano supinasatthanayena kathesum. “**Sace agāram ajjhāvasissati**”ti-ādi pana devatāviggahena tamattham yāthāvato pavedesum.

Dhammatāti ettha **dhamma**-saddo “jātidhammānam bhikkhave sattānan”ti-ādīsu² viya pakatipariyāyo, dhammo eva **dhammatā** yathā devo eva devatāti āha “**ayam sabhāvo**”ti, ayam pakatīti attho. Svāyam sabhāvo atthato tathā niyatabhāvoti āha “**ayam niyāmoti vuttam hoti**”ti. Niyāmo pana bahuvidhoti te sabbe atthuddhāranayena uddharitvā idhādhippetaniyāmameva dassetuṃ “**niyāmo ca nāmā**”ti-ādi vuttam. Tattha kammānam niyāmo **kammaniyāmo**. Esa nayo utuniyāmādīsu tīsu. Itaro pana dhammo eva niyāmo **dhammaniyāmo**, dhammatā.

Kusalassa kammassa. **Nisento** tikhiṇam karonto.

Arūpādibhūmibhāgavisesavasena utuvisesadassanato utuvisesena sijjhamānānam rukkhādīnam pupphaphalādiggahaṇam “**tesu tesu janapadesū**”ti visesetvā vuttam. **Tasmim tasmim kāleti** tasmim tasmim vasantādīkāle.

Madhurato bījato **tittato** bījatoti yojanā.

18. Vattamānasamīpe vattamāne viya voharitabbanti “**okkamati**”ti vuttanti āha “**okkanto hotīti ayamevattho**”ti. **Evam hotīti** evam vuttappakārenassa sampajānanā hoti. **Na okkamamāne** paṭisandhikkhaṇassa duviññeyyatāya. Tathā ca vuttam “paṭisandhicittam na jānāti”ti. Dasasahassacakkavālapattharaṇena vā **appamāṇo**. Ativiya samujjalanabhāvena **ulāro**. **Devānubhāvanti** devānam pabhānubhāvam. Devānañhi pabham so

1. Ma-Ṭṭha 4. 124 piṭṭhe.

2. Ma 1. 84; Ma 3. 293; Khu 9. 38 piṭṭhesu.

obhāso abhibhavati, na tesam ādhipaccam. Tenāha “**nivatthavatthassā**”ti-ādi.

Lokānam lokadhātūnam antaro vivaro **lokantaro**, so eva itthiliṅgavasena “**lokantarikā**”ti vutto. Rukkhagacchādinā kenaci na haññantīti **aghā**, asambādihā. Tenāha “**niccavivaṭṭā**”ti. **Asamvutā**ti heṭṭhā, upari ca kenaci na pihitā. Tena vuttam “**heṭṭhāpi appatiṭṭhā**”ti. Tattha pi-saddena yathā heṭṭhā udakassa pidhāyikā pathavī natthīti asamvutā lokantarikā, evam uparipi cakkavāḷesu viya devavimānānam abhāvato asamvutā appatiṭṭhāti dasseti. Andhakāro ettha atthīti **andhakārā**. **Cakkhuvīññānam na jāyati** ālokassa abhāvato, na cakkhuno. Tathā hi “tenobhāseṇa aññamaññam sañjānantī”ti vuttam. Jambudīpe ṭhitamajjhānikavelāyam pubbavidehavāsīnam atthaṅgamanavasena upaḍḍham sūriyamaṇḍalam paññāyati, aparagoyānavāsīnam uggamanavasena, evam sesadīpesupīti āha “**ekappahāreṇeva tīsu dīpesu paññāyantī**”ti. Ito aññathā pana dvīsu eva dīpesu ekappahāreṇa paññāyantīti. Ekekāya disāya nava nava yojanasatasahassāni andhakāraavidhamanampi imināva nayena daṭṭhabbam. **Pabhāya nappahontī**ti attano pabhāya obhāsituṃ anabhisambhunanti. Yugandharapabbatappamāṇe ākāse vicaraṇato “**cakkavāḷapabbatassa vemajjhena vicarantī**”ti vuttam.

Vāvaṭṭāti khādanattham gaṇhituṃ upakkamantā. **Viparivattitvā**ti vivattitvā. **Chijjivā**ti mucchāpattiyā ṭhitaṭṭhānato mucchitvā, aṅgapaccaṅgachedanena vā chijjivā. **Accantakhāre**ti ātapasantāpābhāvena atisītabhāvameva sandhāya accantakhāratā vuttā siyā. Na hi tam kappasaṅṭhahana-udakasampattikaramahāmeghavuṭṭham pathavisandhārakam kappavināsaka-udakam viya khāram bhavituṃ arahati. Tathā hi sati pathavīpi vilīyeyya, tesam vā pāpakammabalena petānam udakassa pubbakheḷabhāvāpatti viya tassa udakassa tadā khārabhāvāpatti hotīti vuttam “**accantakhāre udake**”ti.

Ekayāgupānamattampīti pattādibhājanagatam yāguṃ gaḷoci-ādi-uddharaṇiyā gahetvā pivanamattampi kālam. **Samantatoti** sabbabhāgato chappakārampi.

19. **Catunnaṃ mahārājānaṃ vasaṇāti**
vessavaṇādicatumahārājabhāvasāmañña.

Yathāvihāraṇti yathāsakaṃ vihāraṃ.

20. **Pakatiyāti** attano pakatiyā **eva**. Tenāha “**sabhāvenevā**”ti. Parassa santike gahaṇena vinā attano sabhāveneva sayameva adhiṭṭhahitvā **sīlasampannā**. **Bodhisattamātāpīti** amhākaṃ Bodhisattamātāpī. **Kāladevilassāti** yathā kāladevilassa santike aññadā gaṇhāti, bodhisatte pana -pa- sayameva sīlaṃ aggaheṣi, tathā Vipassībodhisattamātāpīti adhippāyo.

21. “**Manussesū**”ti idaṃ pakaticārīttavasena vuttaṃ “manussitthiyā nāma manussapurisesu purisādhippāyacittaṃ uppajjeyyā”ti. Bodhisattassa mātuyā pana devesupī tādīsaṃ cittaṃ nuppajjateva. Yathā Bodhisattassa ānubhāvena Bodhisattamātu purisādhippāyacittaṃ nuppajjati, evaṃ tassānubhāveneva sā kenaci purisena anabhibhavinīyāti āha “**pādā na vahanti dibbasaṅkhalikā viya bajjhantī**”ti.

22. Pubbe “kāmaguṇūpasañhitaṃ cittaṃ nuppajjati”ti vuttaṃ, puna “pañcahi kāmaguṇehi samappitā samaṅgībhūtā paricāretī”ti ca vuttaṃ, kathamidaṃ aññaṃaṇñaṃ na virujjhatīti āha “**pubbe**”ti-ādi. **Vatthupaṭikkhepoti** abrahmacariyavatthupaṭisedho. Tenāha “**purisādhippāyavasena**”ti. **Ārammaṇapaṭilābhoti** rūpādīpañcakāmaguṇārammaṇasseva paṭilābho.

23. **Kilamathoti** khedo, kāyassa garubhāvakathinabhāvādayopi tassā tadā na honti eva. “Tirokucchigataṃ passatī”ti vuttaṃ, kadā paṭṭhāya passatīti āha “**kalalādīkālaṃ atikkamitvā**”ti-ādi. Dassane payojanaṃ sayameva vadati. Tassa abhāvato kalalādīkāle na passati. **Puttena** daharena mandena uttānaseyyakena **saddhim**. “**Yaṃ taṃ mātū**”ti-ādi pakaticārīttavasena vuttaṃ. Cakkavattigabbhatopi hi savisesaṃ Bodhisattagabbho parihāraṃ labhati puññasambhāraṃ sātīsayattā, tasmā Bodhisattamātā atīviya sappāyāhārācārā ca hutvā sakkaccaṃ pariharati. **Sukhavāsathanti** bodhisattassa sukhavāsathāṃ. **Puratthābhimukhoti**

mātu purimabhāgābhimukho. Idāni tirokucchigatassa dissamānatāya abbhantaram, bāhirañca kāraṇaṃ dassetuṃ **“pubbe katakamman”**ti-ādi vuttaṃ. **Assāti** deviyā. **Vatthunti** kucchiṃ. Phalika-abbhapaṭalādino viya Bodhisattamātukucchitacassa patanubhāvena ālokassa vibandhābhāvato yathā Bodhisattamātā kucchigataṃ Bodhisattaṃ passati, kimevaṃ Bodhisattopi mātaram, aññañca purato ṭhitam rūpagataṃ passati, noti āha **“Bodhisatto panā”**ti-ādi. Kasmā pana sati cakkhumhi, āloke ca na passatīti āha **“na hi antokucchiyaṃ cakkhuviññāṇaṃ uppajjati”**ti. Assāsapassāsā viya hi tattha cakkhuviññāṇampi na uppajjati tajjassa samannāhārassa abhāvato.

24. Yathā añña itthiyo vijātappaccayā tādiseṇa rogena abhibhūtāpi hutvā maranti, Bodhisattamātu pana Bodhisatte kucchigate tassa vijāyananimittaṃ, na koci rogo uppajjati, kevalaṃ āyuparikkhayeneva kālaṃ karoti, svāyamattho heṭṭhā vutto eva. **“Bodhisattena vasitaṭṭhānañhi”**ti-ādi tassa kāraṇavacanāṃ. **Aññesaṃ aparibhoganti** aññehi na paribhuñjitabbaṃ, na paribhogayogyanti attho. Tathā sati Bodhisattapitu aññāya aggamaheṣiyā bhavitabbaṃ, tathāpi bodhisattamātari dharantiyā ayujjamānakanti āha **“na ca sakkā”**ti-ādi. **Apanetvāti** aggamaheṣiṭhānato nīharitvā. Attani chandarāgavaseneva bahiddhā ārammaṇapariyesanāti visayinisārāgo sattānaṃ visayesu sārāgassa balavakāraṇanti dassento āha **“sattānaṃ attabhāve chandarāgo balavā hoti”**ti. **Anurakkhituṃ na sakkotīti** sammā gabbhāparihāraṃ nānuyuñjati. Tena **gabbho bahvābādho hoti. Vatthuvisadaṃ hotīti** gabbhāsayo visuddho hoti. Mātu majjhimavayassa tatiyakoṭṭhāse Bodhisattagabbhokkamanampi tassā āyuparimāṇavilokaneneva saṅgahitaṃ vayovasena uppajjanakavikārassa parivajjanato. Itthisabhāvena uppajjanakavikāro pana Bodhisattassa ānubhāvene va vūpasamati.

25. **Sattamāsajātoti** paṭisandhiggahaṇato sattame māse jāto. So **sītuṇhakkhamo na hoti** ativiya sukhumālatāya.

Aṭṭhamāsajāto kāmaṃ sattamāsajātato buddhivayavā, ekacce pana cammaṃpadesā vuddhiṃ pāpuṇantā ghaṭṭanaṃ na saḥanti, tena so **na jīvati**. “Sattamāsajātassa pana na tāva te jātā”ti vadanti.

27. **Devā paṭhamam paṭiggaṇhantīti** “lokanātham mahāpurisam sayameva paṭhamam paṭiggaṇhāmā”ti sañjātagāravabahumānā attano pīṭim pavedentā **khīṇāsavā suddhā vāsabrahmāno ādito paṭiggaṇhanti**. **Sūtivesanti** sūtijaggaṇadhātivesam. **Eketi** abhayagirivāsino. **Macchakkhisadisam** chavivasena. **Aṭṭhāsi** na nisīdi, na nipajji vā. Tena vuttam “ṭhitāva bodhisattam bodhisattamātā vijāyati”ti. Niddukkhatāya **ṭhitā** eva hutvā **vijāyati**. Dukkhasa hi balavabhāvato tam dukkham asahamānā aññā itthiyo nisinnā vā nipannā vā vijāyanti.

28. **Ajinappaveṇiyāti** ajinacammehi sibbitvā katapaveṇiyā. **Mahātejoti** mahānubhāvo. **Mahāyasoti** mahāparivāro, vipulakittighoso ca.

29. **Bhaggavibhaggāti** sambādhaṭṭhānato nikkhamanena vibhāvitattā bhaggā, vibhaggā viya ca hutvā, tena nesam avisadabhāvameva dasseti. **Alaggo hutvāti** gabbhāsaye, yonipadese ca katthaci alaggo asatto hutvā, yato “dhamakaraṇato udakanikkhamanasadisan”ti vuttam. **Udakenāti** gabbhāsayaḡatena udakena. **Amakkhitova nikkhamati** sammakkhitassa tādisassa udakasemhādikasveva tattha abhāvato. Bodhisattassa hi puññānubhāvato paṭisandhiggahaṇato paṭṭhāya tam ṭhānam pubbepi visuddham¹ visesato paramasugandhagandhakuṭi viya candanagandham vāyantam tiṭṭhati.

Udakavaṭṭiyoti udakakkhandhā.

31. **Muhuttajātoti** muhuttena jāto hutvā muhuttamattova. **Anudhāriyamāneti** anukūlavasena nīyamāne. **Āgatānevāti** tam ṭhānam upagatāni eva. **Anekasākhanti** ratanamayānekasatapatiṭṭhānahīrakam. **Sahassamaṇḍalanti** tesam upariṭṭhitam anekasahassamaṇḍalahīrakam. **Marūti** devā. **Na kho panevam daṭṭhabbam** padavītiḥārato pageva

1. Tam ṭhānam visuddham (?)

disāvilokanassa katattā. Tenāha “**mahāsatto hī**”ti-ādi. **Ekaṅgaṇānī**ti vivaṭabhāvena vihāraṅgaṇapariveṇaṅgaṇāni viya ekaṅgaṇasadisāni **ahesum**. **Sadisopi natthī**ti tumhākaṃ idaṃ vilokanaṃ visiṭṭhe passitum “**idha tumhehi sadisopi natthi, kuto uttaritaro**”ti āhaṃsu. **Aggoti** padhāno, kena panassa padhānatāti āha “**guṇehī**”ti. **Paṭhama**-saddo cettha padhānapariyāyo. Bodhisattassa pana padhānatā anaññasādhāraṇāti āha “**sabbapaṭhamo**”ti, sabbapadhānoti attho. **Etassevā**ti aggasaddasseva. Ettha ca mahesakkhā tāva devā tathā ca vadanti, itare pana kathanti? Mahāsattassa ānubhāvadassanādīnā. Mahesakkhānañhi devānaṃ mahāsattassa ānubhāvo viya tena sadisānampi ānubhāvo paccakkho ahoṣīti, itare pana tesāṃ vacanaṃ sutvā saddahantā anuminantā tathā āhaṃsu. Paripākagatapubbahetusāmsiddhāya dhammatāya codiyamāno **imasmiṃ -pa-byākāsi**.

Jātamattasseva Bodhisattassa ṭhānādīni yesāṃ visesādhigamānaṃ pubbanimittabhūtānīti te niddhāretvā dassento “**ettha cā**”ti-ādimāha. Tattha **patiṭṭhānaṃ caturiddhipādapaṭilābhassa pubbanimittaṃ** iddhipādavasena lokuttaradhammesu suppatiṭṭhitabhāvasamijjhanato. **Uttarābhimukhabhāvo** lokassa uttaraṇavasena gamanassa pubbanimittaṃ. Tena hi bhagavā sadevakassa lokassa abhibhūto, kenaci anabhibhūto ahoṣi. Tenāha “**mahājanaṃ ajjhottharivā abhibhavitvā gamanassa pubbanimittaṃ**”ti. Tathā sattapadagamaṇaṃ sattapadabojjhaṅgasampanna-ariyamaggagamaṇassa. Suvisuddhasettacchattadhāraṇaṃ suvisuddhavimuttichattadhāraṇassa. Pañcarājajakudhabhaṇḍasamāyogo pañcavidhavimuttiguṇasamāyogassa. Anāvaṭadisānuvilokanaṃ anāvaṭañāṇatāya. “**Aggohamasmī**”ti-ādinā achambhitavācābhāsaṇaṃ kenaci avibandhanīyatāya appavattiyassa saddhammacakkappavattanassa. “**Ayamantimā jāti**”ti āyatim jātiyā abhāvakkittanā anupādi -pa- pubbanimittanti veditabbaṃ tassa tassa anāgate laddhabbavisesassa taṃ taṃ nimittaṃ abyabhicārīti katvā. **Na āgatoti** imasmim sutte, aññattha ca vakkhamānāya anupubbiyā na āgato. **Āharitvā**ti tasmim tasmim sutte, aṭṭhakathāsu ca āgatanayena āharitvā **dīpetabbo**.

“**Dasasahassilokadhātu kampī**”ti idaṃ satipi idha pāliyaṃ āgatatte vakkhamānānaṃ acchariyānaṃ mūlabhūtaṃ dassetuṃ vuttaṃ, evaṃ aññampi evarūpaṃ daṭṭhabbaṃ. **Tantibaddhā viṇā cammabaddhā bheriyoti** pañcaṅgikatūriyassa nidassanamattaṃ, ca-saddena vā itaresampi saṅgaho daṭṭhabbo. “Andubandhanādīni taṅkhaṇe eva chajjitvā puna pākatikāneva honti, tathā jaccandhādīnaṃ cakkhusotādīni tathārūpakammapaccayā tasmimyeva khaṇe uppajjitvā tāvadeva vigacchantī”ti vadanti. Chijjimsūti ca pādesu bandhaṭṭhānesu chijjimsu. **Vigacchimsūti** vūpasamimsu. **Ākāsaṭṭhakaratanāni** nāma taṃ taṃ vimānagatamaṇiratanādīni. Sakatejo **bhāsītānīti** ativiya samujjalāya attano pabhāya obhāsītāni **ahesuṃ**. **Nappavattīti** na sannipāto. **Na vāyīti** kharo vāto na vāyi. Mudusukho pana sattānaṃ sukhāvahovāyi. **Pathavigatā ahesuṃ** uccaṭṭhāneṭhātum avisahantā. **Utusampannoti** anuṇhāsītāsaṅkhātena utunā sampanno. Apphoṭanaṃ vuccati bhujahatthasaṅghaṭṭanasaddo, atthato pana vāmahatthaṃ ure ṭhapetvā dakkhiṇena puthupāṇinā hatthatālanena saddakaraṇaṃ. Mukhena usseḷanaṃ saddassa muñcanaṃ seḷanaṃ. Ekaddhajamālā ahosi nirantaraṃ dhajamālāsamodhānagatāya. Na kevalaṅca etāni eva, atha kho aññānīpi “vicittapupphasugandhapupphavassadevo pavassi, sūriye dissamāne¹ eva tārakā obhāsimsu, acchaṃ vippasannaṃ udakaṃ pathavito ubbhijji, bilāsayaṃ ca tiracchānā āsayato nikkhamimsu, rāgadosamohāpi tanubhaviṃsu pathaviyaṃ rajo vūpasami, aniṭṭhagandho vigacchi, dibbagandho vāyi, rūpino devā sarūpeneva manussānaṃ āpāthamagamaṃsu, sattānaṃ cutūpapātā nāhesuṃ”ti evamādīni yāni mahābhinihārasamaye uppannāni dvattimsapubbanimittāni, tāni anavasesato tadā ahesunti.

Tatrāpīti tesupi pathavikampādīsu evaṃ pubbanimittabhāvo veditabbo. Na kevalaṃ sampatijātassa ṭhānādīsu evāti adhippāyo. **Sabbaññūtaññāpaṭilābhassa pubbanimittaṃ** sabbassa ñeyyassa, titthakaramatassa ca cālanato. Kenaci anussāhitānaṃyeva imasmiṃyeva **ekacakkavāḷe sannipāto** kenaci anussāhitānaṃyeva **ekappahārenea sannipatitvā dhammapaṭiggaṇhanassa pubbanimittaṃ**. **Paṭhamaṃ devatānaṃ paṭiggahaṇaṃ** dibbavihārapaṭilābhassa, **pacchā manussānaṃ paṭiggahaṇaṃ** tattheva ṭhānassa

1. Dibbamāne (Ma-Ṭṭha 3 Ṭikāyaṃ)

niccalasabhāvato āneñjavihārapaṭilābhassa **pubbanimittam**. **Viñānam sayam vajjanam** parūpadesena vinā sayameva **anupubbavihārapaṭilābhassa pubbanimittam**. **Bherīnam vajjanam** cakkavālapariyantāya parisāya pavedanasamatthassa **dhammabheriyā anusāvanassa** amatadundubhighosanassa **pubbanimittam**. **Andubandhanādīnam chedo mānavinibandhabhedanassa pubbanimittam**. **Mahājanassa rogavigamo** tasseva sakalavaṭṭadukkharogavigamabhūtaṃ saccapaṭilābhassa **pubbanimittam**. “Mahājanassā”ti padaṃ “mahājanassa dibbaccakkhupaṭilābhassa, mahājanassa dibbasotadhātupaṭilābhassā”ti-ādinā tattha tattha ānetvā sambandhitabbaṃ. Iddhipādabhāvanāvasena sātisayañājavasampattisiddhīti āha “**pīṭhasappīnam jvasampadā caturiddhipādapaṭilābhassa pubbanimittam**”ti. **Supaṭṭanasampāpuṇanam catupaṭisambhidādhigamassa pubbanimittam**. Atthādi-anurūpaṃ atthādīsu sampaṭipattibhāvato. **Ratanānam sakatejobhāsītattam yam lokassa dhammobhāsam dassessati**, tena **tassa sakatejobhāsītattassa pubbanimittam**.

Catubrahmavihārapaṭilābhassa pubbanimittam tassa sabbaso veravūpasamanato. **Ekādasa-agginibbāpanassa pubbanimittam** dunnibbāpanannibbānabhāvato. **Ñāṇālokādassanassa pubbanimittam** anāloke ālokadassanabhāvato. **Nibbānārasenāti** kilesānam nibbāyanarasena. **Ekarasabhāvassāti** sāsanassa sabbattha ekarasabhāvassa, tañca kho amadhurassa lokassa sabbaso madhurabhāvāpādanena. **Dvāsattiditthigatabhīndanassa pubbanimittam** sabbaso ditthigatavātāpanayanavasena. **Ākāsādi-appatiṭṭhavisamacañcalaṭṭhānam** pahāya **sakuṇānam pathavigamanam** tādisam micchāgāham pahāya sattānam pāṇehi **ratanattayasaraṇagamanassa pubbanimittam**. **Bahujanakantatāyāti** candassa viya bahujanassa kantatāya. **Sūriyassa uṇhasīta vivajjita-utusukhatā** pariṭāhavivajjita **kāyikacetasikasukhappattiyā pubbanimittam**. **Devatānam apphoṭanādīhi kīḷanam** pamoduppatti bhavantagamanena, dhammasabhāvabodhanena ca udānavasena pamodavibhāvanassa **pubbanimittam**. **Dhammavegavassanassāti** desanāñānavegena dhammāmatassa vassanassa **pubbanimittam**. **Kāyagatāsativasena** laddham jhānam pādakaṃ katvā uppāditamagga phalasukhānubhavo kāyagatāsati-amatapaṭilābho, tassa pana kāyassāpi atappakasukhāvahattā khudāpipāsāpīlanābhāvo **pubbanimittam**

vutto. Aṭṭhakathāyaṃ pana khudaṃ, pipāsañca bhinditvā vuttaṃ. Tattha pubbanimittānaṃ bhedo visesasāmaññavibhāgena, gobalībaddaṅāyena ca gahetabbo. “Sayamevā”ti padaṃ “aṭṭhaṅgikamaggadvāravivaraṇassā”ti etthāpi ānetvā sambandhitabbaṃ. **Bharitabhāvassāti** paripuṇṇabhāvassa. “**Ariyaddhajamālāmālitāyāti** kāsāyaddhajamālāvantaṭāyā”ti keci, sadevakassa lokassa pana ariyamaggabojjhaṅgaddhajamālāhi mālibhāvassa **pubbanimittāṃ**. Yaṃ panettha anuddhaṭaṃ, taṃ suviññeyyameva.

Etthāti “sampatijāto”ti-ādinā āgate imasmim vāre. Vissajjitova, tasmā amhehi idha apubbaṃ vattabbaṃ natthīti adhippāyo. Tadā pathaviyaṃ gacchantopi mahāsatto ākāseṇa gacchanto viya mahājanassa tathā upaṭṭhāsīti ayamettha niyati dhammaniyāmo bodhisattānaṃ dhammatāti idaṃ niyatīvādavasena kathaṃ. Pubbe purimajātīsu tādisassa puññasambhārakammassa katattā upacittā mahājanassa tathā upaṭṭhāsīti idaṃ pubbekatakammavādavasena kathaṃ. Imesaṃ sattānaṃ upari īsanasīlatāya yathāsakaṃ kammameva issaro nāma, tassa nimmānaṃ attano phalassa nibbattaṃ mahāpurisopi sadevakaṃ lokaṃ abhibhavitūṃ samatthena uḷārena puññakammena nibbattito, tena issarena nimmito nāma, tassa cāyaṃ nimmānaviseso, yadidaṃ mahānubhāvata, yāya mahājanassa tathā upaṭṭhāsīti idaṃ issaranimmānavasena kathaṃ. Evaṃ taṃ taṃ bahulaṃ vatvā kiṃ imāya pariyāyakathāyāti avasāne ujukameva byākari. Sampatijāto pathaviyaṃ kathaṃ padasā gacchati, evaṃ mahānubhāvo ākāseṇa maññe gacchatīti parikkappanasena ākāseṇa gacchanto viya ahoṣi. Sīghataraṃ pana sattapadavītiḥārena gatattā dissamānarūpopi mahājanassa adissamāno viya ahoṣi. Acelakabhāvo, khuddakasarīratā ca tādisassa iriyāpathassa na anucchavikāti kammānubhāvasañjanitapāṭihāriyavasena alaṅkatapaṭiyatto viya, soḷasavassuddesiko viya ca mahājanassa upaṭṭhāsīti veditabbaṃ. Mahāsattassa puññānubhāvena tadā tathā-upaṭṭhānamattamevetanti. **Pacchā bāladārakova ahoṣi, na tādisoti** buddhabhāvānucchavikassa Bodhisattānubhāvassa yāthāvato paveditattā **parisā cassa** byākaraṇena **buddhena viya -pa-** attamanā ahoṣi.

Sabbadhammatāti sabbā soḷasavidhāpi yathāvuttā dhammatā **sabbabodhisattānaṃ hontīti veditabbā** puññañāṇasambhāradassanena nesam ekasadisattā.

Dvattimsamahāpurisalakkhaṇavaṇṇanā

33. **Dukūlacumbaṭaketi** daharassa nipajjanayogyatāvasena paṭisaṃhaṭadukūlasukhume. “Khattiyo brāhmaṇo”ti evamādi **jāti**. “Koṇḍañño gotamo”ti evamādi **gottaṃ**. “Poṇikā cikkhallikā sākiyā koḷiyā”ti evamādi **kulapadeso**. **Ādi**-saddena rūpissariyaparivārādisabbasampattiyo saṅgaṇhāti. Mahantassāti vipulassa, uḷārassāti attho. **Nipphattiyoti** siddhiyo. Gantabbagatiyāti gati-saddassa kammaśādanatāṃ āha. Upapajjanavasena hi sucaritaduccaritehi gantabbāti **gatiyo**, upapattibhavaviseso. Gacchati yathārucci pavattattīti **gati**, ajjhāsayo. **Paṭisaraṇeti** parāyaṇe avassaye. Sabbasaṅkhatavisaṃyuttassa hi arahato nibbānameva taṃpaṭisaraṇaṃ. **Tyāhanti** te ahaṃ.

Dasavidhe kusaladhamme, agarahite ca rājadhamme¹ niyuttoti dhammiko. Tena ca dhammena sakalaṃ lokaṃ rañjetīti dhammarājā. Yasmā cakkavattī dhammena ñāyena rajjaṃ adhigacchati na adhammena, tasmā vuttaṃ “**dhammena laddharajjattā dhammarājā**”ti. Catūsu disāsu samuddapariyosānatāya **caturantā** nāma tattha tattha dīpe mahāpathavīti āha “**puratthima -pa- issaro**”ti. **Vijitāvīti** vijetabbassa vijitavā, kāmakodhādikassa abbhantarassa, paṭirājabhūtassa bāhirassa ca arigaṇassa vijayi, vijetvā ṭhitoti attho. Kāmaṃ cakkavattino kenaci yuddhaṃ nāma natthi, yuddhena pana sādhetabbassa vijayassa siddhiyā “vijitasāṅgāmo”ti vuttaṃ. Janapadova catubbidha-acchariyadhammādisamannāgate asmim rājini thāvariyaṃ kenaci asaṃhāriyaṃ daḷhaṃ bhattabhāvaṃ patto, janapade vā attano dhammikāya paṭipattiyā thāvariyaṃ thirabhāvaṃ pattoti janapadatthāvariyappatto. Manussānaṃ ure satthaṃ ṭhapetvā icchitadhanaharaṇādinā parasāhasakāritāya sāhasikā.

Ratijjananaṭṭhenāti atappakapītisomanassuppādanena. Saddatthato pana rametīti **ratanaṃ**. “Aho manoharan”ti citte kattabbatāya

1. Khu 6. 97 piṭṭhe Jātake vitthāro.

cittīkatam̄. “Svāyam̄ cittīkāro tassa pūjanīyatāyā”ti cittīkatanti pūjanīyanti attham̄ vadanti. Mahantam̄ vipulam̄ aparimitam̄ mūlam̄ agghatīti **mahaggham̄.** Natthi etassa tulā upamāti **atulam̄,** asadisam̄. Kadāci eva uppajjanato dukkhena laddhabbattā **dullabhadassanam̄.** Anomehi ulāraguṇeheva sattehi paribhuñjitabbato anomasattaparibhogam̄. Idāni nesam̄ cittīkatādi-atthānam̄ savisesam̄ cakkaratane labbhamānatam̄ dassetvā itaresupi te atidisitum̄ “**cakkaratanassa cā**”ti-ādi āradham̄. **Aññam̄ devaṭṭhānam̄ nāma na hoti** rañño anaññasādhāraṇissariyādisampattiṭṭhābhahetuto, sattānañca yathicchitatthapaṭilābhahetuto. **Aggho natthi** ativiya ulārasamujjalasattaratanamayattā, acchariyabbhutamahānubhāvātāya ca. Yadaggena mahaggham̄, tadaggena **atulam̄.** Sattānam̄ pāpajigucchana vigatakāḷako puññapasutatāya maṇḍabhūto yādiso kālo Buddhuppādāraho, tādise eva cakkavattīnampi sambhavoti āha “yasmā ca panā”ti-ādi. Upamāvasena cetam̄ vuttam̄, upamopameyyānañca na accantameva sadisatā. Tasmā yathā Buddhā kadāci karahaci uppajjanti, na tathā cakkavattino, evam̄ santepi cakkavattivattaparipūraṇassāpi dukkarabhāvatoṭopi dullabhuppādāye vāti, iminā dullabhuppādātāsāmaññena tesam̄ dullabhadassanatā vuttāti veditabbam̄. Kāmam̄ cakkaratanānubhāvena sijjhamāno guṇo cakkavattiparivārasādhāraṇo, tathāpi “cakkavattī eva nam̄ sāmibhāvena visavitāya paribhuñjati”ti vattabbatam̄ arahati tadattham̄ uppajjanatotī dassento “**tadetan**”ti-ādimāha. Yathāvuttānam̄ pañcannam̄, channampi vā atthānam̄ itararatanesupi labbhanato “**evam̄ sesānipī**”ti vuttam̄. Hatthi-assapariṇāyakaratanehi ajitavijayato, cakkaratanena ca parivārabhāvena, sesehi paribhogūpakaraṇabhāvena samannāgato. Hatthi-assamaṇi-itthiratanehi paribhogūpakaraṇabhāvena sesehi parivārabhāvenāti yojanā.

Catunnam̄ mahādīpānam̄ sirivibhavanti tattha laddham̄ sirisampattiñceva bhogasampattiñca. Tādisamevāti “purebhattamevā”ti-ādinā vuttānubhāvameva. Yojanappamāṇam̄ padesam̄ byāpanena yojanappamāṇam̄ andhakāram̄. Atidīghatādi **chabbidhadosaparivajjitam̄.**

Sūrāti sattivanto, nibbhayāti atthoti āha “**abhīrukā**”ti. **Aṅganti** kāraṇam̄. Yena kāraṇena “**vīrā**”ti vucceyyum̄, tam̄ **vīraṅgam̄.** Tenāha

“**vīriyassetam nāman**”ti. Yāva cakkavālapabbatā cakkassa vattanato
 “**cakkavālapabbatam sīmam katvā ṭhitasamuddapariyantam**”ti vuttam.
 “Adaṇḍenā”ti imināva dhanadaṇḍassa, sarīradaṇḍassa, ca akaraṇam vuttam.
 “**Asatthenā**”ti iminā pana senāya yujjhanassāti tadubhayaṃ dassetuṃ “**ye
 katā parādhe**”ti-ādi vuttam. **Vuttappakāraṇti** sāgarapariyantam.

“Rañjanaṭṭhena **rāgo**, taṇhāyanaṭṭhena **taṇhā**”ti pavatti-ākārabhedena
 lobho eva dvidhā vutto. Tathā hissa dvidhāpi chadanaṭṭho ekantiko. Yathāha
 “andhatamaṃ tadā hoti, yaṃ rāgo sahate naran”ti¹,
 “taṇhāchadanachādītā”ti² ca. Iminā nayena dosādīnampi chadanaṭṭho
 vattabbo. **Kilesaggahaṇena** vicikicchādayo sesakilesā vuttā. Yasmā te sabbe
 pāpadhammā uppajjamānā sattasantānaṃ chādetvā pariyanandhitvā tiṭṭhanti
 kusalappavattim nivārenti, tasmā te “chadanā, chadā”ti ca vuttā.
Vivaṭṭacchadāti ca okāraṇassa ākāraṃ katvā niddeṣo.

35. **Tāsanti** dvinnampi nipphattīnaṃ. **Nimittabhūtānī**
 nāpakakāraṇabhūtāni. Tathā hi lakkhiyati mahāpurisabhāvo etehīti
lakkhaṇāni. Ṭhānagamanādīsu bhūmiyaṃ suṭṭhu samaṃ patiṭṭhitā pādā
 etassāti **suppatiṭṭhitapādo**. Tam panassa suppatiṭṭhitapādamaṃ
 byatirekamukhena vibhāvetuṃ “**yathā**”ti-ādi vuttam. Tattha **aggatalanti**
 aggapādatalam. **Paṇhīti** paṇhitalam. **Passanti** pādatalassa dvīsu passesu
 ekekaṃ, ubhayameva vā pariyantam passam. “**Assa panā**”ti-ādi anvayato
 atthavibhāvanam. **Suvaṇṇapādukatalamiva** ujukaṃ nikkhipiyamānam.
Ekappahārenevāti ekakkhaṇeyeva. **Sakalam pādatalam bhūmiṃ phusati**
 nikkhipane. Ekappahāreneva sakalam pādatalam bhūmito uṭṭhahatīti yojanā.
Tasmā ayaṃ suppatiṭṭhitapādoti nigamanam. Yaṃ panettha vattabbaṃ
 anupubbaninnādi-acchariyabbhutaṃ nissandaphalam, tam parato
Lakkhaṇasuttavaṇṇanāyam³ āvi bhavissatīti.

Nābhi dissatīti lakkhaṇacakkassa nābhi parimaṇḍalasaṅghānā
 suparibyattā hutvā dissati, labbhatīti adhippāyo. **Nābhiparicchinnāti** tassam
 nābhiyaṃ paricchinnā paricchavedavasena ṭhitā.
Nābhimukhaparikkhepapattoti

1. Khu 10. 12, 32 piṭṭhesu. 2. Khu 1. 172 piṭṭhe Udāne. 3. Dī-Ṭṭha 3. 102 piṭṭhe.

pakaticakkassa akkhabbhāhatapariharaṇatthaṃ nābhimukhe
 ṭhapetabbaparikkhepa paṭṭo, tappaṭicchanno ida adhippeto. **Nemimaṇikā**ti
 nemiyaṃ āvalibhāvena ṭhitamaṇikālekhā. **Sambahulavāro**ti
 bahuvīdhalekhaṅgavibhāvana vāro. Sattīti āvudhasatti. **Sirivacchoti** siri-
 aṅgā. **Nandīti** dakkhiṇāvattam. Sovattikoti sovatti-aṅgo. Vaṭamsakoti
 āveḷam. **Vaḍḍhamānakanti** purimahādīsu dīpaṅkam. **Morahatthakoti**
 morapiñchakalāpo, morapiñchapaṭisibbito vā bījanīviseso. **Vālabījanīti**
 cāmarivālam. Siddhatthādīpuṇṇaghaṭapūṇṇapātiyo. “Cakkavālo”ti vatvā
 tassa padhānāvayave dassetuṃ “**himavā sineru -pa- sahasānī**”ti vuttam.
 “**Cakkavattirañño parisam upādāyā**”ti idam hatthiratanādīnampi tattha
 labbhamānabhāvadassanam. Sabboti satti-ādiko yathāvutto aṅgaviseso
cakkalakkhaṇasseva parivāroti veditabbo.

“**Āyatapaṇhī**”ti idam aññesaṃ paṇhito dīghatam sandhāya vuttam, na
 pana atidīghatanti āha “**paripuṇṇapaṇhī**”ti. Yathā pana paṇhilakkhaṇam
 paripuṇṇam nāma hoti, tam byatirekamukhena dassetuṃ “yathā hī”ti-ādī
 vuttam. **Āraggenāti** maṅḍalāya sikhāya. **Vaṭṭetvāti** yathā suvaṭṭam hoti,
 evam vaṭṭetvā. **Rattakambalagenḍukasadisāti**
 rattakambalamayagenḍukasadisā.

“**Makkaṭassevā**”ti dīghabhāvam, samatañca sandhāyetam vuttam.
Niyyāsateleṇāti chattiritaniyyāsādīniyyāsasammissena telena, yaṃ
 “surabhiniyyāsan”tipi vadanti. **Niyyāsate**laggaṇaṇācetha haritālavaṭṭiyā
 ghanasiniddhabhāvadassanattham.

Yathā satakkhattuṃ vihatam kappāsapaṭalam sappimaṇḍe osāritam
 ativiya mudu hoti, evam mahāpurisassa hatthapādāti dassento
 “**sappimaṇḍe**”ti-ādīmāha. **Talunāti** sukhumāḷā.

Cammenāti aṅgulantaraveṭhitacammena. **Paṭibaddha-aṅgulantaroti**
 ekato sambaddha-aṅgulantaro na hoti. **Ekappamāṇāti** dīghato
 samānappamāṇā. **Yavalakkhaṇanti** abhantarato aṅgulipabbe ṭhitam
 yavalakkhaṇam. **Paṭivijjhivāti** tamtam pabbānam samānadesatāya aṅgulīnam
 pasāritakālepi aññamaññam vijjhītāni viya phusitvā tiṭṭhanti.

Saṅkhā vuccanti gopphakā, uddham saṅkhā etesanti **ussaṅkhā**, pādā. **Piṭṭhipādeti** piṭṭhipādasamīpe. **Tenāti** piṭṭhipāde ṭhitagopphakabhāvena baddhā hontīti yojanā. Tayidaṃ “tenā”ti padaṃ uparipadadvayepi yojetabbam “tena baddhabhāvena na yathāsukham parivaṭṭanti, tena yathāsukham napaṭṭanena gacchantānam pādalanipi na dissanti”ti. **Uparīti** piṭṭhipādato dviti-aṅgulimattam uddham, “caturaṅgulamattan”ti ca vadanti. Nigūlhāni ca honti, na aññesaṃ viya paññāyamānāni. **Tenāti** gopphakānam upari paṭṭhitabhāvena. **Assāti** mahāpurisassa. Satipi desantarappavattiyam niccaloti dassanattam **nābhiggahaṇam**. “**Adhokāyova iñjati**”ti idaṃ purimapadassa kāraṇavacanam. Yasmā adhokāyova iñjati, tasmā nābhito -pa- niccalo hoti. “**Sukhena pādā parivaṭṭanti**”ti idaṃ pana purimassa, pacchimassa ca kāraṇavacanam. Yasmā sukhena pādā parivaṭṭanti, tasmā adhokāyova iñjati. Yasmā sukhena pādā parivaṭṭanti, tasmā puratopi -pa- pacchatoyevāti.

Yasmā eṇimigassa samantato ekasadisamaṃsā anukkamena uddham thūlā jaṅghā honti, tathā Mahāpurisassāpi, tasmā vuttam “**eṇimigasadisajaṅgho**”ti. **Paripuṇṇajaṅgho**ti samantato maṃsūpacayena paripuṇṇajaṅgho. Tenāha “**na ekato**”ti-ādi.

Etenāti “anonamanto”ti-ādivacanena, jāṇuphāsubhāvādīpanenāti attho. **Avasesajanāti** iminā lakkhaṇena rahitajanā. **Khujjā vā honti** heṭṭhimakāyato uparimakāyassa rassatāya, **vāmanā vā** uparimakāyato heṭṭhimakāyassa rassatāya, etena ṭhapetvā Sammāsambuddham, cakkavattinañca itare sattā khujjapakkhikā, vāmanapakkhikā cāti dasseti.

Kāmaṃ sabbāpi padumakaṇṇikā suvaṇṇavaṇṇāva, kañcanapadumakaṇṇikā pana pabhassarabhāvena tato sātisayāti āha “**suvaṇṇapadumakaṇṇikasadisehī**”ti. **Ohitanti** samohitam antogadham. Tathābhūtam pana tam tena channam hotīti āha “**paṭicchannan**”ti.

Suvaṇṇavaṇṇoti suvaṇṇavaṇṇavaṇṇoti ayamettha atthoti āha “**jātihiṅgulakenā**”ti-ādi, svāyamattho āvuttiñāyena ca veditabbo. Sarīrapariyāyo idha vaṇṇa-saddoti adhippāyo. Paṭhamavikappam

vatvā tathārūpāya pana ruḷhiyā abhāvaṃ manasi katvā
vaṇṇadhātupariyāyameva
vaṇṇa-saddaṃ gahe tvā dutiyavikappo vutto. Tasmā padadvayenāpi
suniddhantasuvaṇṇasadisachavivaṇṇoti vuttaṃ hoti.

Rajoti sukhumarajo. **Jallanti** malīnabhāvāvaho reṇusañcayo. Tenāha
“**malaṃ vā**”ti. Yadi vivattati, kathaṃ nhānādīnīti āha “**hatthadhovanādīnī**”ti-
ādi.

Āvaṭṭapariyosāneti padakkhiṇāvāṭṭanavasena pavattassa āvaṭṭassa ante.

Brahmuno sarīraṃ purato vā pacchato vā anonamitvā ujukameva
uggatanti āha “**brahmā viya ujugatto**”ti. Sā panāyaṃ ujugattatā avayavesu
Buddhippattesu daṭṭhabbā, na daharakāleti vuttaṃ “**uggatadīghasarīro
bhavissati**”ti. **Itaresūti** “khandhajāṇūsū”ti imesu **dvīsu ṭhānesu** namantā
purato namantīti ānetvā sambandho. **Passavaṅkāti** dakkhiṇapassena vā
vāmapassena vā vaṅkā. **Sūlasadisāti** potthakarūpakaraṇe
ṭhapitasūlapādasadisā.

Hatthapiṭṭhi-ādivasena satta sarīravayavā ussadā upacitamamsā etassāti
sattussado. Aṭṭhikoṭiyo paññāyantīti yojanā. **Nigūḷhasirājālehīti**
lakkhaṇavacanametanti tena nigūḷha-aṭṭhikoṭihītipi vuttameva hotīti.
Hatthapiṭṭhādīhīti ettha **ādi**-saddena amsakūṭakhandhakūṭānam saṅgahe
siddhe taṃ ekadesena dassento “**vaṭṭetvā -pa- khandhenā**”ti āha.
“**Silārūpakam viyā**”ti-ādinā vā nigūḷha-amsakūṭatāpi vibhāvitāyevāti
daṭṭhabbam.

Sīhassa pubbaddham sīhapubbaddham, paripuṇṇāvayavatāya
sīhapubbaddham viya sakalo kāyo assāti sīhapubbaddhakāyo. Tenāha
“**sīhassa pubbaddhakāyo viya sabbo kāyo paripuṇṇo**”ti. **Sīhassevāti** sīhassa
viya. **Dussaṅṭhitavisāṅṭhito na hotīti** duṭṭhu saṅṭhito, virūpasāṅṭhito ca na
hoti, tesam tesam avayavānam ayuttabhāvena, virūpabhāvena ca saṅṭhiti
upagato na hotīti attho. **Saṅṭhantīti** saṅṭhahanti. **Dīghehīti** aṅgulināsādīhi.
Rassehīti gīvādīhi. **Thūlehīti**

ūrubbāhu-ādīhi. **Kisehīti** kesalomamajjhādīhi. **Puthulehīti** akkhihatthatalādīhi. **Vaṭṭehīti** jaṅghahatthādīhi.

Satapuññalakkhaṇatāya **nānacittena puññacittena cittito** sañjātacittabhāvo “īdiso eva Buddhānaṃ dhammakāyassa adhiṭṭhānaṃ bhavituṃ yutto”ti dasapāramīhi **sajjito** abhisankhato, “dānacittena puññacittena”ti vā pāḷho, dānavasena, sīlādivasena ca pavattapuññacittena attho.

Dvinnam koṭṭānam antaranti dvinnam piṭṭhibāhānaṃ vemajjham piṭṭhimajjhassa uparibhāgo. **Citam paripuṇṇanti** aninnabhāvena citam, dvīhi koṭṭehi samatalatāya paripuṇṇam. **Uggammāti** uggantvā, aninnam samatalam hutvāti adhippāyo. Tenāha “**suvaṇṇaphalakam viyā**”ti.

Nigrodho viya parimaṇḍaloti parimaṇḍalanigrodho viya parimaṇḍalo, “nigrodhaparimaṇḍalaparimaṇḍalo”ti vattabbe ekassa parimaṇḍalasaddassa lopaṃ katvā “**nigrodhaparimaṇḍalo**”ti vutto. Tenāha “**samakkhandhasākho nigrodho**”ti-ādi. Na hi sabbo nigrodho parimaṇḍaloti, parimaṇḍalasaddasannidhānena vā parimaṇḍalova nigrodho gayhatīti ekassa parimaṇḍalasaddassa lopena vināpi ayamattho labbhatīti āha “**nigrodho viya parimaṇḍalo**”ti. **Yāvatako assāti yāvatakvassa o-kārassa va-kārādesam katvā.**

Samavaṭṭitakkhandhoti samam suvaṭṭitakkhandho. Koñcā viya dīghagalā, bakā viya vaṅkagalā, varāhā viya puthulagalāti yojanā. **Suvaṇṇāliṅgasadisoti** suvaṇṇamayakhuddakamudiṅgasadiso.

Rasaggasaggīti madhurādibhedam rasam gasanti anto pavesantīti rasaggasā rasaggasānam aggā rasaggasaggā, tā etassa santīti **rasaggasaggī.** **Tenāti** ojāya apharaṇena hīnadhātukattā **te batvābādhā honti.**

Hanūti sannissayadantādhārassa samaññā, tam bhagavato sīhassa hanu viya, tasmā Bhagavā **sīhahanu.** Tattha yasmā Buddhānaṃ rūpakāyassa, dhammakāyassa ca upamā nāma hīnūpamāva, natthi samānūpamā, kuto adhikūpamā, tasmā ayampi hīnūpamāti dassetuṃ “**tatthā**”ti-ādi vuttam. Yasmā mahāpurisassa heṭṭhimānurūpavaseneva uparimampi saṅghitam, tasmā

vuttaṃ “**dvepi paripuṇṇānī**”ti, tañca kho na sabbaso parimaṇḍalatāya, atha kho tibhāgāvasesamaṇḍalatāyāti āha “**dvādasiyā pakkhassa candasadisānī**”ti. **Sallakkhetvāti** attano lakkhaṇasatthānusārena upadhāretvā. Dantānaṃ uccanīcatā abhantarabāhirapassavasena veditabbā, na aggavaseneva. Tenāha “**ayapaṭṭakena chinnaśaṅkhapaṭalaṃ viyā**”ti. **Ayapaṭṭakanti** ca kakacaṃ adhippetāṃ. **Samābhavissanti**, na visamā, samasaṅgāhānāti attho.

Sātisayaṃ mududīghaputhulatādippakāraguṇā hutvā bhūtā jātāti pabhūtā, bha-kārassa ha-kāraṃ katvā pahūtā jivhā etassāti **pahūtajivho**.

Vicchinditvā vicchinditvā pavattasaratāya **chinnassarāpi**. Anekākāratāya **bhinnassarāpi**. Kākassa viya amanuññasaratāya **kākassarāpi**. **Apalibuddhattāti** anupaddutavatthukattā, vatthūti ca akkharuppattiṭṭhānaṃ veditabbāṃ. **Aṭṭhaṅgasamannāgatoti** ettha aṅgāni parato āgamissanti. **Mañjughosoti** madhurassaro.

Abhinīlanettoti adhikanīlanetto, adhiatā ca sātisayaṃ nīlabhāvena veditabbā, na nettanīlabhāvasseva adhiabhāvatoti āha “**na sakalanīlanetto**”ti-ādi. Pītalohitavaṇṇā setamaṇḍalagatarājivasena. Nīlasetakāḷavaṇṇā pana taṃtaṃmaṇḍalavaseneva veditabbā.

“**Cakkhubhaṇḍanti** akkhidalan”ti keci. “**Akkhidalavaṭuman**”ti aññe. Akkhidalehi pana saddhiṃ akkhibimbanti veditabbāṃ. Evañhi viṇiggatagambhīrajotanāpi yuttā hoti. “**Adhippetan**”ti iminā ayamettha adhippāyo ekadesena samudāyupalakkhaṇāñāyenāti dasseti. Yasmā pakhuma-saddo loke akkhidalalomesu niruḷho, tenevāha “**mudusiniddhanīlasukhumapakhumācitāni akkhīnī**”ti.

Kiñcāpi uṇṇā-saddo loke avisesato lomariyāyo, idha pana lomavisesavācakoti āha “**uṇṇāloman**”ti. **Nalāṭavemajjhe jātāti** nalāṭamajjhagatā jātā. **Odātātāya upamā, na**

mudutāya. Uṇṇā hi tatopi sātisayaṃ mudutarā. Tenāha “**sappi maṇḍe**”ti-ādi. **Rajatapubbulaṅkanti** rajatamayātāarakamāha.

Dve atthavase paṭicca vuttanti yasmā Buddhā, cakkavattino ca paripuṇṇa nalāṭatāya, paripuṇṇasābimbatāya ca “**uṇḥīsasīsā**”ti vuccanti, tasmā te dve atthavase paṭicca “**uṇḥīsasīsō**”ti **idam vuttam**. Idāni tam atthadvayaṃ mahāpurise suppatiṭṭhitanti “**mahāpurisassa hi**”ti-ādi vuttam. Saṅhatamatāya, suvaṇṇavaṇṇatāya, pabhassaratāya, paripuṇṇatāya ca **rañño bandha-uṇḥīsapatto viya virocanti**. **Kapisīsāti** dvidhābhūtasīsā. **Phalāsīsāti** phalītasīsā. **Aṭṭhisīsāti** maṃsassa abhāvato ativiya aṭṭhitāya, patanubhāvato vā taconaddha-aṭṭhimattasīsā. **Tumbasīsāti** lābusadisāsīsā. **Pabbhārasīsāti** piṭṭhibhāgena olambamānasīsā. **Purimanayenāti** paripuṇṇanalāṭatāpakkhena. **Uṇḥīsaveṭṭhitāsīsō viyāti** uṇḥīsapattena veṭṭhitāsīsapadeso viya. **Uṇḥīsam viyāti** chekena sippinā viracita-uṇḥīsamaṇḍalam viya.

Vipassīsamaññāvaṇṇanā

37. **Tassa vitthāro**ti tassa lakkhaṇapariggaṇhane nemittakānaṃ santappanassa vitthāro vitthārakathā. **Gabbhokkantiyaṃ** nimittabhūtasupinapaṭiḍḍigāhakasantappane **vuttoyeva**. **Niddosenāti** khārikaloṇikādidosarahitena. **Dhātiyoti** thaññāpāyikā dhātiyo. Tā hi dhāpentī thaññāṃ pāyentīti dhātiyo. “**Tathā**”ti iminā “saṭṭhin”ti padaṃ upasamharati, **sesāpīti** nhāpikā, dhārikā, parihārikāti imā tividhā. Tāpi dahanti vidahanti nhānaṃ dahanti dhārentīti “dhātiyo”tveva vuccanti. Tattha **dhāraṇaṃ** urasā, ūrunā, hatthehi vā suciraṃ velam sandhāraṇaṃ. **Pariharaṇaṃ** aññassa aṅkato attano aṅkaṃ, aññassa bāhuto attano bāhuṃ upasamharantehi **haraṇaṃ** sampāpanaṃ.

38. **Mañjussaroti** saṅhassaro. Yo hi saṅho, so kharo na hotīti āha “**akharassaro**”ti. **Vaggussaroti** manorammassaro, manorammatā cassa cāturiyane puññayogatoti āha “**chekanipuṇassaro**”ti. **Madhurassaroti** sotasukhassaro, sotasukhatā cassa ativiya iṭṭhabhāvenāti āha “**sātassaro**”ti.

Pemaṇīyassaroti piyāyitabbassaro, piyāyitabbatā cassa suṇantānaṃ attani bhattisamuppādanenāti āha “**pemajanakassarō**”ti. ¹**karavikassaroti** karavikasaddo¹. Yesaṃ sattānaṃ sotapathamupagacchati, te attano sarasampattiyā pakatiṃ jahāpetvā avase karonto attano vase vatteti, evaṃmadhuroti dassento “**tatridan**”ti-ādimāha. Tattha “**karavikasakuṇe**”ti-ādi tassa sabhāvakaṭṭhānaṃ. **Lalītantī** pīvegasamuṭṭhitāṃ līlāṃ. **Chaddetvāti** “saṅkharāṇampi² madhurasaddasavanantarāyakaran”ti **tiṇāni** apanetvā. **Anikkhipitvāti** bhūmiyaṃ anikkhipitvā ākāśagameva katvā. **Anubaddhamigā** vālamigehi. Tato **maraṇabhayaṃ** hitvā. **Pakkhe pasāretvāti** pakkhe yathāpasārite katvā apatantā **tiṭṭhanti**.

Suvaṇṇapaṇjaraṃ vissajjesi yojanappamāṇe ākāse attano. Āṇāya pavattanato. Tenāha. “**So rājāṇāyā**”ti-ādi. **Lalīmsūti** lalītaṃ kātum ārabhiṃsu. **Taṃ pītinti** taṃ buddhaguṇārammaṇaṃ pītiṃ. Teneva nīhārena punappanaṃ pavattaṃ pītiṃ **avijahitvā** vikkhambhitakilesā therānaṃ santike laddhadhammassavanasappāyā upanissayasampattiyā paripakkañānatāya **sattahi -pa- patitṭhāsi**. Sattasatamattena orodhajanena saddhiṃ padasāva therānaṃ santikaṃ upagatatā “**sattahi jaṅghasatehi saddhin**”ti vuttaṃ. **Tatoti** karavikasaddato. **Satabhāgena -pa- veditabbo** anekakappakoṭisatasambhūtapuññasambhārasamudāgatavatthusampattibhāva to.

39. **Kammavipākajanti** sātisayasucaritakammanibbattaṃ pittasemharuhirādīhi apalibuddhaṃ dūrepi ārammaṇasampaṭicchanasamatthaṃ kammavipākena saha jātaṃ, kammaṃ vā vipākabhāvena jātaṃ pasādacakkhu. Duvidhañhi dibbacakkhukamma mayāṃ, bhāvanāmayanti. Tatridaṃ kammamayanti āha “**na bhāvanāmayan**”ti bhāvanāmayāṃ pana Bodhimūle uppajjissati. Ayaṃ “so”ti sallakkhaṇaṃ kāmāṃ manoviññāṇena hoti, cakkhuviññāṇena pana tassa tathā vibhāvitattā manoviññāṇassa tatha tathāpavattīti āha “**yenanimittaṃ -pa- sakkotī**”ti.

1-1. Ayaṃ pāṭho adhunā neva pāṭiyāṃ nāṭṭhakathāyaṃ dissati. 2. Saṅkhādanampi (?)

40. **Vacanattho** saddattho. **Nimīlananti** nimīlanadassanaṃ navisuddhaṃ, tathā ca akkhīni avivaṭāni nimīladassanassa navisuddhibhāvato. Tabbipariyāyato pana dassanaṃ visuddhaṃ, vivaṭaṅcāti āha “**antarantarā**”ti-ādi.

41. Nī-iti jānanatthaṃ dhātuṃ gahetvā āha “**panayati jānāti**”ti. Yato vuttaṃ “animittā na nāyare”ti, ¹“vidūbhi neyyaṃ naravarassā”ti² ca. Nī-iti pana pavattanatthaṃ dhātuṃ gahetvā “**nayati pavatteti**”ti. **Appamatto ahosi** tesu tesu kiccakaraṇīyesu.

42. Vassāvāso **vassaṃ** uttarapadalopena, tasmā vassaṃ, vasse vā sannivāsaphāsutāya arahatīti **vassiko**, pāsādo. Māsā pana vasse utumhi bhavāti vassikā. **Itaresūti** hemantikagimhikanti imesu. **Eseva nayoti** uttarapadalopena niddesaṃ atidisati.

Nāti-ucco hoti nātinīcoti gimhiko viya ucco, hemantiko viya nīco na hoti, atha kho tadubhayavemajjhalakkaṇatāya nāti-ucco hoti, nātinīco. **Assāti** pāsādassa. **Nātibahūnīti** gimhikassa viya na-atibahūni. **Nātitanūnīti** hemantikassa viya nakhuddakāni, tanutarajālāni ca. **Missakānevāti** hemantike viya na uṇhaniyāneva, gimhike viya ca nasītanīyāneva, atha kho ubhayamissakāneva. **Tanukānīti** naputhulāni. **Uṇhappavesanattāyāti** sūriyasantāpānuppavesāya. **Bhittiniyūhānīti** dakkhiṇapasse bhittīsu niyūhāni. **Siniddhanti** sinehavantaṃ, siniddhaggahaṇeneva cassa garukatāpi vuttā eva. **Kaṭukasannissitanti** tikaṭukādikaṭukadrabbūpasañhitā. **Udakayantānīti** udakadhārāvissandayantāni. Yathā jalayantāni, evaṃ himayantānīpi tattha karonti eva. Tasmā hemante viya himāni patantāniyeva hontīti ca veditabbaṃ.

Sabbaṭṭhānānīpiti sabbāni paṭikiriyaṅhānabhojanakīḷasaṅcaraṇādiṭṭhānānīpi, na nivāsaṭṭhānāniyeva. Tenāha “**dovārikāpi**”ti-ādi. Tattha kāraṇamāha “**rājā kirā**”ti-ādi.

Paṭhamabhāṇavāravaṇṇanā niṭṭhitā.

1. Visuddhi 1. 228; Saṃ-Ṭṭha 1. 39 piṭṭhesu.

2. Khu 10. 1 piṭṭhe Nettīyaṃ.

Jiṇṇapurisavaṇṇanā

44. **Gopānasivaṅkanti** vaṅkagopānasī viya. Vaṅkānañhi vaṅkabhāvassa nidassanattham avaṅkagopānasīpi gayhati. **Ābhoggavaṅkanti**-ādito paṭṭhāya abbhuggatāya kuṭīlasarīratāya vaṅkam. Tenāha “**khandhe**”ti-ādi. Daṇḍaparam daṇḍaggahaṇaparam ayanam gamanam etassāti **daṇḍaparāyanam**, daṇḍo vā param āyanam gamanakāraṇam etassāti **daṇḍaparāyanam**. Thānādisu daṇḍo gati avassayo etassa tena vinā appavattanatoti **daṇḍagatikam**, gacchati etenāti vā **gati**, daṇḍo gati gamanakāraṇam etassāti **daṇḍagatikam**. **Daṇḍapaṭisarānanti** etthāpi eseva nayo. **Jarāturanti** jarāya kilantam assavasam. **Yadā ratho purato hotīti** dvedhāpathe sampatte purato gacchante balakāye tatha ekaṃ saṅṭhānam āruḷho majjhe gacchanto bodhisattena āruḷho ratho itaram saṅṭhānam gacchanto yadā purato hoti. **Pacchā balakāyoti** tadā pacchā hoti sabbo balakāyo. **Tādise okāseti** tādise vuttappakāre maggappadese. **Tam purisanti** tam jiṇṇapurisam. **Suddhāvāsāti** siddhatthādīnam tiṇṇam sammāsambuddhānam sāsane brahmacariyam caritvā suddhāvāsabhūmiyam nibbattabrahmāno. Te hi tadā tatha tiṭṭhanti. “Kim paneso jiṇṇo nāmā”ti eso tayā vuccamāno kim atthato, tam me niddhāretvā kathehīti dasseti. Aniddhāritasarūpattā hi tassa attano Bodhisatto liṅgasabbanāmena tam vadanto “kin”ti āha. “Yathākim, te jātan”ti dvayameva hi loke yebhuyyato jāyati itthī vā puriso vā, tathāpi tam liṅgasabbanāmena vuccati, evamsampadamidaṃ veditabbam. “**Kim vuttam hoti**”ti-ādi tassa aniddhāritasarūpatamyeva vibhāveti.

“**Tena hī**”ti-ādi “ayaṅca jiṇṇabhāvo sabbasādhāraṇattā mayhampi upari āpattito evā”ti mahāsattassa samvijjanākāravibhāvanam ratham sāretīti **sārathi**. Kīḷāvihārattham uyyuttā yanti upagacchanti etanti **uyyānam**. **Alanti** paṭikkhepavacanam. **Nāmāti** garahaṇe nipāto “kathañhi nāmā”ti-ādīsu¹ viya. Jātiyā ādīnavadassanattham taṃmūlassa ummūlanam viya hotīti, tassa ca avassitabhāvato “**jātiyā**

1. Vi 1. 23, 26, 53, 54, 56, 90, 91; Vi 2. 1, 2, 7, 20 piṭṭhādīsu.

mūlaṃ khaṇanto nisīdī”ti āha. Siddhe hi kāraṇe phalaṃ siddhameva hotīti. Pīḷaṃ janetvā antotudanasena sabbapaṭṭhamāṃ hadayaṃ anupavissa ṭhitattā paṭṭhamena sallena hadaye viddho viya nisīdīti yojanā.

Byādhipurisavaṇṇanā

47. Pubbe vuttanayenevāti “suddhāvāsā kirā”ti-ādinā pubbe vutteneva nayena. **Ābādhikanti** ābādhavantāṃ. **Dukkhitanti** sañjātadukkhāṃ. **Ajātanti** ajātabhāvo, nibbānaṃ vā.

Kālakatapurisavaṇṇanā

50. Bhantanettakuppalādi vividhaṃ katvā lātabbato **vilāto**, vayhaṃ, sivikā cāti āha **“vilātanti sivikan”**ti. Sivikāya diṭṭhapubbattā Mahāsatto citakapañjaraṃ “sivikan”ti āha. **Ito paṭigatanti** ito bhavato apagataṃ. **Katakālanti** pariyosāpitaḷḷavanakālaṃ. Tenāha **“yattakan”**ti-ādi.

Pabbajitavaṇṇanā

53. Dhammaṃ caratīti **dhammacaraṇo**, tassa bhāvo **dhammacaraṇabhāvoti** dhammacariyameva vadati. **Evam ekekassa padassāti** yathā “sādhudhammacariyāti pabbajito”ti yojanā, evaṃ “sādhusamacariyāti pabbajito”ti-ādinā ekekassa padassa **yojanā veditabbā**. **Sabbānīti** “sādhudhammacariyā”ti-ādīsu āgatāni sabbāni dhammasamakusalapuñṇapadāni. **Dasakusalakammamathavevacanānīti** dānādīni dasakusaladhammapariyāyapadāni.

Bodhisattapabbajjāvaṇṇanā

54. Pabbajitassa dhammiṃ kathaṃ sutvāti sambandho. **Aññañca** saṅgīti-anāruḷhaṃ tena tadā vuttaṃ dhammiṃ kathanti yojanā. **“Varṇsovā”**ti padattayena dhammatā esāti dasseti. **Cirassaṃ cirassaṃ passanti** dīghāyukabhāvato. Tathā hi vuttaṃ “bahūnaṃ vassānaṃ -pa- accayenā”ti. **Tenevāti** nacirassaṃ diṭṭhabhāveneva. Acirakālantarikameva pubbakālakiriyaṃ dassento **“jiṇṇaṇca disvā -pa- pabbajitaṇca disvā, tasmā ahaṃ pabbajitomhi rājā”**ti

āha yathā “nhatvā vattham paridahitvā gandham vilimpitvā mālam piḷandhitvā bhutto”ti.

Mahājanakāya-anupabbajjāvaṇṇanā

55. “**Kasmā panethā**”ti-ādinā tesam caturāsītiyā pāṇasahassānam Mahāsatte sambhattatam, samvegabahulatañca dasseti, yato sutatṭhāneyeva ṭhatvā nātimittādisu kiñci anāmantetvā mattavaravāraṇo viya ayomayabandhanam ghanabandhanam chinditvā pabbajjam upagacchimsu.

Cattāro māse cārikam cari na tāva nāṇassa paripākagattā.

Yadā pana nāṇam paripākam gatam, tam dassento “**ayam panā**”ti-ādimāha. **Sabbeva ime** pabbajitā mama gamanam **jānissanti**, jānantā ca mam anubandhissanti adhippāyo. **Sannisīvesūti** sannisīnesu. **Saṇatevāti** saṇati viya saddam karoti viya.

Avivekārāmānanti anabhirativivekānam. **Ayam kāloti** ayam tesam pabbajitānam mama gamanassa ajānanakālo. **Nikkhamitvāti** paṇṇasālāya niggantvā, mahābhikkhamanam pana pageva nikkhanto. Pāramitānubhāvena uṭṭhitam upari devatāhi dibbapaccattharaṇehi supaññattampi mahāsattassa puññānubhāvena siddhattā tena paññattam viya hotīti vuttam “**pallaṅkam paññapetvā**”ti. “Kāmam taco ca nhāru ca, aṭṭhi ca avasissatū”ti-ādi¹nayappavattam **caturaṅgavīriyam adhiṭṭhahitvā**. **Vūpakāsanti** vivekavāsam.

Aññenevāti yattha Mahāpuriso tadā viharati, tato aññeneva disābhāgena. Kāmam Bodhimaṇḍo Jambudīpassa majjhe nābhiṭṭhāniyo tadā pana brahāraññe vivitte yogīnam paṭisallānasāruppo hutvā tiṭṭhati, tadañño pana jambudīpappadeso yebhuyyena bahujaṇo ākiṇṇamanusso iddho phīto ahoṣi. Tena te tam tam janapadadesam uddissa gatā “**antojambudīpābhimukhā cārikam pakkantā**”ti vuttā **antojambudīpābhimukhā**, na himavantādipabbatābhimukhāti attho.

1. Ma 2. 146; Saṃ 1. 266, 464; Am 1. 52; Am 3. 33; Khu 7. 50, 379 piṭṭhesu.

Bodhisatta-abhinivesavaṇṇanā

57. Kāmaṃ bhagavā buddho hutvā sattasattāhāni tattheva vasi, sabbapaṭhamamāṃ pana visākhapuṇṇamamāṃ sandhāya “**ekarattivāsaṃ upagatassā**”ti vuttamā. **Rahogatassāti** raho janavivittamā ṭhānam upagatassa, tena gaṇasaṅgaṇikābhāvena Mahāsattassa kāyavivekamāha. **Paṭisallīnassāti** nānārammaṇacārato cittassa nivattiyā pati sammadeva nilīnassa tattha avisaṭacittassa, tena cittasaṅgaṇikābhāvenassa pubbabhāgiyam cittavivekamāha. **Dukkanti** jāti-ādimūlakam dukkham. Kāmam cutūpapātāpi jātimaraṇāni eva, maraṇajātiyova “jāyati mīyati”ti pana vatvā “cavati upapajjati”ti vacanam na ekabhavapariyāpannānam nesam gahaṇam, atha kho nānābhavapariyāpannānam ekajjham gahaṇanti dassento āha “**idam dvayam -pa- vuttan**”ti. Kasmā pana lokassa kicchāpattiparivitakkane “jarāmaraṇassā”ti jarāmaraṇavasena niyamanam katanti āha “**yasmā**”ti-ādi. **Jarāmarāṇameva upatṭhāti-āditoti** adhippāyo. **Abhinivittassāti** āradhassa. Paṭiccasamuppādamukhena vipassanārambhe tassa jarāmarāṇato paṭṭhāya abhiniveso aggato yāva mūlam otaraṇam viyāti āha “**Bhavaggato otarantassa viyā**”ti.

Upāyamanasikārāti upāyena manasikaraṇato manasikārassa pavattanato. Idāni tam upāyamanasikārapariyāyam yonisomanasikāram sarūpato, pavatti-ākārato ca dassetum “**aniccādīni hī**”ti-ādi vuttam. **Yonisomanasikāro nāma hotīti** yāthāvato manasikārabhāvato. **Aniccādīnīti ādi**-saddena dukkhānatta-asubhādīnam gahaṇam. **Ayanti** “etadahosī”ti evam vutto “kimhi nu kho satī”ti-ādinayappavatto manasikāro. **Tesam aññataroti** tesu aniccādīmanasikāresu aññataro eko. Ko pana soti? Aniccamanasikārova, tattha kāraṇamāha “**udayabbayānupassanāvasena pavattatā**”ti. Yañhi uppajjati ceva cavati ca, tam aniccam udayavayaparicchinnatā addhuvanti katvā. Tassa pana tabbhāvadassanam yāthāvamanasikāratāya yonisomanasikāro. **Ito yonisomanasikārāti** hetumhi nissakkavacananti tassa iminā “**upāyamanasikārenā**”ti hetumhi karaṇavacanena atthamāha. **Samāgamo**

ahosīti yāthāvato paṭivijjhanavasena saṅgamo ahosi. **Kim pana tanti** kim pana taṃ jarāmarañakāraṇanti āha “**jāti**”ti. “Jātiyā khoti-ādīsu ayaṃ saṅkhepattho—kimhi nu kho sati jarāmarañam hoti, kim paccayā jarāmarañan”ti jarāmarañakāraṇam pariggaṇhantassa Bodhisattassa “yasmim sati yaṃ hoti, asati ca na hoti, taṃ tassa kāraṇan”ti evaṃ abyabhicārikāraṇapariggaṇhane “jātiyā kho sati jarāmarañam hoti, jātipaccayā jarāmarañan”ti yā jarāmarañassa kāraṇapariggāhikā paññā uppajjati, tāya uppajjantiyā samāgamo ahosīti. **Sabbapadānīti** “kimhi nu kho sati jāti hoti”ti-ādinā āgatāni jāti-ādīni viññāṇapariyosānāni nava vadāni.

Dvādasapadike paṭiccasamuppāde idha yāni dve padāni aggahitāni tesam aggahaṇe kāraṇam pucchivā vissajjetukāmo tesam gahetabbākāram tāva dassento “**ettha panā**”ti-ādimāha. Paccakkhabhūtam paccuppannabhavam paṭhamam gahetvā tadanantaram anāgataṃ “dutiyan”ti gahaṇe atīto tatiyo hotīti āha “**avijjāsaṅkhārā hi atīto bhavo**”ti. Nanu cettha anāgatassāpi bhavassa gahaṇam na sambhavati paccuppannavasena abhinivesassa jotitattāti? Saccametaṃ, kāraṇe pana gahite phalaṃ gahitameva hotīti tathā vuttanti daṭṭhabbam. Apicettha anāgatopi addhā atthato saṅgahito eva, yato parato “nāmarūpapaccayā saḷāyatanan”ti-ādinā anāgataddhasaṅgahitā desanā pavattā. **Tehīti** avijjāsaṅkhārehi ārammaṇabhūtehi. **Na ghaṭiyati** na sambajjhati. **Mahā -pa- abhiniviṭṭhoti** aghaṭane kāraṇamāha. **Adiṭṭhehīti** anavabuddhehi, itthambhūtalakkaṇe cetam karaṇavacanam. Sati anubodhe paṭivedhena bhavitabbanti āha “**na sakkā Buddhena bhavitun**”ti. **Imināti** mahāsattena. **Teti** avijjāsaṅkhārā. **Bhava-upādānataṇhāvasenevāti** bhava-upādānataṇhādassanavaseneva. **Diṭṭhā** taṃsabhāvataṃsahagatehi tehi samānayogakkhamattā. **Visuddhimagge**¹ **kathitāva**, tasmā na idha kathetabbāti adhippāyo.

58. **Paccayatoti** hetuto, saṅkhāratoti attho. “Kimhi nu kho sati jarāmarañam hoti”ti-ādinā hi hetuparamparāvasena phalaparamparāya

1. Visuddhi 2. 148 piṭṭhe.

vuccamānāya “kimhi nu kho sati viññāṇaṃ hotī”ti vicāraṇāya “saṅkhāre kho sati viññāṇaṃ hotī”ti viññāṇassa visesakāraṇabhūte saṅkhāre aggahite tato viññāṇaṃ paṭinivattati nāma, na sabbapaccayato. Tenevāha “nāmarūpe kho sati viññāṇaṃ hotī”ti¹, nāmampi cettha saha-jātādivaseneva paccayabhūtaṃ adhippetāṃ, na kammūpanissayavasena paccuppannavasena abhinivissassa jotitattā. **Ārammaṇatoti** avijjāsaṅkhārasaṅkhāta-ārammaṇato, atītabhava-saṅkhāta-ārammaṇato vā. Atītaddhāpariyāpannā hi avijjāsaṅkhārā. Yato paṭinivattamānaṃ viññāṇaṃ atītabhavatopi paṭinivattati nāma. **Ubhayampīti** paṭisandhiviññāṇampi vipassanāviññāṇampi. **Nāmarūpaṃ nātikkamatīti** paccayabhūtaṃ, ārammaṇabhūtaṃca nāmarūpaṃ nātikkamati tena vinā avattanato. Tenāha “**nāmarūpato paraṃ na gacchatī**”ti.

Viññāṇe nāmarūpassa paccaye honteti viññāṇe nāmassa, rūpassa, nāmarūpassa ca paccaye honte. **Nāmarūpe ca viññāṇassa paccaye honteti** tathā nāme, rūpe, nāmarūpe ca viññāṇassa paccaye honteti catuvokāra-ekavokārapañcavokārabhavavasena yathārahaṃ yojanā veditabbā, **dvīsūpi aññamaññapaccayesu hontesūti** pana pañcavokārabhavavaseneva. **Ettakenāti** evaṃ viññāṇanāmarūpānaṃ aññamañña-upatthambhanavasena pavattiyā. **Jāyetha vā -pa- upapajjetha vāti** “satto jāyati -pa- upapajjati vā”ti samaññā hoti viññāṇanāmarūpavinimuttassa sattapaññattiyā upādānabhūtassa dhammassa abhāvato. Tenāha “**Ito hī**”ti-ādi. **Etadevāti** viññāṇaṃ, nāmarūpanti etaṃ dvayameva.

Pañca padānīti “jāyetha vā”ti-ādīni pañca padāni. Nanu tattha paṭhamatatiyehi catutthapañcamāni atthato abhinnānīti āha “**saddhīm aparāparacutipāṭisandhīhi**”ti. **Puna taṃ etthāvatāti vuttamatthanti** yo “ettāvātā”ti padena pubbe vutto, tameva yathāvuttamattham “yadidan”ti-ādīnā **niyyātentō** nidassento puna **vatvā**. **Anulomapaccayākāravasenāti** paccayadhammadassanapubbakapaccayuppannadhammadassanavasena. Paccayadhammānañhi attano

1. Dī 2. 27 piṭṭhe.

paccayuppannessa paccayabhāvo idappaccayatāpaccayākāro, so ca “avijjāpaccayā saṅkhārā”ti-ādinā vutto. Saṁsārappavattiyā anulomanato **anulomapaccayākāro**. Jāti-ādikaṁ sabbaṁ vaṭṭadukkhaṁ cittena samihitena kataṁ samūhavasena gahetvā Pāḷiyāṁ “dukkhakkhandhassā”ti vuttanti āha “**jāti -pa- dukkharāsissā**”ti.

59. Dukkhakkhandhassa anekavāraṁ samudayadassanavasena viññāṇassa pavattattā “**samudayo samudayo**”ti āmeṭṭitavacanaṁ avoca. Atha vā “evaṁ samudayo hotī”ti idaṁ na kevalaṁ nibbattinidassanapadaṁ, atha kho paṭiccasamuppādasaddo viya samuppādamukhena idha samudayasaddo nibbattimukhena paccayattaṁ vadati. Viññāṇādayo bhavantā idha paccayadhammā niddiṭṭhā, te sāmāññarūpena byāpanicchāvasena gaṇhanto “samudayo samudayo”ti āha, evaṁ katvā yaṁ vakkhati “imasmiṁ sati idaṁ hotīti paccayasāñjānamattaṁ kathitaṁ”ti¹, taṁ samatthitaṁ hoti. Yadi evaṁ “udayadassanapaññāvesā”ti idaṁ kathanti? Nāyaṁ doso paccayato udayadassanamukhena nibbattilakkhaṇadassanassa sambhavato. **Dassanaṭṭhena cakkhūti** samudayassa paccakkhato dassanabhāvena cakkhu viyāti **cakkhu**. **Ñātakaraṇaṭṭhenāti** yathā samudayo sammadeva ñāto hoti avabuddho, evaṁ karaṇaṭṭhena. **Pajānanaṭṭhenāti** “viññāṇāditaṁtāmpaccayupattiyā etassa dukkhadukkhandhassa samudayo hotī”ti pakāro jānanaṭṭhena. **Nibbijjhivā paṭivijjhivā uppannaṭṭhenāti** anibbijjhivā pubbe udayadassanapaññāya paṭipakkhadhamme nibbijjhivā “ayaṁ samudayo”ti paccayato, khaṇato ca, sarūpato paṭivijjhivā uppannabhāvena, nibbijjhanaṭṭhena paṭivijjhanaṭṭhena vijjāti vuttaṁ hoti. **Obhāsaṭṭhenāti** samudayasabhāvapaṭicchādanakassa mohandhakārassa ca kilesandhakārassa ca vidhamanavasena avabhāsakabhāvena.

Idāni yathāvuttamatthaṁ paṭipāṭiyā vibhāvetuṁ “**yathāhā**”ti-ādi vuttaṁ. Tattha **cakkhuṁ udapādīti** pāḷiyāṁ paduddhāro. Kathaṁ udapādīti ceti āha “**dassanaṭṭhenā**”ti. “Samudayassa paccakkhato dassanabhāvenāti vuttovāyamatto. Iminā nayena sesapadesupi attho veditabbo. **Cakkhudhammoti** cakkhūti pāḷidhammo. **Dassanaṭṭho atthoti** dassanasabhāvo

1. Dī-Ṭṭha 2. 52 piṭṭhe.

tena pakāsetabbo attho. Sesesupi eseva nayo. **Ettakehi padehīti** imehi pañcahi padehi. **“Kim kathitan”**ti piṇḍattham pucchati.

Paccayasañjānanamattanti viññāṇādīnam paccayadhammānam nāmarūpādipaccayuppanassa paccayasabhāvasañjānanamattaṃ kathitaṃ avisesato paccayasabhāvasallakkaṇassa jotitattā. Saṅkhārānam sammadeva udayadassanassa jotitattā **“vīthipaṭipannā taruṇavipassanā kathitā”**ti ca vuttaṃ.

61. Attanā adhigatattā āsannapaccakkhatāya **“ayan”**ti vuttaṃ, ariyamaggādīnam magganatṭhena **maggoti**. Pubbabhāgavipassanā hesā. Tenāha **“bodhāyā”**ti. Bodhapadassa bhāvasādhanataṃ sandhāyāha **“catusaccabujjhanatthāyā”**ti. pariññāpahānabhāvanābhisamayā yāvadeva sacchikiriyābhisamayatthā nibbānādhighamatthattā brahmacariyavāsassāti vuttaṃ **“nibbānabujjhanatthāyā eva vā”**ti. “Nibbānam paramaṃ sukhaṃ”¹ hi vuttaṃ. **Bujjhatīti** cattāri ariyasaccāni ekapaṭivedhena paṭivijjhati, tena bodhasaddassa kattusādhanattamāha. **Paccattapadehīti** paṭhamāvibhattidīpakehi padehi. **Nibbānameva kathitaṃ** viññāṇādi nirujjhati etthāti katvā. **Anibbattinirodhanti** sabbaso paccayanirodhena anuppādanirodham accantanirodham.

62. **Sabbeheva etehi padehīti** “cakkhū”ti-ādīhi pañcahi padehi. **Nirodhasañjānanamattamevāti** “nirodho nirodhoti kho”ti-ādīnā nirodhassa sañjānanamattameva **kathitaṃ** pubbārambhābhāvato, na tassa paṭivijjhanavasena paccakkhato dassanaṃ ariyamaggassa anadhigatattā. Saṅkhārānam sammadeva nirodhadassanaṃ nāma sikhāppattāya vipassanāya vasena icchitabbanti **“vuṭṭhānagāminī balavavipassanā kathitā”**ti ca vuttaṃ.

63. **Viditvāti** pubbabhāgiyena ñāṇena jānitvā. **Tato aparabhāgeti** vuttanayena paccayanirodhajānanato pacchābhāge. **Upādānassa paccayabhūtesūti** catubbidhassapi upādānassa ārammaṇapaccayādīnā paccayabhūtesu, upādāniyesūti attho. **Vahantoti** pavattento. **Idanti** “aparena samayenā”ti-ādivacanāṃ. **Kasmā vuttanti** “yāya paṭipattiyā sabbepi Mahābodhisattā carimabhāve bodhāya paṭipajjanti, vipassanāya Mahābodhisattāna tatheva paṭipannan”ti kathetukamyatāvāsena pucchāvacanāṃ.

1. Ma 2. 176, 177; Khu 1. 43 piṭṭhesu.

Tenāha “**sabbeyeva hī**”ti-ādi. Tattha puttassa jātadivase mahābhinnikkhamanaṃ, padhānānuyogo ca dhammatāvasena vedītabbo, itaraṃ itikattabbatāvasena. Tatthāpi cirakālaparibhāvanāya laddhāsevanāya mahākaruṇāya sañcoditamānasattā “kicchāraṃ vatāyaṃ loko āpanno”ti-ādinā¹ saṃsāradukkhato mocetuṃ icchitassa sattalokassa kicchāpattidassanamukhena jarāmaraṇato paṭṭhāya paccayākārasammasanampi dhammatāva. Tathā attādhīnatāya, kenaci anupakhatattā, asecanakasukhavihāratāya, catutthajjhānikatāya ca ānāpānakammaṭṭhānānuyogo. **Pañcasu khandhesu abhinivisitvāti** viññānanāmarūpādipariyāyena gahitesu pañcasu upādānakkhandhesu vipassanābhinivesavasena abhinivisitvā paṭipattiṃ ārabhitvā. **Anukkamanti** anu anu gāmitabbato paṭipajjitabbato “anukkaman”ti laddhanāmaṃ anupubbapaṭipattiṃ. **Katvāti** paṭipajjitvā.

Iti rūpanti ettha dutiyo **iti**-saddo nidassanatto, tena paṭhamo **iti**-saddo sarūpassa, parimāṇassa ca bodhako anekatthattā nipātānaṃ, āvutti-ādivasena vāyamattho vedītabbo. Antogadhāvadhāraṇaṅca vākyāṃ dassento “**idaṃ rūpaṃ, ettakaṃ rūpaṃ, ito uddhaṃ rūpaṃ natthī**”ti-ādimāha. Tattha “**ruppanasabhāvan**”ti iminā sāmāññato rūpassa sabhāvo dassito, “**bhūtopādāyabhedan**”ti-ādinā visesato, tadubhayenapi “idaṃ rūpan”ti padassa attho niddiṭṭho. Tattha **lakkhaṇaṃ** nāma tassa tassa rūpavisesassa anaññasādhāraṇo sabhāvo. **Raso** tasseva attano phalaṃ pati paccayabhāvo. **Paccupaṭṭhānaṃ** tassa paramatthato vijjānānattā yāthāvato ñāṇassa gocarabhāvo. **Paḍaṭṭhānaṃ** āsannakāraṇaṃ, tenassa paccayāyattavuttitā dassitā. “**Anavasesarūpapariggaho**”ti iminā pana “ettakaṃ rūpaṃ, ito uddhaṃ rūpaṃ natthī”ti padadvayassāpi attho niddiṭṭho rūpassa sabbaso pariyādānavasena niyāmanato. “Iti rūpassa samudayo”ti ettha pana **iti**-saddo “iti kho bhikkhave sappatibhayo bālo”ti-ādīsu² viya pakāratthoti āha “**itī evan**”ti.

Avijjāsamudayāti avijjāya uppādā, atthibhāvāti attho. Nirodhanirodhī hi uppādo atthibhāvavācākopi hoti, tasmā

1. Dī 2. 26; Saṃ 1. 246, 251 piṭṭhesu.

2. Ma 3. 107; Am 1. 100 piṭṭhesu.

purimabhavasiddhāya avijjāya sati imasmim bhava rūpasamudayo, rūpassa uppādo hotīti attho. “**Tañhāsamudayā**”ti-ādīsupi eseva nayo.

Āhārasamudayāti ettha pana pavattipaccayesu kabaḷikārāhārassa balavatāya so eva gahito. Tasmim pana gahite pavattipaccayatāsāmaññena utucittāni

gahitāneva hontīti catusamuṭṭhānikarūpassa paccayato udayadassanaṃ

vibhāvitamevāti daṭṭhabbaṃ. “**Nibbattilakkhaṇaṃ**”ti-ādinā kālavasena

udayadassanamāha. Tattha **nibbattilakkhaṇanti** rūpassa uppādasaṅkhātāṃ

saṅkhatalakkhaṇaṃ. **Passantopī**ti na kevalaṃ paccayasamudayameva. Atha

kho khaṇato udayaṃ passantopi. Addhāvasena hi paṭhamaṃ udayaṃ

passitvā ṭhito puna santativasena disvā anukkamena khaṇavasena passati.

Avijjānirodhā rūpanirodhoti aggamaggena avijjāya anuppādanirodhato

anāgatassa rūpassa anuppādanirodho hoti paccayābhāve abhāvato.

Tañhānirodhā kammanirodhoti etthāpi eseva nayo. **Āhāranirodhā**ti

pavattipaccayassa kabaḷikārāhārassa abhāvena. **Rūpanirodhoti**

taṃsamuṭṭhānarūpassa abhāvo hoti. Sesam vuttanayameva.

“**Vipariṇāmalakkhaṇaṃ**”ti bhaṅgakālavasena hetam vayadassanaṃ, tasmā

taṃ addhāvasena paṭhamaṃ passitvā puna santativasena disvā anukkamena

khaṇavasena passati. Ayañca nayo pākatikavipassakavasena vutto,

Bodhisattānaṃ panetaṃ natthi. Esa nayo udayadassanepi.

“**Iti vedanā**”ti-ādīsupi heṭṭhā rūpe vuttanayānusārena attho vedītabbo.

Tenāha “**ayaṃ vedanā, ettakā vedanā**”ti-ādi. Tattha **vedayita -pa- sabhāvanti**

ettha “vedayitasabhāvaṃ -pa- vijānanasabhāvaṃ”ti paccekam **sabhāvasaddo**

yojetabbo. **Vedayitasabhāvanti** anubhavanasabhāvaṃ. **Sañjānanasabhāvanti**

“nīlaṃ pītaṃ”ti-ādinā ārammaṇassa sallakkhaṇasabhāvaṃ.

Abhisāṅkharāṇasabhāvanti āyūhanasabhāvaṃ. **Vijānanasabhāvanti**

ārammaṇassa upaladdhisabhāvaṃ. **Sukhādīti ādi-**saddena

dukkhasomanassadomanassupekkhāvedanānaṃ saṅgaho, **rūpasaññādīti ādi-**

saddena saddasaññādīnaṃ, **phassādīti ādi-**saddena cetanāvitakkādīnaṃ,

cakkhaviññāṇādīnanti ādi-saddena sabbesaṃ lokiyaviññāṇānaṃ saṅgaho.

Yathā ca viññāṇe, esa nayo vedanādīsipi.

Tesanti “samudayo”ti vuttadhammānaṃ. **Tīsu khandhesūti** vedanāsaññāsaṅkhārakkhandhesu. “Phuṭṭho vedeti, phuṭṭho sañjānāti, phuṭṭho ceteti”ti¹ vacanato “**phassasamudayā**”ti vattabbaṃ. “Nāmarūpapaccayāpi viññāṇaṇaṃ”ti² vacanato **viññāṇakkhandhe** “**nāmarūpasamudayā**”ti vattabbaṃ. **Tesaṃyevāti** tīsu khandhesu “phassassa viññāṇakkhandhe nāmarūpassā”ti phassanāmarūpānaṃ yeva **vasena atthaṅgamapadampi yojetabbaṃ**, avijjādayo pana rūpe vuttasadisā evāti adhippāyo.

Samapaññāsalakkaṇavaseṇāti paccayato vīsati khaṇato pañcāti pañcavīsatiyā udayalakkhaṇānaṃ, paccayato vīsati khaṇato pañcāti pañcavīsatiyā eva vayalakkhaṇānañcāti samapaññāsāya udayavayalakkhaṇānaṃ vasena. Tatha pañcannaṃ khandhānaṃ udayo lakkhīyati etehīti **lakkhaṇānīti** vuccanti avijjādisamudayoti, tathā tesāṃ anuppādanīrodho lakkhīyati etehīti **lakkhaṇānīti** vuccanti avijjādīnaṃ accantanīrodho. Nibbattivipariṇāmalakkhaṇāni pana saṅkhatalakkhaṇamevāti. Evametāni samapaññāsalakkaṇāni sarūpato vedītabbāni. **Yathānukkamena vaḍḍhiteti** yathāvutta-udayabbayañāṇe tikkhe sūre pasanne hutvā vahante tato paraṃ vattabbānaṃ bhaṅgaññādīnaṃ uppattiṭṭhāṇīyā buddhipatte paramukkaṃsagata **vipassanāñāṇe**. Pageva hi chattimsakoṭṭisatasahassamukhena pavattena sabbaññūtaññāṇānucchavikena mahāvajiraññāsaṅkhātena sammasanañāṇena sambhatānubhāvaṃ gabbhaṃ gaṇhantaṃ paripākāṃ gacchantaṃ paṭipadāvisuddhiñāṇaṃ aparimitakāle sambhatāya paññāpāramiyā ānubhāvena ukkaṃsapāramippattāṃ anukkamena vuṭṭhānagāminibhāvaṃ upagantvā yadā ariyamaggena ghaṭeti, tadā ariyamaggacittaṃ sabbakilesehi maggapaṭipāṇīyā vimuccati, vimuccantañca tathā vimuccati, yathā sabbañeyyāvaraṇappahānaṃ hoti. Yaṃ kilesānaṃ “savāsanappahānaṃ”ti vuccati, tayidaṃ pahānaṃ atthato anuppattinīrodhoti āha “**anuppādanīrodhena**”ti. **Āsavasaṅkhātehi kilesehīti** bhavato ā bhavaggaṃ, dhammato ā gotrabhuṃ savanato pavattanato āsavasaññītehi rāgo, diṭṭhi, mohoti imehi kilesehi. Lakkhaṇavacanañcetaṃ, pāṇīyaṃ yadidaṃ “āsavehī”ti, tadekaṭṭhatāya pana

1. Saṃ 2. 292 piṭṭhe.

2. Abhi 2. 149; Dī 2. 48 piṭṭhe.

sabbehipi kilesehi sabbehipi pāpadhammehi cittaṃ vimuccati. **Aggahetvā** tesāṃ kilesānaṃ lesamattampi aggahetvā.

Maggakkhaṇe vimuccati nāma taṃtaṃmaggavajjhakilesehi **phalakkhaṇe vimuttaṃ nāma. Maggakkhaṇe vā vimuttañceva vimuccati cāti** uparimaggakkhaṇe heṭṭhimamaggavajjhehi vimuttañceva yathāsakaṃ¹ pahātabbehi vimuccati ca. **Phalakkhaṇe vimuttamevāti** sabbasmimpi phalakkhaṇe vimuttameva, na vimuccati nāma.

Sabbabandhanāti orambhāgiyuddhambhāgiyasaṅgahitā sabbasmāpi bhavaśāññojanā, **vippamutto** visesato pakārehi mutto. **Suvikasitacittasantānoti** sātisayaṃ nāṇarasamisamphassaena suṭṭhu sammadeva samphullacittasantāno. “**Cattāri maggañāṇāni**”ti-ādi yehi nāṇehi suvikasitacittasantāno, tesāṃ ekadesena dassanaṃ. Nippadesato dassanaṃ pana parato āgamissati, tasmā tattheva tāni vibhajjissāma. **Sakale ca buddhaguṇeti** atītaṃse appaṭihatañāṇādike sabbepi Buddhaguṇe. Yadā hi lokanātho aggamaggaṃ adhigacchati, tadā sabbe guṇe hatthagate karoti nāma. Tato paraṃ “hatthagate katvā ṭhito”ti vuccati.

“Paripuṇṇasaṅkappo”ti vatvā paripuṇṇasaṅkappatāparidīpanaṃ udānaṃ dassetuṃ “**anekajātisamsāraṇ**”ti-ādi vuttaṃ. Tattha ādito dvinnaṃ gāthānaṃ attho heṭṭhā **Brahmajālanidānavañṇāyamaṃ**² vutto eva. Parato pana **ayoghanahatassāti** ayo haññati etenāti **ayoghanam**, kammārānaṃ ayokūṭaṃ, ayomuṭṭhi ca, tena ayoghanena hatassa pahatassa. **Eva**-saddo cettha nipātamattaṃ. **Jalato jātavedasoti** jalayamānassa aggissa, anādare vā etaṃ sāmivacanaṃ. **Anupubbūpasantassāti** anukkamena upasantassa vikkhambhantassa niruddhassa. **Yathā na ñāyate gatīti** yathā tassa gati na ñāyati. Idaṃ vuttaṃ hoti—ayomuṭṭhikūṭādinā pahatattā ayoghanena hatassa pahatassa ayogatassa, kamsabhājanādīgatassa vā jalamānassa aggissa anukkamena upasantassa dasasu disāsu na katthaci gati paññāyati paccayanirodhena appaṭisaṅdhaniruddhattāti. **Evaṃ sammāvimmuttānanti** sammā hetunā ñāyena

1. Yathākathaṃ (Ka)

2. Dī-Ṭī 1. 24 piṭṭhe.

tadaṅgavikkhambhanavimuttipubbaṅgamāya samucchedavimuttiyā ariyamaggena catūhipi upādānehi, āsavehi ca muttattā sammāvimuttānaṃ, tato eva kāmabandhanasaṅkhātāṃ kāmoghabhavoghādibhedāṃ avasiṭṭha-oghañca taritvā ʒhitattā **kāmabandhoghatārīnaṃ** suṭṭhu paṭipassambhitasabbakilesavipphanditattā kilesābhisāṅkhāravātehi akampanīyatāya **acalaṃ** nibbānasaṅkhātāṃ saṅkhārūpasamaṃ **sukhaṃ pattānaṃ** adhigatānaṃ khīṇāsavānaṃ **gati** devamanussādibhedāsu gatīsu “ayaṃ nāma”ti paññāpetabbatāya abhāvato **paññāpetuṃ natthi na** upalabbhati, yathāvuttajātavedo viya apaññattikabhāvameva te gacchantīti attho. **Evaṃ manasi karontoti** “evaṃ anekajāṭisamsāraṃ”ti-ādinā¹ attano katakiccattāṃ manasi karonto bodhipallaṅke nisinnova virocitthāti yojanā.

Dutiyabhāṇavāraṇṇanā niṭṭhitā.

Brahmayācanakathāvaṇṇanā

64. **Yannūnāti** parivitakkanatthe nipāto, **ahanti** bhagavā attānaṃ niddisatīti āha “**yadi panāhan**”ti. “**Aṭṭhame sattāhe**”ti-ādi yathā amhākaṃ Bhagavā abhisambuddho hutvā vimuttisukhapaṭisaṃvedanādivasena sattasu sattāhesu paṭipajji, tato parañca dhammagambhīratāpaccavekkhaṇādivasena, evameva sabbepi sammāsambuddhā abhisambuddhakāle paṭipajjimsu, te ca sattāhādayo tatheva vavatthapīyantīti ayaṃ sabbesampi buddhānaṃ dhammatā. Tasmā vipassī bhagavā abhisambuddhakāle tathā paṭipajjīti dassetuṃ āradhāṃ. Tattha “**aṭṭhame sattāhe**”ti idaṃ sattaṃsattāhato paraṃ, sattāhato orime ca pavattāya paṭipattiyā vasena vuttaṃ, na pallaṅkasattāhassa viya aṭṭhamassa nāma sattāhassa vavatthitassa labbhamānattā. **Anantaroti** “adhigato kho myāyaṃ dhammo”ti-ādiko² vitakko.

Paṭividdhoti sayambuñāṇena “idaṃ dukkhaṃ”ti-ādinā paṭimukhaṃ paṭivijjhanavasena pavatto, yathābhūtaṃ avabuddhoti attho. **Dhammoti** catusaccadhammo

1. Khu 1. 36 piṭṭhe Dhammapade.

2. Dī 2. 32; Ma 1. 224; Ma 2. 291; Saṃ 1. 138; Vi 3. 5, 7, 8 piṭṭhesu.

paccayabhāvo uppādanasamatthatā **idappaccayatā**, tena paramatthapaccayalakkhaṇo paṭiccasamuppādo dassito hoti. Paṭicca samuppajjati phalaṃ etasmāti **paṭiccasamuppādo**. Padadvayenāpi dhammānaṃ paccayaṭṭho eva vibhāvito. Tenāha “**saṅkhārādipaccayānaṃ avijjādīnaṃ etaṃ adhivacanaṃ**”ti. Ayamettha saṅkhepo, vitthāro pana **visuddhimaggasaṃvaṇṇanāsu**¹ vuttanayena vedītabbo.

Sabbasaṅkhārasamathoti-ādi sabbanti

sabbasaṅkhārasamathādīpadābhīdeyyaṃ sabbāṃ, atthato **nibbānameva**. Idāni tassa nibbānabhāvaṃ dassetuṃ “**yasmā hi**”ti-ādi vuttāṃ. **Tanti** nibbānaṃ. **Āgammāti** paṭicca ariyamaggassa ārammaṇapaccaya hetu. **Sammantīti** appaṭisandhikūpasamavasena sammanti. Tathā santā ca savisesaṃ upasantaṃ nāma hontīti āha “**vūpasammantī**”ti, etena sabbe saṅkhārā sammanti etthāti **sabbasaṅkhārasamatho**, nibbānanti dasseti. Sabbasaṅkhāravisāmyutte hi nibbāne sabbasaṅkhāravūpasamapariyāyo ñāyāgatoyevāti. Sesapadesupi eseva nayo. Upadhīyati ettha dukkhanti **upadhi**, khandhādayo. **Paṭinissatṭhāti** samucchēdavasena pariccattā **honti**. **Sabbā taṇhāti** aṭṭhasatappabhedā sabbāpi taṇhā. **Sabbe kilesarāgāti** kāmarāgarūparāgādībhedaṃ sabbepi kilesabhūtā rāgā, sabbepi vā kilesā idha kilesarāgāti vedītabbā, na lobhavesasā eva cittassa viparītabhāvāpādanato. Yathāha “rattampi cittaṃ vipariṇataṃ, duṭṭhampi cittaṃ vipariṇataṃ, mūḷhampi cittaṃ vipariṇataṃ”ti². **Virajantīti** attano sabhāvaṃ vijahanti. **Sabbāṃ dukkhanti** jarāmaṇādībhedaṃ sabbāṃ vaṭṭadukkhāṃ. **Bhavana bhavanti** tena tena bhavana bhavantaṃ. Bhavanikantībhāvena **sāmsibbati**, **phalena vā saddhīṃ kammaṃ** sataṇhasseva āyatīṃ punabbhavabhāvato. **Tato vānato nikkhantaṃ** tatha tassa sabbaso abhāvato. Ciranisajjācirabhāsaṃhi piṭṭhi-āgilāyanatālugalāsosādivasena **kāyakilamatho ceva kāyavihesā ca** vedītabbā. Sā ca kho desanāya atthaṃ ajānantānaṃ, appaṭipajjantānaṃ vasena, jānantānaṃ, pana paṭipajjantānaṃ desanāya kāyaparissamopi satthu aparissamova. Tenāha bhagavā “na ca maṃ dhammādhikaraṇaṃ vihesesī”ti³. Tathā hi vuttāṃ “**yā ajānantānaṃ desanā nāma, so mama kilamatho assā**”ti. **Ubhayanti** cittakilamatho,

1. Visuddhi 2. 148 piṭṭhe.

2. Vi 1. 174 piṭṭhe.

3. Khu 1. 86 piṭṭhe Udāne.

cittavihesā cāti **ubhayampetaṃ buddhānaṃ natthi**, bodhimūleyeva samucchinnatā.

65. **Anubrūhanaṃ** sampiṇḍanaṃ. **Soti** “apissū”ti nipāto. **Vipassinti** paṭisaddayogena sāmi-atthe upayogavacananti āha “**vipassissā**”ti. Vuddhippattā acchariyā vā **anacchariyā**. Vuddhi-atthopi hi akāro hoti yathā “asekkhā dhammā”ti¹. Kappānaṃ cattāri asaṅkhyeyyāni, sataśahassañca sadevakassa lokassa dhammasaṃvibhāgakaṛaṇatthameva pāramiyo pūretvā idāni samadhigatadhammarājassa tattha appossukkatāpattidīpanatā, gāthāthassa acchariyatā, tassa vuddhippatti cāti veditabbā. Atthadvārena hi gāthānaṃ anacchariyatā. **Gocarā ahesunti** upaṭṭhahimsu. Upaṭṭhānañca vitakketabbatā vāti āha “**parivitakkayitabbatāṃ pāpuṇimsū**”ti.

Yadi sukhāpaṭipadāva, kathaṃ kicchatāti āha “**pāramīpūraṇakāle**”ti-ādi. **Evamādīni** duppariccajāni **dentassa**. **Ha**-iti vā byattanti etasmim atthe nipāto, “ekamsatthe”ti keci. **Ha** byattaṃ, ekamsena vā, **alam** nippayojanaṃ evaṃ kicchenā adhigatassa dhammassa desetunti yojanā. **Halanti** “alan”ti iminā samānatthapadaṃ “halanti vadāmī”ti-ādīsu² viya. **Rāgadosaphuṭṭhehī** phuṭṭhavisena viya sappena rāgena, dosena ca samphuṭṭhehi abhibhūtehi. **Rāgadosānugatehī** rāgadosehi anubandhehi.

Niccādīnanti niccaggāhādīnaṃ. **Evam gatanti** evaṃ pavattaṃ aniccādi-ākārena pavattaṃ. “**Catusaccadhamman**”ti idaṃ aniccādīsu, saccesu ca yathālābhavasena gahetabbaṃ. Evam gatanti vā evaṃ “aniccan”ti-ādīnaṃ abhinivisitvā mayā, aññehi ca sammāsambuddhehi gataṃ, ñātaṃ paṭividdhanti attho. **Kāmarāgena, bhavarāgena ca rattā** nīvaraṇehi nivutacittatāya, **diṭṭhirāgena rattā** viparītābhinivesena **na dakkhanti** yāthāvato imaṃ dhammaṃ nappaṭivijjhissanti. **Evam gāhāpetunti** “aniccan”ti-ādīnaṃ sabhāvena yāthāvato dhamme jānāpetuṃ. **Rāgadosaparetatāpi** nesaṃ sammūḷhabhāvenevāti āha “**tamokhandhena āvuṭṭā**”ti.

Dhammadesanāya appossukkatāpattiyā kāraṇaṃ vibhāvetuṃ “**kasmā panā**”ti-ādīnaṃ sayameva codanaṃ samuṭṭhāpeti. Tattha yathāyaṃ idāni

1. Abhi 1. 2 piṭṭhe.

2. Saṃ-Ṭī 1. 232 piṭṭhe passitabbaṃ.

dhammadesanāya appossukatāpatti sabbabuddhānaṃ
 āciṅṅasamāciṅṅadhammatāvasena, sabbabodhisattānaṃ ādito “kiṃ me
 aññātaveseṇā”ti-ādinā¹ mahābhinihāre attano cittassa samussāhanaṃ
 āciṅṅasamāciṅṅadhammatāvāti āha “**kiṃ me**”ti-ādi. Tattha **aññātaveseṇāti**
 sadevakaṃ lokaṃ unnādentō Buddhō ahutvā kevalaṃ Buddhānaṃ
 sāvakaḥāvūpagamanavasena aññātarūpena. Tividhaṃ kāraṇaṃ
 appossukatāpattiyā paṭipakkhassa balavabhāvo, Dhammassa
 paramagambhīratā, tattha ca Bhagavato sātisayaṃ gāravanti taṃ dassetuṃ
 “**tassa hī**”ti-ādi āradhānaṃ. Tattha **paṭipakkhā** nāma rāgādayo kilesā
 sammāpaṭipattiyā antarāyakarattā. Tesāṃ balavabhāvato ciraparibhāvanāya
 sattasantānato dubbisodhiyatāya te satte mattahatthino viya dubbalapurisaṃ
 ajjhottharivā anayabyasanaṃ āpādentā anekasatayojanāyāma vitthāraṃ
 sunicitaṃ ghanasannivesaṃ kaṇṭakaduggampi adhisenti.
 Dūrappahedaducchejjatāhi dubbisodhiyataṃ pana dassetuṃ “**athassā**”ti-ādi
 vuttaṃ. Tattha ca anto āmaṭṭhatāya **kañjikapuṇṇalābu**. Ciraparivāsikatāya
takkabharitacāṭi. Snehatintadubbalabhāvena **vasātelapītapilotikā**.
 Telamissitatāya **añjanamakkhitaḥatthā** dubbisodhaniyā vuttā. Hīnūpamā cetā
 rūpappabandhabhāvato, acirakālikattā ca malīnatāya, kilesasaṃkilesō eva
 pana dubbisodhaniyatāro anādikālikattā, anusayitattā ca. Tenāha
 “**atisaṃkiliṭṭhā**”ti. Yathā ca dubbisodhaniyatāya evaṃ
 gambhīraduddasaturanubodhānampi vutta-upamā hīnūpamāva.

Gambhīropi dhammo paṭipakkhavidhamanena supākaṭo bhaveyya,
 paṭipakkhavidhamanaṃ pana sammāpaṭipattipaṭibaddhaṃ, sā
 saddhammasavanādhīnā, taṃ satthari, dhamme ca pasādāyattaṃ. So visesato
 loke sambhāvanīyassa garukātabbassa abhipatthanāhetukoti panālikāya
 sattānaṃ dhammasampaṭipattiyā brahmayācanādinimittanti taṃ dassento
 “**apicā**”ti-ādimāha.

66. “Aññataro”ti appaññāto viya kiñcāpi vuttaṃ, atha kho pākaṭo
 paññātoti dassetuṃ “**imasmim cakkavāle jeṭṭhakamahābrahmā**”ti vuttaṃ.
 Mahābrahmabhavane **jeṭṭhakamahābrahmā**. So hi sakko

1. Khu 4. 310 piṭṭhe Buddhavaṃse.

viya kāmadevaloke, brahmaloke ca pākaṭo paññāto. Upakkilesabhūtaṃ appaṃ rāgādirajaṃ etassāti **apparajaṃ**, apparajaṃ akkhi paññācakkhu, yesaṃ te taṃsabhāvāti katvā **apparajakkhajātikā**ti imamatthaṃ dassetuṃ “**paññāmaye**”ti-ādīmāha. Appaṃ rāgādirajaṃ yesaṃ te taṃsabhāvā **apparajakkhajātikā**ti evamettha attho veditabbo. **Assavanatā**ti “sayam abhiññā”ti-ādīsu¹ viya karaṇe paccattavacananti āha “**assavanatā yā**”ti.

Dasapuññakiriyavattuvasenāti

dānādidasavidhvimuttipariṇāpaniyapuññakiriyavattūnaṃ vasena. Tenāha “**katādhikārā**”ti-ādi. **Papañcasūdanīyaṃ** pana “dvādasapuññakiriyavasenā”ti² vuttaṃ, taṃ dānādīsu saraṇagamana parahitapariṇāmanadvayapakkipanavasena vuttaṃ.

69. Garuṭṭhānīyesu gāravavasena garukarapatthanā **ajjhesanā**, sāpi-atthato patthanā evāti vuttaṃ “**yācanan**”ti. Padesavisayaññadassanaṃ hutvā Buddhānaṃyeva āveṇikabhāvato idaṃ ñāṇadvayaṃ “**Buddhacakkhū**”ti vuccatīti āha “**imesañhi dvinnam ñāṇanam Buddhacakkhūti nāman**”ti. **Tiṇṇam maggaññānanti** heṭṭhimānaṃ tiṇṇam maggaññānaṃ “**dhammacakkhū**”ti nāmaṃ catusaccadhammadassananti katvā dassanamattabhāvato. Yato tāni ñāṇāni vijjūpamābhāvena vuttāni, aggamaggaññānaṃ pana ñāṇakiccassa sikhāppattiyā dassanamattaṃ na hotīti “dhammacakkhū”ti na vuccatīti. Yato taṃ vajirūpamābhāvena vuttaṃ. **Vuttanayenevāti** “apparajakkhajātikā”ti ettha vuttanayeneva. Yasmā mandakilesā “**apparajakkhā**”ti vuttā, tasmā bahalakilesā “**mahārajakkhā**”ti veditabbā. Paṭipakkhavidhamanasamatthatāya **tikkhāni** sūrāni visadāni, vuttavipariyāyena **mudūni**. **Saddhādayo ākārāti** saddahanādippakāre vadati. **Sundarāti** kalyāṇā. **Sammohavinodanīyaṃ**pana”yesaṃ āsayādayo koṭṭhāsā sundarā, te svākārā”ti³ vuttaṃ, taṃ imāya atthavaṇṇanāya aññadatthu saṃsandati sametīti daṭṭhabbaṃ. Yato saddhāsampadādivasena ajjhāsayaṃ sundaratāti, tabbipariyāyato asundaratāti. Vasena ajjhāsayaṃ sundaratāti, tabbipariyāyato asundaratāti. **Kāraṇam** nāma paccayākāro, saccāni vā. **Paralokanti** samparāyaṃ. Taṃ dukkhāvahaṃ vajjaṃ viya bhayato passitabbanti vuttaṃ “**paralokañceva vajjaṃ bhayato passantī**”ti. Sampattibhavato vā aññattā vipattibhāvo “paraloko”ti vuttaṃ “**para -passantī**”ti.

1. Dī 1. 11, 166; Ma 1. 110, 355, 361 piṭṭhesu.

2. Ma-Ṭṭha 2. 83 piṭṭhe.

3. Abhi-Ṭṭha 2. 440 piṭṭhe.

Ayaṃ panettha pālīti ettha “apparajakkhā” dipadānaṃ atthavibhāvane ayaṃ tassa tathābhāvasādhakapāli. Saddhādīnañhi vimuttiparipācakadhammānaṃ balavabhāvo tappaṭipakkhānaṃ pāpadhammānaṃ dubbalabhāveneva hoti, tesañca balavabhāvo saddhādīnaṃ dubbalabhāvenāti vimuttiparipācakadhammānaṃ savisesaṃ atthitānatthitāvasena “apparajakkhā mahārajakkhā”ti-ādayo pālīyaṃ¹ vibhajitvā dassitā. Iti saddhādīnaṃ vasena pañca apparajakkhā, asaddhiyādīnaṃ vasena pañca mahārajakkhā. Evaṃ tikkhindriyamudindriyādayoti vibhāvitā paññāsa puggalā. Saddhādīnaṃ pana antarabhedena anekabhedā veditabbā. Khandhādayo eva lujjanapalujjanaṭṭhena **loko**, sampattibhavabhūto loko **sampattibhavaloko**, sugatisaṅkhāto upapattibhavo, sampatti sambhavati etenāti **sampattisambhavaloko**² sugatisaṃvattaniyo kammabhavo. Duggatisaṅkhāta-upapattibhavaduggatisaṃvattaniyakammabhavā **vipattibhavalokavipattisambhavalokā**.

Puna ekakadukādivasena lokaṃ vibhajitvā dassetuṃ “**eko loko**”ti-ādi vuttam. Āhārādayo hi lujjanapalujjanaṭṭhena lokoti. Tattha “**eko loko sabbe sattā āhāraṭṭhitikā**”ti³ yāyaṃ puggalādhiṭṭhānāya kathāya sabbasaṅkhārānaṃ paccayāyattavuttitā vuttā, tāya sabbo saṅkhāraloko eko ekavidho pakārantarassābhāvato. “**Dve lokā**”ti-ādīsupi iminā nayena attho veditabbo. Nāmaggaṇaṇena cetta nibbānassa aggaṇaṇaṃ tassa alokasabhāvattā. Nanu ca “āhāraṭṭhitikā”ti ettha paccayāyattavuttitāya maggaphalānampi lokatā āpajjatīti? Nāpajjati pariññeyyānaṃ dukkhasaccadhammānaṃ “idhaloko”ti adhippetattā. Atha vā na lujjati na palujjatīti yo gahito, tathā na hoti, so lokoti taṃgahaṇarahitānaṃ lokuttarānaṃ natthi lokatā. Upādānaṃ ārammaṇabhūtā khandhā **upādānakkhandhā**. Anurodhādivatthubhūtā lābhādayo **aṭṭhalokadhammā**. **Dasāyatanānīti** dasa rūpāyatanāni vivaṭṭajjhāsayaṃ adhippetattā. Tassa ca sabbaṃ tebhūmakakammaṃ garahitabbaṃ, vajjitabbañca hutvā upaṭṭhātīti vuttam “**sabbe abhisāṅkhārā vajjaṃ, sabbe bhavagāmikammā vajjaṃ**”ti.

1. Khu 9. 116 piṭṭhe Paṭisambhidāmagge.

2. Sampattisambhavo, loko (Ka)

3. Dī 3. 178; Am 3. 297, 300; Khu 9. 6, 117, 230 piṭṭhesu.

Yesam̄ puggalānam̄ saddhādayo mandā, te idha “assaddhā”ti-ādinā vuttā. Na pana sabbena sabbam̄ saddhādīnam̄ abhāvatoti apparajakkhadukādīsu pañcasu dukesu ekekasmim̄ dasa dasa katvā “**paññāsāya ākārehi imāni pañcindriyāni jānātī**”ti vuttam̄. Atha vā anvayato, byatirekato ca saddhādīnam̄ indriyānam̄ paropariyattam̄ jānātīti katvā tathā vuttam̄. Ettha ca apparajakkhādivasena āvajjantassa bhagavato te sattā puñjapuñjāva hutvā upaṭṭhahanti, na ekekā.

Uppalāni ettha santīti **uppalinī**, gacchopi jalāsayopi, idha pana jalāsayo adhippetoti āha “**uppalavane**”ti. Yāni udakassa antonimuggāneva hutvā pusanti vaḍḍhanti, tāni **antonimuggaposīni**. **Dīpitānīti** aṭṭhakathāyam̄ pakāsītāni, idheva vā “āññānipī”ti-ādinā dīpitāni. **Ugghaṭitaññūti** ugghaṭanam̄ nāma ñāṇugghaṭanam̄, ñāṇe ugghaṭitamatte eva jānātīti attho. Vipañcitam̄ vitthārameva attham̄ jānātīti **vipañcitaññū**. Uddesādīhi netabboti **neyyo**. **Saha udāhaṭavelāyāti** udāhāre dhammassa uddese udāhaṭamatte eva. **Dhammābhisamayoti** catusaccadhammassa ñāṇena saddhim̄ abhisamayo. **Ayam̄ vuccatīti** ayam̄ “cattāro satipaṭṭhānā”ti-ādinā¹ nayena saṅkhittena mātīkāya dīpiyamānāya desanānusārena ñāṇam̄ pesetvā arahattam̄ gaṇhitum̄ samattho “**puggalo ugghaṭitaññū**”ti vuccati. **Ayam̄ vuccatīti** ayam̄ saṅkhittena mātīkam̄ ṭhapetvā vitthārena atthe vibhajiyamāne arahattam̄ pāpuṇitum̄ samattho “**puggalo vipañcitaññū**”ti vuccati. **Uddesatoti** uddesahetu, uddisantassa, uddisāpentassa vāti attho. **Paripucchatoti** attham̄ paripucchantassa. **Anupubbena dhammābhisamayo hotīti** anukkamena arahattappatto hoti. **Na tāya jātiyā dhammābhisamayo hotīti** tena attabhāvena maggam̄ vā phalam̄ vā antamaso jhānam̄ vā vipassanam̄ vā nibbattetum̄ na sakkoti. **Ayam̄ vuccati puggalo padaparamoti** ayam̄ puggalo byañjanapadameva paramam̄ assāti “padaparamo”ti vuccati.

Yeti ye duvidhe puggale sandhāya vuttam̄ vibhaṅge².

Kammāvaraṇenāti pañcavidhena ānantariyakammena. **Vipākāvaraṇenāti** ahetukapaṭisandhiyā. Yasmā duhetukānampi ariyamaggapaṭivedho natthi, tasmā

1. Abhi 2. 200 piṭṭhādīsu. 2. Abhi-Ṭṭha 2. 442 piṭṭhe ñāṇavibhaṅga-aṭṭhakathāyam̄.

duhetukapaṭisandhipi “vipākāvaraṇamevā”ti veditabbā. **Kilesāvaraṇenā**ti niyatamicchādiṭṭhiyā. **Assaddhā**ti Buddhādīsu saddhārahitā. **Acchandikā**ti kattukamyatākusalacchandarahitā, uttarakurukā manussā acchandikaṭṭhānam pavitṭhā. Duppaññāti bhavaṅgapaññāya parihīnā, bhavaṅgapaññāya pana paripuṇṇāyapi yassa bhavaṅgam lokuttarassa paccayo na hoti, sopi duppañño eva nāma. **Abhabbā niyāmaṃ okkamituṃ kusalesu dhammesu sammattanti** kusalesu dhammesu sammattaniyāmasaṅkhātāṃ ariyamaggaṃ okkamituṃ adhigantuṃ abhabbā. “**Na kammāvaraṇenā**”ti-ādīni vuttavipariyāyena veditabbāni.

“**Rāgacaritā**”ti-ādīsu yaṃ vattabbaṃ, taṃ paramatthadīpaniyaṃ¹ Visuddhimaggasaṃvaṇṇanāyaṃ² vuttanayena veditabbaṃ.

70. **Ārabbhā**ti attano adhippetassa atthassa Bhagavato jānāpanaṃ uddissāti attho. Selo pabbato ucco hoti thiro ca, na paṃsupabbato, missakapabbato vāti āha “**sele yathā pabbatamuddhani**”ti. **Dhammamayaṃ pāsādanti** lokuttaradhammamāha. So hi pabbatasadiso ca hoti sabbadhamme atikkamma abbhuggataṭṭhena pāsādasadiso ca, paññāpariyāyo vā idha dhamma-saddo. Sā hi abbhuggataṭṭhena pāsādoti abhidhamme³ niddiṭṭhā. Tathā cāha—

“Paññāpāsādamāruyha, asoko sokiniṃ paṃsaṃ.

Pabbataṭṭhova bhūmaṭṭhe, dhīro bāle avekkhati”ti⁴.

“**Yathā hī**”ti-ādīsu yathā pabbate ṭhatvā rattandhakāre heṭṭhā oloketassa purisassa khetto kedārapālikuṭṭhiyo, tattha sayītanussā ca na paññāyanti anujjalabhāvato. Kuṭṭikāsu pana aggijālā paññāyati ujjalabhāvato, evaṃ dhammapāsādamāruyha sattalokaṃ olokayato bhagavato ñāṇassa āpātham nāgacchanti akatakalyāṇā sattā ñāṇagginā anujjalabhāvato, anujjalabhāvato ca rattiṃ khittā

1. Paramatthamañjūsāyaṃ visuddhimaggasaṃvaṇṇanāyanti bhavitabbaṃ—

“Sā esā paramatthānam, tattha tattha yathārahaṃ.

Nidhānato paramattha-mañjūsā nāma nāmato”ti—

Visuddhi-Ṭī 2. 535 piṭṭhe Visuddhimaggamahāṭikāya nigamane sayameva vuttattā.

2. Visuddhi-Ṭī 1. 121 piṭṭhe.

3. Abhi-Ṭī 1. 192 piṭṭhe.

4. Khu 1. 17 piṭṭhe Dhammapade.

sarā viya honti. Katakalyāṇā pana bhābbapuggalā dūre ʥitāpi Bhāgavato ṇāṇassa āpātham āgacchanti paripakkaṇāṇaggitāya samujjalabhavato, uḷārasantānatāya Himavantapabbato viya cāti evaṃ yojanā veditabbo.

Uḷḷhehīti tvam dhammadesanāya appossukkatāsaṅkhātasaṅkocāpattito kīlāsubhāvato uḷḷhāha. **Vīriyavantatāyāti** sātisayacatubbidhasammappadhānavīriyavantatāya. Vīrassa hi bhāvo, kammaṃ vā **vīriyam**. Kilesamārassa viya maccumārassapi āyatim asambhavato “**maccukilesamārānan**”ti vuttam. Abhisāṅkhāramāravijayassa aggahaṇam kilesamāravijayeneva tabbijayassa jotitabhāvato. **Vāhanasamatthatāyāti** saṃsāramahākantārato nibbānasaṅkhātā khemappadesam sampāpanasamatthatāya.

71. “Apārutam tesam amatassa dvāran”ti keci paḥanti. Nibbānassa dvāram pavisanamaggo vivarivā ʥhapito mahākaruṇūpanissayena sayambhuṇṇāṇena adhigatattā. **Saddham pamuṇcantūti** saddham pavedentu, attano saddahanākāram upaḷḷhāpentūti attho. Sukhena akicchena pavattanīyatāya **suppavattitam**. **Na bhāsim** na bhāsissāmīti cintesi.

Aggasāvakayugavaṇṇanā

73. **Sallapitvāti** “vipasannāni kho te āvuso indriyāni”ti-ādina¹ ālāpasallāpam katvā. Taṇhissa aparabhāge satthu santikam upasaṅkamanassa paccayo ahoṣi.

75-6. **Anupubbiṃ kathanti** anupubbiyā anupubbam kathetabbakatham. Kā pana sāti? Dānādikathā. Tattha **dānakathā** tāva pacurajanesu pavattiyā sabbasādhāraṇattā, sukarattā, sile patiḷḷhānassa upāyabhāvato ca ādito kathitā. Pariccāgasīlo hi puggalo pariggahavattūsu nissaṅgabhāvato sukheneva sīlāni samādiyati, tattha ca suppatiḷḷhito hoti. Sīlena dāyakaṇṇaḷḷakavisuddhito parānuggaham vatvā parapīḷānivattivacanato, kiriyadhammam vatvā akiriyadhamma vacanato,

1. Vi 3. 51, 52 piḷḷhe.

bhogasampattihetum vatvā bhavasampattihetuvacanato ca **dānakathānantaram sīlakathā** kathitā, tañce dānasīlam vaṭṭanissitam, ayam bhavasampatti tassa phalanti dassanattham, imehi ca dānasīlamayehi paṇītapañītataraḍibhedabhinnehi puññakiriyavatthūhi etā cātumahārājikādīsū paṇītapañītataraḍibhedabhinnā aparimeyyā dibbabhogabhavasampattiyo hontīti dassanattham **tadanantaram saggakatham** vatvā ayam saggo rāgādīhi upakkiliṭṭho, sabbadā anupakkiliṭṭho ariyamaggoti dassanattham **saggānantaram maggakathā** kathetabbā. Maggañca kathentena tadadhigamupāyadassanattham saggapariyāpannāpi, pageva itare sabbepi kāmā nāma batvādīnavā, aniccā, adhuvā, vipariṇāmadhammāti **kāmānam ādīnavo**, hīnā, gammā, pothujjanikā, anariyā, anatthasañhitāti tesam **okārolāmakabhāvo**, sabbepi bhavā kilesānam vatthubhūtāti **tattha samkilesa**, sabbaso kilesavippamuttam nibbānanti **nekkhamme ānisamsoca** kathetabboti ayamattho **maggantīti** ettha **iti**-saddena ādi-atthajotakena bodhitoti veditabban.

Sukhānam nidānanti diṭṭhadhammikānam, samparāyikānam, Nibbānapaṭisaṃyuttānañcāti sabbesampi sukhānam kāraṇam. Yañhi kiñci loke bhogasukham nāma, tam sabbam dānanidānanti pākaṭoyamattho. Yam pana tam jhānavipassanāmaggaphalanibbānapaṭisaṃyuttam sukham, tassāpi dānam upanissayapaccayo hotiyeva. **Sampattīnam mūlanti** yā imā loke padesarajjasirissariyasattaratanasamujjalacakkavattisampadāti evaṃpabhedā mānūsikā sampattiyo, yā ca cātumahārājādībheda dibbasampattiyo, yā vā panaññāpi sampattiyo, tāsam sabbāsam idam dānam nāma mūlam kāraṇam. **Bhogānanti** bhujjītabbatthena “**bhogo**”ti laddhanāmānam manāpiyarūpādīnam, tannissayānañca upabhogasukhānam. Avassayaṭṭhena **patiṭṭhā**. **Visamagatassāti** byasanappattassa. **Tānanti** rakkhā tato paripālanato. **Leṇanti** byasanehi paripāciyamānassa oliyanapadeso. **Gatīti** gantabbatthānam. **Parāyaṇanti** paṭisaraṇam. **Avassayoti** vinipatitum adento nissayo. **Ārammaṇanti** olubbhārammaṇam.

Ratanamaya sīhāsanasadisanti sabbaratanamayasattaṅgamahāsīhāsanasa disam mahaggham hutvā sabbaso vinipatitum appadānato.

Mahāpathavisadisam

gatagataṭṭhāne patiṭṭhāya labhāpanato. **Ālambanarajjusadisanti** yathā dubbalassa purisassa ālambanarajju uttiṭṭhato, tiṭṭhato ca upatthambho, evaṃ dānaṃ sattānaṃ sampattibhave uppattiyā, ṭhitiyā ca paccayabhāvato.

Dukkhanittharaṇaṭṭhenāti duggatidukkhanittharaṇaṭṭhena.

Samassāsaṇaṭṭhenāti lobhamacchariyādipaṭisattupaddavato sammadeva assāsaṇaṭṭhena. **Bhayaparittāṇaṭṭhenā**ti dāliddiyabhayato paripālaṇaṭṭhena.

Maccheramalādīhīti maccheralobhadosa-issāvivicikicchādiṭṭhi-ādicittamalehi.

Anupalittaṭṭhenāti anupakkiliṭṭhatāya. **Tesanti** maccheramalādīkacavarānaṃ.

Etehi eva **durāsadaṭṭhena**. **Asantāsaṇaṭṭhenā**ti anabhibhavanīyatāya santāsābhāvena. Yo hi dāyako dānapati, so sampatipi kutoci na bhāyati, pageva āyatim. Dhammasīsenā puggalo vutto. **Balavantaṭṭhenā**ti

mahābalavatāya. Dāyako hi dānapati sampati pakkhabalena balavā hoti, āyatim pana kāyabalādīhipi. **Abhimaṅgalasammataṭṭhenā**ti

“vaḍḍhikāraṇaṃ”ti abhisammatabhāvena. Vipattibhavato

sampattibhavūpanayanaṃ **khemantabhūmisampāpanaṃ**, bhavaṅgāmato yogakkhemasampāpanaṅca **khemantabhūmisampāpanaṭṭho**.

Idāni dānaṃ vaṭṭagatā ukkaṃsappattā sampattiyo viya vivaṭṭagatāpi tā sampādetīti bodhicariyabhāvenapi dānaguṇe dassetuṃ “**dānañhī**”ti-ādi vuttaṃ. Tattha sakkamābrahmasampattiyo attahitāya eva, cakkavattisampatti pana attahitāya, parahitāya cāti dassetuṃ sā tāsāṃ parato vuttā, eṭā lokiyā, imā pana lokuttarāti dassetuṃ tato paraṃ

“**sāvakaṇāpāramīṇāṇaṃ**”ti-ādi vuttaṃ. Tatthāpi

ukkaṭṭhukkaṭṭhatarukkaṭṭhatamāti dassetuṃ kamena ñāṇattayaṃ vuttaṃ.

Tesaṃ pana dānassa paccayabhāvo heṭṭhā vutto eva. Etenevassa brahmasampattiyāpi paccayabhāvo dīpitoti veditabbo.

Dānaṅca nāma dakkhiṇeyyesu hitajjhāsayena vā pūjanajjhāsayena vā attano santakassa paresaṃ pariccajanaṃ, tasmā dāyako sattesu ekantahitajjhāsayo purisapuggalo, so “paresaṃ himsati, paresaṃ vā santakaṃ haratī”ti aṭṭhānametanti āha “**dānaṃ dadanto sīlaṃ samādātuṃ sakkotī**”ti. **Sīlasadiso alaṅkāro natthī**ti akittimaṃ hutvā sabbakālaṃ sobhāvisesāvahattā. **Sīlapupphasadisam pupphaṃ natthī**

etthāpi eseva nayo. **Silagandhasadiso gandho natthī**ti ettha “candanam tagaram vāpī”ti-ādikā¹ gāthā, “gandho isīnam ciradikkhitānam, kāyā cuto gacchati mālutenā”ti-ādikā² ca vattabbā. Sīlañhi sattānam ābharaṇaṇceva alaṅkāroca gandhavilepanaṅca parassa dassanīyabhāvāvahaṅca. Tenāha “**sīlālaṅkārena hī**”ti-ādi.

“**Ayam saggo labbhatī**”ti idaṃ majjhimehi chandādīhi āradham sīlam sandhāyāha. Tenāha sakko devarājā—

“Hīnena brahmacariyena, khattiye upapajjati.

Majjhimena ca devattam, uttamena visujjhatī”ti³.

Iṭṭhoti sukho, **kantoti** kamanīyo, **manāpoti** manavaḍḍhanako, tam panassa iṭṭhādibhāvam dassetum “**niccamettha kīlā**”ti-ādi vuttam. **Niccanti** sabbakālam. **Kīlāti** kāmūpasamhitā sukhavihārā. **Sampattiyoti** bhogasampattiyo. **Dibbanti** dibbabhavam devalokapariyāpannam. **Sukhanti** kāyikam, cetasikaṅca sukham. **Dibbasampattinti** dibbabhavam āyusampattim, vaṇṇayasa-issariyasampattim, rūpādisampattiṅca. **Evamādīti ādi**-saddena yāmādīhi anubhavitabham dibbasampattim vadati.

Appassādāti nirassādā paṇḍitehi yathābhūtam passantehi tattha assādetabbatābhāvato. **Bahudukkhāti** mahādukkhā sampati, āyatiṅca vipuladukkhānubandhattā. **Bahupāyāsāti** anekavidhaparissayā. **Etthāti** kāmesu. **Bhiyyoti** bahum. **Dosoti** aniccatādinā, appassādatādinā ca dūsitabhāvo, yato te viññūnam cittam nārādhenti. Atha vā ādinam vāti pavattatīti **ādīnavo**, paramakapaṇatā⁴, tathā ca kāmā yathābhūtam paccavekkhantānam paccupatiṭṭhanti. **Lāmakabhāvoti** nihīnabhāvo aseṭṭhehi sevītābattā, seṭṭhehi na sevītābattā ca. **Samkilissananti** vibādhētabbatā upatāpetabbatā. **Nekkhamme ānisaṃsanti** ettha yattakā kāmesu ādīnavā tappaṭipakkhato tattakā nekkhamme ānisaṃsā. Apica “nekkhammam nāmetam asambādam asamkiliṭṭham, nikkhamtam kāmehi, nikkhamtam kāmasaṅghāya, nikkhamtam kāmavitakkehi, nikkhamtam kāmāpariḷāhehi, nikkhamtam

1. Khu 1. 21; Khu 11. 317 piṭṭhesu.

3. Khu 6. 185 piṭṭhe Jātake.

2. Khu 6. 6 piṭṭhe Jātake.

4. Paramakāmaññatā (Ka)

byāpādato”ti-ādinā¹ nayena nekkhamme ānisaṃse pakāsesi, pabbajjāya, jhānādīsu ca guṇe vibhāvesi vaṇṇesi.

Vuttanayanti ettha yaṃ avuttanayaṃ “kallacitte”ti-ādi, tattha **kallacitteti** kammaniyacitte, heṭṭhā pavattitadesanāya assaddhiyādīnaṃ cittadosānaṃ vigatattā uparidesanāya bhājanabhāvūpagamanena kammakkhamacitteti attho. Assaddhiyādayo hi yasmā cittassa rogabhūtā tadā te vigatā tasmā arogacitteti attho. Diṭṭhimānādikilesavigamanena **muducitte**. Kāmacchandādivigamena **vinīvaraṇacitte**. Sammāpaṭipattiyaṃ uḷārapīti pāmojjayogena **udaggacitte**. Tattha saddhāsampattiya **pasannacitte**. Yadā ca bhagavā aññāsīti sambandho. Atha vā **kallacitteti** kāmacchandavigamena arogacitte. **Muducitteti** byāpādivigamena mettāvasena akathinacitte. **Vinīvaraṇacitteti** uddhaccakukkucavigamena vikkhepassa vigatattā tena apihitacitte. **Udaggacitteti** thinamiddhavigamena sampaggahitavasena alīnacitte. **Pasannacitteti** vicikicchāvigamena sammāpaṭipattiyaṃ adhimuttacitte, evampettha attho veditabbo.

“**Seyyathāpi**”ti-ādinā upamāvasena nesāṃ saṃkilesappahānaṃ, ariyamagguppādaṅca dasseti. **Apagatakālakanti** vigatakālakāṃ. **Sammadevāti** suṭṭhu eva. **Rajananti** nīlapītādiraṅgajātāṃ. **Paṭigaṇheyyāti** gaṇheyya pabhassaraṃ bhaveyya. **Tasmīmyeva āsaneti** tissaṃ eva nisajjāyaṃ, etena nesāṃ lahuvipassakatā, tikkhapaññatā, sukhaṭipadākhippābhīññatā ca dassitā hoti. **Virajanti** apāyagamaniyarāgarajādīnaṃ vigamena virajāṃ. Anavasesadiṭṭhi vicikicchāmalāpagamanena **vītamalaṃ**. Paṭhamamaggavajjhakilesarajābhāvena vā **virajāṃ**, pañcavidhadussīlyamalāpagamanena **vītamalaṃ**. **Dhammacakkhanti** brahmāyusutte² heṭṭhimā tayo maggā vuttā, Cūḷarāhulovāde³ āsavakkhayo. Idha pana sotāpattimaggo adhippeto. “**Yaṃ kiñci samudayadhammaṃ, sabbaṃ taṃ nirodhadhammaṃ**”ti tassa uppatti ākāradassananti. Nanu ca maggañāṇaṃ asaṅkhatadhammārammaṇaṃ, na saṅkhatadhammārammaṇanti? Saccametaṃ. Yasmā taṃ nirodhaṃ ārammaṇaṃ katvā kiccavasena sabbasaṅkhatāṃ paṭivijjhantaṃ uppajjati, tasmā tathā vuttaṃ.

“Suddhaṃ vatthanaṃ”ti nidassita-upamāyaṃ idaṃ upamāsaṃsandanaṃ—vatthanaṃ viya cittaṃ, vatthassa āgantukamalehi kiliṭṭhabhāvo viya cittaṃ rāgādimalēhi

1. Sārattha-Ṭī 3. 194 piṭṭhepi.

2. Ma 2. 334 piṭṭhe.

3. Ma 3. 324 piṭṭhe.

samkiliṭṭhabhāvo, dhovanasilā viya anupubbikathā, udakaṃ viya saddhā, uduke temetvā ūsagomayachārikābharehi kāḷakapadesa samucchinditvā vatthassa dhovanapayogo viya saddhāsinehena temetvā temetvā satisamādhīpaññāhi dose sithilī katvā sutādividhinā cittassa sodhane vīriyārambho, tena payogena vatthe nānākāḷakāpagamo viya vīriyārambhena kilesavikkhambhanam, raṅgajātam viya ariyamaggo, tena suddhassa vatthassa pabhassarabhāvo viya vikkhambhi takilesassa cittassa maggena pariyaodapananti. “Diṭṭhadhammā”ti vatvā dassanam nāma ñāṇadassanato aññampi atthīti tam nivattanattham **“pattadhammā”**ti vuttam. Patti ca ñāṇasampattito aññampi vijjatīti tato viśesadassanattham **“viditadhammā”**ti vuttam. Sā pana viditadhammatā dhammesu ekadesenāpi hotīti nippadesato viditabhāvaṃ dassetuṃ **“pariyogāḷhadhammā”**ti vuttam, tena nesam saccābhisambodhiṃyeva vibhāveti. Maggañāṇaṃhi ekābhisamayavasena pariññādīkiccam sādhetam nippadesatova catusaccadhammam samantato ogāhantam paṭivijjatīti. Sesam heṭṭhā vuttanayameva.

77. **Cīvaradānādīnī**ti cīvarādīparikkhāradānam¹ sandhāyāha. Yo hi cīvarādīke aṭṭha parikkhāre, pattacīvaremeva vā sotāpannādi-ariyassa, puthujjanasseva vā sīlasampannassa datvā “idam parikkhāradānam anāgate ehibhikkhubhāvāya paccayo hotū”ti patthanam paṭṭhapesi, tassa ca sati adhikārasampattiyam buddhānam sammukhībhāve iddhimayaparikkhāralābhāya samvattatīti veditabbam. **Vassasatikattherā viya ākappasampannāti adhippāyo.**

Sandassesīti suṭṭhu paccakkham katvā dassesi. **Idhalokatthanti** idhalokabhūtam khandhapañcakasaṅkhātam attham. **Paralokatthanti** etthāpi eseva nayo. **Dassesīti** sāmāññalakkhaṇato, salakkhaṇato ca dassesi. Tenāha **“aniccan”**ti-ādi. Tattha hutvā abhāvato **aniccanti dassesi.** Udayabbayapaṭipālanato **dukkhanti dassesi.** Avasavattanato anattāti dassesi. Ime ruppanādīlakkhaṇā pañcakkhandhāti rāsattṭhena **khandhe dassesi.** Ime cakkhādisabhāvā nissattanijjīvaṭṭhena aṭṭhārasa dhātuyoti **dassesī.** Imāni cakkhādisabhāvāneva dvārārammaṇabhūtāni dvādasa āyatanānīti **dassesī.**

1. Cīvarādi-aṭṭhaparikkhāradānam (Ka)

ime avijjādayo jarāmarañapariyosānā dvādasa paccayadhammā paṭiccasamuppādoti **dassesī**. Rūpakkhandhassa heṭhā vuttanayena paccayato cattāri, khaṇato ekanti imāni **pañca lakkhaṇāni dassesī**. **Tathāti** iminā “pañca lakkhaṇāni”ti padamā ākaḍḍhati. **Dassentoti** iti-saddo nidassanatto, evanti attho. **Nirayanti** aṭṭhamahāniraya soḷasa-ussadanirayappabhedam sabbaso nirayam **dassesī**. **Tiracchānayaninti** apadadvipadacatuppada bahuppada dibhedam migapasupakkhisarīsapādivibhāgam nānāvidham tiracchānalokam.

Pettivisayanti

khuppiṇāsikavantāsikaparadattūpajīvinijjhāmatanḥikādibhedabhinnam nānāvidham petasattalokam. **Asurakāyanti** kālakañcikasuranikāyam. Evam tāva duggatibhūtam paralokattham vatvā idāni sugati bhūtam vattum “**tiṇṇam kusalānam vipākan**”ti-ādi vuttam. Vehapphale subhakiṇṇeyeva saṅgahetvā asaṅṅīsu, arūpīsu ca sampattiyā dassetabbāya abhāvato duviñṇeyyatāya “**navannaṃ brahmalokānan**”tveva vuttam.

Gaṇhāpesīti te dhamme samādinne kārāpesi.

Samuttejanam nāma samādinnadhammānam yathā anupakārakā dhammā parihāyanti, pahīyanti ca, upakārakā dhammā parivaḍḍhanti, visujjhanti ca, tathā nesam ussāhuppādananti āha “**abhussāhesī**”ti. Yathā pana tam ussāhuppādanam hoti, tam dassetum “**idhalokatthañcevā**”ti-ādi vuttam. **Tāsetvā tāsetvāti** pariyaṭṭabhāvāpādanena tejetvā tejetvā. **Adhigatam viya katvāti** yesam katheti, tehi tamattham paccakkhato anubhuyyamanam viya katvā. Veneyyānañhi buddhehi pakāsiya māno attho paccakkhatopi pākāṭataro hutvā upaṭṭhāti. Tathā hi Bhagavā evam thomīyati—

“Ādittopi ayam loko, ekādasahi aggibhi.

Na tathā yāti samvegam, sammohapaliguṇṭhito.

Sutvādīnavasaññuttam, yathā vācam mahesino.

Paccakkhatopi buddhānam, vacanam suṭṭhu pākāṭan”ti.

Tenāha “**dvattimsakammakāraṇapañcavīsatimahābhayappabhedañhi**”ti-ādi. Dvattimsakammakāraṇāni “hatthampi chindanti”ti-ādinā¹

Dukkakkhandhasutte

1. Ma 1. 129 piṭṭhe.

āgatanayena veditabbāni. **Pañcaviṣatimahābhayāni** “jātibhayaṃ jarābhayaṃ byādhibhayaṃ maraṇabhayaṃ”ti-ādinā¹ tattha tattha sutte āgatanayena veditabbāni. **Āghātanabhaṇḍikā** adhikuṭṭanakāḷiṅgaram, yaṃ “accādhānan”tipi vuccati.

Paṭiladdhaguṇena codesīti “taṃtaṃguṇādhigamena ayampi tumhehi paṭiladdho, ānisaṃso ayampī”ti paccakkhato dassento “kiṃ ito pubbe evarūpaṃ atthī”ti codento viya ahoṣi. Tenāha **“mahānisaṃsaṃ katvā kathesi”**ti.

Tappaccayañcakilamathanti saṅkhārapavattihetukaṃ tasmim tasmim sattasantāne uppajjanakaparissamaṃ saṃvighātaṃ vihesaṃ. **Idhāti** heṭṭhā paṭhamamaggādhigamatthāya kathāya. Sabbasaṅkhārūpasamabhāvato **santaṃ**. Atittikaraparamasukhatāya **paṇītaṃ**. Sakalasaṃsāraḃyasanato tāyanatthena tāṇaṃ. Tato nibbindahadayānaṃ nilīyanaṭṭhānatāya **leṇaṃ**. **Ādi**-saddena gatipaṭisaraṇaṃ paramassāsoti evamādīnaṃ saṅgaho.

Mahājanakāyapabbajjāvaṇṇanā

80. Saṅghappahonakānaṃ bhikkhūnaṃ abhāvā **“saṅghassa aparipuṇṇattā”**ti vuttaṃ. Dve aggasāvakaḃ eva hi tadā ahesuṃ.

Cārikā-anujānanaḃvaṇṇanā

86. “Kadā udapādī”ti pucchāṃ “sambodhito”ti-ādinā saṅkhepato vissajjetva puna taṃ vitthārato dassetuṃ **“bhagavā kirā”**ti-ādi vuttaṃ. Pitu saṅgahaṃ karonto vihāsi sambodhito “satta saṃvaccharāni satta māse satta divase”ti ānetvā sambandho, taṅca kho veneyyānaṃ tadā abhāvato. **Kilañjehi** bahi **chādāpetvā, vattehi** anto **paṭicchādāpetvā, upari ca** vatthehi **chādāpetvā**, tassa heṭṭhā **suvaṇṇa -pa-** vitānaṃ **kārāpetvā**. **Mālāvacchaketi** pupphamālāhi vacchākārena veṭṭhite. **Gandhantareti** cāṭibharitagandhassa antare. **Pupphānīti** cāṭi-ādibharitāni jalajapupphāni ceva caṅkotakādibharitāni thalajapupphāni ca.

1. Khu 8. 240, 261 piṭṭhesu.

Kāmañcāyaṃ rājā Buddhapitā, tathāpi Buddhā nāma lokagaruno, na te kenaci vase vattetabbā, atha kho te eva pare attano vase vattenti, tasmā rājā “**nāhaṃ bhikkhusaṃghaṃ demī**”ti āha.

Dānamukhanti dānakaraṇūpāyaṃ, dānavattanti attho. **Na dāni me anuññātāti** idāni me dānaṃ na anuññātā, no na anujānantīti attho.

Paritassanaḥjīvanti dukkhajīvikā, dāliddiyanti attho.

Sabbesaṃ bhikkhūnaṃ pahosīti Bhagavato aṭṭhasaṭṭhi ca bhikkhusatasahassānaṃ bhāgato dātum pahosi, na sabbesaṃ pariyattabhāvena. Tenāha “**senāpatipi attano deyyadhammaṃ adāsī**”ti. **Jeṭṭhikaṭṭhāneti** jeṭṭhikadeviṭṭhāne.

Tatheva katvāti carapurise ṭhapetvā. **Sucinti** suddhaṃ. **Pañītanti** ulāraṃ bhāvanapuṃsakañcetaṃ “ekamantan”ti-ādīsu¹ viya. **Bhañjivāti** madditvā, pīletvāti attho. **Jātisappikhīrādīhiyevāti** antojātasappikhīrādīhiyeva, amhākaṃ eva gāvi-ādito gahitasappi-ādīhiyevāti attho.

90. Parāpavādaṃ, parāpakāraṃ, sītuṇhādibhedañca guṇāparādhaṃ khamati sahati adhvāsetīti **khanti**. Sā pana yasmā silādīnaṃ paṭipakkhadhamme savisesaṃ tapati santapati vidhamatīti **paramaṃ** uttamaṃ tapo. Tenāha “**adhivāsanakhanti nāma paramaṃ tapo**”ti. “Adhvāsanakhanti”ti iminā dhammanijjhānakkhantito viseseti. Titikkhanaṃ khamanaṃ **titikkhā**. Akkharacintakā² hi khamāyaṃ titikkhāsaddaṃ vaṇṇenti. Tenevāha “**khantiyā eva vevacanaṃ**”ti-ādi. **Sabbākārenāti** santapaṇītanipuṇasivakhemādinā sabbappakārena. **So pabbājito nāma na hoti** pabbājitaḥpadhammassa apabbājanato. **Tasseva** tatiyapadassa **vevacanaṃ** anattantaratā.

“**Na hī**”ti-ādinā tamevatthaṃ vivarati. **Uttamatthena paranti vuccati** para-saddassa seṭṭhavācakattā “puggalaparoparaññū”ti-ādīsu³ viya. **Paranti aññānaṃ**. Idāni parasaddaṃ aññāpariyāyameva gahetvā atthaṃ dassetum “**athavā**”ti-ādi vuttaṃ. **Malassāti** pāpamalassa. **Apabbājittatīti** anīhaṭṭatā

1. Vi 1. 1 piṭṭhe.

2. Pāṇinī 1. 2. 20 suttaṃ passitabbaṃ.

3. Am 2. 484; Khu 10. 152 piṭṭhesu.

anirākatattā. **Samitattā**ti nirodhitattā tesam pāpadhammānam. “**Samitattā hi pāpānam samaṇoti pavuccatī**”ti hi vuttam.

Apica Bhagavā bhikkhūnam pātimokkham uddisanto pātimokkhakathāya ca sīlapadhānattā sīlassa ca visesato doso paṭipakkhoti tassa niggaṇhanavidhim dassetum ādito “**khantī paramam tapo**”ti āha, tena aniṭṭhassa paṭihanānūpāyo vutto, titikkhāgahaṇena pana iṭṭhassa, tadubhayenapi uppannam ratim abhibhuyya viharatīti ayamatto dassitoti. Taṇhāvānassa vūpasamanato **nibbānam paramam vadanti buddhā**. Tattha khantiggahaṇena payogavipattiyā abhāvo dassito, titikkhāgahaṇena āsayavipattiyā abhāvo. Tathā khantiggahaṇena parāparādhasahatā, titikkhāgahaṇena paresu anaparajjhanā dassitā. Evaṃ kāraṇamukhena anvayato pātimokkham dassetvā idāni byatirekato tam dassetum “**na hī**”ti-ādi vuttam, tena yathā sattānam jīvitā voropanam, pāñiledḍḍudaṇḍādīhi vibādhanāṅca “parūpaghāto, paraviheṭṭhanan”ti vuccati, evam tesam mūlasāpateyyāvaharaṇam, dāraparāmasanam, viśamvādanam, aññamaññabhedanam, pharusavacanena mammaghaṭṭanam, niratthakavippalāpo, parasantakagijjhanam, ucchedavindanam, micchābhinivesanaṅca upaghāto, viheṭṭhanaṅca hotīti yassa kassaci akusalassa kammaṭṭhassa, kammaṭṭhassa ca karaṇena pabbajito, samaṇo ca na hotīti dasseti.

Sabbākusalassāti sabbassāpi dvādasākusalacittuppādasāṅgahitassa sāvajjadhammassa. Karaṇam nāma tassa attano santāne uppādananti tappaṭikkhepato akaraṇam “**anuppādanan**”ti vuttam. “**Kusalassā**”ti idam “etaṃ Buddhāna sāsanan”ti vakkhamānattā ariyamaggadhamme, tesaṅca sambhārabhūte tebhūmakakusaladhamme sambodhetīti āha “**catubhūmakakusalassā**”ti. **Upasampadā**ti upasampādanam, tam pana tassa samadhigamoti āha “**paṭilābho**”ti. **Cittajotananti** cittassa pabhassarabhāvakaraṇam sabbaso parisodhanam. Yasmā aggamaggasamaṅgino cittam sabbaso pariyodapīyati nāma, aggaphalakkhaṇe pana pariyodapitam hoti puna pariyodapetabba tāya abhāvato, iti pariniṭṭhitapariyodapanatam sandhāyāha “**taṃ pana arahattena hotī**”ti. **Sabbapāpam pahāya** tadaṅgādivasenevāti adhippāyo. “**Sīlasamvarenā**”ti hi iminā tebhūmakassāpi saṅgahe itarappahānānampi saṅgaho hotīti, evaṅca katvā sabbaggahaṇam samatthitam

hoti. **Samathavissanāhī**ti lokiya lokuttarāhi samathavipassanāhi. **Sampādetvā**ti nipphādetvā. Sampādanañcetta hetubhūtaḥi phalabhūtaḥi sahaajātāhipi, pageva purimasiddhāhīti daṭṭhabbāḥi.

Kassacīti hīnādīsu kassaci sattassa kassaci upavādassa, tena davakamyatāyapi upavadanaḥi paṭikkhipati. **Upaghātassa akaraṇanti** etthāpi “kassacī”ti ānetvā sambandho. **Kāyenā**ti ca nidassanamattametāḥi manasāpi paresāḥi anattacintanādivasena upaghātakaraṇassa vajjetabbatā. **Kāyenā**ti vā ettha arūpakāyassāpi saṅgaho daṭṭhabbo, na copanakāyakarajakāyānaḥi eva. **Pa atimokkhanti** pakārato ativiya sīlesu mukhyabhūtaḥi. **“Atipamokkhan”**ti tameva padaḥi upasaggabyattayena vadati. Evaḥi bhedato padavaṇṇanaḥi katvā tatvato vadati **“uttamasīlan”**ti. **“Pāti vā”**ti-ādinā pālanato rakkhaṇato ativiya mokkhanato ativiya mocanato pātimokkhanti dasseti “pāpā atimokkhetīti atimokkho”ti nimittassa kattubhāvena upacaritabbato. **Yo vā nanti** yo vā puggalo naḥi pātimokkhasamvarasīlam **pāti** samādiyitvā avikopento **rakkhati**, **taḥi** “pāti”ti laddhanāmaḥi pātimokkhasamvarasīle ṭhitāḥi **mokkhetīti pātimokkhanti** ayamettha saṅkhepo, vitthārato pana pātimokkhapadassa attho visuddhimaggasamvaṇṇanāyaḥi¹ vuttanayena veditabbo.

Mattaññutāti bhojane mattaññutā, sā pana visesato paccayasannissitasīlavasena gahetabbāti āha **“paṭiggahaṇaparibhogavasena pamāṇaññutā”**ti. Ājīvapārisuddhisīlavasenaḥi gayhamāne “pariyesanavissajjanavasena”tipi vattabbāḥi. **Saṅghaṭṭanavirahitanti** janasaṅghaṭṭana virahitaḥi, nirajanasambādhaḥi vivittanti attho. **Catupaccayasantoso dīpito** paccayasantosatāsāmaññena itaradvayassāpi lakkhaṇahāranayena jotitabhāvato. **“Aṭṭhasamāpattivasibhāvāyā”**ti iminā payo janadassanavasena yadatthaḥi vivittasenāsanasevanaḥi icchitaḥi, so adhiccittānuyogo vutto. Aṭṭha samāpattiyo cettha vipassanāya pādakabhūtaḥi adhippetā, na yā kācīti sakalassāpi adhiccittānuyogassa jotitabhāvo veditabbo.

1. Visuddhi-Ṭī 1. 39 piṭṭhe.

Devatārocanavaṇṇanā

91. **Ettāvātā**ti ettakena suttapadesena. Tatthāpi ca iminā -pa- kathanena suppaṭividdhabhāvaṃ pakāsetvāti yojanā. Ca-saddo byatirekattho, tena idāni vuccamānattham ullaṅgeti. **Ekamidāhanti** ekaṃ aham. **Idam**-saddo nipātamattam. **Ādi**-saddena “bhikkhave samayan”ti evamādipāṭho saṅgahito. Aham bhikkhave ekaṃ samayanti evampettha padayojanā.

Subhagavaneti subhagattā subhagam, sundarasirikattā, sundarakāmatā vāti attho. Subhagañhi taṃ sirisampattiyā, sundare cettha kāme manussā patthenti. Bahujanakantatāyapi taṃ **subhagam**. Vanayatīti **vanam**, attasampattiyā attani sineham uppādetīti attho. Vanute iti vā **vanam**, attasampattiyā eva “maṃ paribhuñjathā”ti satte yācati viyāti attho. Subhagañca taṃ vanañcāti subhagavanam, tasmim subhagavane. Aṭṭhakathāyaṃ pana kim iminā papañcenāti “**evamñāmakevane**”ti vuttam. Kāmaṃ sālarukkhopi “sālo”ti vuccati, yo koci rukkhopi vanappatijetṭhakarukkhopi. Idha pana pacchimo eva adhippetoti āha “**vanappatijetṭhakassa mūle**”ti. **Mūlasamugghātavasenāti** anusayasamucchindanavasena.

Na **vihāyantī**ti akuppadhammatāya na vijahanti. “**Na kañci sattam tapantīti atappā**”ti idam tesu tassā samaññāya niruḷhatāya vuttam, aññathā sabbepe suddhāvāsā na kañci sattam tapantīti atappā nāma siyūm. “**Na vihāyantī**”ti-ādinibbacanesupi eseva nayo. **Sundaradassanāti** dassanīyāti ayamatthoti āha “**abhirūpā**”ti-ādi. **Sundarametesam dassananti** sobhanametesam cakkhunā dassanam, viññāṇena dassanampīti attho. **Sabbeveva -pa- jetṭhā** pañcavokārabhave tato viṣiṭṭhānam abhāvato.

Sattanam Buddhānam vassenāti sattanam Sammāsambuddhānam apadānavasena. Avihehi ajjhiṭṭhena ekena avihābrahmunā kathitā tehi sabbehi kathitā nāma hontīti vuttam “**tathā avihehī**”ti. Eseva nayo sesesupi. Tenāha bhagavā “devatā maṃ etadavocun”ti. Yam pana pāliyam “**anekāni devatāsatanī**”ti vuttam, taṃ sabbam pacchā attano

sāsane visesaṃ adhigantvā tattha uppannānaṃ vasena vuttaṃ.

Anusandhidvayampīti dhammadhātupadānusandhi,

devatārocanapadānusandhīti duvidhaṃ anusandhiṃ. **Niyyātentoti**

nigamento. Yaṃ panettha atthato avibhattaṃ, taṃ suviññeyyamevāti.

Mahāpadānasuttavaṇṇanāya līnaṭṭhappakāsānā.

2. Mahānidānasutta

Nidānavañṇanā

95. **Janapadinoti** janapadavanto, janapadassa vā issarasāmino **rājakumārā** gottavasena **kurū nāma**. Tesam nivāso yadi eko janapado, katham bahuvacananti āha “**ruḷisaddenā**”ti. Akkharacintakā¹ hi idisesu ṭhānesu yutte viya idisalingavacanāni icchanti. Ayamettha ruḷhi yathā aññatthāpi “Aṅgesu viharati, Mallesu viharatī”ti ca. Tabbisesanepi janapadasadde jātisadde ekavacanameva. **Aṭṭhakathācariyā panāti pana-**saddo visesatthajotano, tena “puthu-atthavisayatāya evetaṃ puthuvacanan”ti “bahuke panā”ti-ādina vakkhamānavisesam joteti. **Sutvāti** mandhātumahārājassa ānubhāvadassanānusārena paramparānugataṃ katham sutvā. **Anusarṇyāyantena**ti anuvarantena. **Etesam ṭhānanti** candimasūriyamukhena cātumahārājikabhavanamāha. Tenāha “**tattha agamāsi**”ti-ādi. **Soti** mandhātumahārājā. **Tanti** cātumahārājikarajjam. **Gahetvāti** sampañcchitvā. **Puna pucchi** pariṇāyakaratanam.

Dovārikabhūmiyam tiṭṭhanti sudhammāya, devasabhāya, devapurassa ca catūsu dvāresu ārakkhāya adhigatattā. “**Dibbarukkhasahassapaṭimaṇḍitan**”ti idaṃ “cittalatāvanan”ti-ādīsupi yojetabban.

Pathaviyam patitṭhāsīti bhassitvā pathaviyā āsannaṭṭhāne aṭṭhāsī. Na hi cakkaratanam bhūmiyam patati, tathāṭṭhitañca nacirasseva antaradhāyi tenattabhāvena cakkavatti-issariyassa abhāvato. “Cirataram kālam ṭhatvā”ti apare. **Rājā ekakova agamāsi** attano ānubhāvena. **Manussabhāvoti** manussagandhasarīranissandādimanussabhāvo. **Pāturahosīti** devaloke pavattivipākadāyino aparāpariyāya vedanīyassa kammassa katokāsattā sabbadā soḷasavassuddesikatā mālā’milāyanādi **dibbabhāvo** pāturahosi. Tadhā manussānam asaṅkhyeyyāyukatāya **sakkarajjam kāretvā**. “Kim me iminā upaddharajjenā”ti atricchatāya **atittova**. Manussaloke utuno kakkhaḷatāya **vātātapena phutthagatto kālamakāsi**.

1. Pāṇini 1. 2. 51 suttaṃ passitabban.

Avayavesu siddho viseso samudāyassa visesako hotīti ekampi raṭṭhaṃ bahuvacanena vohariyati.

Da-kārena atthaṃ vaṇṇayanti niruttinayena. **Kammāsoti kammāsapādo vuccati** uttarapadalopena yathā “rūpabhavo rūpan”ti. Kathaṃ pana so “kammāsapādo”ti vuccatīti āha “**tassa kirā**”ti-ādi. Damitoti ettha kīdisaṃ damanaṃ adhippetanti āha “**porisādabhāvato paṭisedhito**”ti. “**Ime pana therāti** majjhimabhāṇakā”ti keci. Apare pana “aṭṭhakathācariyā”ti, “dīghabhāṇakā”ti vadanti. Ubhayathāpi cūlakammāsadammaṃ sandhāya tathā vadanti. Yakkhiniputto hi kammāsapādo alīnasattukumārakāle¹ bodhisattena tattha damito. Sutasomakāle² pana bārāṇasirājā porisādabhāvapaṭisedhanena yattha damito, taṃ mahākammāsadammaṃ nāma. “**Putto**”ti vatvā “**atrajo**”ti vacanaṃ orasaputtabhāvadassanattthaṃ.

Yehi āvasitappadeso “kururaṭṭhan”ti nāmaṃ labhi, te uttarakuruto āgatamanussā tattha rakkhitaniyāmeneva pañca sīlāni rakkhimsu, tesaṃ diṭṭhānugatiyā pacchimaṇatātī so desadhammavasena avicchedato pavattamāno **kuruvattadhammoti** paññāyittha. Ayañca attho kurudhammajātakena dīpetabbo. So aparabhāge paṭthamaṃ yattha saṃkiliṭṭho jāto, taṃ dassetuṃ “**kururaṭṭhavāsīnan**”ti-ādi vuttaṃ. Yattha bhagavato vasanokāsabhūto koci vihāro na hoti, tattha kevalaṃ gocaragāmakittanaṃ nidānakathāya pakati yathā taṃ sakkesu viharati devadahaṃ nāma sakyānaṃ nigamoti imamatthaṃ dassento “**avasanokāsato**”ti-ādimāha.

“**Āyasmā**”ti vā “**devānaṃ piyā**”ti vā “**tatra bhavan**”ti vā piyasamudāhāro esoti āha “**āyasmāti piyavacanametana**”ti. Tayidaṃ piyavacanāṃ garugāravavasena vuccatīti āha “**gāravavacanametana**”ti.

Atidūra-accāsannavajjanena nātidūranāccāsannaṃ nāma gahitaṃ, taṃ pana avakāmsato ubhinnaṃ pasāritahatthānaṃ saṅghaṭṭhanaṃ vedittabbaṃ. **Cakkhunā cakkhuṃ āhacca datṭhabbaṃ hoti**, tenāpi agāravameva kataṃ hoti. **Gīvaṃ parivattetvāti** parivattanavasena gīvaṃ pasāretvā.

1. Khu 4. 405; Khu 5. 365 piṭṭhesu.

2. Khu 6. 131 piṭṭhe.

Kulasaṅgahatthāyāti kulānuddayatāvasena kulānaṃ anuggaṇhanatthāya **sahassa bhaṇḍikaṃ nikkhipanto viya** bhikkhapaṭiḅgaṇhanena tesam mahato puññābhisandassa jananena. **Paṭisammajjitvā**ti antevāsikehi sammajjanaṭṭhānaṃ sakkaccakāritāya puna sammajjitvā. **Tikkhattunti** “ādito paṭṭhāya antan”ti-ādinā vuttacaturākārūpasañhite tayo vāre, tenassa dvādasakkhattuṃ sammasitabhāvamāha.

Amhākaṃ Bhagavato gambhīrabhāveneva kathitattā sesabuddhehipi evameva kathitoti dhammanvaye ṭhatvā vuttaṃ “**sabbabuddhehi -pa-kathito**”ti. **Sā**lindanti saporibhaṇḍaṃ. “**Sineruṃ ukkhipanto viyā**”ti iminā tādīsāya desanāya sudukkarabhāvamāha. Suttameva “**suttantakathan**”ti āha dhammakhandhabhāvato. Yathā
vinayapaṇṇattibhūmantarasamayantarānaṃ vijānanaṃ anaññasādhāraṇaṃ Sabbaññutaññāsseva visayo, evaṃ antadvayavinimuttassa kārakavedakarāhitassa paccayākārassa vibhajanampīti dassetuṃ “**Buddhānañhi**”ti-ādi āradham. Tattha **ṭhānānī**ti kāraṇāni. **Gajjitam mahantaṃ hotī**ti taṃ desetabbasseva anekavidhatāya, duviññeyyatāya ca nānāyehi pavattamānaṃ desanāgajjitam mahantaṃ vipulaṃ, bahubhedāṅca hoti. **Ñāṇam anupavisatī**ti tato eva desanāñāṇaṃ desetabbadhamme vibhāgaso kurumānaṃ anu anu pavisati, tena anupavissa ṭhitaṃ viya hotīti attho. **Buddhañāṇassa mahantabhāvo paññāyatī**ti evaṃvidhassa nāma dhammassa desakaṃ, paṭivedhakañcāti Buddhānaṃ desanāñāṇassa, paṭivedhañāṇassa ca uḷārabhāvo pākaṭo hoti. Ettha ca kiñcāpi “sabbam vacīkammaṃ Buddhassa Bhagavato ñāṇapubbaṅgamaṃ ñāṇānuparivattan”ti¹ vacanato sabbāpi Bhagavato desanā ñāṇarahitā natthi, sīhasamānavuttitāya sabbattha samānappavatti. Desetabbavasena pana desanā visesato ñāṇena anupaviṭṭhā, gambhīratarā ca hotīti daṭṭhabbaṃ. Kathaṃ pana vinayapaññatthim patvā desanā tilakkhaṇabbhāhatā suññatapaṭisaṃyuttā hotīti? Tatthāpi sannisinnaparisāya ajjhāsayaṇurūpaṃ pavattamānā desanā saṅkhārānaṃ aniccatādivibhāvanaṃ, sabbadhammānaṃ attattaniyatābhāvappakāsanaṅca hoti. Tenevāha “anekapariyāyena dhammim kathaṃ katvā”ti-ādi.

1. Khu 7. 139, 278; Khu 8. 175; Khu 9. 376; Khu 10. 16 piṭṭhehi adhippāyamattameva gahitaṃ viya dissati.

Āpajjāti patvā yathā ñāṇakoṅcanādaṃ vissajjeti, evaṃ pāpuṇitvā.

Pamāṇātikkameti aparimāṇatthe “yāvañcidaṃ tena Bhagavatā”ti-ādīsu¹ viya. Aparimeyyabhāvajotano hi ayaṃ yāva-saddo. Tenāha “**atigambhīro** **attho**”ti. **Avabhāsa**tīti ñāyati upaṭṭhāti. Ñāṇassa tathā upaṭṭhānañhi sandhāya “**dissati**”ti vuttam. Nanu esa paṭiccasamuppādo ekantagambhīrova, tattha kasmā gambhīrāvabhāsataṃ jotitāti? Sacca metam, ekantagambhīratādassanathameva panassa gambhīrāvabhāsaḡgahaṇaṃ. Tasmā aññattha labbhamānaṃ catukoṭikaṃ byatirekamukhena nidassetvā tamevassa ekantagambhīrataṃ vibhāvetuṃ “**ekañhī**”ti-ādi vuttam. **Etaṃ natthī**ti agambhīro, agambhīrāvabhāso cāti etaṃ dvayaṃ natthi, tena yathādassite catukoṭike pacchimā ekakoṭi labbhatīti dasseti. Tenāha “**ayañhī**”ti-ādi.

Yehi gambhīrabhāvehi paṭiccasamuppādo “gambhīro”ti vuccati, te catūhi upamāhi ulliṅgento “**bhavaggaggahaṇāyā**”ti-ādimāha. Yathā Bhavaggaṃ hatthaṃ pasāretvā gahetuṃ na sakkā dūrabhāvato, evaṃ saṅkhārādīnaṃ avijjādipaccayasambhūtasamudāgataṭṭho pākātikañāṇena gahetuṃ na sakkā. Yathā sineruṃ bhinditvā miñjaṃ pabbatarasaṃ pākātikapurisena nīharituṃ na sakkā, evaṃ paṭiccasamuppādagate dhammatthādike pākātikañāṇena bhinditvā vibhajja paṭivijjhanavasena jānituṃ na sakkā. Yathā mahāsamuddaṃ pākātikapurisassa bāhudvayena padhārituṃ na sakkā, evaṃ vepullaṭṭhena mahāsamuddasadisam paṭiccasamuppādaṃ pākātikañāṇena desanāvasena padhārituṃ na sakkā. Yathā mahāpathaviṃ parivattetvā pākātikapurisassa pathavojaṃ gahetuṃ na sakkā, evaṃ “itthaṃ avijjādayo saṅkhārādīnaṃ paccayā hontī”ti tesam paccayabhāvo pākātikañāṇena nīharitvā gahetuṃ na sakkāti. Evaṃ catubbidhagambhīratāvasena catasso upamā yojetabbā. Pākātikañāṇavasena cāyamatthayojanā katā diṭṭhasaccānaṃ tattha paṭivedhasabhāvato, tathāpi yasmā sāvakānaṃ, Paccekabuddhānaṃca tattha sappadesameva ñāṇaṃ, Buddhānaṃyeva nippadesaṃ, tasmā vuttam “**Buddhavisayaṃ pañhan**”ti-ādi.

1. Dī 1. 2 piṭṭhe.

Ussādentoti paññāya ukkaṃsento, uggaṇhantoti attho. **Apasādentoti** nibbhacchanto, niggaṇhantoti attho.

Ussādanāvaṇṇanā

Tenāti mahāpaññabhāvena. **Tatthāti** therassa satipi uttānabhāve, paṭiccasamuppādassa aññesaṃ gambhīrabhāve. **Subhojanarasapuṭṭhassāti** sundarena bhojanarasena positassa. **Katayogassāti** nibaddhapayogena kataparicayassa. **Mallapāsāṇanti** mallehi mahabbaleheva ukkhipitabbapāsāṇaṃ. **Kuhim imassa bhāriyaṭṭhānanti** kasmim passe imassa pāsāṇassa garutarappadesoti tassa sallahukabhāvaṃ dīpento vadati.

Timirapiṅgaleneva dīpenti tassa mahāvippahārabhāvato. Tenāha “**tassa kirā**”ti-ādi. **Pakkuthatīti** pakkuthantaṃ viya parivattati parito vivattati. Lakkhaṇavacanañhetam. Piṭṭhiyaṃ sakalinapadakāpiṭṭham. **Kāyūpapannassāti** mahatā kāyena upetassa, mahākāyassāti attho.

Piñchavattīti piñchakalāpo. **Supaṇṇavātanti** nāgaggahaṇādīsu pakkhapaphoṭanavasena uppajjanakavātaṃ.

Pubbūpanissayasampattikathāvaṇṇanā

“Pubbūpanissayasampattiyā”ti-ādinā uddiṭṭhakāraṇāni vitthārato vivaritum “**ito kirā**”ti-ādi vuttam. Tattha itoti ito kappato. **Satasahassimeti** satasahassame. **Haṃsāvati nāma nagaraṃ ahosi** jātanagaraṃ. **Dhurapattānīti** bāhirapattāni, yāni dīghatamāni.

Kaniṭṭhabhātāti vemātikabhātā kaniṭṭho yathā amhākaṃ Bhagavato Nandatthero. Buddhānañhi sahodarā bhātaro nāma na honti. Kathaṃ jeṭṭhā tāva nuppajjanti, kaniṭṭhānaṃ pana asambhavo eva. **Bhoganti** vibhavaṃ. **Upasantoti** corajanitasankhobhavūpasamena upasanto **janapado**.

Dve sātake nivāsetvāti sātakadvayameva attano kāyaparihārikaṃ katvā itaraṃ sabbasambhāraṃ attato mocetvā.

Pattaggahaṇatthanti antopakkhitta-uṇhabhojanattā aparāparaṃ hatthe parivattentassa attaggahaṇattham. **Uttarisāṭakanti** attano uttarisāṭakaṃ.

Etāni pākaṭaṭṭhānānīti etāni yathāvuttāni Bhagavato desanāya pākaṭāni therassa puññakaraṇaṭṭhānāni.

Paṭisandhim gahetvāti amhākaṃ mahābodhisattassa paṭisandhiggaṇadivase eva paṭisandhim gahetvā.

Titthavāsādivaṇṇanā

Uggahaṇaṃ pāliya uggaṇhaṇaṃ. **Savanaṃ** atthasavanaṃ. **Paripucchaṇaṃ** gaṇṭhiṭṭhānesu atthaparipucchaṇaṃ. **Dhāraṇaṃ** pāliyāpi pāli-atthassapi citte ṭhapaṇaṃ. Sabbañcetaṃ idha paṭiccasamuppādasena veditabbaṃ.

Sotāpannā nañca -pa- upaṭṭhāti tattha sammohavidhamāsanena “yaṃ kiñci samudayadhammaṃ, sabbaṃ taṃ nirodhadhammaṃ”ti¹ attapaccakkhavasena upaṭṭhānato. **Nāmarūpaparicchedoti** saha paccayena nāmarūpassa paricchijja avabodho.

Paṭiccasamuppādagambhīratāvaṇṇanā

“Atthagambhīratāyā”ti-ādinā saṅkhepato vuttamatthaṃ vivarituṃ “**tatthā**”ti-ādi āradhmaṃ. **Jātipaccayasambhūtasamudāgataṭṭhoti** jātipaccayato sambhūtaṃ hutvā sahitassa attano paccayānurūpassa jarāmaṇassa uddhaṃ uddhaṃ āgatabhāvo, anupavattatthoti attho. Atha vā sambhūtaṭṭho ca samudāgataṭṭho ca **sambhūtasamudāgataṭṭho**. “Na jātito jarāmaṇaṃ na hoti, na ca jātiṃ vinā aññato hoti”ti hi jātipaccayasambhūtaṭṭho vutto, itthañca jātito samudāgacchatīti jātipaccayasamudāgataṭṭho, yā yā jāti yathā yathā paccayo hoti, tadanurūpapātubhāvoti attho. So anupacitakusalasambhārānaṃ ñāṇassa tattha appaṭiṭṭhatāya agādhaṭṭhena **gambhīro**. Sesapadesupi eseva nayo.

Avijjāya saṅkhārānaṃ paccayaṭṭhoti yenākārena yadavattā avijjā saṅkhārānaṃ paccayo hoti. Yena hi pavatti-ākārena, yāya ca avattāya avatthitā avijjā tesāṃ tesāṃ saṅkhārānaṃ paccayo hoti, tadubhayassapi duravabodhanīyato avijjā saṅkhārānaṃ navahi ākārehi

1. Dī 1. 102; Saṃ 3. 371; Vi 3. 16; Khu 8. 31, 34, 38, 40, 43, 66, 71, 75, 77 piṭṭhesu.

paccayaṭṭho anupacitakusalasambhārānam ñāṇassa tattha appaṭiṭṭhatāya agādhaṭṭhena **gambhīro**. Esa nayo sesapadesupi.

Katthaci anulomato desiyati, katthaci paṭilomatoti idha pana paccayuppādā paccayuppannuppādasāṅkhāto **anulomo**, paccayanirodhā paccayuppannanirodhasāṅkhāto ca **paṭilomo**, adhippeto. Ādito pana paṭṭhāya antagamanam **anulomo**, antato ca ādigamanam **paṭilomoti** adhippeto. Ādito paṭṭhāya anulomadesanāya, antato paṭṭhāya paṭilomadesanāya ca **tisandhi catusāṅkhepo**. “Ime bhikkhave cattāro āhārā kim nidānā”¹ ti-ādikāya¹ ca vemajjhato paṭṭhāya paṭilomadesanāya, “cakkhuñca paṭicca rūpe ca uppajjati cakkhuviññānam, tiṇṇam saṅgati phasso, phassapaccayā vedanā”² ti-ādikāya² anulomadesanāya ca **dvisandhi tisāṅkhepo**. “Saṃyojaniyesu bhikkhave dhammesu assādānupassino viharato taṇhā pavaḍḍhati, taṇhāpaccayā upādānan”³ ti-ādīsu³ **ekasandhi dvisāṅkhepo**. Ekaṅgo hi paṭiccasamuppādo desito. Labbhateva hi so “tatra bhikkhave sutavā ariyasāvako paṭiccasamuppādāmyeva sādhuṅkaṃ yoniso manasi karoti ‘iti imasmim sati idaṃ hoti -pa- nirujjhatī’⁴ ti. Sukhavedaniyam bhikkhave phassaṃ paṭicca uppajjati sukhavedanā”⁴ ti⁴ imassa suttassa vasena veditabbo⁵. Iti tena tena kāraṇena tathā tathā pavattetabbattā paṭiccasamuppādo desanāya gambhīro. Tenāha “**ayam desanāgambhīratā**”⁵ ti. Na hi tattha sabbaññutaññānato aññam ñāṇam paṭiṭṭham labhati.

“**Avijjāya panā**”⁵ ti-ādīsu jānanalakkhaṇassa ñāṇassa paṭipakkhabhūto avijjāya **aññāṇaṭṭho**. Ārammaṇassa paccakkhakaṇaṇena dassanabhūtassa paṭipakkhabhūto **adassanaṭṭho**. Yenesā attano sabhāvena dukkhādīnam yāthāvasarasam paṭivijjhitaṃ na deti chādetvā pariyonandhitvā tiṭṭhati, so tassā saccāsampañivedhaṭṭho. **Abhisāṅkharāṇam** samvidhānam, pakappananti attho. **Āyūhanam** sampañḍanam, sampayuttadhammānam attano kiccānurūpatāya rāsikaraṇanti attho. Apuññābhisaṅkhārekadeso **sarāgo**. Añño **virāgo**. Rāgassa vā appaṭipakkhabhāvato rāgappavaḍḍhako,

1. Sam 1. 253 piṭṭhe.

2. Sam 1. 311, 312 piṭṭhesu.

3. Sam 1. 312, 315 piṭṭhesu.

4. Sam 1. 321 piṭṭhe.

5. Vasenāti veditabbaṃ (?)

rāgupattipaccayo ca sabbopi apuññābhisaṅkhāro **sarāgo**. Itaro tabbidūrabhāvato **virāgo**. “Dīgharattaṃ hetam bhikkhave assutavato puthujjanassa ajjhositam mamāyitam parāmaṭṭham ‘etaṃ mama, eso hamasmi, eso me attā’¹ti¹ attaparāmāsassa viññāṇam visesato vatthu vuttanti viññāṇassa **suññataṭṭho** gambhīro. Attā vijānāti saṃsaratīti sabyāpārātāsāṅkanti abhinivesabalavatāya **abyāpāra-asaṅkantipaṭisandhipātubhāvaṭṭhā** ca gambhīrā. Nāmarūpassa paṭisandhikkhaṇe ekatova uppādo **ekuppādo**, pavattiyam visum visum yathāraham **ekuppādo**, nāmassa rūpena, rūpassa ca nāmena asampayogato **vinibbhogo**, nāmassa nāmena, rūpassa ca rūpena ekaccassa ekaccena **avinibbhogo**² yojetabbo. Ekuppādekanirodhehi avinibbhoge adhippete so rūpassa ca ekakalāpapavattino rūpena labbhatīti. Atha vā ekacatuvo kārabhavesu nāmarūpanam asahavattanato aññamaññam **vinibbhogo**, pañcavokārabhave sahavattanato **avinibbhogo ca** veditabbo.

Nāmassa ārammaṇābhīmukhanamanam **namanatṭho**. Rūpassa virodhipaccaya samavāye visadisuppatti **ruppanatṭho**. Indriyapaccayabhāvo **adhipatiyatṭho**. “Lokopeso, dvārāpesā, khettaṃpetan”³ti³ vuttalokādi-attho cakkhādīsu pañcasu yojetabbo. Manāyatanassa pana lujjanato, manosamphassādīnam dvārakhettabhāvato ca ete atthā veditabbā. Āpāthagatānam rūpādīnam pakāsanayogyatālakkaṇam obhāsanam cakkhādīnam **visayibhāvo**, manāyatanassa vijānanam. **Saṅghaṭṭanaṭṭho** visesato cakkhusamphassādīnam pañcannam, itare channampi yojetabbā. Phusanañca phassassa sabhāvo. Saṅghaṭṭanam raso, itare upaṭṭhānākārā. **Ārammaṇarasānubhavanaṭṭho** rasavasena vutto, **vedayatṭho** lakkaṇavasena. **Sukhadukkhamajjhattabhāvo** yathākkamam tissannam vedanānam sabhāvavasena vutto. “Attā vedayatī”³ti³ abhinivesassa balavabhāvato **nijjivattṭho** vedanāya gambhīro. Nijjivāya vā vedanāya vedayitam **nijjivavedayitam**, so eva atthoti **nijjivavedayatṭho**.

1. Saṃ 1. 319 piṭṭhe.

2. Nāmassa nāmena avinibbhogo (Mūlaṭī 2. 130 piṭṭhe.)

3. Abhi 1. 157 piṭṭhādīsu.

Sappītikataṇhāya **abhinanditaṭṭho**. Balavatarataṇhāya gilitvā pariniṭṭhāpanam **ajjhosaṇaṭṭho**. Itare pana jeṭṭhabhāva-osāraṇasamuddaduratikkama-apāripūrivasena veditabbā. **Ādānaggahaṇābhinivesaṭṭhā** catunnampi upādānānam samānā, **parāmāsaṭṭho** diṭṭhupādānādīnameva, tathā **duratikkamaṭṭho**. “Diṭṭhikantāro”¹ hi vacanato diṭṭhīnam duratikkamatā. Daḷhaggahaṇattā vā catunnampi **duratikkamaṭṭho** yojetabbo. **Yonigatithitivāsesukhipananti** samāse bhummavacanassa alopo daṭṭhabbo. Evañhi tena āyūhanābhisaṅkhāraṇapadānam samāso hoti. Yathā tathā jāyanam **jāti-attho**. Tassā pana sannipātato jāyanam **sañjāti-attho**. Mātukucchim okkamitvā viya jāyanam **okkanti-attho**. So jātito nibbattanam **nibbatti-attho**. Kevalam pātubhavanam **pātubhāvaṭṭho**.

Jarāmarāṇaṅgam maraṇappadhānanti tassa maraṇaṭṭhā eva **khayādayo** gambhīrāti dassitā. Uppannuppannānañhi navanavānam khayena kamena khaṇḍiccādiripakkapavattiyam loke jarāvohāroti. **Khayaṭṭho** vā jarāya vuttoti daṭṭhabbo. Navabhāvāpagamo hi “khayo”² ti vattum yuttoti. **Vipariṇāmaṭṭho** dvinnampi vasena yojetabbo, santativasena vā jarāya khayavayabhāvā, sammutikhaṇikavasena maraṇassa **bhedavipariṇāmaṭṭhā** yojetabbā. **Avijjādīnam sabhāvo** paṭivijjhīyatīti paṭivedho. Vuttañhetam **nidānakathāyam** “tesam tesam vā tattha tattha vuttadhammānam paṭivijjhitaṭṭho salakkhaṇasaṅkhāto aviparītasabhāvo paṭivedho”². So hi avijjādīnam sabhāvo maggañāṇeneva asamhapaṭivedhavasena paṭivijjhitaṭṭhato aññāṇassa alabbhaneyyapatiṭṭhatāya agādhaṭṭhena **gambhīro**. Sā sabbāpīti sā yathāvuttā saṅkhepato catubbidhā vitthārato anekappabhedā sabbāpi paṭiccasamuppādassa gambhīratā **therassa uttānakā viya upaṭṭhāsi** catūhi aṅgehi samannāgatattā. **Udāhu aññesampīti** “mayham tāva esa paṭiccasamuppādo uttānako hutvā upaṭṭhātī, kim nu kho aññesampi evam uttānako hutvā upaṭṭhātī”² ti **mā evam avaca** mayāva dinnanaye catusaccakammaṭṭhānavidhimhi ṭhatvā.

1. Abhi 1. 94 piṭṭhe.

2. Dī-Ṭṭha 1. 21; Abhi-Ṭṭha 1. 23 piṭṭhesu.

Apasādanāvannaṇā

Oḷārikanti vatthuvītikkamasamatthatāvasena thūlaṃ. Kāmaṃ kāmāragapaṭighāyeva atthato kāmāragapaṭighasaṃyojanāni, kāmāragapaṭighānusayā ca, tathāpi aññoyeva saṃyojanaṭṭho bandhanabhāvato añño anusayanaṭṭho appahīnabhāvena santāne thāmagamananti katvā, iti kiccavisesavisiṭṭhabhede gahetvā “**cattāro kilese**”ti ca vuttaṃ. Eseva nayo itaresupi. **Aṇusahagateti** aṇusabhāvaṃ upagate. Tabbhāvattho hi ayaṃ sahadagata-saddo “nandirāgasahagatā”ti-ādīsu¹ viya.

Yathā uparimaggādhigamanavasena saccasampaṭivedho paccayākārapaṭivedhavasena, evaṃ sāvaka bodhipacceka bodhisammāsambodhi-adhigamanavasena pi saccasampaṭivedho paccayākārapaṭivedhavasenevāti dassetuṃ “**kasmā cā**”ti-ādi vuttaṃ. **Sabbathāvāti** sabbappakārenea, kiñcipi pakāraṃ asesetvāti attho. Ye katābhinihāraṇaṃ mahābodhisattānaṃ vīriyassa ukkaṭṭhamajjhima mudutāvasena bodhisambhārasambharaṇe kālabhedā icchitā, te dassento “**cattāri, aṭṭha, soḷasa vā asaṅkhyeyyāni**”ti āha, svāyamattho **cariyāpiṭakavannaṇāya**² gahetabbo. **Sāvako padesañāṇe ṭhitoti** sāvako hutvā sekkhabhāvato tatthāpi padesañāṇe ṭhito. **Buddhānaṃ kathāya** “taṃ tathāgato abhisametī”ti-ādikāya **paccanīkaṃ hoti**. Anaññasādhāraṇassa hi vasena buddhānaṃ sīhanādo, na aññasādhāraṇassa.

“**Vāyamantassevā**”ti iminā visesato ñāṇasambhārasambharaṇaṃ paññāpāramitāpūraṇaṃ vadati. Tassa ca sabbampi puññaṃ upanissayo.

“Esa devamanussānaṃ, sabbakāmadado nidhi.

Yaṃ yadevābhīpatthenti, sabbametena labbhatī”ti³—

hi vuttaṃ. Tasmā mahābodhisattānaṃ sabbesampi puññasambhāro yāvadeva ñāṇasambhārattho sammāsambodhisamadhigamasamatthattāti āha

1. Dī 2. 246; Ma 1. 60, 84, 373; Ma 3. 293; Saṃ 3. 369; Vi 3. 15; Abhi 2. 106; Khu 9. 39, 330 piṭṭhesu.

2. Cariyāpiṭaka-Ṭṭha 320 piṭṭhe.

3. Khu 1. 10 piṭṭhe Khuddakapāṭhe.

“**paccayākāraṃ -pa- natthi**”ti. Idāni paccayākārapaṭivedhasseva vā mahānubhāvatādassanamukhena paṭiccasamuppādasseva paramagambhīratam dassetum “**avijjā**”ti-ādi vuttam. **Navahi ākārehīti** uppādādīhi navahi ākārehi. Avijjā hi saṅkhārānaṃ uppādo hutvā paccayo hoti, pavattam hutvā nimittam, āyūhanam, saṃyogo, palibodho, samudayo, hetu, paccayo hutvā paccayo hoti. Evaṃ saṅkhārādayo viññāṇādīnam. Vuttañhetam **paṭisambhidāmagge** “katham paccayapariggāhe paññā dhammaṭṭhitiñānam? Avijjā saṅkhārānaṃ uppādaṭṭhiti ca pavattaṭṭhiti ca nimittaṭṭhiti ca āyūhanaṭṭhiti ca saññogaṭṭhiti ca palibodhaṭṭhiti ca samudayaṭṭhiti ca hetuṭṭhiti ca paccayaṭṭhiti ca imehi navahākārehi avijjā paccayo saṅkhārā paccayasamuppannā”ti-ādi¹.

Tattha **navahākārehīti** navahi paccayabhāvūpagamanākārehi. Uppajjati etasmā phalanti **uppādo**, phaluppattiyā kāraṇabhāvo. Sati ca avijjāya saṅkhārā uppajjanti, nāsati, tasmā avijjā saṅkhārānaṃ uppādo hutvā paccayo hoti. Tathā avijjāya sati saṅkhārā pavattanti, nīyanti ca. Yathā ca bhavādīsu khipanti, evaṃ tesam avijjā paccayo hoti. Tathā āyūhanti phaluppattiyā ghaṭenti, saṃyujjanti attano phalena. Yasmiṃ santāne sayam uppannā, tam palibundhanti. Paccayantarasamavāye udayanti uppajjanti. Hinoti ca saṅkhārānaṃ kāraṇabhāvaṃ gacchati. Paṭicca avijjānaṃ saṅkhārā ayanti pavattantīti evaṃ avijjāya saṅkhārānaṃ kāraṇabhāvūpagamanavisesā uppādādayo veditabbā. Tattha tathā saṅkhārādīnam viññāṇādīsu uppādaṭṭhiti-ādīsūpi. Tiṭṭhati etenāti **ṭhiti**, kāraṇam. Uppādo eva **ṭhiti uppādaṭṭhiti**. Eseva nayo sesesūpi. “**Paccayo hoti**”ti idam idha lokanāthena tadā paccayapariggāhassa āradhabhāvādassanam. So ca ārambho nīyārūlho “yathā ca purimehi mahābodhisatthehi bodhimūle pavattito, tattheva ca pavattito”ti. Acchariyavegābhīhatā dasasahasilokadhātu saṅkampi sampakampīti dassento “**diṭṭhamattevā**”ti-ādimāha.

Etassa dhammassāti etassa paṭiccasamuppādasaññitassa dhammassa. So pana yasmā atthato hetupabhavānaṃ hetu. Tenāha “**etassa paccayadhammassā**”ti, jāti-ādīnam jarāmarāṇādipaccayatāyāti attho. Nāmarūpaparicchedo, tassa ca paccayapariggāho na paṭhamābhīnivesamattena

1. Khu 9. 48 piṭṭhe.

hoti, atha kho tattha aparāparam ñāṇupattisaññitena anu anu bujjanena, tadubhayābhāvaṃ pana dassento “**ñātapariññāvasena ananubujjanā**”ti āha. Niccasaññādīnam pajahanavasena vattamānā vipassanā dhamme ca paṭivijjhantī eva nāma hoti paṭipakkhavikkhambhanena tikkhavisadabhāvāpattito, tadadhiṭṭhānabhūtā ca tīraṇapariññā, ariyamaggo ca pariññāpahānābhisamayavasena pavattiyā tīraṇapahānapariññāsaṅgaho cāti tadubhayapaṭivedhābhāvaṃ dassento “**tīraṇa -pa- appaṭivijjhā**”ti āha. **Tantaṃ** vuccati vatthavinānatthaṃ tantavāyehi daṇḍake āsañjitvā pasāritasuttapaṭṭi tanīyatīti katvā. Taṃ pana suttasantānakulatāya nidassanabhāvena ākulameva gahitanti āha “**tantam viya ākulakajāta**”ti. Saṅkhepato vuttamatthaṃ vitthārato dassetuṃ “**yathā nāmā**”ti-ādi vuttam. **Samānetunti** pubbena paraṃ samaṃ katvā ānetuṃ, avisamaṃ ujum kātunti attho. Tantameva vā ākulaṃ **tantākulaṃ**, tantākulaṃ viya jāta bhūtāti **tantākulajāta**. Majjhimaṭṭhapaṭipadaṃ anupagantvā antadvayapatanena **paccayākāre khalitā ākulā byākulāhonti**. Teneva antadvayapatanena taṃtaṃdiṭṭhigāhavasena paribbhamantā ujukaṃ dhammaṭṭhikatham paṭipajjitum na jānanti. Tenāha “**na sakkonti taṃ paccayākāraṃ ujum kātun**”ti. **Dve Bodhisatteti** paccakabodhisattamahābodhisatte. **Attano dhammatāyāti** attano sabhāvena, paropadesena vināti attho. **Tattha tattha guḷakajātanti** tasmim tasmim ṭhāne jātaguḷakampi. **Gaṇṭhīti** suttagaṇṭhi. Tato eva **gaṇṭhibaddham** baddhagaṇṭhikam. **Paccayesu pakkhalitvāti** aniccadukkhānattādisabhāvesu paccayadhammesu niccādiggāhavasena pakkhalitvā. **Paccaye ujum kātum asakkontāti** tasseva niccādiggāhassa avissajjanato paccayadhammanimittam attano dassanam ujum kātum asakkontā idaṃsaccābhinivesakāyaganthavasena gaṇṭhikajāta hontīti āha “**dvāsaṭṭhi -pa- gaṇṭhibaddhā**”ti. **Ye hi keci** samaṇā vā brāhmaṇā vā sassatadiṭṭhi-ādidiṭṭhiyo **nissitā** allīnā.

Vinanato “kulā”ti itthiliṅgavasena laddhanāmassa tantavāyassa gaṇṭhikam nāma ākulabhāvena aggato vā mūlato vā duviññeyyāyeva khalitatantasuttanti āha “**kulāgaṇṭhikam vuccati pesakārakaññiyasuttan**”ti. **Sakuṇikāti** kulāvakasakuṇikā. Sā hi rukkhāsākhāsu

olambanakulāvaka¹ hoti. Tañhi sā kulāvakaṃ tato tato tiṇahīradike ānetvā tathā vinandhati, yathā tesam pesakārakañjijyasuttam viya aggena vā aggam mūlena vā mūlam samānetum, vivecetum vā na sakkā. Tenāha “**yathā hī**”ti-ādi. **Tadubhayampīti** “kulāgaṇṭhikan”ti vuttam kañjijyasuttam, kulāvakañca. **Purimanayenevāti** “evameva sattā”ti-ādinā pubbe vuttanayeneva.

Kāmaṃ muñjapabbajatiṇāni yathājātānīpi dīghabhāvena patitvā araññaṭṭhāne aññamaññaṃ vinandhitvā ākulabyākulāni hutvā tiṭṭhanti, tāni pana na tathā dubbiveciyāni, yathā rajjubhūtānīti dassetum “**yathā tāni**”ti-ādi vuttam. Sesamettha heṭṭhā vuttanayameva.

Apāyāti avadḍhitā, sukkena, sukhaḥetunā vā virahitāti attho. **Dukkhasa gatibhāvato**ti apāyikassa dukkhassa pavattiṭṭhānabhāvato. **Sukhasamussayatoti** abbhudayatato. **Vinipatitattāti** virūpaṃ nipatitattā yathā tenattabhāvena sukhasamussayo na hoti, evaṃ nipatitattā. **Itaroti** saṃsāro. Nanu “apāyan”ti-ādinā vuttopi saṃsāro evāti? Saccametam, nirayādīnaṃ pana adhimattadukkhabhāvadassanattam apāyādiggahaṇam. Gobalībaddañāyenāyamatto veditabo. **Khandhānañca paṭipāṭīti** pañcannaṃ khandhānaṃ hetuphalabhāvena aparāparaṃ pavatti. **Abbocchinnam vattamānāti** avicchedena pavattamānā. **Tam sabbampīti** tam “apāyan”ti-ādinā vuttam sabbam apāyadukkhāñceva vaṭṭadukkhāñca. “**Mahāsamudde vātukkhattanāvā viyā**”ti idam paribbhamaṭṭhānassa mahantadassanattañceva paribbhamanassa anavaṭṭhitatādassanattañca. “**Upamāya yantesu yuttagoṇo viyā**”ti idam pana avasabhāvadassanattañceva duppamokkhabhāvadassanattañcāti veditabam.

Paṭiccasamuppādavannaṇā

Iminā tāvāti ettha **tāva**-saddo kamatto, tena “tantākulakajātā”ti padassa anusandhi parato āvi bhavissatīti dīpeti. **Atthi idappaccayāti** ettha ayaṃ paccayoti idappaccayo, tasmā **idappaccayā**, imasmā paccayāti attho. Idam vuttam hoti—“imasmā nāma paccayā jarāmaṇaṇ”ti evaṃ vattabbo atthi nu kho jarāmaṇaṇassa paccayoti.

1. ...kuṭavā (Ka)

Tenāha “**atthi nu kho -pa- bhaveyyā**”ti. Ettha hi “kiṃ paccayā jarāmarañam? jātipaccayā jarāmarañan”ti upari jāti-sadda paccaya-sadda samānādhikaraṇena kiṃ-saddena idaṃ-saddassa samānādhikaraṇatādassanato kammadhārayasamāsātā idappaccayasaddassa yujjati. Na hettha “imassa paccayā idappaccayā”ti jarāmarañassa, aññassa vā paccayato jarāmarañasambhavapucchā sambhavati viññātabhāvato, asambhavato ca, jarāmarañassa pana paccayapucchā sambhavati. Paccayasaddasamānādhikaraṇatāyañca idaṃ-saddassa “imasmā paccayā”ti paccayapucchā yujjati.

Sā pana samānādhikaraṇatā yadipi aññapadatthasamāsepi labbhati, aññapadatthavacanicchābhāvato panettha Kammadhārayasamāso veditabbo. Sāmivacanasamāsapakkhe pana nattheva samānādhikaraṇatāsambhavoti. Nanu ca “idappaccayatā paṭiccasamuppādo”ti ettha idappaccaya-saddo sāmivacanasamāso icchitoti? saccaṃ icchito ujukameva tattha paṭiccasamuppādavacanicchāti katvā, idha pana kevalaṃ jarāmarañassa paccayaparipucchā adhippetā, tasmā yathā tattha idaṃ-saddassa paṭiccasamuppādavisesanātā, idha ca “pucchitabbapaccayatthātā sambhavati, tathā tattha, idha ca samāsakappanā veditabbā. Kasmā pana tattha Kammadhārayasamāso na icchitoti? Hetuppabhavānaṃ hetu paṭiccasamuppādoti imassa atthassa Kammadhārayasamāse asambhavatoti imassa, attano paccayānurūpassa anurūpo paccayo idappaccayoti etassa ca atthassa icchitattā. Yo panettha idaṃ-saddena gahito attho, so “atthi idappaccayā jarāmarañan”ti jarāmarāṇaggahaṇeneva gahitoti idaṃ-saddo paṭiccasamuppādato pariccajanato aññassa asambhavato paccaye avatiṭṭhati, tenettha Kammadhārayasamāso. Tattha pana idaṃ-saddassa tato pariccajanakāraṇaṃ natthīti sāmivacanasamāso eva icchito. Aṭṭhakathāyaṃ pana yasmā jarāmarāṇādīnaṃ paccayapucchāmukhenāyaṃ paṭiccasamuppādadesanā āraddhā, paṭiccasamuppādo ca nāma atthato hetuppabhavānaṃ hetūti vuttovāyamatto, tasmā “imassa jarāmarañassa paccayo”ti evamatthavaṇṇanā katā.

Paṇḍitenāti ekaṃsabyākaraṇīyādipaṇhāvisesajānanasamattāya paññāya samannāgatena. Tameva hissa paṇḍiccaṃ dassetuṃ “**yathā**”ti-ādi

vuttaṃ. Yādisassa jīvassa diṭṭhigatiko sarīrato anaññattaṃ pucchati **“taṃ jīvaṃ taṃ sarīraṃ”**ti, so evaṃ paramatthato nupalabbhati, kathaṃ tassa vañjhātanayassa viya dīgharassatā sarīrato aññatā vā anaññatā vā byākātabbā siyā, tasmāssa pañhassa ṭhapanīyatā veditabbā. **Tuṇhībhāvo** nāmesa pucchato anādaro vihesā viya hotīti **“abyākatametaṃ”**ti pakārantaramāha. Evaṃ abyākaraṇakāraṇaṃ ñātukāmassa kathetabbaṃ hoti, kathite ca jānantassa pamādoṇi evaṃ siyā, kathanavidhi pana “yādisassā”ti-ādinā dassito eva. **Evaṃ appaṭipajjivāti** evaṃ ṭhapanīyapañhe viya tuṇhībhāvādīṃ anāpajjivā eva. “Appaṭipajjivā”ti vacanaṃ nidassanamattametaṃ. “Kim sabbam aniccaṃ”ti vutte “kim saṅkhatam sandhāya pucchasi, udāhu asaṅkhatan”ti paṭipucchitvā byākātabbaṃ hoti, “kim khandhapañcakaṃ pariññeyyaṃ”ti puṭṭhe “atthi tattha pariññeyyaṃ, atthi na pariññeyyaṃ”ti vibhajja byākātabbaṃ hoti, evaṃ appaṭipajjivāti ca ayamettha attho icchitoti. Pubbe yassa paccayassa atthitāmattaṃ coditanti atthitāmattaṃ vissajjitaṃ. Pucchāsabhāgena hi vissajjananti. Idāni tasseva sarūpapucchā karīyatīti **“puna kin”**ti vuttaṃ. Idhāpi “yathā”ti-ādi sabbam ānetvā vattabbaṃ.

“Esa nayo sabbapadesū”ti atidesavasena ussukkaṃ katvā **“nāmarūpapaccayā”**ti-ādinā tattha apavādo āraddho. Yasmā dassetukāmo, tasmā idaṃ vuttanti yojanā. **Channaṃ vipākasamphassānaṃyeva gahaṇaṃhoti** viññāṇādi vedanāpariyosānā vipākavidhīti katvā anekesu suttapadesu¹ abhidhamme² ca yebhuyyena tesam yeva gahaṇassa niruḷhattā. **Idhāti** imasmim sutte. **Ca-saddo** byatirekattho, tenettha “gahitampī”ti-ādinā vuccamānaṃyeva visesaṃ joteti. Paccayabhāvo nāma paccayuppannāpekkho tena vinā tassa asambhavato. Tasmā **saḷāyatanappaccayāti** saḷāyatanapaccayā phasso”ti iminā padenāti yojanā. Avayavena vā samudāyopalakkhaṇametaṃ “saḷāyatanapaccayā”ti, tasmā “saḷāyatanapaccayā phasso”ti iminā padenāti vuttaṃ hoti. **Gahitampīti** chabbidham vipākaphassampi. **Aggahitampīti** avipākaphassampi kusalākusalakiriyāphassampi. Paccayuppannavisesaṃ

1. Ma 3. 109; Khu 1. 77 piṭṭhesu.

2. Abhi 2. 142 piṭṭhe.

dassetukāmoti yojanā. Na cettha paccayuppannova upādinno icchito, atha kho paccayopi upādinno icchitoti ajjhattikāyatanasseva saḷāyatanaggahaṇena gahaṇanti katvā vuttam **“Saḷāyatanato. “Pa. dassetukāmo”**ti. Na hi phassassa cakkhādisaḷāyatanameva paccayo, atha kho “cakkhuñca paṭicca rūpe ca uppajjati cakkhuviññāṇam, tiṇṇam saṅgati phasso”ti-ādi¹ vacanato rūpāyatanādirūpañca cakkhuviññāṇādināmañca paccayo, tasmā imam cakkhādisaḷāyatanato atirittam āvajjanādi viya sādharmaṇam ahutvā tassa tassa phassassa sādharmaṇatāya aññam visesapaccayam pi-saddena avisiṭṭham sādharmaṇapaccayampi dassetukāmo Bhagavā, “nāmarūpapaccayā phasso”ti idam vuttanti yojanā. **Abhidhammabhājanīyepi** imameva paccayam sandhāya “nāmarūpapaccayā phasso”ti vuttanti tada**ṭṭhakathāyam**² “paccayavisesadassanathañceva mahānidānadesanāsaṅgahatthañcā”ti atthavaṇṇanā katā. **Paccayānanti** jāti-ādīnam paccayadhammānam. **Nidānam kathitanti** jarāmarañādikassa nidānattam kathitam ekamsiko paccayabhāvo kathito. Tañhi tesam paccayabhāve abyabhicārīti dassetum” iti kho panetan”ti-ādīnā upari desanā pavattā. **Nijjaṭeti** nijjālake. **Niggumbeti** nikkhepe. Padadvayenāpi ākulābhāvameva dasseti, tasmā anākulaṁ abyākulaṁ mahantam paccayanidānam ettha kathitanti **mahānidānam** suttaṁ aññathābhāvassa abhāvato.

98. **Tesam tesam paccayānanti** tesam tesam jāti-ādīnam paccayānam. Yasmā paccayabhāvo nāma tehi tehi paccayehi anūnādhikeheva tassa tassa phalassa sambhavato tatho taccho, tappakāro vā sāmaggi-upagatesu paccayesu muhuttampi tatho nibbattanadhammānam asambhavābhāvato. **Avitatho** avisaṁvādanako visaṁvādanākāravirahito aññadhammapaccayehi aññadhammānuppattito. **“Anaññathā”**ti vuccati aññathābhāvassa abhāvato. Tasmā **“tatham avitatham anaññatham paccayabhāvaṁ dassetun”**ti vuttam. Pariyāyati attano phalam pariggahetvā vattatīti **pariyāyo**, hetūti āha **“pariyāyenāti kāraṇenā”**ti. **Sabbena sabbanti**.

1. Ma 3. 328, 332, 333; Saṁ 1. 301, 302; Saṁ 2. 261; Abhi 4. 248, 249 piṭṭhādīsu.

2. Abhi-Ṭṭha 2. 193 piṭṭhe.

devattādinā sabbabhāvena sabbā jāti. **Sabbathā sabbanti** tatthāpi cātumahārājikādisabbākārena sabbā, **nipāadvayametam**, nipātañca abyayam, tañca sabbalingavibhattivacanesu ekākārameva hotīti pāliyam “sabbena sabbam sabbathā sabbam”ti vuttam. Atthavacane pana tassa tassa jātisaddāpekkhāya itthi-atthavuttitam dassetum “**sabbākārena sabbā**”ti-ādi vuttam. **Imināvanayenā**ti iminā jātivāre vutteneva nayena. **Devādīsūti ādi-**saddena gandhabbayakkhādike pāliyam¹ āgate, tadantarabhede ca saṅgaṇhāti.

Idha nikkhitta-atthavibhajanattheti² imasmim “kassaci kimhici”ti aniyamato uddesavasena vuttatthassa niddisanatthe jotetabbe **nipāto**, tadatthajotanam nipātapadanti attho. **Tassāti** tassa padassa. **Teti** dhammadesanāya sampadānabhūtam theram vadati. **Seyyathidanti** vā te katameti ceti attho. Yehi “kassaci”ti, “kimhici”ti ca aniyamato vutto attho, te katameti. Kathetumyatāpucchā hesā. **Devabhāvāyāti** devabhāvattam. **Khandhajātīti** khandhapātubhāvo, yathā khandhesu uppannesu “devā”ti samaññā hoti, tathā tesam uppādoti attho. Tenāha “**yāyā**”ti āha. **Sabbapadesūti** “gandhabbānam gandhabbatthāyā”ti-ādīsu sabbesu jātiniddesapadesu, bhavādīpadesu ca. Yena hi nayena sace hi jātīti ayamatthayojanā katā, jātiniddesapadesova “bhavo”ti-ādinā bhavādīpadesupi so kātabboti. **Devāti upapattidevā** cātumahārājikato paṭṭhāya yāva bhavaggā dībbanti kāmagaṇḍāhi kīlanti laḷanti viharanti jotantīti katvā. Gandham abbanti paribhuñjantīti **gandhabbā**, dhataratthassa mahārājassa parivārabhūtā. Yajanti vessavaṇasakkādike pūjentīti **yakkhā**, tena tena vā paṇidhikammādinā yajitabbā pūjetabbāti **yakkhā**, vessavaṇassa mahārājassa parivārabhūtā. **Aṭṭhakathāyam** pana “amanussā”ti avisesena vuttam. **Bhūtāti** kumbhaṇḍā virūlhakassa mahārājassa parivārabhūtā. **Aṭṭhakathāyam** pana “ye keci nibbattasattā”ti avisesena vuttam. **Aṭṭhipakkhā** bhamaratuppaḷādayo. **Cammapakkhā** jatusingālādayo. **Lomapakkhā** haṃsamorādayo. **Sarīsapā** ahivicchikasatapadi-ādayo.

1. Dī 2. 48 piṭṭhe.

2. Aniyamitanikkhitta-atthavibhajanatthe (Aṭṭhakathāyam)

“**Tesaṃ tesaṃ**”ti idaṃ na yevāpanakaniddeso viya avuttasaṅgahatthaṃ vacanaṃ atha kho ayevāpanakaniddeso viya vuttasaṅgahatthanti. **Ādi-**saddeneva ca āmeditattho saṅgayhatīti āha “**tesaṃ tesaṃ devagandhabbādīnan**”ti. **Tadattāyāti** taṃbhāvāya, yathārūpesu khandhesu pavattamānesu “devā gandhabbā”ti lokasamaññā hoti, tathārūpatāyāti attho. Tenāha “**devagandhabbādibhāvā**”ti. “Nirodho, vigamo”ti ca paṭiladdhattālābhassa bhāvo vuccati, idha pana accantabhāvo adhippeto “sabbaso jātiyā asatī”ti avatvā “jātinirodhā”ti vuttattāti āha “**abhāvāti attho**”ti.

Phalattāya hinotīti yathā phalaṃ tato nibbattati, evaṃ hinoti pavattati, tassa hetubhāvaṃ upagacchatīti attho. **Idaṃ gaṇhatha nanti** “idaṃ me phalaṃ, gaṇhatha nan”ti evaṃ **appeti viya** niyyātetī viya. “Esa nayo”ti avisesaṃ atidisitvā visesamattassa atthaṃ dassetuṃ “**apicā**”ti-ādi vuttaṃ. Nanu cāyaṃ jāti parinipphannā, saṅkhatabhāvā ca na hoti vikārabhāvato, tathā jarāmaṇaṃ, tassa kathaṃ sā hetu hotīti codanaṃ sandhāyāha “**jarāmaṇassa hī**”ti-ādi. Tabbhāve bhāvo, tadabhāve ca abhāvo jarāmaṇassa jātiyā upanissayatā.

99. **Okāsapariggahoti** pavattiṭṭhānapariggaho. **Upapattibhave** yujjati upapattikkhandhānaṃ yathāvuttaṭṭhānato aññattha anuppajjanato. **Idha paṇāti** imasmim̐ sutte “kāmabhavo”ti-ādinā āgate imasmim̐ ṭhāne. **Kammabhave yujjati** kāmabhavādi jotanaṃ visesato tassa jātiyā paccayabhāvatoti. Tenāha “**so hi jātiyā upanissayakoṭiyāva paccayo**”ti. Nanu ca upapattibhavopi jātiyā upanissaya vasena paccayo hotīti? saccaṃ hoti, so pana na tathā padhāna bhūto, kammabhavo pana padhānabhūto paccayo janakabhāvatoti. “So hi jātiyā”ti-ādi vuttaṃ kāmabhavūpagam̐ kammaṃ kāmabhavo. Esa nayo rūpārūpabhavesupi. **Okāsapariggahova kato** “kimhici”ti iminā sattapariggahassa katattā.

100. **Tiṇṇampi kammabhavānanti** kāmakammabhavādīnaṃ tiṇṇampi kammabhavānaṃ, **tiṇṇaṅca upapattibhavānanti** kāmupapattibhavādīnaṃ tiṇṇaṅca upapattibhavānaṃ.

Tathā sesānipīti diṭṭhupādānādīni sesupādānānīpi tiṇṇampi kammabhavānaṃ, tiṇṇaṅca upapattibhavānaṃ paccayoti attho. **Itīti** evaṃ vuttanayena. Dvādasa kammabhavā dvādasa upapattibhavāti **catuvīsatibhavā veditabbā**. Yasmā kammabhavassa paccayabhāvamukheneva upādānaṃ upapattibhavassa paccayo nāma hoti, na aññathā, tasmā upādānaṃ kammabhavassa ujukameva paccayabhāvoti āha “**nippariyāyenettha dvādasa kammabhavā labbhanti**”ti. **Tesanti** kammabhavānaṃ. **Sahajātaḷoṭiyāti** akusalassa kammabhavassa sahaajātaṃ upādānaṃ sahaajātaḷoṭiyā, itaraṃ anantarūpanissayādivasena upanissayakoṭiyā, kusalassa kammabhavassa pana upanissayakoṭiyāva paccayo. Ettha ca yathā aññamaññanissayasampayutta-atthi-avigatādipaccayānaṃ sahaajātapaccayena ekasaṅghataṃ dassetuṃ “sahaajātaḷoṭiyā”ti vuttaṃ, evaṃ ārammaṇūpanissaya-anantarūpanissayapakatūpanissayānaṃ ekajjhaṃ gahaṇavasena “**upanissayakoṭiyā**”ti vuttanti **datṭhabbaṃ**.

101. **Upādānassāti** ettha kāmupādānassa **taṇhā** upanissayakoṭiyāva paccayo, sesupādānānaṃ **sahaajātaḷoṭiyāpi upanissayakoṭiyāpi** viññāṇādi ca vedanāpariyosānā vipākavidhīti katvā.

102. **Yadidaṃ vedanāti ettha vipākavedanāti** tameva tāva¹ **upanissayakoṭiyā paccayo** itarakoṭiyā asambhavato. **Aññāti** kusalākusalakiriyavedanā. **Aññathāpīti** sahaajātaḷoṭiyāpi.

103. **Ettāvatāti** jarāmaraṇādīnaṃ paccayaparamparādassanavasena pavattāya ettakāya desanāya. **Purimataṇhanti** purimabhavasiddhaṃ taṇhaṃ. “Esa paccayo taṇhāya, yadidaṃ vedanā”ti vatvā tadanantaraṃ “phassapaccayā vedanāti iti kho panetaṃ vuttan”ti-ādinā vedanāya paccayabhūtassa phassassa uddharaṇaṃ aññesu suttesu āgatanayena paṭiccasamuppādassa desanāmaggo, taṃ pana anotaritvā samudācārataṇhādassanamukheneva taṇhāmūlakadhamme desento āciṇṇadesanā maggato okkamanto viya, taṅca desanaṃ passato appavattanti² pasayha balakkārena desento viya ca hotīti āha “**idāni**”ti-ādi. **Dve taṇhāti** idhādhippetataṇhā

1. Vipākavedanā taṇhāya (?)

2. Appavattantiṃ (Ka)

eva dvidhā bhindanto āha. **Esanataṇhāti** bhogānaṃ pariyesanavasena pavattataṇhā. **Esitataṇhāti** pariyiṭṭhesu bhogesu uppajjamānataṇhā. **Samudācārataṇhāyāti** pariyuṭṭhānavasena pavattataṇhāya. **Duvidhāpesā vedanaṃ paṭicca taṇhā nāma vedanāpaccayā ca** appaṭiladdhānaṃ bhogānaṃ paṭilābhāya pariyesanā, laddhesu ca tesu pātabyatāpatti-ādi hotīti.

Paritassanavasena pariyesati etāyāti **pariyesanā**. Āsa yato, payogato ca pariyesanā tathāpavatto cittuppādo. Tenāha “**taṇhāya sati hotī**”ti. **Rūpādi-ārammaṇapaṭilābhoti** savatthukānaṃ rūpādi-ārammaṇānaṃ gavesanavasena, pavattiyānaṃ pana aparīyīṭṭhamyeva labbhati, tampi atthato pariyesanāya laddhameva nāma tathārūpassa kammassa pubbekatattā eva labbhanato. Tenāha “**So hi pariyesanāya sati hotī**”ti. **Sukhavinicchayanti** sukhaṃ viśesato nicchinotīti sukhavinicchayo, sukhaṃ sabhāvato, samudayato, atthaṅgamanato, nissaraṇato ca yāthāvato jānitvā pavattañāṇaṃ, taṃ sukhavinicchayaṃ. **Jaññāti** jāneyya. “Subhasukhaṃ”ti-ādikaṃ ārammaṇe abhūtākāraṃ vividhaṃ ninnabhāvena nicchinoti āropetīti **vinicchayo**. Assādānupassanataṇhādiṭṭhiyāpi evameva vinicchayabhāvo vedītabbo. Imasmim̐ pana sutte vitakkoyeva āgatoti yojanā. **Imasmim̐ pana sutteti** sakkapañhasutte¹. Tattha hi “chando kho devānaminda vitakkaṇidāno”ti¹ āgataṃ. **Idhāti** imasmim̐ Mahānidānasutte. “**Vitakkeneva vinicchināti**”ti etena “vinicchīyati etenāti vinicchayo”ti vinicchaya-saddassa karaṇasādhanamāha. “**Ettakan**”ti-ādi vinicchayakāradassanaṃ.

Chandanaṭṭhena chando, evaṃ rañjanaṭṭhena rāgo, svāyaṃ anāsevanatāya mando hutvā pavatto idhādhippetoti āha “**Dubbalarāgassādhivacanaṃ**”ti. **Ajjhosānanti** taṇhādiṭṭhivasena abhinivisaṇaṃ. “Mayhaṃ idan”ti hi taṇhāgāho yebhuyyena attaggāhasannissayova hoti. Tenāha “ahaṃ mamaṃ”ti, “**balavasanniṭṭhānaṃ**”ti ca tesāṃ gāhānaṃ thirabhāvappattimāha. **Taṇhādiṭṭhivasena pariggahakaraṇanti** “ahaṃ mamaṃ”ti balavasanniṭṭhānavasena

1. Dī 2. 221 piṭṭhe.

abhiniviṭṭhassa attattaniyaggāhavatthuno aññāsādhāraṇaṃ viya katvā pariggahetvā ṭhānaṃ, tathāpavatto lobhasahagatacittuppādo. Attanā pariggahitassa vatthuno yassa vasena parehi sādharmaṇabhāvassa asahamāno hoti puggalo, so dhammo **asahanatā. Evaṃ vacanatthaṃ vadanti** niruttinayena. Saddalakkhaṇe pana yassa dhammassa vasena macchariyogato puggalo maccharo, tassa bhāvo, kammaṃ vā **macchariyaṃ**, macchero dhammo. Macchariyassa balavabhāvato ādarena rakkhaṇaṃ ārakkhoti āha “**dvāra -pa- suṭṭhu rakkhaṇaṃ**”ti. Attano phalaṃ karotīti **karaṇaṃ**, yaṃ kiñci kāraṇaṃ, adhikaṃ karaṇanti **adhikaraṇaṃ**, visesakāraṇaṃ. Visesakāraṇaṃca bhogaṇaṃ ārakkhadāṇḍādānādi-anatthasambhavassāti vuttaṃ “**ārakkhādhikaraṇaṃ**”ti-ādi.

Paranisedhanatthanti māraṇādinā paresaṃ vibādhanatthaṃ. Ādīyati etenāti **ādānaṃ**, daṇḍassa ādānaṃ **daṇḍādānaṃ**, abhibhavitvā paraviheṭhanacittuppādo. **Satthādānēpi** eseva nayo. Hatthaparāmāsādivasena kāyena kātabbakalaho **kāyakalaho**. Dhammaghaṭṭanādivasena vācāya kātabbakalaho **vācākalaho**. Virujjhanavasena virūpaṃ gaṇhāti etenāti **viggaho**. Viruddhaṃ vadati etenāti **vivādo**. **Tuvaṃ tuvanti** agāravavacanasahacaraṇato tuvaṃ tuvaṃ, sabbete tathāpavattā dosasahagatacittuppādā veditabbā. Tenāha Bhagavā “aneke pāpakā akusalā dhammā sambhavanti”ti¹.

112. **Desanaṃ nivattesi**ti “taṇhaṃ paṭicca pariyesanā”ti-ādinā anulomanayena pavattitaṃ desanaṃ paṭilomanayena puna “ārakkhādhikaraṇaṃ”ti ārabhanto nivattesi. **Pañcakāmaguṇikarāgavasenāti** ārammaṇabhūtā pañca kāmaguṇā etassa atthīti pañcakāmaguṇiko, tattha rañjanavasena abhiraṇavasena pavattarāgo, tassa vasena **uppannā** rañjanavasena taṇhāyanavasena pavattā **rūpāditaṇhā**va kāmesu taṇhāti **kāmatāṇhā**. Bhavati atthi sabbakālaṃ tiṭṭhatīti pavattā bhavadiṭṭhi uttarapadalopena **bhavo**, taṃsahagatā taṇhā **bhavataṇhā**. Vibhavati vinassati ucchiṇṇatīti pavattā vibhavadiṭṭhi **vibhavo** uttarapadalopena, taṃsahagatā taṇhā **vibhavataṇhāti** āha “**sassatadiṭṭhi**”ti-ādi. **Ime dve**

1. Dī 2. 50 piṭṭhe.

dhammāti “esa paccayo upādānassa, yadidaṃ taṇhā”¹ti evaṃ vuttā vaṭṭamūlatanḥā ca “taṇhaṃ paṭicca pariyesanā”²ti evaṃ vuttā samudācāratanḥā cāti ime dve dhammā. **Vaṭṭamūlasamudācāravasenā**ti vaṭṭamūlavasena ceva samudācāravasena ca. **Dvīhi koṭṭhāsehī**ti dvīhi bhāgehi. Dvīhi avayavehi samosaranti nibbattanavasena samaṃ vattanti itoti **samo saraṇaṃ**, paccayo, ekaṃ samosaraṇaṃ etāsanti ekasamosaraṇā. Kena pana ekasamosaraṇāti āha “**vedanāyā**”ti. Dvepi hi taṇhā vedanāpaccayā evāti. Tenāha “**vedanāpaccayena ekapaccayā**”ti. Tato tato osaritivā āgantvā samavasanaṭṭhānaṃ **osaraṇasamosaraṇaṃ**. Vedanāya samaṃ saha ekasmiṃ ārammaṇe osaraṇakapavattanakā vedanā samosaraṇāti āha “**idam sahajātasamosaraṇaṃ nāmā**”ti.

113. **Sabbeti** uppattidvārasena bhinditvā vuttā **savipākaphassā** eva viññāṇādi vedanāpariyosānā vipākavidhīti katvā. Paṭiccasamuppāda kathā nāma vaṭṭakathāti āha “**ṭhapetvā cattāro lokuttaravipākaphasse**”ti. **Bahudhāti** bahuppakārena. Ayañhi pañcadvāre cakkhupasādādivatthukānaṃ pañcannaṃ vedanānaṃ cakkhusamphassādiko phasso sahajāta-aññamaññanissayavipāka-āhārasampayutta-atthi-avigatavasena aṭṭhadhā paccayo hoti. Sesānaṃ pana ekekasmim dvāre sampaṭicchanasantīraṇatadārammaṇavasena pavattānaṃ kāmāvacaravipākavedanānaṃ cakkhusamphassādiko phasso upanissayavasena ekadhāva paccayo hoti. Manodvārepi tadārammaṇavasena pavattānaṃ kāmāvacaravipākavedanānaṃ sahajātamanosamphasso tatheva aṭṭhadhā paccayo hoti, tathā paṭisandhibhavaṅgacutivasena pavattānaṃ tebhūmakavipākavedanānaṃ. Yā pana tā manodvāre tadārammaṇavasena pavattā kāmāvacaravedanā, tāsāṃ manodvārāvajjanasampayutto manosamphasso upanissayavasena ekadhāva paccayo hotīti evaṃ phasso bahudhā vedanāya paccayo hotīti veditabbaṃ.

114. **Vedanādīnanti** vedanāsaññāsaṅkhāraviññāṇānaṃ. **Asadisabhāvāti** anubhavanasañjānanābhisaṅkharaṇavijānanabhāvā. Te hi aññamaññavidhurena vedayitādirūpena ākiriyaṇti paññāyanti **ākārāti vuccanti**.

1. Dī 2. 49 piṭṭhe.

2. Dī 2. 50 piṭṭhe.

Teyevāti vedanādīnaṃ te eva vedayitādi-ākārā. **Sādhukāṃ dassiyamānā**ti sakkaccaṃ paccakkhato viya pakāsiyamānā. **Taṃ taṃ līnamatthaṃ gamentī**ti “arūpaṭṭho ārammaṇābhimukhanamanaṭṭho”ti evamādikāṃ taṃ taṃ līnaṃ apākaṭaṃ atthaṃ gamenti nāpentīti **liṅgāni**. Tassa tassa **sañjānanahetutoti** tassa tassa arūpaṭṭhādikassa sallakkhaṇassa kāraṇattā. Nimīyanti anumīyanti etehīti **nimittāni**. **Tathā tathā** arūpabhāvādippakārena, vedayitādippakārena ca **uddisitabbato** kathetabbato **uddesā**. **Tasmāti** “asadisabhāvā”ti-ādinā vuttamevatthaṃ kāraṇabhāvena paccāmasati. Yasmā vedanādīnaṃ aññamañña-asadisabhāvā yathāvuttenatthena ākārādayo, tasmā **ayaṃ** idāni vuccamāno ettha pālipade **attho**.

Nāmasamūhassāti ārammaṇābhimukhaṃ namaṇaṭṭhena “nāmaṇ”ti laddhasamaññaassa vedanādicatukkhandhasaṅkhātassa arūpadhammapuñjassa. **Paññattī**ti nāmakāyo arūpakalāpo arūpino khandhā”ti-ādikā paññāpanā hoti. Cetanāpadhānattā saṅkhārakkhandhadhammānaṃ “**saṅkhārānaṃ cetanākāre**”ti-ādi vuttaṃ. Tathā hi **suttantabhājanīye** saṅkhārakkhandhavibhajane “yā cetanā sañcetanā sañcetayitattan”ti¹ cetanāva niddiṭṭhā. **Asatī**ti asantesu. Vacanavipallāsena hi evaṃ vuttaṃ. **Cattāro khandhe vatthuṃ katvāti** vedanā saññā cittaṃ cetanādayoti ime catukkhandhasaṅñite nissayapaccayabhūte dhamme vatthuṃ katvā. Ayañca nayo pañcadvārepi sambhavatīti “**manodvāre**”ti visesitaṃ. **Adhivacanasamphassavevacanoti** adhivacanamukhena paññattimukhena gahetabbattā “adhivacanasamphasso”ti laddhanāmo. **Soti** manosamphasso. Pañcavokāre ca hadayavatthuṃ nissāya labbhanato **rūpakāye paññāyateva**, ayaṃ pana nayo idha na icchito vedanādipaṭikkhepavasena asambhavapariyāyassa jotitattāti “**pañcapasāde vatthuṃ katvā uppajjeyyā**”ti attho vutto. Na hi vedanāsannissayena vinā pañcapasāde vatthuṃ katvā manosamphassassa sambhavo atthi. Uppattiṭṭhāne asati anuppattiṭṭhānato phalassa uppatti nāma kadācīpi natthīti imamatthaṃ yathādhigatassa atthassa nidassanavasena dassento

1. Abhi 2. 150 piṭṭhe abhidhammabhājanīye.

“**ambarukkhe**”ti-ādimāha. **Rūpakāyatoti** kevalam rūpakāyato. **Tassāti** manosamphassassa.

Virodhipaccayasannipāte vibhūtatarā visadisuppatti, tasmim vā sati attano santāne vijjamānasseva visadisuppattihetubhāvo **ruppanākāro**. So eva ruppanākāro vatthusappaṭighādikaṃ taṃ taṃ līnamatthaṃ gametīti **liṅgam**. Tassa tassa sañjānanahetuto **nimittam**. Tathā tathā uddisitabbato **uddesoti** evamettha ākārādayo atthato veditabbā. Vatthārammaṇānaṃ aññamaññapaṭihananaṃ paṭigho, tato paṭighato jāto **paṭighasamphasso**. Tenāha “**sappaṭighan**”ti-ādi. **Nāmakāyatoti** kevalam nāmakāyato. **Tassāti** paṭighasamphassassa. Sesam paṭhamapañhe vuttanayameva.

Ubhayavasenāti nāmakāyo rūpakāyoti ubhayasannissayassa adhivacanasamphasso paṭighasamphassoti ubhayasamphassassa vasena.

Visum visum paccayaṃ dassetvāti byatirekamukhena paccakaṃ nāmakāya rūpakāyasaññitaṃ paccayaṃ dassetvā. **Tesanti** phassānaṃ. **Avisesatoti** visesaṃ akatvā sāmaññato. **Dassetunti** byatirekamukheneva dassetuṃ. **Eseva hetūti** esa chasupi dvāresu pavatto nāmarūpasāṅkhāto hetu yathārahaṃ dvinnampi phassānaṃ. Idāni taṃ yathārahaṃ pavattim vibhajivā dassetuṃ “**cakkhudvārādīsu hī**”ti-ādi vuttam.

Sampayuttakā khandhāti phassena sampayuttā vedanādayo khandhā. Āvajjanassāpi sampayuttakkhandhaggahaṇenevettha gahaṇam daṭṭhabbam tadavinābhāvato. Parato **manosamphassepi** eseva nayo. **Pañcavidhopīti** cakkhusamphassādivasena pañcavidhopi. **So phassoti** paṭighasamphasso. **Bahudhāti** bahuppakārena. Tathā hi vipākanāmaṃ vipākassa anekabhedassa manosamphassassa sahaajāta-aññamaññanissayavipākasampayutta-atthi-avigatavasena sattadhā paccayo hoti. Yam panettha āhāraṅgiccam, taṃ āhārapaccayavasena. Yam indriyāṅgiccam, taṃ indriyapaccayavasena paccayo hoti. Avipākaṃ pana nāmaṃ avipākassa manosamphassassa ṭhapetvā vipākapaccayaṃ itaresam vasena paccayo hoti. Rūpaṃ pana cakkhāyatanādibhedam cakkhusamphassādikassa pañcavidhassa phassassa

nissayapurejāta-indriyavippayutta-atthi-avigatavasena chadhā paccayo hoti. Rūpāyatanādibhedam tassa pañcavidhassa ārammaṇapurejāta-atthi-avigatavasena catudhā paccayo hoti. Manosamphassassa pana tāni rūpāyatanādīni, dhammārammaṇaṅca tathā ca ārammaṇapaccayamatteneva paccayo hoti. Vatthurūpaṃ pana manosamphassassa nissayapurejātavippayutta-atthi-avigatavasena pañcadhā paccayo hoti. Evaṃ **nāmarūpaṃ** assa phassassa bahudhā **paccayo hotīti** veditabbaṃ.

115. Paṭhamuppattiyam viññāṇam nāmarūpassa visesapaccayoti imamattham byatirekamukhena dassetuṃ pāḷiyam “mātukucchimhi na okkamissathā”ti-ādi vuttam. Gabbhaseyyakapaṭisandhi hi bāhirato mātukucchim okkamantassa viya hontīpi atthato yathāpaccayam khandhānam tattha paṭhamuppattiyeva. Tenāha “**pavisitvā -pa- na vattissathā**”ti. **Suddhanti** kevalam viññāṇena amissitam virahitam. “Avasesan”ti idam nāmāpekkham, tasmā **avasesam nāmarūpanti** imam viññāṇam ṭhapetvā avasesam nāmarūpaṃvāti attho. **Paṭisandhivasena okkantanti**¹ paṭisandhiggahaṇavasena, mātukucchim okkamantassa vā paṭhamāvayavabhāvena otiṇṇam. **Vokkamissathāti** santativicchedam vināsam upagamissatha, tam pana maraṇam nāma hotīti āha “**cutivasenā**”ti. **Assāti** viññāṇassa, taṅca kho viññāṇasāmaññavasena vuttam. Tenāha “**tasseva cittassa nirodhenā**”ti, paṭisandhicittasseva nirodhenāti attho. **Tatoti** paṭisandhicittato. Paṭisandhicittassa, tato dutiyatīyacittānam vā nirodhena cuti na hotīti vuttamattham yuttito vibhāvetuṃ “**paṭisandhicittena hi**”ti-ādi vuttam. **Etasmim antareti** etasmim soḷasacittakkhaṇe kāle. **Antarāyo natthīti** ettha dārakassa tāva maraṇantarāyo mā hotu tadā cuticittassa asambhavato, mātu pana katham tadā maraṇantarāyābhāvoti? Tam tam kālam anatikkamitvā tadantareyeva cavanadhammāya gabbhaggahaṇasseva asambhavato. Tenāha “**ayañhi anokāso nāmā**”ti, cutiyāti adhippāyo.

Paṭisandhicittena saddhim samuṭṭhitarūpānīti okkantikkhaṇe uppannakammajarūpāni vadati. Tāni hi nippariyāyato paṭisandhicittena saddhim samuṭṭhitarūpāni nāma, na utusamuṭṭhānāni paṭisandhicittassa uppādato pacchā samuṭṭhitattā.

1. Okkamitvā (Aṭṭhakathāyam)

Cittajāhārajānaṃ pana tadā asambhavo eva. Yāni paṭisandhicittena saddhiṃ samuṭṭhitarūpāni, tāni tividhāni tassa uppādakkhaṇe samuṭṭhitāni, ṭhitikkhaṇe samuṭṭhitāni, bhaṅgakkhaṇe samuṭṭhitānīti. Tesu uppādakkhaṇe samuṭṭhitāni sattarasamassa bhavaṅgassa uppādakkhaṇe nirujjhanti, ṭhitikkhaṇe samuṭṭhitāni ṭhitikkhaṇe nirujjhanti, bhaṅgakkhaṇe samuṭṭhitāni bhaṅgakkhaṇe nirujjhanti. Tattha “bhañjamāno dhammo bhañjamānassa dhammassa paccayo hotī”ti na sakkā vuttuṃ, uppāde, pana ṭhitiyañca na na sakkāti “sattarasamassa bhavaṅgassa uppādakkhaṇe, ṭhitikkhaṇe ca dharantānaṃ vasena tassa paccayampi dātuṃ na sakkontī”ti vuttaṃ. Rūpakāyūpatthambhitasseva hi nāmakāyassa pañcavokāre pavattīti. Tehi rūpadhammehi tassa cittassa balavataṃ sandhāyāha “**sattarasamassa -pavatti pavattati**”ti. **Paveṇī ghaṭiyatīti** aṭṭhacattālīsakammajassa rūpapaveṇī sambandhā hutvā pavattati. Paṭhamañhi paṭisandhicittāṃ, tato yāva soḷasamaṃ bhavaṅgacittāṃ, tesu ekekassa uppādaṭṭhitibhaṅgavasena tayo tayo khaṇā. Tattha ekekassa cittassa tīsu tīsu khaṇesu samatīmsa samatīmsa kammajarūpāni uppajjanti. Iti soḷasatikā aṭṭha cattālīsāṃ honti. Esa nayo tato paresupi. Taṃ sandhāya vuttaṃ “aṭṭhacattālīsakammajassa rūpapaveṇī sambandhā hutvā pavattati”ti. **Sace pana na sakkontīti** paṭisandhicittena saddhiṃ samuṭṭhitarūpāni sattarasamassa bhavaṅgassa paccayaṃ dātuṃ sace na sakkonti. Yadi hi paṭisandhicittato sattarasamaṃ cuticittāṃ siyā, paṭisandhicittassa ṭhitibhaṅgakkhaṇesu kammajarūpaṃ na uppajjeyya, pageva bhavaṅgacittakkhaṇesu. Tathā sati nattheva tassa cittassa paccayalābhoti pavatti nappavattati, paveṇī na ghaṭiyateva, aññadatthu vicchijjati. Tenāha “**vokkamati nāma hotī**”ti-ādi.

Itthattāyāti itthampakāratāya. Yādiso gabbhaseyyakassa attabhāvo, taṃ sandhāyetaṃ vuttaṃ. Tassa ca pañcakkhandhā anūnā eva hontīti āha “**evaṃ paripuṇṇapañcakkhandhabhāvāyā**”ti. **Upacchijjissathāti** santānavicchedena vicchindeyya. **Suddhaṃ nāmarūpamevāti** viññānavirahitaṃ kevalaṃ nāmarūpameva. Avayavānaṃ pāripūri vuḍḍhi. Thirabhāvappatti **viruḷhi**. Mahallakabhāvappatti **vepullaṃ**. Tāni ca yathākkammaṃ paṭhamādivayavasena hontīti vuttaṃ “**paṭhamavayavasena**”ti-ādi. **Vā-saddo** aniyamattho, tena vassasahassadvayādīnaṃ saṅgaho daṭṭhabbo.

Viññāṇamevāti niyamavacanaṃ, ito bāhirakappitassa attano, issarādīnaṃca paṭikkhepapadaṃ, na avijjādiphassādipaṭikkhepapadaṃ paṭiyogīnivattanapadattā avadhāraṇassa. Tenāha “**eseva hetū**”ti-ādi. Ayaṃca nayo heṭṭhāpi sabbapadesu yathārahaṃ vattabbo. Idāni viññāṇameva nāmarūpassa padhānakāraṇanti imamatthaṃ opammavasena vibhāvetuṃ “**yathā hī**”ti-ādi vuttaṃ. Paccekāṃ viya samuditassāpi nāmarūpassa viññāṇena vinā attakiccāsamatthataṃ dassetuṃ “**tvaṃ nāmarūpaṃ nāmā**”ti ekajjhaṃ gahaṇaṃ. **Purecāriketi** pubbaṅgameva. Viññāṇaṃhi sahaajātadhammānaṃ pubbaṅgamaṃ. Tenāha Bhagavā “manopubbaṅgamā dhammā”ti¹. **Bahudhāti** anekappakārena **paccayo hoti**.

Kathaṃ? vipākanāmassa hi paṭisandhiyaṃ aññaṃ vā viññāṇaṃ sahaajāta-aññaṃaññanissaya vipāka-āhāra-indriyasampayutta-atthi-avigatapaccayehi navadhā paccayo hoti. Vatthurūpassa paṭisandhiyaṃ sahaajāta aññaṃañña nissaya vipāka āhāra indriya vippayutta atthi avigatapaccayehi navadhā paccayo hoti. Ṭhapetvā pana vatthurūpaṃ sesarūpassa imesu navasu aññaṃaññapaccayaṃ apanetvā sesehi aṭṭhahi paccayehi paccayo hoti. Abhisāṅkhāraviññāṇaṃ pana asaṅgasattarūpassa, pañcavokāre vā kammajassa suttantikapariyāyato upanissayavasena ekadhāva paccayo hoti. Avasesaṃhi paṭhamabhavaṅgato pabhuti sabbampi viññāṇaṃ tassa nāmarūpassa yathārahaṃ paccayo hotīti veditabbaṃ. Ayamettha saṅkhepo, vitthārato pana paccayanaye dassiyamāne sabbāpi mahāpakaraṇakathā ānetabbā hotīti na vitthāritā. Kathaṃ panetaṃ paccetabbaṃ “paṭisandhināmarūpaṃ viññāṇapaccayā hoti”ti? Suttato, yuttito ca. Pāḷiyaṃhi “cittānuparivattino dhammā”ti-ādinā² nayena bahudhā vedanādīnaṃ viññāṇapaccayatā āgatā. Yuttito pana idha cittajena rūpena diṭṭhena adiṭṭhassāpi rūpassa viññāṇaṃ paccayo hotīti viññāyati. Cittehi pasanne, appasanne vā tadanurūpāni rūpāni uppajjamānāni diṭṭhāni, diṭṭhena ca adiṭṭhassa anumānaṃ hotīti. Iminā idha “diṭṭhena cittajarūpena adiṭṭhassāpi paṭisandhirūpassa viññāṇaṃ paccayo hoti”ti paccetabbametaṃ. Kammasamuṭṭhānassāpi hi rūpassa cittasamuṭṭhānassa viya viññāṇapaccayatā paṭṭhāne āgatāti.

1. Khu 1. 13; Khu 10. 107, 112, 184, 277 piṭṭhesu.

2. Abhi 1. 10 piṭṭhe.

116. Idha **samudaya**-saddo samudāya-saddo viya samūhapariyāyoti āha “**dukkharāsisambhavo**”ti. **Ekakoti** asahāyo rājaparisārahito. **Passeyyāma te rājabhāvaṃ** amhehi vināti adhippāyo. Yathārahaṃ parisam rañjetīti hi **rājā**. **Atthatoti** atthasiddhito avadantampi **vadati viya**. “**Hadayavatthun**”ti imināva tannissayopi gahito vāti daṭṭhabbam. Ānantariyabhāvato nissayanissayopi “nissayo”tveva vuccatīti. **Paṭisandhiviññāṇaṃ nāma bhaveyyāsi**, netam ṭhānaṃ vijjatīti attho. Tenāha “**passeyyāmā**”ti-ādi. **Bahudhāti** anekadhā **paccayo hoti**. Kathaṃ? Nāmaṃ tāva paṭisandhiyaṃ sahaajāta-aññamaññanissayavipākasampayutta-atthi-avigatapaccayehi sattadhā viññāṇassa paccayo hotīti. Kiñci panettha hetupaccayena, kiñci āhārapaccayenāti evaṃ aññathāpi paccayo hoti. Avipākaṃ pana nāmaṃ yathāvuttesu paccayesu ṭhapetvā vipākapaccayaṃ itarehi chahi paccayehi paccayo hoti. Kiñci panettha hetupaccayena, kiñci āhārapaccayenāti aññathāpi paccayo hoti, tañca kho pavattiyāmyeva, na paṭisandhiyaṃ. Rūpato pana hadayavatthu paṭisandhiyaṃ viññāṇassa sahaajāta aññamañña nissaya vippayutta atthi avigata paccayehi chadhāva paccayo hoti. Pavattiyaṃ pana sahaajāta-aññamaññapaccayavajjitehi pañcahi purejātapaccayena saha teheva paccayehi paccayo hoti. Cakkhāyatanādibhedam pana pañcavidhampi rūpaṃ yathākkamaṃ cakkhuviññāṇādibhedassa viññāṇassa nissaya purejāta indriya vippayutta atthi avigata paccayehi paccayo hotīti evaṃ nāmarūpaṃ viññāṇassa bahudhā paccayo hotīti veditabbaṃ.

Yvāyamanukkamena viññāṇassa nāmarūpaṃ, paṭisandhināmarūpassa ca viññāṇaṃ pati paccayabhāvo, so kadāci viññāṇassa sātisayo, kadāci nāmarūpassa, kadāci ubhinnaṃ sadisoti tividhopi so “**ettāvatā**”ti padena ekajjhaṃgahitoti dassento “**viññāṇe -pa- pavattesū**”ti vatvā puna yamidampi viññāṇaṃ nāmarūpasaññitānaṃ pañcannaṃ khandhānaṃ aññamaññanissayena pavattānaṃ ettakena sabbā saṃsāraavaṭṭappavattīti imamattham dassento “**ettakena -pa- paṭisandhiyo**”ti āha. Tattha **ettakenāti** ettakeneva, na ito aññena kenaci kārakavedakasabhāvena attanā, issarādina vāti attho. Antogadhāvadhāraṇaṃhetam padam.

Vacanamattameva adhikiccāti dāsādīsu sirivaḍḍhakādisaddā viya atathattā vacanamattameva adhikāraṃ katvā **pavattassa**. Tenāha “**atthaṃ adisvā**”ti. **Vohārassā**ti voharaṇamattassa. **Pathoti** pavattimaggo pavatīyā visayo. Yasmā saraṇakiriyāvasena puggalo “**sato**”ti vuccati, sampajānanakiriyāvasena “**sampajāno**”ti, tasmā vuttam “**kāraṇā padesavasenā**”ti. Kāraṇam niddhāretvā utti niruttīti. Ekameva atthaṃ “paṇḍito”ti-ādinā pakārato ñāpanato “**paññattī**”ti vadanti. So eva hi “paṇḍito”ti ca “byatto”ti ca “medhāvī”ti ca paññāpīyatīti. Paṇḍiccappakārato pana **paṇḍito**, veyyattiyappakārato **byattoti** paññāpīyatīti evam pakārato paññāpanato paññatti. Yasmā idha adhivacananiruttipaññattipadāni samānatthāni. Sabbañca vacanam adhivacanādibhāvam bhajati, tasmā kesuci vacanavisesesu visesena pavattehi adhivacanādisaddehi sabbāni vacanāni paññatti-atthappakāsanasāmaññena vuttānīti iminā adhippāyena ayamatthayojanā katāti veditabbā.

Atha vā **adhi**-saddo uparibhāve, upari vacanam **adhivacanam**. Kassa upari? Pakāsetabbassa atthassāti pākaṭoyamattho. Adhīnam vā vacanam **adhivacanam**, kena adhīnam? Atthena. Tathā taṃtamathappakāsenā nicchitam, niyataṃ vā **vacanam nirutti**. Pathaviḍhātupurisādītaṃtamapakārena ñāpanato **paññattī**ti evam adhivacanādīpadānam sabbavacanesu pavattī veditabbā, aññathā sirivaḍḍhakadhanavaḍḍhakappakārānameva niruttitā, “paṇḍito viyatto”ti evam pakārānameva ekameva atthaṃ tena tena pakārena ñāpentānam paññattitā ca āpajjeyyāti. Evam tīhipi nāmehi vuttassa vohārassa pavattimaggopi saha viññāṇena nāmarūpanti ettāvātāva icchitabbo. Tenāha “**itī**”ti-ādi. **Paññāya avacaritabbanti** paññāya pavattitabbam, ñeyyanti attho. Tenāha “**jānitabban**”ti. **Vatṭanti** kilesavaṭṭam, kammavaṭṭam, vipākavaṭṭanti tividhampi vaṭṭam. **Vattatī**ti pavattati. Tayidam “jāyethā”ti-ādinā pañcahi padehi vuttassa atthassa nigamanavasena vuttam. **Ādi**-saddena itthītipurisāti-ādinampi saṅgaho daṭṭhabbo. **Nāmapaññattatthāyāti** khandhādīphassādisattādi-itthādināmassa paññāpanatthāya. Vatthupi ettāvātāva. Tenāha “**kandhapañcakampi ettāvātāva paññāyati**”ti. **Ettāvātā** ettakena, saha viññāṇena nāmarūpappavattiyāti attho.

Attapaññattivaṇṇanā

117. Anusandhiyati etenāti **anusandhi**, heṭṭhā āgatadesanāya anusandhānavasena pavattā uparidesanā, sā paṭhamapadassa dassitā, idāni dutiyapadassa dassetabbāti tamattham dassento “**iti bhagavā**”ti-ādimāha. **Rūpinti** rūpavantaṃ. **Parittanti** na vipulaṃ, appakanti attho. Yasmā attā nāma koci paramatthato natthi. Kevalaṃ pana diṭṭhigatikānaṃ parikkappitamattaṃ, tasmā yattha nesaṃ attasaññā, yathā cassa rūpibhāvādi-parikkappanā hoti, taṃ dassento “**yo**”ti-ādimāha. **Rūpiṃ parittanti** attano upaṭṭhitakasiṇarūpavasena rūpiṃ, tassa avaḍḍhitabhāvena parittaṃ. **Paññapeti** nīlakasiṇādivasena nānākasiṇalābhī. **Tanti** attānaṃ. **Anantanti** kasiṇanimittassa appamāṇatāya paricchadassa anupaṭṭhānato antarahitaṃ. **Ugghāṭevāti** bhāvanāya apanetvā. **Nimittaphuṭṭhokāsanti** tena kasiṇanimittena phuṭṭhappadesaṃ. **Tesūti** catūsu arūpakkhandesu. **Viññānamattamevāti** “viññānamayo attā”ti evaṃvādī.

118. “**Etarahī**”ti sāvadhāraṇamidam padanti tadattham dassento “idānevā”ti vatvā avadhāraṇena nivattitamattham āha “**na ito paran**”ti. Tattha tattheva sattā ucchijjantīti ucchedavādī. Tenāha “**ucchedavasenetam vuttan**”ti. **Bhāvinti** sabbaṃ sadā bhāviṃ avinassanakaṃ. Tenāha “**sassatavase netam vuttan**”ti. **Atathāsabhāvanti** yathā paravādī vadanti, na tathā sabhāvaṃ. **Tathabhāvāyāti** ucchedabhāvāya vā sassatabhāvāya vā. Aniyamavacanañhetam vuttam sāmāññajotanāvasena. **Sampādessāmīti** tathabhāvamassa sampannaṃ katvā dassayissāmi, patiṭṭhāpessāmīti attho. Tathā hi vakkhati “sassatavādaṅca jānāpetvā”ti-ādi¹. **Imināti** “atatham vā panā”ti-ādivacanena, anucchedasabhāvampi samānaṃ sassatavādinomaṭṭhavasenaṭṭhi adhippāyo. **Upakappessāmīti** upecca samatthayissāmi.

Evaṃ samānanti evaṃ bhūtaṃ samānaṃ. Rūpakasiṇajjhānaṃ **rūpaṃ** uttarapada lopena, adhigamanavasena taṃ etassa atthīti **rūpīti** āha “**rūpinti rūpakasiṇalābhī**”ti. **Parittattānudiṭṭhīti** ettha rūpī-saddopi āvutti-ādinayena ānetvā vattabbo rūpibhāvampi hi so diṭṭhigatiko parittabhāvaṃ

1. Dī-Ṭṭha 2. 95 piṭṭhe.

viya attano abhinivissa ʒhitoti. **Arūpinti** etthāpi eśeva nayo. “Pattapalāsabahulagacchasaṅkhepena ghanagahanajaṭāvītānā nātidīghasantānā **valli**, tabbiparītā **latā**”ti vadanti. **Appahīnaṭṭhenā**ti maggena asamucchinnabhāvena. Kāraṇalābhe sati uppajjanārahataṭā anusayanaṭṭho.

Arūpakasiṇaṃ nāma kasiṇugghāṭimākāsaṃ, na paricchinnākāsakasiṇaṃ. “Ubhayampi arūpakasiṇamevā”ti keci. **Arūpakkhandhagocaraṃ** vāti vedanādayo arūpakkhandhā “attā”ti abhinivesassa gocaro etassāti arūpakkhandhagocaro, diṭṭhigatiko, taṃ arūpakkhandhagocaraṃ. **Vā**-saddo vutta vikappattho. Saddayojanā pana arūpaṃ arūpakkhandhā gocarabhūtā etassa atthīti arūpī, taṃ arūpim. **Lābhino cattāro**ti rūpakasiṇādilābhavasena taṃ taṃ diṭṭhigādaṃ sayameva parikkappetvā taṃ ādāya paggayha paññāpanakā cattāro diṭṭhigatikā. **Tesaṃ antevāsikā**ti tesaṃ lābhinaṃ vādaṃ paccakkhato, paramparāya ca uggahetvā tatheva naṃ khamitvā rocetvā paññāpanakā cattāro. **Takkikā cattāro**ti kasiṇajjhānassa alābhino kevalaṃ takkanavaseneva yathāvutte cattāro diṭṭhivāde sayameva abhinivissa paggayha ʒhitā cattāro. **Tesaṃ antevāsikā** pubbe vuttanayena veditabbā.

Na attapaññattivaṇṇanā

119. **Āraddhavipassakopī**ti samparāyikavipassakopi, tena balavavipassanāya ʒhitam puggalaṃ dasseti. **Na paññapeti eva** abahussutopīti adhippāyo. Tādiso hi vipassanāya ānubhāvo. Sāsanikopi jhānābhīññālābhī “na paññapetī”ti na vattabboti so idha na uddhaṭo. Idāni nesaṃ apaññāpane kāraṇaṃ dasseti “**etesañhī**”ti-ādinā. **Iceva ñāṇaṃ hoti**, na viparītaggāho tassa kāraṇassa dūrasamussāritattā. Arūpakkhandhā iceva ñāṇaṃ hotīti yojanā.

Attasamanupassanāvaṇṇanā

121. **Diṭṭhivasena samanupassitvā**, na ñāṇavasena. **Sā ca samanupassanā** atthato diṭṭhidassanavasena.

“Vedanāṃ attato samanupassatī”ti evamāgatā **vedanākkhandhavatthukā sakkāyaditthi**. Itthādibhedāṃ ārammaṇaṃ na paṭisaṃvedetīti **appaṭisaṃvedanoti** vedakabhāvapaṭikkhepamukhena sañjānanādibhāvopi paṭikkhitto hoti tadavinābhāvatoti āha **“iminā rūpakkhandhavatthukā sakkāyaditthi kathitā”**ti. **“Attā me vidiyati”**ti iminā appaṭisaṃvedanattaṃ paṭikkhipati. Tenāha “nopi appaṭisaṃvedano”ti. **Vedanādhammo**”ti pana iminā “vedanā me attā”ti imaṃ vādaṃ paṭikkhipati. Vedanāsaṅkhāto dhammo etassa atthīti hi vedanādhammoti vedanāya samannāgatabhāvaṃ tassa paṭijānāti. Tenāha “etassa ca vedanādhammo **avippayuttasabhāvo**”ti. Saññāsaṅkhāraviññānakkhandhavatthukā sakkāyaditthi kathitāti ānetvā sambandho. **“Vedanā sampayuttattā vedyati”**ti taṃsampayogato taṃ kiccakattamāha yathā cetanāyogato cetano purisoti. Sabbesampi taṃ sārammaṇadhammānaṃ ārammaṇānubhavanaṃ labbhateva, tañca kho ekadesato phuṭṭhatāmattato, vedanāya pana vissavitāya sāmibhāvena ārammaṇarasānubhavananti. Tassā vasena saññādayopi taṃsampayuttattā “vediyati”ti vuccanti. Tathā hi vuttaṃ **Aṭṭhasāliniyaṃ** “ārammaṇarasānubhavanaṭṭhānaṃ patvā sesasampayuttadhammā ekadesamattakameva anubhavanti”ti¹, rājasūdanidassanena vāyamatto tatha vibhāvito eva. **Etassāti** saññādikkhandhattayassa. **“Avippayuttasabhāvo”**ti iminā avisamāyogajanitaṃ kañci viśesaṃ ṭhānaṃ dīpeti.

122. **Tatthāti** tesu vāresu. **Tīsu ditthigatikesūti** “vedanā me attā”ti, “appaṭisaṃvedano me attā”ti “vedanādhammo me attā”ti ca evaṃvādesu tīsu ditthigatikesu. Tissannaṃ vedanānaṃ bhinnasabhāvattā sukhaṃ vedanaṃ “attā”ti samanupassato dukkhaṃ, adukkhamasukhaṃ vā vedanaṃ “attā”ti samanupassanā na yuttā. Evaṃ sesadvayepīti āha **“yo yo yaṃ yaṃ vedanaṃ attāti samanupassati”**ti.

123. **“Hutvā abhāvato”**ti iminā udayabbayavantatāya aniccāti dasseti, **“tehi tehi”**ti-ādinā anekakāraṇasaṅkhatattā saṅkhatāti. **Taṃ taṃ paccayanti** “indriyaṃ, ārammaṇaṃ, viññāṇaṃ, sukhaṃ, vedanīyo

1. Abhi-Ṭṭha 1. 153 piṭṭhe.

phasso”ti evamādikam taṃ taṃ attano kāraṇaṃ **paṭicca** nissāya sammā sassaṭādhāvassa, ucchedādhāvassa ca abhāvena ñāyena **samakāraṇena** sadisaṭkāraṇena anurūpakāraṇena **uppanā**. Khayasabhāvāti **khayadhammā**, vayasabhāvāti **vayadhammā**, virajjanasabhāvāti **virāgadhammā**, nirujjhanasabhāvāti **nirohadhammā**, catūhipi padehi vedanāya bhaṅgabhāvameva dasseti. Tenāha “**khayoti -pa- khayadhammāti-ādi vuttan**”ti.

Vigatoti sabhāvavigamena vigato. **Ekassevāti** ekasseva diṭṭhigatikassa. **Tīsupi kālesūti** tissannaṃ vedanānaṃ pavattikālesu. **Eso me attāti** “eso sukhavedanāsabhāvo, dukkha-adukkhamasukhavedanāsabhāvo me attā”ti **kiṃ pana hoti**, ekasseva bhinnasabhāvataṃ anumattako kathaṃ pacceṭīti adhippāyena pucchati. Itaro evampi tassa na hotiyevāti dassento “**kiṃ pana na bhavissati**”ti-ādimāha. **Visesenāti** sukhādivibhāgena. **Sukhañca dukkhañcāti** ettha **ca-saddena** adukkhamasukhaṃ saṅgaṇhāti, sukhasaṅgahameva vā tena kataṃ santasukhumabhāvato. **Avisesenāti** avibhāgena vedanāsāmañña. **Vokiṇṇanti** sukhādhedena vomissakaṃ. **Taṃ** tividhampi vedanaṃ **esa** diṭṭhigatiko ekajjhaṃ gahetvā **attāti samanupassati**. **Ekakkhaṇe ca bahūnaṃ vedanānaṃ uppādo āpajjati** avisesena vedanāsabhāvattā. Attano hi tasmim sati sadā sabbavedanāpavattippasaṅgato diṭṭhigatiko agatiyā ekakkhaṇepi bahūnampi vedanānaṃ uppattim paṭijāneyyāti tassa avasaraṃ adento “**na ekakkhaṇe bahūnaṃ vedanānaṃ uppatti atthi**”ti āha, paccakkhaviruddhametanti adhippāyo. **Etenapetaṃ nakkhamatīti** etena viruddhattasādhanenapi sabbena sabbaṃ attano abhāvenapi paṇḍitānaṃ na rucati, etaṃ dassanaṃ dhīrā nakkhamatīti attho.

124. Indriyabaddhepi rūpappabandhe vāyodhātuvipphārasena kāci kiriyā nāma labbhatīti suddharūpakkhandhepi yattha kadāci vāyodhātu vipphāro labbhati, tameva nidassanabhāvena gaṇhanto “**tālavante vā vātāpane vā**”ti āha. **Vedanādhammesūti** vedanādhammavantesu. “**Ahamasmī**”ti iminā tayopi khandhe ekajjhaṃ gahetvā ahamkāraṃ uppajjanākāro vuttoti. “**Ayamahamasmī**”ti pana iminā tattha ekamekaṃ gahetvā ahamkāraṃ uppajjanākāro vutto. Tenāha

“**ekadhammopī**”ti-ādi. **Tanti** “ahamasmī”ti ahamkārappattiṃ. Sā hi catukkhandhanirodhena anupalabbhamānasannissayā sasavisāṇatikhiṇatā viya na bhaveyyāvāti.

Ettāvatāti “kittāvatā ca ānandā”ti-ādinā “tantākulakajātā”ti padassa anusandhidassanavasena pavattena ettakena desanādhammena. Kāmaṃ heṭṭhāpi vaṭṭakathāva kathitā, idha pana diṭṭhigatikassa vaṭṭato sīsukkhipanāsamatthatāvibhāvanavasena micchādiṭṭhiyā mahāsāvajjabhāvadīpaniyakathā pakāsitāti taṃ dassento “**vaṭṭakathā kathitā**”ti āha. Nanu vaṭṭamūlaṃ avijjā taṇhā, tā anāmasitvā tato aññathā kasmā idha vaṭṭakathā kathitāti āha “**bhagavā hī**”ti-ādi. **Avijjāsīsenāti** avijjāṃ uttamaṅgaṃ katvā, avijjāmukhenāti attho. **Koṭinappaññāyatīti** “asukassa nāma sammāsambuddhassa, Cakkavattino vā kāle avijjā uppannā, na tato pubbe atthī”ti avijjāya ādi mariyādā appaṭiha tassa mama sabbaññutaññāṇassāpi na paññāyati avijjāmānattā evāti attho. Ayaṃ paccayo idappaccayo, tasmā **idappaccayā**, imasmā āsavādikāraṇāti attho. **Bhavataṇhāyāti** bhavasamyojanabhūtāya taṇhāya. **Bhavadīṭṭhiyāti** sassatadiṭṭhiyā. “**Tattha tattha upapajjanto**”ti iminā “ito ettha etto idhā”ti evaṃ apariyantaṃ aparāparupattiṃ dasseti. Tenāha “**mahāsamudde**”ti-ādi.

126. **Paccayākāramūlhassāti** bhūtakathanametam, na visesanaṃ. Sabbopi hi diṭṭhigatiko paccayākāramūlho evāti. **Vivaṭṭaṃ kathentoti** vaṭṭato vinimuttattā vivaṭṭaṃ, vimokkho, taṃ kathento. **Kārakassāti** satthu ovādakārakassa, sammāpaṭipajjantassāti attho. Tenāha “**satipaṭṭhānavihārino**”ti. So hi vedanānupassanāya, dhammānupassanāya ca sammāpaṭipattiyā “neva vedanaṃ attānaṃ samanupassatī”ti-ādinā vattabbataṃ arahati. Tenāha “**evarūpo hī**”ti-ādi. **Sabbadhammesūti** sabbesu tebhūmakadhammesu. Te hi sammasanīyā, **na aññanti** vedanāya aññaṃ saññādidhammaṃ attānaṃ na samanupassatīti. “**Khandhalokādayo**”ti rūpādiddhammā eva vuccanti, tesaṃ samūhoti dassetuṃ “**rūpādīsu dhammesū**”ti vuttaṃ. **Na upādiyati** diṭṭhitaṇhāvāhavasena. “Seyyo hamasmī”ti-ādinā¹

1. Saṃ 2. 308; Khu 7. 61, 336; Abhi 1. 225; Abhi 2. 359, 366 piṭṭhesu.

pavattamānamaññanāpi taṇhādīṭṭhimaññanā viya paritassanarūpā evāti āha “**taṇhādīṭṭhimānaparitassanāyapī**”ti.

Sā evaṃ dīṭṭhīti sā arahato evaṃpakārā dīṭṭhīti yo vadeyya, tadakallaṃ, taṃ na yuttanti attho. **Evamassa dīṭṭhī**ti etthāpi evaṃpakārā assa arahato dīṭṭhīti-ādinā yojetabbam. **Evañhi satī**ti yo vadeyya “hoti tathāgato param maraṇā itissa dīṭṭhī”ti, tassa ce vacanam tathevāti attho. “**Arahā na kiñci jānāti**”ti **vuttam bhaveyya** jānato tathā dīṭṭhiyā abhāvato. **Tenevā**ti tathā vatthumayuttattā eva. **Catunnampi nayānanti** “hoti tathāgato”ti-ādinā āgatānam catunnam vārānam. Ādito tīsu vāresu saṅkhipitvā pariyosānavāre vitthāritattā “**avasāne ‘taṃ kissa hetū’ti-ādimāhā**”ti vuttam. “Ādito tīsu vāresu tatheva desanā pavattā, yathā pariyosānavāre, pāḷi pana saṅkhittā”ti keci.

Vohāroti “satto itthī puriso”ti-ādinā “khandhā āya tanānī”ti-ādinā, “phasso vedanā”ti-ādinā ca vohāritabbavohāro. Tassa pana vohārassa pavattiṭṭhānam nāma saṅkhepato ime evāti āha “**khandhā āyatanāni dhātuyo**”ti. Yasmā nibbānam pubbabhāge saṅkhārānam nirodhabhāveneva paññāpiyati ca, tasmā tassāpi khandhamukhena avacaritabbatā labbhatīti “**paññāya avacaritabbam khandhapañcakan**”ti vuttam. Tenāha bhagavā “imasmiṃyeva byāmamatte kaḷevare sasaññimhi samanake lokañca paññāpemi lokasamudayañca lokanirodhañca lokanirodhagāminiñca paṭipadan”ti¹. **Paññāvacaranti** vā tebhūmakadhammāmetam gahaṇanti “**khandhapañcakan**”tveva vuttam, tasmā² “yavatā paññā”ti etthāpi lokiyapaññāya eva gahaṇam daṭṭhabbam. Vaṭṭakathā hesāti. Tathā hi “yavatā vaṭṭam vaṭṭati”icceva vuttam. Tenevāha “tantākulakapadasseva anusandhi dassito”ti. Yasmā Bhagavā dīṭṭhisīsenettha vaṭṭakatham kathetvā yathānusandhināpi vaṭṭakatham kathesi, tasmā “**tantākulaka padasseva anusandhi dassito**”ti sāvadhāraṇam katvā vuttam. Paṭiccasamuppādakathā panettha yāvadeva tassa gambhīrabhāvavibhāvanatthāya vitthāritā, vivaṭṭakathāpi samānā idha paccāmaṭṭhāti daṭṭhabbam.

1. Saṃ 1. 61; Aṃ 1. 357 piṭṭhesu.

2. Taṃ tasmā (Ka)

Sattaviññāṇaṭṭhitivaṇṇanā

127. **Gacchanto gacchantoti** samathapaṭipattiyam suppatiṭṭhito hutvā vipassanāgamanena, maggagamanena ca gacchanto gacchanto. Ubhohi bhāgehi muccanato **ubhatobhāgavimutto nāma hoti**. So “evam asamanu passanto”ti vutto vipassanāyānikoti katvā “**yo ca na samanupassatīti vutto -pa- paññāvimutto nāma hoti**”ti vuttam. **Heṭṭhā vuttānanti** “kittāvatā ca ānanda attānam na paññapento na paññā peti”ti-ādinā,¹ “yato kho ānanda bhikkhu neva vedanam attānam samanupassati”ti-ādinā² ca heṭṭhā pāliyam āgatānam dvinnam puthujjana **bhikkhūnam**. **Nigamananti** nissaraṇam. **Nāmananti** paññāvimuttādinānam.

Paṭisandhivasena vuttāti

nānattakāyanānattasaññitāvisesavisiṭṭhapaṭisandhi vasena vuttā satta viññāṇaṭṭhitiyo. Tam tam sattanikāyam pati nissayato hi nānattakāyādītā tampariyāpannapaṭisandhisamudāgatāti daṭṭhabbā tadabhinibbattakakammabhavassa tathā āyūhitattā. **Catasso āgamissantīti** rūpavedanāsaññāsañkhārakkhandhavasena catasso viññāṇaṭṭhitiyo āgamissantīti “rūpupāyam vā āvuso viññāṇam tiṭṭhamānam tiṭṭhati”ti-ādinā³. **Viññāṇapaṭiṭṭhānassāti** paṭisandhiviññāṇassa etarahi paṭiṭṭhānakāraṇassa. Atthato vuttavisesavisiṭṭhā pañcavokāre rūpavedanāsaññāsañkhārakkhandhā, catuvokāre vedanādayo tayo khandhā veditabbā. Sattāvāsabhāvam upādāya “**dve ca āyatanānīti dve nivāsaṭṭhānānī**”ti vuttam. Nivāsaṭṭhānapariyāyopi āyatanasaddo hoti yathā “devāyatanadvayan”ti. **Sabbanti** viññāṇaṭṭhiti āyatanadvayanti sakalam. **Tasmā gahitam** tattha ekameva aggahetvāti adhippāyo. **Pariyādānam** anavasesaggahaṇam **na gacchati vaṭṭam** viññāṇaṭṭhiti-āyatanadvayānam aññamañña-antogadhattā.

Nidassanatthe nipāto, tasmā **seyyathāpi manussāti** yathā manussāti vuttam hoti. **Viseso hotiyeva** satipi bāhirassa kārakassa abhede ajjhattikassa bhinnattā. Nānattam kāye etesam, nānatto vā kāyo etesanti **nānattakāyā**, iminā nayena

1. Dī 2. 55 piṭṭhe.

2. Dī 2. 58 piṭṭhe.

3. Dī 3. 190 piṭṭhe.

sesapadesupi attho veditabbo. **Nesanti** manussānaṃ. Nānattā saññā etesaṃ atthīti **nānattasaññīno**. Sukhasamussayato vinipāto etesaṃ atthīti **vinipātikā** satipi devabhāve dibbasampattiyā abhāvato, apāyesu vā gato natthi nipāto etesanti **vinipātikā**. Tenāha “**catu-apāyavinimuttā**”ti. **Dhammapadanti** satipaṭṭhānādiddhammakotṭhāsaṃ. **Vijāniyāti** sutamayena tāva ñāṇena vijānitvā. Tadanusārena yonisomanasikāraṃ paribrūhanto sīlavisuddhi-ādikaṃ sammāpaṭipattim **api paṭipajjema**. Sā ca paṭipatti **hitāya** diṭṭhadhammikādisakalahitāya amhākaṃ **siyā**. Idāni tatha sīlapaṭipattim tāva vibhāgena dassento “**pānesu cā**”ti gāthamāha.

Brahmakāye paṭhamajjhānanibbatte brahmasamūhe, brahmanikāye vā bhavāti **brahmakāyikā**. Mahābrahmuno parisāya bhavāti **brahmapārisajjā** tassa paricārakaṭṭhāne ṭhitattā. Mahābrahmuno purohitaṭṭhāne ṭhitāti **brahmapurohitā**. Āyuvaṇṇādīhi mahanto brahmānoti **mahābrahmuno**. Satipi tesam tividhānampi paṭhamena jhānena abhinibbattabhāve jhānassa pana pavattibhedena ayaṃ visesoti dassetuṃ “**brahmapārisajjā panā**”ti-ādi vuttam. **Parittenāti** hīnena, sā cassa hīnatā chandādīnaṃ hīnatāya veditabbā, paṭiladdhamattam vā **hīnaṃ**. **Kappassāti** asaṅkhyeyyakappassa. Hīnapaṇītānaṃ majjhe bhavattā **majjhimena**, sā cassa majjhimatā chandādīnaṃ majjhimatāya veditabbā, paṭilabhitvā nātisubhāvitam vā **majjhimaṃ**. **Upaḍḍhakappoti** asaṅkhyeyyakappassa upaḍḍhakappo. **Vipphārikataroti** brahmapārisajjehi pamāṇato vipulataro, sabhāvato uḷārataro ca hoti. Sabhāvenapi hi uḷāratarova, tam panettha appamāṇam. Tathā hi parittābhādīnaṃ, parittasubhādīnaṃcā kāye satipi sabhāvavematte ekattavaseneva vavattāpīyatīti “ekattakāyā”tveva vuccanti. **Paṇītenāti** ukkaṭṭhena, sā cassa ukkaṭṭhatā chandādīnaṃ ukkaṭṭhatāya veditabbā, subhāvitam vā sammadeva vasibhāvaṃ pāpitaṃ **paṇītam** padhānabhāvaṃ nītanti katvā, idhāpi kappo asaṅkhyeyyakappavaseneva veditabbo paripuṇṇassa mahākappassa asambhavato. Itīti evaṃ vuttappakārena. **Teti** “brahmakāyikā”ti vuttā tividhāpi brahmāno. **Saññāya ekattāti** tihetukabhāvena saññāya

ekattasabhāvattā. Na hi tassā sampayuttadhammasena aññopi koci bhedo atthi.

“**Evan**”ti iminā nānattakāya-ekattasaññinoti dasseti.

Daṇḍa-ukkāyāti daṇḍadīpikāya. **Saratī**ti dhāvati viya. **Vissaratī**ti vippakiṇṇā viya dhāvati. **Dve kappā**ti dve mahākappā. Ito paresupi eseva nayo. **Idhā**ti imasmim sutte. Ukkatthaparicchedavasena ābhassa ragghaṇeneva **sabbepi te** Parittābhā, Appamāṇābhāpi **gahitā**.

Sobhanā pabhā subhā, subhāya kiṇṇā subhākiṇṇāti vattabbe ā-kārassa rassattam, antimāṇa-kārassa ha-kārañca katvā “subhākiṇṇā”ti vuttā aṭṭhakathāyaṃ pana niccalāya ekagghanāya pabhāya subhoti pariyaṇavacananti “**subhena okiṇṇā vikiṇṇā**”ti attho vutto, etthāpi antimāṇa-kārassa ha-kārakaraṇam icchitabbameva. **Na chijjitvā chijjitvā pabhā gacchati** ekagghanattā. **Catutthaviññāṇaṭṭhitimeva bhajanti** kāyassa, saññāya ca ekarūpattā. Vipulasantasukhāyuvanṇādi phalattā **vehapphalā**. **Etthā**ti viññāṇaṭṭhitīyaṃ.

Vivaṭṭapakkhe ṭhitā napunarāvattanato. “Na sabbakālikā”ti vatvā tameva asabbakālikattam vibhāvetum “**kappasatasahassampī**”ti-ādi vuttam. Soḷasakappasahassaccayena uppannānam Suddhāvāsabrahmānam parinibbāyanato, aññesañca tattha anuppajjanato **Buddhasuññe loke** suññam tam ṭhānam hoti, tasmā Suddhāvāsā na sabbakālikā, **khandhāvāraṭṭhānasadisā honti** Suddhāvāsabhūmiyo. **Iminā suttena** Suddhāvāsānam sattāvāsabhāva dīpaneneva viññāṇaṭṭhitibhāvo dīpito, tasmā **suddhāvāsāpi** sattasu viññāṇaṭṭhitīsu **catutthaviññāṇaṭṭhitim** navasu sattāvāsesu **catutthasattāvāsānyeva bhajanti**.

Sukhumattāti saṅkhārāvesasasukhumabhāvappattattā.

Paribyattaviññāṇakiccābhāvato **neva viññāṇam**, sabbaso aviññāṇam na hotīti **nāviññāṇam**, tasmā paripphuṭaviññāṇakiccavanti **viññāṇaṭṭhitīsu avatvā**.

128. **Tañca viññāṇaṭṭhitinti** paṭhamam viññāṇaṭṭhitim. Heṭṭhā vuttanayena sarūpato, manussādivibhāgato, saṅkhepato, “nāmañca rūpañca”ti

bhedato ca **pajānāti**. **Tassā samudayañcāti** tassā paṭhamāya viññāṇaṭṭhitiyā pañcavīsatividhaṃ samudayañca **pajānāti**. **Atthaṅgamepi** eseva nayo. Assādetabbato, assādato ca **assādam**. **Ayam** aniccādibhāvo **ādīnavo**. Chandarāgo viniyati etena, ettha vāti **chandarāgavinayo**, saha maggena nibbānaṃ. **Chandarāgappahānanti** etthāpi eseva nayo. Mānadiṭṭhinaṃ vasena ahanti vā, taṇhāvasena mamanti vā abhinandanāpi mānassa paritassanā viya daṭṭhabbā. **Sabbatthāti** sabbesu sesesu aṭṭhasupi vāresu. **Tatthāti** upari tīsu viññāṇaṭṭhītīsu dutiyāyatanesu. Tattha hi rūpaṃ natthi. Puna **tatthāti** paṭhamāyatane. Tattha hi eko rūpakkhandhova. **Etthāti** ca tameva sandhāya vuttaṃ. Tattha hi rūpassa kammamuṭṭhānattā āhārasena yojanā na sambhavati.

Yato khoti ettha **to-saddo** dā-saddo viya kālavacano “yato kho Sāriputta bhikkhusaṅgho”ti-ādīsu¹ viyāti vuttaṃ “**yadā kho**”ti. **Aggahetvāti** kañcīpi saṅkhāraṃ “etaṃ mamā”ti-ādīnaṃ aggahetvā. **Paññāvimuttoti** aṭṭhannaṃ vimokkhānaṃ anadhigatattā sātīsayassa samādhībalassa abhāvato paññābaleneva vimutto. Tenāha “**aṭṭhavimokkhe asacchikatvā paññābalenevā**”ti-ādi. **Appavattinti** āyatim appavattim **katvā**. Pajānanto vimuttoti vā paññāvimutto, paṭhamajjhānaphassena vinā pari jānanādippakārehi cattāri saccāni jānanto paṭivijjhanto tesam kiccānaṃ matthakappattiyā niṭṭhitakiccatāya vīsesena muttoti **vimutto**. **So** paññāvimutto. **Sukkhavipassakoti** samathabhāvanāsinehābhāvena sukkhā lūkhā, asiniddhā vā vipassanā etassāti **sukkhavipassako**. **Ṭhatvāti** pādakakaraṇavasena ṭhatvā. **Aññatarasminti** ca aññatara-aññatarasmim, ekekasminti attho. Evañhissa pañcavidhatā siyā. “Na heva kho aṭṭha vimokkhe kāyena phusitvā viharatī”ti iminā sātīsayassa samādhībalassa abhāvo dīpito. “Paññāya cassa disvā”ti-ādīnaṃ sātīsayassa paññābalassa bhāvo. **Paññāya cassa disvā āsavā parikkhīṇā hontīti** na āsavā paññāya passanti, dassanakāraṇā pana parikkhīṇā “disvā parikkhīṇā”ti vuttā. Dassanāyattaparikkhayattā eva hi dassanaṃ āsavānaṃ khayassa purimakiriyā hoti.

1. Vi 1. 11 piṭṭhe.

Aṭṭhavimokkhavaṇṇanā

129. **Ekassa bhikkhunoti** sattasu ariyapuggalesu ekassa bhikkhuno. Viññāṇaṭṭhiti-ādinā pariḷāṇanādivasappavatta **nigamanañca** paññāvimuttanāmañca. **Itarassāti** ubhatobhāgavimuttassa. Ime sandhāya hi pubbe “dvinnam bhikkhūnam”ti vuttam. **Kenatṭhenāti** kena sabhāvena. Sabhāvo hi ñāṇena yāthāvato araṇīyato ñātābbato “attho”ti vuccati, so eva ttha-kārassa tṭha-kāram katvā “aṭṭho”ti vutto. **Adhimuccanaṭṭhenāti** adhiyam savisesam muccanaṭṭhena, etena satipi sabbassāpi rūpāvacarajjhānassa vikkhambhanavasena paṭipakkhato vimuttabhāve yena bhāvanāvisesena tam jhānam sātisayam paṭipakkhato, vimuccitvā pavattati, so bhāvanāviseso dīpito. Bhavati hi samānāyatiyuttopi bhāvanāvisesena pavatti-ākāraviseso yathā tam saddhāvimuttatā diṭṭhippattassa. Tathā paccanīkadhammehi suṭṭhu vimuttatāya, evaṃaniggahitabhāvena nirāsaṅkatāya abhirativasena suṭṭhu adhimuccanaṭṭhenapi vimokkho. Tenāha “**ārammaṇe cā**”ti-ādi. **Ayam panatthoti** ayam adhimuccanaṭṭho **pacchime vimokkhe** nirodhe **natthi**, kevalo vimuttaṭṭho eva tatha labbhati, tam sayameva parato vakkhati.

Rūpīti yenāyam sasantaipariyāpannena rūpena samannāgato, tam yassa jhānassa hetubhāvena viṣiṭṭham rūpam hoti, yena viṣiṭṭhena rūpena “rūpī”ti vucceyya

rūpī-saddassa atisayatthadīpanato, tadeva sasantaipariyāpannarūpavasena paṭiladdhajjhānam idha paramatthato rūpībhāvasādhakanti daṭṭhabbam. Tenāha “**ajjhattan**”ti-ādi. **Rūpajjhānam rūpam** uttarapadalopena. **Rūpānī**ti panettha purimapadalopo daṭṭhabbo. Tena vuttam “**nīlakaṣiṇādirūpānī**”ti¹. Rūpe kaṣiṇarūpe saññā rūpasaññā, sā etassa atthīti rūpasaññī, saññāsīsena jhānam vadati. Tappaṭikkhepena arūpasaññī. Tenāha “**ajjhattam na rūpasaññī**”ti-ādi.

“**Anto-appanāyam subhanti ābhogo natthī**”ti iminā pubbābhogavasena tathā-adhimutti siyāti dasseti. Evañhettha tathāvattābbatāpatticodanā samatthitā hoti. Yasmā suvisuddhesu nīlādīsu vaṇṇakaṣiṇesu tatha katādhikārānam abhirativasena suṭṭhu adhimuccanaṭṭho

1. Nīlakaṣiṇādīni rūpāni (Aṭṭhakathāyam)

sambhavati, tasmā aṭṭhakathāyaṃ tathā tatiyo vimokkho saṃvaṇṇito, yasmā pana mettāvasena pavattamānā bhāvanā satte appaṭikūlato dahanti tesu tato adhimuccitvāva pavattati, tasmā **paṭisambhidāmagge**¹ “brahmavihārabhāvanā subhavamokkho”ti vuttā, tayidaṃ ubhayampi tena tena pariyaena vuttattā na virujjhatīti daṭṭhabbam.

Sabbasoti anavasesato. Na hi catunnaṃ arūpakkhandhānaṃ ekadesopi tattha avassissati. **Visuddhattā**ti yathāparicchinnaḷe nirodhitattā. **Uttamo vimokkho nāma** ariyeheva samāpajjitabbato, ariyaphalapariyosānattā diṭṭheva dhamme nibbānappattibhāvato ca.

130. **Ādito paṭṭhāyāti** paṭhamasamāpattito paṭṭhāya. **Yāva pariyoṣānā samāpatti**, tāva. **Aṭṭhatvāti** katthaci samāpattiyaṃ aṭṭhito eva, nirantameva paṭipāṭiyā, uppaṭipāṭiyā ca samāpajjatevāti attho. Tenāha “**ito cito ca sañcaraṇavasena vuttan**”ti. **icchatī** samāpajjituṃ. Tattha “**samāpajjati pavisati**”ti samāpattisamaṅgīpuggalo taṃ taṃ pavitṭho viya hotīti katvā vuttaṃ.

Dvīhi bhāgehi vimuttoti arūpajjhānena vikkhambhanavimokkhena, maggena samucchadavimokkhenāti dvīhi vimuccanabhāgehi, arūpasamāpattiyā rūpakāyato, maggena nāmakāyatoti dvīhi vimuccitabbabhāgehi ca vimutto. Tenāha “**arūpasamāpattiyā**”ti-ādi. **Vimuttoti** hi kilesehi vimutto, vimuccanto ca kilesānaṃ vikkhambhanasamucchindanehi kāyadvayato vimuttoti ayamettha attho. Gāthāya ca ākiṅcaṇṇāyatanaḷabhino upasivabrāhmaṇassa Bhagavatā “nāmakāyā vimutto”ti ubhatobhāgavimutto muni akkhāto. Tattha **attham paletīti** attham gacchati. **Na upeti saṅkhanti** “asukam nāma disam gato”ti vohāraṃ na gacchati. **Evam muni nāmakāyā vimuttoti** evam arūpaṃ upapanno sekkhamuni pakatiyā pubbeva rūpakāyā vimutto, tattha ca catutthamaggaṃ nibbattetvā nāmakāyassa pariṇṇātattā puna nāmakāyāpi vimutto. Ubhatobhāgavimutto khīṇāsavo hutvā anupādāya

1. Khu 9. 235 piṭṭhe.

parinibbānasaṅkhātāṃ **atthaṃ paleti na upeti saṅkhaṃ**, “khattiyo brāhmaṇo”ti evamādikāṃ samaññaṃ na gacchatīti attho.

“Aññatarato vuṭṭhāyā”ti idaṃ kiṃ ākāśānañcāyatanādīsū aññataralābhīvasena vuttaṃ, udāhu sabbārupalābhīvasenāti yathicchasi, tathā hotu, yadi sabbārupalābhīvasena vuttaṃ, na koci virodho. Atha tattha aññataralābhīvasena vuttaṃ “yato kho Ānanda bhikkhu ime aṭṭha vimokkhe anulomampi samāpajjati”ti-ādivacanena virujjheyyāti? Yasmā arūpāvacarajjhānesu ekassāpi lābhī “aṭṭhavimokkhalābhī”tveva vuccati aṭṭhavimokkhe ekadesassāpi taṃnāmadāna samatthatāsambhavato. Ayañhi aṭṭhavimokkhasamaññaṃ samudāye viya tadekadesevi niruḷhāpattisamaññaṃ viyā¹”ti. Tena vuttaṃ “ākāsā nañcāyatanādīsū aññatarato vuṭṭhāyā”ti. “Pañcavidho hoti”ti vatvā chabbidhatāmpissa keci parikappenti, taṃ tesāṃ matimattaṃ, nicchitovāyaṃ pañho pubbācariyehīti dassetuṃ “**keci paṇā**”ti-ādi vuttaṃ. Tattha **kecīti** uttaravihāravāsino, sārasamāsācariyā ca². Te hi “ubhatobhāgavimuttoti ubhayabhāgavimutto samādhivipassanāto”ti vatvā rūpāvacarasamādhināpi samādhiparipanthato vimuttiṃ maññanti. Evaṃ rūpajjhānabhāgena, arūpajjhānabhāgena ca ubhato vimuttoti pāyasamāno³. “**Tādisamevā**”ti iminā yādisaṃ arūpāvacarajjhānaṃ kilesavikkhambhane, tādisaṃ rūpāvacaracatutthajjhānampīti imamatthaṃ ullaṅgeti. Tenāha “**tasmā**”ti-ādi.

Ubhatobhāgavimuttapañhoti ubhatobhāgavimuttassa chabbidhatāṃ nissāya uppannapañho. **Vaṇṇanaṃ nissāyāti** tassa padassa atthavacanaṃ nissāya. **Cirenāti** therassa aparabhāge cirena kālena. **Vinicchayanti** saṃsayachedakasanniṭṭhānaṃ **patto**. **Taṃ pañhanti** taṃ atthaṃ. Ñātuṃ icchito hi attho pañho. **Na kenaci sutapubbanti** kenaci kiñci na sutapubbaṃ, idaṃ atthajātanti adhippāyo. Kiñcāpi upekkhāsahagataṃ, kiñcāpi kilese vikkhambhetīti paccekāṃ kiñcāpi-saddo yojetabbo. **Samudācaratīti** pavattati. Tattha kāraṇamāha “**ime hī**”ti-ādinā, tena rūpāvacarabhāvanato ārupabhāvanā savisesaṃ kilese vikkhambhenti

1. Niruḷhāpattisamaññaṃ (?)

2. Cete (Ka)

3. Pāyasamāne (Ka)

rūpavirāgabhāvanābhāvato, uparibhāvanābhāvato cāti dassetīti. Evañca katvā **aṭṭhakathāyaṃ** āruppabhāvanāniddeṣe yaṃ vuttaṃ “tassevaṃ tasmim̃ nimitte punappunaṃ cittaṃ cārentassa nīvaraṇāni vikkhambhanti sati santiṭṭhatī”¹ti-ādi¹, taṃ samatthataṃ hotīti. **Idaṃ suttanti** puggalapaññattipāṭha²māha. Sabbañhi Buddhavacanaṃ atthasūcanādi-atthena suttanti vutto vāyamattho. Yaṃ pana tattha vattabbaṃ, taṃ heṭṭhā vuttameva. Aṭṭhannaṃ vimokkhānaṃ anulomādito samāpajjanena sātisaṃyaṃ santānassa abhisankhātattā, aṭṭhamañca uttamaṃ vimokkhaṃ padaṭṭhānaṃ katvā vipassanaṃ vaḍḍhetvā aggamaggādhigamena ubhatobhāgavimu ccanato ca imāya ubhatobhāgavimuttiyā sabbasetṭhatā veditāti daṭṭhabbā.

Mahānidānasuttavaṇṇanāya līnatthappakāsanā.

1. Visuddhi 1. 325 piṭṭhe.

2. Abhi 3. 117 piṭṭhe.

3. Mahāparinibbānasutta

131. Pūjanīyabhāvato, Buddhasampadañca pahāya pavattattā mahantañca taṃ parinibbānañcāti **mahāparinibbānaṃ**, savāsanappahānato mahantaṃ kilesakkhayaṃ nissāya pavattaṃ parinibbānantipi **mahāparinibbānaṃ**, mahatā kālena, mahatā vā guṇarāsina sādhitam parinibbānantipi **mahāparinibbānaṃ** mahantabhāvāya, dhātūnaṃ bahubhāvāya parinibbānantipi **mahāparinibbānaṃ**, mahato lokato nissaṭam parinibbānantipi **mahāparinibbānaṃ**, sabbalokāsādhāraṇattā Buddhānaṃ sīlādiguṇehi mahato Buddhassa Bhagavato parinibbānantipi **mahāparinibbānaṃ**, mahati sāsane paṭiṭṭhite parinibbānantipi **mahāparinibbānanti** Buddhassa Bhagavato parinibbānaṃ vuccati, tappaṭisaṃyuttaṃ suttaṃ **mahāparinibbānasuttaṃ**. Gijjhā ettha vasantīti **gijjham**, gijjham kūṭam etassāti **Gijjhakūṭo**, gijjham viya vā **gijjham**, kūṭam, taṃ etassāti **Gijjhakūṭo**, pabbato, tasmim **Gijjhakūṭe**. Tenāha “**gijjhā**”ti-ādi. **Abhiyātukāmoti** ettha **abhi**-saddo abhibhavanattho, “abhivijānātū”ti-ādīsu¹ viyāti āha “**abhibhavanatthāya yātukāmo**”ti. **Vajjirājānoti** “vajjetabbā ime”ti-ādito pavattaṃ vacanaṃ upādāya “vajjī”ti laddhanāmā rājāno, vajjiratṭhassa vā rājāno **vajjirājāno**. Vajjiratṭhassa pana vajjisamaññā tannivāsirājakumāravasena veditabbā. **Rājiddhiyāti** rājabhāvānugatena sabhāvena. So pana sabhāvo nesaṃ gaṇarājūnaṃ mitho sāmaggīyā loke pākaṭo, ciraṭṭhāyī ca ahoṣīti “**samaggabhāvaṃ kathesi**”ti vuttaṃ. Anu anu taṃsamaṅgino bhāveti vaḍḍhetīti anubhāvo, anubhāvo eva **ānubhāvo**, patāpo, so pana nesaṃ patāpo hatthi-assādivāhanasampattiyā, tattha ca susikkhitabhāvena loke pākaṭo jātoti “**etena -pa- kathesi**”ti vuttaṃ. **Tālacchiggalenāti** kuñcikāchiddena. **Asananti** saram. **Atipāyissantīti** atikkāmenti. **Poṅkhānupoṅkhanti** poṅkhassa anupoṅkham, purimasarassa poṅkhapadānugatapoṅkham itaram saram katvāti attho. **Avirādhitanti** avirajjhitaṃ. **Ucchindissāmīti** ummūlanavasena kulasantatiṃ chindissāmi. Ayanam vaḍḍhanaṃ **ayo**, tappaṭikkhepena **anayoti** āha “**avaḍḍhiyā etaṃ nāman**”ti. **Vikkhipatīti** vidūrato khipati, apanetīti attho.

1. Dī 2. 141; Dī 3. 51; Ma 3. 211 piṭṭhesu.

Gaṅgāyanti gaṅgāsamīpe. **Vaṭṭanagāmanti** sakatapaṭṭagāmaṃ. **Āṇāti** āṇā vattati. **Aḍḍhajojananti** ca tasmim paṭṭane aḍḍhajojanaṭṭhānavāsino sandhāya vuttaṃ. **Tatrāti** tasmim paṭṭane. **Balavāghatajātoti** uppannabalavakodho.

Meti mayhaṃ. **Gatenāti** gamanena.

Rāja-aparihāniyadhammavaṇṇanā

134. **Sītaṃ vā uṇhaṃ vā natthi**, tāyaṃ velāyaṃ puññānubhāvena buddhānaṃ sabbakālaṃ samasītuṇhāva utu hoti, taṃ sandhāya tathā vuttaṃ. **Abhiṇhaṃ sannipātāti** nīccasannipātā, taṃ pana nīccasannipātataṃ dassetuṃ “**divasassā**”ti-ādi vuttaṃ. **Sannipātabahulāti** pacurasannipātā. **Vosānanti** saṅkocaṃ. “**Yāvakiṇvaṇ**”ti ekamevetam padaṃ aniyamato parimāṇavācī, kālo cettha adhippetoti āha “**yattakaṃ kālan**”ti. “**Vuddhiyevā**”ti-ādinā vuttamatthaṃ byatirekamukhena dassetuṃ “**abhiṇhaṃ asannipatantā hī**”ti-ādi vuttaṃ. **Ākulāti** khubhitā, na pasannā. **Bhijjivāti** vaggabandhato vibhajja visuṃ visuṃ hutvā.

Sannipātabheriyāti sannipātārocanabheriyā. **Aḍḍhabhuttā vāti** sāmibhuttā ca. **Osīdamāneti** hāyamāne.

Pubbe akatanti pubbe anibbattaṃ. **Suṅkanti** bhaṇḍaṃ gahetvā gacchantehi pabbatakhaṇḍanadīttagāmadvārādīsu rājapurisānaṃ dātabbabhāgaṃ. **Balinti** nipphannasassādito chabhāgaṃ, sattabhāganti-ādinā laddhakaraṃ. **Daṇḍanti** dasavīsaticahāpaṇādikaṃ aparādhānurūpaṃ gahetabbadhaṇḍaṃ. **Vajjidhammanti** vajjirājadhammaṃ. Idāni apaññattapaññāpanādīsu tappaṭikkhepa-ādinavānisamse vitthārato dassetuṃ “**tesaṃ apaññattan**”ti-ādi vuttaṃ. **Pāricariyakkhamāti** upaṭṭhānakkhamā.

Kulabhoga-issariyādivasena mahatī mattā pamāṇaṃ etesanti **mahāmattā** nītisatthavilite vinicchaye ṭhapitā mahāmattā **vinicchayamahāmattā**, tesaṃ. **Dentīti** niyyātentī. **Sace coroti** evaṃsaññino sace hontī. Pāpabhīrutāya **attanā kiñci avatvā**. Daṇḍanīsaññīte vohāre niyuttatī **vohārikā**, ye “**dhammaṭṭhā**”ti vuccanti. **Suttadharā**

nītisuttadharā, idise vohāravinicchaye niyametvā ṭhapitā. Paramparābhatesu aṭṭhasu kulesu jātā agatigamanaviratā aṭṭhamahallakapurisā **aṭṭhakulikā**.

Sakkāraṇti upakāraṇ. **Garubhāvaṇ** paccupaṭṭhapetvāti “ime amhākaṇ garuno”ti tattha garubhāvaṇ pati pati upaṭṭhapetvā. **Mānentīti** sammānenti, taṇ pana sammānaṇaṇ tesu nesaṇ attamaṇatāpubbakanti āha “**manena piyāyanti**”ti. **Nipaccakāraṇti** paṇipātaṇ. **Dassenti** “ime amhākaṇ pitāmahā, mātāmahā”ti-ādinā nīcacittā hutvā garucittākāraṇ dassenti. **Sandhāretunti** sambandhaṇ avicchinnaṇ katvā ghaṭetuṇ.

Pasayhākāraṇ balakkāraṇa. Kāmaṇ vuddhiyā pūjaṇiyatāya “vuddhihāniyo”ti vuttaṇ, attho pana vuttānukkameneva yojetabbo, pāḷiyaṇ vā yasmā “vuddhiyeva pāḷikaṇkhā, no parihaṇi”ti vuttaṇ, tasmā tadanukkamena “**vuddhihāniyo**”ti vuttaṇ.

Vipaccituṇ aladdhokāse pāpakamme, tassa kammaṇ vipāke vā anavasaroṇa devatopasaggo, tasmīṇ pana laddhokāse siyā devatopasaggassa avasaroti āha “**anuppannaṇ -pa- vaḍḍhenti**”ti. Eteneva **anuppannaṇ sukhanti** etthāpi attho veditabbo. “Balakāyassa diguṇatiguṇatādassanaṇ, paṭibhayabhāvadassanaṇ”ti evamādinā devatānaṇ. Saṅgāmasīse sahaḷatā veditabbā.

Anicchitanti aniṭṭhaṇ. **Āvaraṇatoti** nisedhanaṇo. Yassa dhammato anapetā dhammiyāti idha “**dhammikā**”ti vuttā. Migasūkarādighātāya sunakhādīnaṇ kaḍḍhitvā vanacaraṇaṇ **vājo**, migavā, tattha niyuttā, te vā vājenti nenti **vājikā**, migavadhacāriṇo. **Cittappavattiṇ** **pucchati**. Kāyikavācasikapayogena hi sā loke pākāṭā pakāsabhūtāti.

135. Devāyatanabhāvena citattā, lokassa cittikāraṭṭhānattā ca **cetiyaṇ ahoṇi**.

Kāmaṇkāraṇasena kiṇcipi na karaṇiyāti **akaraṇiyā**. Kāmaṇkāro pana hatthagata karaṇavasenaṇi āha “**aggahetabbāti attho**”ti. **Abhimukhayuddhenāti** abhimukhaṇ ujuṇkameva saṅgāmakaraṇena.

upalāpanaṃ sāmaṃ dānañcāti dassetuṃ “alan”ti-ādi vuttaṃ. Bhedopi idha upāyo evāti vuttaṃ “aññatra mithubhedāyā”ti. Yuddhassa¹ pana anupāyatā pageva pakāsītā. **Idanti** “aññatra upalāpanāya, aññatra mithubhedā”ti ca idaṃ vacanaṃ. **Kathāya nayaṃ labhitvāti** “yāvakīvañca -pa- no parihānī”ti imāya Bhagavato kathāya nayaṃ upāyaṃ labhitvā.

Anukampāyāti vajjirājesu anuggahena. **Assāti** Bhagavato.

Kathanti vajjihi saddhiṃ kātabbayuddhakathaṃ. **Ujurm karissāmīti** paṭirājāno ānetvā pākāraparikhānaṃ aññathābhāvāpādanena ujubhāvaṃ karissāmi.

Paṭiṭṭhitaguṇoti paṭiṭṭhitācariyaguṇo. **Issarā sannipatantu**, mayaṃ anissarā, tattha gantvā kiṃ karissāmāti **licchavino na sannipatimsūti** yojanā. **Sūrā sannipatantūti** etthāpi eseva nayo.

Balabherinti yuddhāya balakāyassa uṭṭhānabherim.

Bhikkhu-aparihāniyadhammavaṇṇanā

136. Aparihānāya hitāti **aparihāniyā**, na parihāyanti etehīti vā **aparihāniyā**, te pana yasmā aparihāniyā kārakā nāma honti, tasmā vuttaṃ “**aparihānikare**”ti. Yasmā pana te parihānikarānaṃ ujupaṭipakkhabhūtā, tasmā āha “**vuddhihetubhūte**”ti. Yasmā Bhagavato desanā uparūpari nāṇālokaṃ pasādentī sattānaṃ hadayandhakāraṃ vidhamati, pakāsetebbe ca atthe hatthatale āmalakaṃ viya suṭṭhutarāṃ pākāṭe katvā dasseti, tasmā vuttaṃ “**candasahassaṃ -pa- kathayissāmī**”ti.

Yasmā Bhagavā “tassa brāhmaṇassa sammukhā Vajjīnaṃ abhiṇhasannipātādi paṭipattim kathentoyeva ayaṃ aparihāniyakathā aniyānikā vaṭṭanissitā, mayhaṃ pana sāsane tathārūpī kathā kathetabbā, sā hoti niyyānikā vivaṭṭanissitā, yāya sāsanaṃ mayhaṃ parinibbānato parampi addhaniyaṃ assa ciraṭṭhitikan”ti cintesi, tasmā bhikkhū sannipātāpetvā tesam aparihāniye dhamme desento teneva niyāmena desesi. Tena vuttaṃ “**idaṃ Vajjisattake² vuttasadisamevā**”ti. Evaṃ saṅkhepato

1. Daṇḍassa (Ka)

2. Vajjisuttake (Ka)

vuttamatthaṃ vitthārato dassento **“idhāpi cā”**ti-ādimāha. Tattha **“tato”**ti-ādi disāsu āgatasāsane vuttaṃ taṃ kathanāṃ. Vihārasīmā ākulā yasmā, tasmā **uposathapavāraṇā** ṭhitā.

Oliyamānakoti pāḷito atthato ca vinassamāno. **Ukkipāpentāti** paṇḍabhāvakaṇḍaṇa, atthasamvaṇṇanena ca paggaṇhantā.

Sāvattiyam bhikkhū viya pācittiyam desāpetabboti¹. **Vajjiputtakā viya** dasavattudīpanena². **“Gihigatānī** gihipaṭisaṃyuttānī”ti vadanti. Gihīsu gatāni, tehi nātāni **gihigatāni**. Dhūmakālo etassāti **dhūmakālikam** citakadhūmavūpasamato param appavattanato.

Thirabhāvappattāti sāsane thirabhāvaṃ anivattitabhāvaṃ upagatā. **Therakārakehī**ti therabhāvasādhakehi silādiguṇehi asekkhadhammehi. **Bahū rattiyoti** pabbajitā hutvā bahū rattiyo **jānanti**. Silādiguṇesu patiṭṭhāpanameva sāsane pariṇāyakatāti āha **“tisu sikkhāsu pavattenti”**ti.

Ovādam na denti abhājanabhāvato. **Paveṇīkathanti** ācariyaparamparābhatam sammāpaṭipattidīpanam dhammakatham. **Sārabhūtam dhammapariyāyanti** samatha vipassanā magga phala sampāpanena sārabhūtam bojjhaṅgakosalla-anuttharasītibhāva-adhicittasuttādīdhammatantiṃ.

Punabbhavadānam punabbhavo uttarapadalopena. **Itareti** ye napaccayavasikā na-āmisacakkhukā, te **na gacchanti** taṇhāya vasam.

Āraññakesūti araññabhāgesu araññapariyāpannesu. Nanu yattha katthacipi taṇhā sāvajjā evāti codanam sandhāyāha **“gāmantasenāsanesu hī”**ti-ādi, tena “anuttāresu vimokkhesu piham upaṭṭhāpayato”ti ettha vuttasinehādayo viya araññakesu senāsanesu sālayatā sevitabbapakkiyā evāti dasseti.

Attanāvāti sayameva, tena parehi anussāhitānam saraseneva anāgatānam pesalānam bhikkhūnam āgamanam, āgatānaṅca phāsuvihāram paccāsiantīti dasseti. **Iminā nīhārenāti** imāya paṭipattiyā.

1. Vi 1. 336 piṭṭhe vitthāravatthu.

2. Vi 4. 491 piṭṭhe vitthāravatthu.

Aggahitadhammaggaṇanti aggahitassa pariyattidhammassa uggahaṇaṃ. **Gahitasajjhāyakaṇanti** uggahitassa suṭṭhu atthacintanaṃ. Cintanattho hi sajjhāyasaddo.

Entīti upagacchanti. **Nisīdanti** āsanapaññāpanādinā.

137. Āramitabbaṭṭhena **kammaṃ ārāmo**. **Kamme ratā**, na ganthadhure, vāsadhure vāti **kammaratā**, **anuyuttāti** tapparabhāvena punappunaṃ pasutā. **Itikātabbakammaṃ** taṃ taṃ bhikkhūnaṃ kātabbaṃ uccāvacakammaṃ cīvaravicāraṇādi. Tenāha “**seyyathidan**”ti-ādi. **Upatthambhanaṃ** dupaṭṭapaṭṭādikaraṇaṃ. Tañhi paṭhamapaṭalādīnaṃ upatthambhanakāraṇattā tathā vuttaṃ. Yadi evaṃ kathamayaṃ kammārāmatā paṭikkhittāti āha “**ekacco hi**”ti-ādi.

Karontoyevāti yathāvuttatiracchānakathaṃ kathentoyeva. Atiracchānakathābhāvepi tassa tatha tapparabhāvadassanatthaṃ avadhāraṇavacanāṃ. **Pariyantakārīti** sapariyantaṃ katvā vattā. “Pariyantavatiṃ vācaṃ bhāsītā”ti¹ hi vuttaṃ. **Appabhassovāti** parimitakathoyeva ekantena kathetabbasseva kathanato. Samāpattisamāpajjanaṃ **ariyo tuṇhībhāvo**.

Niddāyatiyevāti niddokkamane anādīnavadassī niddāyatiyeva. Iriyāpathaparivattanādinā na naṃ vinodeti.

Evaṃ saṃsaṭṭhovāti vuttanayena gaṇasaṅgaṇikāya saṃsaṭṭho eva viharati.

Dussilā pāpicchā nāmāti sayāṃ nissilā asantaḡaṇasambhāvanicchāya samannāgatattā pāpā lāmakā icchā etesanti pāpicchā.

Pāpapuggalehi mettikaraṇato **pāpamittā**. Tehi sadā saha pavattanena **pāpasahāyā**. Tattha ninnatādinā tadadhimuttatāya **pāpasampavaṅkā**.

138. Saddhā etesaṃ atthīti **saddhāti** āha “**saddhāsampannā**”ti. Āgamanīyapaṭipadāya āgatasaddhā **āgamanīyasaddhā**, sā sātisayā Mahābodhisattānaṃ paropadesena vinā saddheyyavattum aviparītato

1. Dī 1. 4, 60 piṭṭhesu.

ogāhetvā adhimuccanatoti āha “**sabbaññubodhisattānaṃ hotī**”ti. Saccapaṭivedhato āgatasaddhā **adhigamasaddhā** surabandhādīnaṃ¹ viya. “Sammāsambuddho Bhagavā”ti-ādinā Buddhādīsu uppajjanakapasādo **pasādasaddhā mahākappinarājādīnaṃ**² viya. “Evametan”ti okkantivā pakkhandivā saddahanavasena kappanaṃ okappanaṃ. **Duvidhāpī** pasādasaddhāpi okappanasaddhāpi. Tattha pasādasaddhā aparaneyyarūpā hoti savanamattena pasīdanato. Okappanasaddhā saddheyyavattthum ogāhetvā anupavisitvā “evametan”ti paccakkhaṃ karontī viya pavattati. Tenāha “**saddhādhimutto vakkalītherasadiso hotī**”ti. **Tassa hīti** okappanasaddhāya samannāgatassa. Hirī etassa atthīti **hiri**, hiri mano etesanti **hirimanāti** āha “**pāpa -pa- citta**”ti. Pāpato ottappenti ubbijjanti bhāyantīti ottappī.

Bahu sutānaṃ suttageyyādi etenāti **bahussuto**, sutaggahaṇaṅcetha nidassanamattānaṃ dhāraṇaparicayaparipucchānupekkhanadiṭṭhīni jhānānaṃpettha icchitabbattā. Savanamūlakattā vā tesampi taggahaṇeneva gahaṇaṃ daṭṭhabbānaṃ. Atthakāmena pariyāpuṇitabbato, diṭṭhadhammikādipurisatthasiddhiyā pariyatthabhāvato ca **pariyatti**, tīṇi piṭakāni. **Saccapaṭivedho** saccānaṃ paṭivijjhaṇaṃ. Tadapi bāhusaccaṃ yathāvuttabāhusaccakiccanipphattito. **Pariyatti adhippetā** saccapaṭivedhāvahena bāhusaccena bahussutabhāvassa idha icchitattā. Soti pariyattibahussuto. Catubbidho hoti pañcamassa pakāraṇaṃ abhāvato. **Sabbatthakabahussutoti** nissayamuccanakabahussutādayo viya padesiko ahutvā piṭakattaye sabbatthakameva bāhusaccasabbhā vato sabbassa atthassa kāyanato kathanato sabbatthakabahussuto. **Te idha adhippetā** paṭipattipaṭivedhasaddhammānaṃ mūlabhūte pariyattisaddhamme suppatiṭṭhitabhāvato.

Āraddhanti paggahitaṃ. **Tānaṃ** pana duvidhampi vīriyārambhavibhāgena dassetuṃ “**tatthā**”ti-ādi vuttaṃ. Tattha **ekakāti** ekākino, vūpakaṭṭhavihāriṇoti attho.

1. Dī-Ṭṭha 3. 48; Ma-Ṭṭha 2. 287; Am-Ṭṭha 1. 305; Dhammapada-Ṭṭha 1. 302; Udāna-Ṭṭha 258 piṭṭhesu.

2. Am-Ṭṭha 1. 246; Dhammapada-Ṭṭha 1. 351; Theragāthā-Ṭṭha 2. 179; Apadāna-Ṭṭha 2. 218 piṭṭhesu vitthāro.

Pucchitvāti parato pucchitvā. **Sampaṭicchāpetunti** “tvaṃ asukanāmo”ti vatvā tehi “āmā”ti paṭijānāpetunti attho. Evaṃ cirakatādi-anussaraṇasamatthasatīnepakkānaṃ appakasireneva satisambojjhaṅgabhāvanāpāripūrim gacchatīti dassanattam **“evarūpe bhikkhū sandhāyā”**ti vuttam. Tenevāha “apicā”ti-ādi.

139. Bujjhati etāyāti “bodhī”ti laddhanāmāya sammādiṭṭhi-ādidhammasāmaggiyā āngoti **bojjhaṅgo**, pasattho, sundaro vā bojjhaṅgo **sambojjhaṅgo**. **Upaṭṭhānalakkhaṇoti** kāyavedanācittadhammānaṃ asubhadukkhāniccānattabhāvasallakkhaṇasaṅkhātāṃ ārammaṇe upaṭṭhānaṃ lakkhaṇametassāti upaṭṭhānalakkhaṇo. Catunnaṃ ariyasaccānaṃ pīḷanādippakārato vicayo upaparikkhā lakkhaṇametassāti **pavicayalakkhaṇo**. Anuppannā kusalānuppādanādivasena cittassa paggaho paggaṇhanaṃ lakkhaṇam etassāti **paggahalakkhaṇo**. Pharaṇaṃ vipphārikatā lakkhaṇam etassāti **pharaṇalakkhaṇo**. Upasamo kāyacittapariḷāhānaṃ vūpasamaṇaṃ lakkhaṇam etassāti **upasamalakkhaṇo**. Avikkhepo vikkhepaviddhamānaṃ lakkhaṇam etassāti **avikkhepalakkhaṇo**. Līnuddhaccarahite adhicitte pavattamāne pagghaniggahasampahānaṃ abyāvaṭṭā ajjuhekkhanaṃ paṭisaṅkhānaṃ lakkhaṇam etassāti **paṭisaṅkhānalakkhaṇo**.

Catūhi kāraṇehīti satisampajaññaṃ, muṭṭhassatipuggalaparivajjanā, upaṭṭhitassatipuggalasevanā, tadadhimuttatāti imehi catūhi kāraṇehi. **Chahi kāraṇehī**ti paripucchakatā, vatthuvisadakiriyā, indriyasamattapaṭipādanā, duppaññapuggalaparivajjanā, paññavantapuggalasevanā, tadadhimuttatāti imehi chahi kāraṇehi. **Mahāsatiṭṭhānavāṇṇanāyāṃ pana** “sattahi kāraṇehī”ti¹ vakkhati, taṃ gambhīraññācariyāpaccavekkhaṇāti imaṃ kāraṇaṃ pakkhipitvā veditabbaṃ. **Navahi kāraṇehī**ti apāyabhayapaccavekkhaṇā, gamanavīthipaccavekkhaṇā, piṇḍapātassa apacāyanatā, dāyajjamahattapaccavekkhaṇā, satthumahattapaccavekkhaṇā, sabrahmacārīmahattapaccavekkhaṇā, kusītapuggalaparivajjanā, āraddhavīriyapuggalasevanā, tadadhimuttatāti imehi navahi kāraṇehi. **Mahāsatiṭṭhānavāṇṇanāyāṃ**²

1. Dī-Ṭṭha 2. 376; Ma-Ṭṭha 1. 294 piṭṭhesu. 2. Dī-Ṭṭha 2. 378; Ma-Ṭṭha 1. 297 piṭṭhesu.

pana ānisaṃsadassāvītā, jātimahattapaccavekkhaṇāti imehi saddhiṃ “ekādasā”ti vakkhati. **Dasahi kāraṇehī**ti Buddhānussati, dhammānussati, saṃghasīlacāgadevatā-upa samānussati, lūkhapuggalaparivajjanā, siniddhapuggalasevanā, tadadhimuttatāti imehi dasahi.

Mahāsatipaññānavāṇṇāyā¹ pana pasādaniyasuttantapaccavekkhaṇāya saddhiṃ “ekādasā”ti vakkhati. **Sattahi kāraṇehī**ti paṇītabhojanasevanatā, utusukhasevanatā, iriyāpathasukhasevanatā, majjhataṭṭhapayogatā, sāraddhakāyapuggalaparivajjanatā, passaddhakāyapuggalasevanatā, tadadhimuttatāti imehi sattahi. **Dasahi kāraṇehī**ti vatthuvisadakiriyā, indriyasamattapaṭipādanā, nimittakusalatā, samaye cittassa paggahaṇaṃ, samaye cittassa niggaṇaṇaṃ, samaye cittassa sampahaṇaṇaṃ, samaye cittassa ajjuhekkhanaṃ, asamāhitapuggalaparivajjanaṃ, samāhitapuggalasevanaṃ, tadadhimuttatāti imehi dasahi kāraṇehi.

Mahāsatipaññānavāṇṇāyā² pana “jhānavimokkhapaccavekkhaṇā”ti iminā saddhiṃ “ekādasā”ti vakkhati. **Pañcahi kāraṇehī**ti sattamajjhataṭṭatā, saṅkhāramajjhataṭṭatā, sattasaṅkhāraḷāyanapuggalaparivajjanā, sattasaṅkhāramajjhataṭṭapuggalasevanā, tadadhimuttatāti imehi pañcahi kāraṇehi. Yaṃ panettha vattabbaṃ, taṃ **mahāsatipaññānavāṇṇāyā**³ āgamissati. Kāmaṃ bodhipakkhiyadhammā nāma nippariyāyato ariyamaggasampayuttā eva niyyānikabhāvato. Suttantadesanā nāma pariyāyakathāti “**iminā vipassanā -pa- kathesī**”ti vuttaṃ.

140. Tebhūmake saṅkhāre “aniccā”ti anupassati etāyāti **aniccānupassanā**, tathā pavattā vipassanā, sā pana yasmā attanā sahaḡatasāññāya bhāvitāya vibhāvitā eva hotīti vuttaṃ “**aniccānupassanāya saddhiṃ uppannasaññā**”ti. Saññāsīsena vāyaṃ vipassanāya eva niddeso. **Anattasaññā**dīsupi eseva nayo. **Lokiyavipassanāpi honti**, yasmā “aniccaṇ”ti-ādinā tā pavattantīti. **Lokiyavipassanāpi** pi-saddena missakāpettha santīti atthato āpannanti atthāpattisiddhamatthaṃ niddhāretva sarūpato dassetuṃ “**virāgo**”ti-ādi vuttaṃ. Tattha **āgatavasenā**ti tathā āgatapāḷivasena “virāgonirodho”ti hi

1. Dī-Ṭṭha 2. 382; Ma-Ṭṭha 1. 300 piṭṭhesu. 2. Dī-Ṭṭha 2. 383; Ma-Ṭṭha 1. 301 piṭṭhesu.
3. Dī-Ṭṭha 2. 384; Ma-Ṭṭha 1. 302 piṭṭhesu.

tattha nibbānaṃ vuttanti idha “virāgasaññā, nirodhasaññā”ti vuttasaññā nibbānārammaṇāpi siyuṃ. Tena vuttaṃ “**dve lokuttarāpi hontī**”ti.

141. Mettā etassa atthīti **mettaṃ**, cittaṃ. Taṃsamuṭṭhānaṃ kāyakammaṃ **mettaṃ kāyakammaṃ**. Esa nayo sesadvayepi. Imānīpi mettākāyakammādīni bhikkhūnaṃ vasena āgatāni tesam seṭṭhaparisabhāvato. Yathā pana bhikkhūsupi labbhanti, evaṃ gihīsūpi labbhanti catuparisasādhāraṇattāti taṃ dassento “**bhikkhūnañhi**”ti-ādimāha. Kāmaṃ ādibrahmacariyakadhammassavanenapi mettākāyakammāni labbhanti, nippariyāyato pana cārittadhammassavanena ayamatto icchitoti dassento “**ābhisamācārikadhammapūraṇaṃ**”ti āha. **Tepītakampi Buddhavacanaṃ**¹ paripucchana-atthakathanavasena pavattiyamānaṃ hitajjhāsayena pavattitabbato.

Āvīti pakāsaṃ, pakāsabhāvo cetha yaṃ uddissa taṃ kāyakammaṃ karīyati, tassa sammukhabhāvatoti āha “**sammukhā**”ti. **Rahoti** appakāsaṃ, appakāsatā ca yaṃ uddissa taṃ kāyakammaṃ karīyati, tassa paccakkhābhāvatoti āha “**parammukhā**”ti. **Sahāyabhāvagamaṇaṃ** tesam purato. **Ubhayehīti** navakehi, therehi ca.

Paggayhāti paggaṇhitvā uccaṃ katvā.

Kāmaṃ mettāsinehasiniddhānaṃ nayanānaṃ ummīlanā, pasannena mukhena olokanañca mettaṃ kāyakammameva, yassa pana cittassa vasena nayanānaṃ mettāsinehasiniddhatā, mukhassa ca pasannatā, taṃ sandhāya vuttaṃ “**mettaṃ manokammaṃ nāmā**”ti.

Lābhasaddo kammasādhano “lābhā vata, lābho laddho”ti-ādīsu viya, so cetha “dhammaladdhā”ti vacanato atītakālikoti āha “**cīvarādayo laddhapaccayā**”ti. Dhammato āgatāti **dhammikā**. Tenāha “dhammaladdhā”ti. Imameva hi atthaṃ dassetuṃ “**kuhanādi**”ti-ādi vuttaṃ. Cittena vibhajanapubbakaṃ kāyena vibhajananti mūlameva dassetuṃ “**evaṃ cittena vibhajanā**”ti vuttaṃ, tena cittuppādamattenapi paṭivibhāgo na kātabboti dasseti. **Appaṭivibhattanti** bhāvanapūmsakaniddeso, appaṭivibhattaṃ vā lābhaṃ bhuñjati kammaniddeso eva.

1. Tepītakampi buddhavacanaṃ mettaṃ vacīkammaṃ nāma (?)

Taṃ taṃ neva gihīnaṃ deti attano ājīvasodhanatthaṃ. **Na attanā bhuñjatīti** attanāva na paribhuñjati “mayhaṃ asādhāraṇabhogitā mā hotū”ti. **Paṭiggaṇhanto ca -pa- passatī**”ti iminā tassa lābhassa tīsupi kālesu sādharmaṇato ṭhapanāṃ dassitaṃ. “**paṭiggaṇhanto ca saṃghena sādharmaṇaṃ hotū**”ti iminā paṭiggahaṇakālo dassito, “**gahetvā -pa- passatī**”ti iminā paṭiggahitakālo, tadubhayaṃ pana tādīsena pubbābhogena vinā na hotīti atthasiddho purimakālo. Tayidaṃ paṭiggahaṇato pubbevassa hoti “saṃghena sādharmaṇaṃ hotūti paṭiggahessāmī”ti. Paṭiggaṇhantassa hoti “saṃghena sādharmaṇaṃ hotūti paṭiggaṇhāmī”ti. Paṭiggahetvā hoti “Saṃghena sādharmaṇaṃ hotūti paṭiggahitaṃ mayā”ti evaṃ tilakkhaṇasampannaṃ katvā laddhalābhaṃ osānalakkhaṇaṃ avikopetvā paribhuñjanto sādharmaṇabhogī, appaṭivibhattabhogī ca hoti.

Imaṃ pana sāraṇīyadhammanti imaṃ catutthaṃ saritabbayuttadhammaṃ. **Na hi -pa- gaṇhanti**, tasmā sādharmaṇabhogitā eva dussīlassa natthīti āraṃbhopi tāva na sambhavati, kuto pūraṇanti adhippāyo. “**Parisuddhasīlo**”ti iminā lābhassa dhammikabhāvaṃ dasseti. “**Vattam akhaṇḍento**”ti iminā appaṭivibhattabhogitaṃ, sādharmaṇabhogitaṃca dasseti. Sati pana tadubhaye sāraṇīyadhammo pūrito eva hotīti āha “**pūretī**”ti. “**Odissakaṃ katvā**”ti etena anodissakaṃ katvā pituno, ācariyupajjhāyādīnaṃ, vā therāsanatto paṭṭhāya dentassa sāraṇīyadhammoyeva hotīti. **Sāraṇīyadhammo panassa na hotīti** paṭijagganaṭṭhāne odissakaṃ katvā dinnattā. Tenāha “**palibodhajagganaṃ nāma hotī**”ti-ādi. Yadi evaṃ sabbena sabbaṃ sāraṇīyadhammapūrakassa odissakadānaṃ na vaṭṭatīti? No na vaṭṭati yuttatṭhāneti dassento “**tena panā**”ti-ādimāha. Gilānādīnaṃ odissakaṃ katvā dānaṃ appaṭivibhāgapakkhikaṃ “asukassa na dassāmī”ti paṭikkhepassa abhāvato. Byatirekappadhāno hi paṭivibhāgo. Tenāha “**avasesan**”ti-ādi. **Adātumpīti pi-**saddena dātumpi vaṭṭatīti dasseti, taṃca kho karuṇāyanavasena, na vattapūraṇavasena.

Susikkhitāyāti sāraṇīyadhammapūraṇavidhimhi suṭṭhu sikkhitāya, sukusalāyāti attho. Idāni tassā kosallaṃ dassetuṃ “**susikkhitāya**

hī”ti-ādi vuttaṃ. **“Dvādasahi vassehi pūrati, na tato oran”**ti iminā tassa duppūraṇaṃ dasseti. Tathā hi so mahapphalo mahānisaṃso, diṭṭhadhammikehipi tāva garutarehi phalānisaṃsehi ca anugato. Taṃsamaṅgī ca puggalo vīsesalābhī ariyapuggalo viya loke acchariyabbhutadhammasamannāgato hoti. Tathā hi so duppajahaṃ dānamayassa, sīlamayassa ca puññassa paṭipakkhadhammaṃ sudūre vikkhambhitaṃ katvā suvisuddhena cetasā loke pākaṭo paññāto hutvā viharati, tassimamatthaṃ byatirekato, anvayato ca vibhāvetuṃ **“sace hī”**ti-ādi vuttaṃ, taṃ suviññeyyameva.

Idāni ye samparāyike, diṭṭhadhammike ca ānisaṃse dassetuṃ **“evan”**ti-ādi vuttaṃ. **Neva issā na macchariyaṃ hoti** cirakālabhāvanāya vidhutabhāvato. **Manussānaṃ piyo hoti** pariccāgasīlatāya visuddhattā. Tenāha”dadāṃ piyo hoti bhajanti naṃ bahū”ti-ādi¹. **Sulabhapaccayo hotīti** dānavasena uḷārajjhāsayaṇaṃ paccayaalābhassa idhānisaṃsabhāvato dānassa. **Pattagatamassa diyyamānaṃ na khīyati** pattagatavasena dvādasavassikassa mahāpattassa avicchena pūritattā. **Aggabhaṇḍaṃ labhati** devasikaṃ dakkhiṇeyyānaṃ aggato paṭṭhāya dānassa dinnattā. **Bhayevā -pa- āpajjanti** deyyapaṭiggāhakavikappaṃ akatvā attani nirapekkhacittena cirakālaṃ dānapūratāya pasāditacittattā.

Tatrāti tesu ānisaṃsesu vibhāvetabbesu. **Imāni** taṃ dīpanāni **vatthūni** kāraṇāni. **Alabhantāpīti** amahāpuññatāya na lābhino samānāpi. **Bhikkhācāramaggasabhāganti** sabhāgaṃ tabbhāgiyaṃ bhikkhācāramaggaṃ jānanti.

Anuttarimanussadhammattā, therānaṃ saṃsayavinodanattaṃca **“sāraṇīyadhammo me bhante pūrīto”**ti āha. Tathā hi dutiyavattthusmimpi therena attā pakāsīto. Manussānaṃ piyatāya, sulabhapaccayatāyapi idaṃ vatthumeva. Pattagatākhīyanassa pana vīsesaṃ vibhāvanato **“idaṃ tāva -pa-ettha vatthun”**ti vuttaṃ.

1. Am 2. 34 piṭṭhe.

Giribhaṇḍamahāpūjāyāti cetiyagirimhi sakalalaṅkāḍīpe, yojanappamāṇe samudde ca nāvāsāṅkhāḍīke ṭhapetvā dīpapupphagandhādīhi kariyamānamahāpūjāyam. **Pariyāyenapīti** lesenapi. **Anucchavikanti** sāraṇīyadhammapūraṇatopi **idaṁ** yathābhūtapavedanam **tumhākaṁ**¹ **anucchavikanti** attho.

Anārocetvāva palāyimsu corabhayena. “Attano dujjīvikā yā”ti ca vadanti.

Vatṭissatīti kappissati. **Therī sāraṇīyadhammapūrikā ahoṣi**, therassa pana silatejēna devatā ussukkaṁ āpajji.

Natthi etesaṁ khaṇḍanti **akhaṇḍāni**. Tam pana nesaṁ khaṇḍam dassetuṁ “**yassā**”ti-ādi vuttaṁ. Tattha upasampannasīlānaṁ uddesakkena ādi-antā veditabbā. Tenāha “**sattasū**”ti-ādi. Anupasampannasīlānaṁ pana samādānakkamenapi ādi-antā labbhanti. **Pariyante chinnaṣāṭako viyāti** vatthante, dasante vā chinnavattham viya, visadisūdāharaṇaṅcetam “**akhaṇḍāni**”ti imassa adhigatattā. Evaṁ sesānipi udāharaṇāni. Khaṇḍitabhinnatā khaṇḍam, tam etassa atthīti **khaṇḍam**, silam. “**Chiddan**”ti-ādisupi eseva nayo. **Vemajjhe bhinnam** vinivijjhanavasena visabhāgavaṇṇena gāvī viyāti sambandho. Sabalarahitāni **asabalāni**. Tathā **akammāsāni**. Silassa **taṇhādāsabyato mocanam** vivaṭṭūpanissayabhāvāpādanam. Yasmā ca taṁsamaṅgīpuggalo serī sayamvasī bhujisso nāma hoti, tasmāpi bhujissāni. Tenevāha “**bhujissabhāvakāraṇato bhujissāni**”ti. Suparisuddhabhāvena pāsamsattā **viññūpasatthāni**. Imināham sīlena devo vā bhavēyam, devaṅṅataro vā, tattha “**nicco dhuvo sassato**”ti, “**sīlena suddhī**”ti ca evamādinā **taṇhādīṭṭhīhi aparāmaṭṭhattā**. “**Ayam te sīlesu doso**”ti catūsupi vipattisu yāya kāyaci vipattiyā dassanena **parāmaṭṭhum** anuddhamsetuṁ. Samādhisaṁvattanappayojanāni **samādhisaṁvattanikāni**.

Samānabhāvūpagatasīlāti sīlasampattiyā samānabhāvaṁ upagatasīlā sabhāgavuttikā. Kāmaṁ puthujjanānaṅca catupārisuddhisīle nānattam na siyā,

1. Tuyham (Aṭṭhakathāyam)

taṃ pana na ekantikam, idaṃ ekantikam niyatabhāvatoti āha “**natthi maggasīle nānattan**”ti. **Taṃ sandhāyetam vuttanti** maggasīlam sandhāya etaṃ “yāni tāni sīlāni”ti-ādi vuttam.

Yāyanti yā ayam mayhañceva tumhākañca paccakkhabhūtā. **Diṭṭhīti** maggasammādiṭṭhi. **Niddosāti** nidhutadosā¹, samucchinnarāgādipāpadhammāti attho. **Niyyātīti** vaṭṭadukkhato nissarati nigacchati. Sayam niyyantasseva hi “tamsamaṅgīpuggalam vaṭṭadukkhato niyyāpetī”ti vuccati. Yā satthu anusīṭṭhi, taṃ karotīti **takkaro**, tassa, yathānusīṭṭham paṭipajjanakassāti attho. **Samānadiṭṭhibhāvanti** sadisadiṭṭhibhāvaṃ saccasampaṭivedhena abhinnadiṭṭhibhāvaṃ. **Vuddhiyevāti** ariyavinaye guṇehi vuḍḍhiyeva, no parihānīti ayam aparihāniyadhammadesanā attanopi sāsanaassa addhaniyatam ākaṅkhanena Bhagavatā idha desitā.

142. **Āsannaparinibbānattāti** katipayamāsādhikena samvaccharamattena parinibbānam bhavissatīti katvā vuttam. **Etamyevāti** “iti sīlan”ti-ādikāmyeva. **Iti sīlanti** ettha iti-saddo pakārattho, parimāṇattho ca ekajjham katvā gahitoti āha “**evam sīlam ettakam sīlan**”ti. **Evam sīlanti** evampabhedam sīlam. **Ettakanti** etaṃparamam, na ito bhīyyo. **Catupārisuddhisīlanti** maggassa sambhārabhūtam lokiyacatupārisuddhisīlam. **Cittekaggatā samādhīti** etthāpi eseva nayo. **Yasmim sīle thatvāti** yasmim lokuttara kusalassa padaṭṭhānabhūte “pubbeva kho panassa kāyakammaṃ vacīkammaṃ ājīvo supārisuddho hotī”ti² evam vuttasīle paṭiṭṭhāya. **Esoti** maggaphalāsamādhī. **Paribhāvitoti** tena sīlena sabbaso bhāvito sambhāvito. **Mahapphalo hoti mahānisaṃsoti** maggasamādhī tāva sāmāññaphalehi mahapphalo, vaṭṭadukkhavūpasamena mahānisaṃso. Itaro paṭippassaddhipphānena mahapphalo, nibbutisukhuppattiyā mahānisaṃso. **Yamhi samādhimhi thatvāti** yasmim lokuttarakusalassa padaṭṭhānabhūte pādakajjhānasamādhimhi ceva vuṭṭhānagāminisamādhimhi ca thatvā. **Sāti** maggaphalapaññā. **Tena paribhāvitāti** tena yathāvuttasamādhinā sabbaso bhāvitā paribhāvitā. Mahapphalamahānisaṃsatā samādhimhi vuttanayena veditabbā. Apica te bojjhaṅgamaggaṅgajhānaṅgappabhedahetutāya **mahapphalā**,

1. Niggatadosā (Ka)

2. Ma 3. 337; Abhi 4. 433 piṭṭhesu.

sattadakkhiṇeyyapuggalavibhāgahetutāya **mahānisaṃsāti** veditabbā. **Yāya paññāya thatvāti** yāyaṃ vipassanāpaññāyaṃ, samādhivipassanāpaññāyaṃ vā thatvā. Samathayānikassa hi samādhisahagatāpi paññā maggādhigamāya visesapaccayo hotiyeva. **Sammadevāti** suṭṭhuyeva yathā āsavānaṃ lesopi nāvasissati, evaṃ sabbaso **āsavehi vimuccati**. Aggamaggakkhaṇaṇhi sandhāyetaṃ vuttaṃ.

143. Lokiyatthasaddānaṃ viya abhiranta-saddassa siddhi daṭṭhabbā. Abhirantaṃ abhirataṃ abhiratīti hi atthato ekaṃ. Abhiranta-saddo cāyaṃ abhirucipariyāyo, na assādapariyāyo. Assādavasena hi katthaci vasantassa assādavatthuvigamena siyā tassa tatha anabhirati, yadidaṃ khīṇāsavānaṃ natthi, pageva buddhānanti āha “**Buddhānaṃ -pa- natthī**”ti. Abhirativasena katthaci vasitvā tadabhāvato aññattha gamaṇaṃ nāma Buddhānaṃ natthi. Veneyyavinayanattham pana katthaci vasitvā tasmim siddhe veneyyavinayanatthameva tato aññattha gacchanti, ayamettha yathārucci. **Āyāmāti** ettha ā-saddo “āgacchā”ti iminā samānatthoti āha “**ehi yāmā**”ti. **Ayāmāti** pana pāṭhe a-kāro nipātamattaṃ. **Santikāvacarattā theram ālapati**, na pana tadā satthu santike vasantānaṃ bhikkhūnaṃ abhāvato. Aparicchinnagaṇano hi tadā Bhagavato santike bhikkhusaṃgho. Tenāha “mahatā bhikkhusaṃghena saddhin”ti. **Ambalaṭṭhikāgamananti** ambalaṭṭhikāgamanapaṭisaṃyuttapāṭhamāha. **Pāṭaligamaneti** etthāpi eseva nayo. **Uttānameva** anantaraṃ, heṭṭhā ca saṃvaṇṇitarūpattā.

Sāriputtasīhanādavaṇṇanā

145. “**Āyasmā sāriputto**”ti-ādi pāṭhajātaṃ. **Sampasādanīyeti** Sampasādanīyasutte¹. **Vitthāritaṃ** porāṇaṭṭhakathāyaṃ, tasmā mayampi tattheva naṃ atthato vitthārayissāmāti adhippāyo.

Dussīla-ādīnavavaṇṇanā

148. Āgantvā vasanti ettha āgantukāti **āvasatho**, tadeva agāranti āha “**āvasathāgāranti āgantukānaṃ āvasathagehan**”ti.

Dvinnam rājūnanti licchavirājamagadharājūnam. **Sahāyakā**ti sevakā. **Kulānī**ti kuṭumbike. Santhatanti **santhari**, sabbam santhari sabbasanthari, tam **sabbasantharim**. Bhāvanapuṃsakaniddeso cāyam. Tenāha “**yathā sabbam santhatam hoti, evan**”ti.

149. **Dussīloti** ettha du-saddo abhāvatto “duppañño”ti-ādīsu¹ viya, na garahatthoti āha “**asīlo nissīlo**”ti. **Bhinnasamvaroti** ettha yo samādinnaṣīlo kenaci kāraṇena sīlabhedam patto, so tāva bhinnasamvaro hoti. Yo pana sabbena sabbam asamādinnaṣīlo ācārahīno, so katham bhinnasamvaro nāma hotīti? Sopi sādhusamācārassa parihāniyassa bheditattā bhinnasamvaro eva nāma. Vissaṭṭhasamvaro samvararahitoti hi vuttam hoti.

Tam tam sippaṭṭhānam. **Māghātakāleti** “mā ghāthetha paṇino”ti evam māghātāti ghosanam ghositadivase.

Abbhugacchati pāpako kittisaddo.

Ajjhāsayena maṅku hotiyeva vippaṭṭisāribhāvato.

Tassāti dussīlassa. **Samādāya pavattiṭṭhānanti** uṭṭhāya samuṭṭhāya katakāraṇam. **Āpātham āgacchatīti** tam manaso upaṭṭhāti. **Ummīletvā idhalokanti** ummīlanakāle attano puttadārādīdassanavasena idhalokam **passati**. **Nimīletvā paralokanti** nimīlanakāle gatinimittupaṭṭhānavasena paralokam **passati**. Tenāha “**cattāro apāyā**”ti-ādī. **Pañcamapadanti** “kāyassa bheda”ti-ādīnā vutto pañcamo ādīnavakoṭṭhāso.

Sīlavanta-ānisamsavaṇṇanā

150. **Vuttavipariyāyenāti** vuttāya ādīnavakathāya vipariyāyena. “Appamatto tam tam kasivāṇijjādīm yathākālam sampādetum sakkotī”ti-ādīnā pāsamsam. sīlamassa atthīti **sīlavā**. **Sīlasampannoti** sīlena samannāgato. **Sampannasīloti** evamādikam pana atthavacanam sukaranti anāmaṭṭham.

1. Ma 1. 366; Am 2. 7 piṭṭhesu.

151. **Pālimuttakāyā**ti saṅgīti-anāruḥhāya **dhammikathāya**. **Tatthevā**ti āvasathāgāre eva.

Pāṭaliputtanagaramāpanavaṇṇanā

152. **Issariyamattāyā**ti issariyappamāṇena, issariyena ceva vitthūpakaraṇena cāti evaṃ vā attho daṭṭhabbo. Upabhogūpakaraṇānipi hi loke “mattā”ti vuccanti. **Pāṭaligāmaṃ nagaram katvā**ti pubbe “Pāṭaligāmo”ti laddhanāmaṃ ṭhānaṃ idāni nagaram katvā. **Māpentī**ti patiṭṭhāpentī. **Āyamukhapacchindanatthanti** āyadvārānaṃ upacchedanāya. “**Sahassasevā**”ti vā pāṭho, sahasaso eva. Tenāha “**ekekavaggavasena sahasaṃ sahasaṃ hutvā**”ti. **Gharavattḥūnī**ti gharapatiṭṭhāpanaṭṭhānāni. **Cittāni namantī**ti taṃtaṃdevatānubhāvena tattha tattheva cittāni namanti vatthuvijjāpāṭhakānaṃ, yattha yattha tāhi vatthūni pariggahitāni. **Sippānubhāvenā**ti sippānugatavijjānubhāvena. **Nāgaggāhoti** nāgānaṃ nivāsappariggaho. Sesadvayesupi eseva nayo. **Pāsāṇoti** appalakkhaṇapāsāṇo. **Khāṇukoti** yo koci khāṇuko. **Sippaṃ jappitvā** tādisaṃ sārambhaṭṭhānaṃ pariharitvā anārambhe ṭhāne tāhi vatthupariggāhikāhi **devatāhi saddhīm mantayamānā viya** taṃtaṃgehāni **māpentī** upadesadānavasena. **Nesanti** vatthuvijjāpāṭhakānaṃ, sabbāsaṃ devatānaṃ. **Maṅgalaṃ vaḍḍhāpessantī**ti maṅgalaṃ brūhessanti. Paṇḍitadassanādīni hi uttamamaṅgalāni. Tenāha “**atha mayan**”ti-ādi.

Saddo abbhugacchati avayavadhammena samudāyassa apadisitabbato yathā “alaṅkato devadatto”ti.

Ariyakamanussānanti ariyadesavāsīmanussānaṃ. **Rāsivasenevā**ti “sahasasā satahasasā”ti-ādinā rāsivaseneva, appakassa pana bhaṇḍassa kayavikkayo aññatthāpi labbhatevāti “rāsivasenevā”ti vuttaṃ. Vāṇijāya patho pavattiṭṭhānanti **vaṇippathoti** purimavikappe attho, dutiyavikappe pana vāṇijānaṃ patho pavattiṭṭhānanti **vaṇippathoti** imamattham dassento “**vāṇijānaṃ vasanaṭṭhānaṃ**”ti āha. Bhaṇḍapuṭe bhindanti mocenti etthāti **puṭabhedananti** ayamettha atthoti āha “**bhaṇḍapuṭe -pa- vuttaṃ hoti**”ti.

Ca-kārattho samuccayattho **vā-saddo**.

153. **Kāḷakaṇṇī sattāti** attanā kaṇhadhammabahulatāya paresaṅca kaṇhavipākānatthanibbattinimittatāya “kāḷakaṇṇī”ti laddhanāmā parūpaddavakarā appesakkhasattā. **Tanti** Bhagavantam. **Pubbaṅhasamayanti** pubbaṅhe ekaṃ samayaṃ. **Gāmappavisananīhārenāti** gāmappavesananivasanākārena. **Kāyapaṭibaddham katvāti** cīvaram pārupitvā, pattam hatthena gahetvāti attho.

Etthāti etasmim vā sakappitappadese. **Saññateti** sammadeva saññate susaṃvutakāyavācācitte.

Pattim dadeyyāti attanā pasutapuññaṃ tāsam devatānaṃ anuppadaḷḷeyya. **“Pūjitā”**ti-ādīsu tadeva pattidānaṃ **pūjā**, anāgate eva updave ārakkhasaṃvidhānaṃ **paṭipūjā**. “Yebhuyyena nātimanussā nātīpetānaṃ pattidānādīnā pūjanamānanādīni karonti, ime pana aññatakāpi samānā tathā karonti, tasmā nesam sakkaccaṃ ārakkhā saṃvidhātābbā”ti aññamaññaṃ sampavāretvā devatā tattha ussukkaṃ āpajantīti dassento **“ime”**ti ādimāha. Balikammakaraṇaṃ **mānanaṃ**, sampati uppannaparissayaharaṇaṃ **paṭimānanti** dassetuṃ **“ete”**ti-ādi vuttaṃ.

Sundarāni passatīti sundarāni iṭṭhāni eva passati, na aniṭṭhāni.

154. **Āṇiyo koṭṭetvāti** lahuke dārudaṇḍe gahetvā kavāṭaphalake viya aññamaññaṃ sambandhe kātuṃ āṇiyo koṭṭetvā. Nāvāsankhepena kataṃ **uḷumpaṃ**, veḷunaḷādike saṅgharivā valli-ādīhi kalāpavasena bandhitvā kattabbaṃ **kullaṃ**.

Udakaṭṭhānassetam adhivacanaṃti yathāvuttassa yassa kassaci udakaṭṭhānassa etaṃ “aṇṇavan”ti adhivacanaṃ, samuddassevāti adhippāyo. **Saranti idha nadī adhippetā** sarati sandatīti katvā. **Gambhīravitthatanti** agāḍhaṭṭhena gambhīram, sakalalokattayabyāpitāya vitthatam. **Visajjāti** anāsajja appatvā. **Pallalāni** tesam ataraṇato. **Vināyeva kullenāti** īdisaṃ udakaṃ kullena īdisena vinā eva **tiṇṇā medhāvino janā**, taṇhāsaram pana ariyamaggasaṅkhātāṃ setuṃ katvā nittiṇṇāti yojanā.

Paṭhamabhāṇavāravaṇṇanā niṭṭhitā.

Ariyasaccakathāvaṇṇanā

155. **Mahāpanādassa** rañño. **Pāsādakotiyam katagāmoti** pāsādassa patitathupikāya paṭiṭṭhitaṭṭhāne niviṭṭhagāmo. **Ariyabhāvakarānanti** ye paṭivijjhanti, tesam ariyabhāvakarānam nimittassa kattubhāvūpacāraseneva vuttam. Tacchāvipallāsabhūtabhāvena **saccānam**. Anubodho pubbhāgiyam ñānam, paṭivedho maggañāṇena abhisamayo, tattha yasmā anubodhapubbako paṭivedho anubodhena vinā na hoti, anubodhopi ekacco paṭivedhena sambandho, tadubhayābhāva hetukañca vaṭṭeva saṃsaraṇam, tasmā vuttam pāḷiyam “ananubodhā -pa-tumhākañcā”ti. Paṭisandhiggahaṇavasena bhavato bhavantarūpagamanam **sandhāvanam**, aparāparam cavanupapajjanavasena sañcaraṇam **saṃsaraṇanti** āha “**bhavato**”ti-ādi. Sandhāvitasam̐saritapadānam kammaśādhanaṭam sandhāyāha “**mayā ca tumhehi cā**”ti paṭhamavikappe. Dutiyavikappe pana bhāvasādhanataṃ hadaye katvā “**mamañceva tumhākañcā**”ti yathārutavaseneva vuttam. **Nayanasamatthāti** pāpanasamatthā, dīgharajjunā baddhasakuṇam viya rajjuhattho puriso desantaraṃ taṇhārajjunā baddham sattasantānam abhisankhāro bhavantaraṃ neti etāyāti **bhavanetti**, taṇhā, sā ariyamaggasatthena suṭṭhu hatā chinnāti **bhavanettisamūhatā**.

Anāvattidhammasambodhiparāyaṇavaṇṇanā

156. **Dve gāmā** “nātikā”ti evam laddhanāmo, ña-kārassa cāyam na-kārādesena niddeso “animittā na nāyare”ti-ādīsu¹ viya. Tenāha “**ñātigāmake**”ti. **Giṇjakā** vuccanti iṭṭhakā, giṇjakāhi eva kato āvasathoti **giṇjakāvasatho**. So kira āvāso yathā sudhāparikammaṇa sampayojanam natthi, evam iṭṭhakāhi eva cinitvā chādetvā kato. Tena vuttam “**iṭṭhakāmaye āvasathe**”ti. Tulādaṇḍakavāṭaphalakāni pana dārumayāneva.

157. **Oram** vuccati kāmādhātu, paccayābhāvena taṃ oram bhajantīti **orambhāgiyāni**, orambhāgassa vā hitāni **orambhāgiyāni**. Tenāha “**heṭṭhābhāgiyānan**”ti-ādi. **Tīhi maggehi**ti heṭṭhimehi tīhi maggehi.

1. Visuddhi 1. 228; Saṃ 1. 39; Jātaka-Ṭṭha 2. 52 piṭṭhesu.

Tehi pahātabbatāya hi nesam̄ saṃyojanānam̄ orambhāgiyatā.
 Orambhaññiyāni vā **orambhāgiyāni** vuttāni niruttinayena. Idāni
 byatirekamukhena nesam̄ orambhāgiyabhāvaṃ vibhāvetum̄ “**tatthā**”ti-ādi
 vuttam̄. Vikkhambhitāni samatthatāvighātena puthujjanānam̄, samucchinnāni
 sabbaso abhāvena ariyānam̄ rūpārūpabhavūpapattiyā vibandhāya na hontīti
 vuttam̄ “**avikkhambhitāni asamucchinnāni**”ti. **Nibbattavasenāti**
 paṭisandhiggahaṇavasena. **Gantum̄ na denti**
 mahaggaṭagāmikammāyūhanassa vinibandhanato. **Sakkāyadiṭṭhi-ādīni tīni**
 saṃyojanāni kāmaccchandabyāpādā viya mahaggaṭūpapattiyā
 avinibandhabhūtānīpi kāmabhavūpapattiyā visesapaccayattā **tattha**
 mahaggaṭabhāve **nibbattampi** tannibbattihetukamma parikkhaye
 kāmabhavūpapattipaccayatāya mahaggaṭabhavato **ānetvā puna idheva**
 kāmabhāve eva **nibbattāpenti**, tasmā **sabbāpini** pañcapi saṃyojanāni
orambhāgiyāni eva. Paṭisandhivasena anāgamanasabhāvāti
 paṭisandhiggahaṇavasena tasmā lokā idha na āgamanasabhāvā.
 Buddhadassanatheradassanadhammassavanānam̄ panatthāya’ssa āgamanam̄
 anivāritam̄.

Kadāci karahaci uppattiyā saviraḷākāratā, **pariyuṭṭhānamandatāya**
 abahalatāti **dvedhāpi tanubhāvo. Abhiñhanti** bahuso. **Bahalabahalāti**
 tibbatibbā. Yattha uppajjanti, tam̄ santānam̄ maddantā, pharantā, sādhentā,
 andhakāram̄ karontā uppajjanti, dvīhi pana maggehi pahīnattā **tanukatanukā**
 mandamandā **uppajjanti. “Puttadhītarō hontī”**ti idaṃ akāraṇam̄. Tathā hi
 aṅgapaccāṅgaparāmasanam̄ mattenapi te hontī. **Idanti** “rāgadosamohānam̄
 tanuttā”ti idaṃ vacanam̄. **Bhavatanukavasenāti** appakabhavavasena. Tanti
 mahāsivattherassa vacanam̄ paṭikkhittanti sambandho. Ye bhavā ariyānam̄
 labbhanti, te paripuṇṇalakkhaṇabhavā eva. Ye na labbhanti, tattha kīdisam̄
 tam̄ bhavatanukam̄, tasmā ubhayathāpi bhavatanukassa asambhavo evāti
 dassetum̄ “**esātāpannassā**”ti-ādi vuttam̄. **Aṭṭhame bhāve bhavatanukam̄**
natthi aṭṭhamasseva bhavassa sabbasseva abhāvato. Sesesupi eseva nayo.

Kāmāvacaralokam̄ sandhāya vuttam̄ itarassa lokassa vasena tathā
 vuttum̄ asakkuṇeyyattā. Yo hi sakadāgāmī devamanussalokesu
 vomissakavasena nibbattati, sopi kāmabhavavaseneva paricchinditabbo.
 Bhagavatā ca kāmāloke ṭhatvā “sakideva imaṃ lokam̄

āgantvā”ti vuttam, “imaṃ lokam āgantvā”ti ca iminā pañcasu sakadāgāmīsu cattāro vajjetvā ekova gahito. Ekacco hi idha sakadāgāmiphalaṃ patvā idheva parinibbāyati, ekacco idha patvā devaloke parinibbāyati, ekacco devaloke patvā tattheva parinibbāyati, ekacco devaloke patvā idhūpapajjitvā parinibbāyati, ime cattāro idha na labbhanti. Yo pana idha patvā devaloke yāvatāyukaṃ vasitvā puna idhūpapajjitvā parinibbāyati, ayamidha adhippeto. Aṭṭhakathāyaṃ pana imaṃ lokanti kāmabhavo adhippetoti imamatthaṃ vibhāvetum “**sace hī**”ti-ādinā aññamyeva catukkaṃ **dassitam**.

Catūsu -pa- sabhāvoti attho apāyagamanīyānaṃ pāpadhammānaṃ sabbaso pahinattā. **Dhammaniyāmenāti** maggadhammaniyāmena. **Niyato** uparimaggādhigamassa avassambhāvibhāvato. Tenāha “**sambodhiparāyaṇo**”ti.

Dhammādāsadhammapariyāyavaṇṇanā

158. **Tesaṃ tesaṃ nāṇagatinti** tesaṃ tesaṃ sattānaṃ “asuko sotāpanno, asuko sakadāgāmī”ti-ādinā taṃtaṃnāṇādhigamanaṃ. **Nāṇūpapattim nāṇābhisamparāyanti** tato parampi “niyato sambodhiparāyaṇo, sakideva imaṃ lokam āgantvā dukkhassantaṃ karissatī”ti-ādinā ca nāṇasahitaṃ uppattipaccayabhāvaṃ. **Olokentassa** nāṇacakkhunā pekkhantassa **kāyakilamathova**, na tena kāci veneyyānaṃ atthasiddhīti adhippāyo. **Cittavihesāti** cittakhedo, sā kilesūpasamhitattā **Buddhānaṃ natthi**. Ādīyati ālokīyati attā etenāti **ādāsaṃ**, dhammabhūtaṃ ādāsaṃ **Dhammādāsaṃ**, ariyamaggañāṇassetam adhivacanaṃ, tena ariyasāvaka catūsu ariyasaccesu viddhastasammohattā attānampi yāthāvato nātvā yāthāvato byākareyya, tappakāsanato pana dhammapariyāyassa suttassa dhammādāsata veditabbā. **Yena Dhammādāsenāti** idha pana maggadhammameva vadati.

Avecca yāthāvato jānitvā tannimitta-uppannapasādo **aveccapasādo**, maggādhigamena uppannapasādo, so pana yasmā pāsāṇapabbato viya niccalo, na ca kenaci kāraṇena vigacchati, tasmā vuttam “**acalena accutenā**”ti.

“**Pañcasīlāni**”ti gahaṭṭhavasenetam vuttam tehi ekantapariharaṇīyato. Ariyānam pana sabbāni sīlāni kantāneva. Tenāha “**sabbopi panettha samvaro labbhatiyevā**”ti.

Sabbesanti sabbesam ariyānam. **Sikkhāpadāvirodhenāti** yathā bhūtarocanāpatti na hoti, evam. **Yuttaṭṭhāneti** katum yuttaṭṭhāne.

Ambapālīgaṇikāvattuvaṇṇanā

161. Tadā kira vesālī iddhā phītā sabbaṅgasampannā ahoṣi vepullappattā, tam sandhāyāha “**khandhake vuttanayena vesāliyā sampannabhāvo veditabbo**”ti. Tasmim kira bhikkhusaṅghe pañcasatamattā bhikkhū navā acirapabbajitā ahesum osannavīriyā ca. Tathā hi vakkhati “tatha kira ekacce bhikkhū osannavīriyā”ti-ādi¹. **Satipaccupaṭṭhānatthanti** tesam satipaccupaṭṭhāpanattham. **Saratīti** kāyādi ke yathāsabhāvato nāṇasampayuttāya satiyā anussarati upadhāreti. **Sampajānātīti** samam pakārehi jānāti avabujjhati. Ayamettha saṅkhepo, vitthāro pana parato **Satipaṭṭhānavāṇṇanāyam**² āgamissati.

Sabbasaṅgāhakanti sarāragatassa ceva vatthālānkāragatassa cāti sabbassa nīlabhāvassa saṅgāhakaṃ vacanam. **Tassevāti** nīlāti sabbasaṅgāhakavasena vutta-atthasseva. **Vibhāgadassananti** pabhedadassanam. Yathā te licchavirājāno apītādivaṇṇā eva keci vilepanavasena pītādivaṇṇā khāyimsu, evam anīlādivaṇṇā eva keci vilepanavasena nīlādivaṇṇā khāyimsūti vuttam “**na tesam pakativāṇṇo nīlo**”ti-ādi. Nīlo maṇi etesūti **nīlamaṇi**, indanīlamahānīlādinīlaratanavinaddhā alaṅkāra. Te kira suvaṇṇaviracitehi maṇi-obhāsehi ekanīlā viya khāyanti. **Nīlamaṇikhacitāti** nīlaratanaparikkhittā. **Nīlavatthaparikkhittāti** nīlavatthanīlakampalaparikkhepā. **Nīlavammikehīti** nīlakaghaṭaparikkhittehi. **Sabbapadesūti** “pītā hontī”ti-ādisabbapadesu. **Parivaṭṭesīti** paṭighaṭṭesi. Āharanti imasmā rājapurisā balinti **āhāro**, tappattajanapadoti āha “**sāhāranti sajanapadan**”ti. Aṅguliphoṭopi aṅguliya

1. Dī-Ṭṭha 2. 138 piṭṭhe.

2. Dī-Ṭṭha 2. 349; Ma-Ṭṭha 1. 248 piṭṭhesu.

cālanavaseneva hotīti vuttam **“aṅgulim cālesun”**ti. **Ambakāyāti** mātuḡāmena. Upacāravacanañhetam itthīsu, yadidam **“ambakā mātuḡāmo jananikā”**ti.

Avalokethāti apavattitvā olokanam oloketha. Tam pana apavattitvā olokanam anu anu dassanam hotīti āha **“punappunam passathā”**ti. **Upanethāti** **“yathāyam Licchavirājaparisā sobhātisayena yuttā, evam Tāvatisaparīsā”**ti upanayam karotha. Tenāha **“tāvatiṃsehi samake katvā passathā”**ti.

“Upasamharatha bhikkhave Licchaviparisam Tāvatisasadisan”ti nayidam nimittaggāhe niyojanam, kevalam pana dibbasampattisadisā etesam rājūnam issariyasampattīti anupubbikathāya saggasampattikathānam viya daṭṭhabbam. Tesu pana bhikkhūsu ekaccānam tattha nimittaggāhopi siyā, tam sandhāya vuttam **“nimittaggāhe uyyojeti”**ti. **Hitakāmatāya** tesam bhikkhūnam yathā Āyasmato Nandassa hitakāmatāya saggasampattidassanam. Tenāha **“tatra kirā”**ti-ādi. **Osannavīriyāti** sammāpaṭipattiyam avasannavīriyā, ossaṭṭhavīriyā vāti attho. **Aniccalakkhaṇavibhāvanatthanti** tesam rājūnam vasena bhikkhūnam aniccalakkhaṇavibhūtabhāvattham.

Veḷuvagānavassūpagamanavaṇṇanā

163. **Samīpe veḷuvagāmoti**¹ pubbaṇham vā sāyanham vā gantvā nivattanayogye āsannaṭṭhāne niviṭṭho parivāragāmo. **Sanḡammāti** sammā gantvā. **Assāti** Bhagavato.

164. **Pharusoti** kakkhaḷo, garutaroti attho. **Visabhāgarogoti** dhātuvisabhāgatāya samuṭṭhito bahalatararogo, na ābādhamattam. **Ñāṇena paricchinditvāti** vedanānam khaṇikataṃ, dukkhataṃ, attasuññatañca yāthāvato ñāṇena paricchijja parituletvā. **Adhivāsesīti** tā abhibhavanto yathāparimadditākārasallakkhaṇena attani āropetvā vāsesi, na tāhi abhibhuyamāno. Tenāha **“avihaññamāno”**ti-ādi. **Adukkhiyamānoti** cetodukkhasena

1. Pāṭaligāmo (Ka)

adukkhiamāno, kāyadukkhaṃ pana “natthī”ti na sakkā vattum. Asati hi tasmim̄ adhivāsanaṃ eva asambhavoti. **Anāmantetvā**ti anālapitvā. **Anapaloketvā**ti avissajjitvā. Tenāha “**ovādānusāsaniṃ adatvāti vuttam̄ hotī**”ti. **Pubbabhāgavīriyena**ti phalasaṃpattiyā parikkammavīriyena. **Phalasaṃpattivīriyena**ti phalasaṃpattisampayuttavīriyena. **Vikkhambhetvā**ti vinodetvā. Yathā nāma pupphanasamaye campakādirukkhe vekhe dinne yāva so vekho nāpanīyati, tāvassa pupphanasamatthataṃ vikkhambhitā vinoditā hoti, evameva yathāvuttavīriyavekhadānena tā vedanā satthusarīre yathāparicchinnaṃ kālaṃ vikkhambhitā vinoditā ahesum̄. Tena vuttam̄ “**vikkhambhetvā**ti vinodetvā”ti. **Jīvitampi jīvitasāṅkhāro** kammunā saṅkharīyatīti katvā. **Chijjamānaṃ** virodhipaccayasamāyogena payogasampattiyā **ghaṭetvā ṭhapīyati**. **Adhiṭṭhāyati** adhiṭṭhānaṃ katvā. Tenāha “**dasamāse mā uppajjitthāti saṃpattim̄ saṃpajjī**”ti. Tam̄ pana “**adhiṭṭhānaṃ, pavattanaṃ**”ti ca vattabbaṃ arahatīti vuttam̄ “**adhiṭṭhahitvā pavattetvā**”ti.

Khaṇikasamāpattīti tādisaṃ pubbābhisaṅkhāraṃ akatvā ṭhānaso saṃpajjitabbasaṃpatti. **Puna sarīraṃ vedanā ajjhottharati** savisesapubbābhisaṅkhārassa akatattā. Rūpasattaka-arūpasattakāni **visuddhimaggasaṃvaṇṇanāsu**¹ vitthāritanayena veditabbāni. **Suṭṭhu vikkhambheti** pubbābhisaṅkhārassa sātisaṃyattā. Idāni tamatthaṃ upamāya vibhāvetum̄ “**yathā nāmā**”ti-ādi vuttam̄. **Apabyūḷhoti** apanīto. **Cuddasahākārehi sannetvā**ti tesam̄yeva rūpasattaka-arūpasattakānaṃ vasena cuddasahi pakārehi vipassanācittaṃ, sakalameva vā attabhāvaṃ visabhāgarogasaṅjanitalūkhabhāvanirogakaraṇāya sinehetvā **na uppajjiyeva sammāsambuddhena sātisaṃyasaṃpattivegena** suvikkhambhitattā.

Gilāno hutvā puna vuṭṭhitoti pubbe gilāno hutvā puna tato gilānabhāvato vuṭṭhito. Madhurakabhāvo nāma sarīrassa thambhitattam̄, tam̄ pana garubhāvapubbakanti āha “**saṅjātagarubhāvo saṅjātathaddhabhāvo**”ti. “**Nānākārato na upaṭṭhahanti**”ti iminā disāsammohopi me

1. Visuddhi-Ṭī 2. 405, 413 piṭṭhesu.

ahosi sokabalenāti dasseti. **Satipaṭṭhānādidhammā**ti kāyānupassanādayo anupassanādhammā pubbe vibhūtā hutvā upaṭṭhahantāpi idāni mayhaṃ **pākaṭā na honti.**

165. **Abbhantaram karoti nāma** attaniyeva ṭhapanato. **Puggalam abbhantaram karoti nāma** samānattatāvasena dhammena pubbe tassa saṅgaṇhato. **Daharakāle**ti attano daharakāle. **Kassaci akathetvā**ti kassaci attano antevāsikassa upanigūhabhūtaṃ ganthaṃ akathetvā. **Muṭṭhiṃ katvā**ti muṭṭhigataṃ viya rahasibhūtaṃ katvā. Yasmim vā naṭṭhe sabbo taṃmūlako dhammo vinassati, so ādito mūlabhūto dhammo, mussati vinassati dhammo etena naṭṭhenāti **muṭṭhi**, taṃ tathārūpaṃ muṭṭhiṃ katvā pariharitvā **ṭhapitaṃ kiñci natthīti dasseti.**

Ahamevāti avadhāraṇaṃ bhikkhusaṃghapariharaṇassa aññasādhāraṇicchādassanatthaṃ, avadhāraṇena pana vinā **“aham bhikkhusaṃghan”**ti-ādi bhikkhu saṃghapariharaṇe ahamkāramamaṃkārahāvadassananti daṭṭhabbam. **Uddisitabbaṭṭhenāti** “sathā”ti uddisitabbaṭṭhena. **Mā vā ahesuṃ** bhikkhūti adhippāyo. “Mā vā ahosi”ti vā pāṭho. **Evaṃ na hotīti** “aham bhikkhusaṃghaṃ pariharissāmī”ti-ādi-ākārena cittappavatti na hoti. **“Pacchimavaya-anuppattabhāvadīpanatthaṃ vuttan”**ti iminā vayo viya buddhakiccampi pariyositakammanti dīpeti. Sakaṭassa bāhappadese daḷhībhāvāya veṭhadānaṃ¹ **bāhabandho.** Cakkanemisandhīnaṃ daḷhībhāvāya veṭhadānaṃ¹ **cakkabandho.**

Tamatthanti veṭhamissakena maññeti vuttamatthaṃ. Rūpādayo eva dhammā saviggaho viya upaṭṭhānato rūpanimittādayo, tesam **rūpanimittādīnaṃ.** **Lokiyānaṃ vedanānanti** yāsaṃ nirodhanena phalasaṃpatti samāpajjitabbā, tāsam nirodhā phāsu hoti, tathā bāḷhavedanābhitunnasārassāpi. **Tadatthāyāti** phalasaṃpattivihāratthāya. Dvīhi bhāgehi āpo gato etthāti **dīpo**, oghena parigato hutvā anajjhotthaṭo bhūmibhāgo, idha pana catūhipi ogehi, saṃsāramahogheneva vā anajjhotthaṭo attā “dīpo”ti adhippeto. Tenāha **“mahāsamuddagatā”**ti-ādi. **Attassaraṇāti** attappaṭisaraṇā. **Attagatikāvāti**

1. Vekhadānaṃ (Ka)

attaparāyaṇāva. **Mā aññagatikā**ti aññaṃ kiñci gatiṃ paṭisaraṇaṃ parāyaṇaṃ mā cintayittha. Kasmā? Attā nāmettha paramatthato dhammo abbhantaraṭṭhena, so evaṃ sampādito tumhākaṃ dīpaṃ tāṇaṃ gati parāyaṇanti. Tena vuttaṃ “**dhammadīpā**”ti-ādi. Tathā cāha “attā hi attano nātho, ko hi nātho paro siyā”ti¹. Upadesamattameva hi parasmiṃ paṭibaddhaṃ, aññā sabbā sampatti purisassa attādhiṇā eva. Tenāha Bhagavā “tumhehi kiccaṃ ātappaṃ, akkhātāro Tathāgatā”ti². **Tamaggeti** tamayogassa agge tassa atikkantābhāvato. Tenevāha “**ime aggatamā**”ti-ādi. **Mamāti** mama sāsane. **Sabbepi te catusatipaṭṭhānagocarāvāti** catubbidhaṃ satipaṭṭhānaṃ bhāvetvā brūhetvā tadeva gocaraṃ attano pavattiṭṭhānaṃ katvā ṭhitā eva **bhikkhū agge bhavissanti**.

Dutiyabhāṇavāraṇṇanā niṭṭhitā.

Nimittobhāsakathāvaṇṇanā

166. Anekavāraṃ bhagavā vesāliyaṃ viharati, tasmā imaṃ vesālippavesanaṃ niyamtvā dassetuṃ “kadā pāvisī”ti pucchitvā āgamanato paṭṭhāya taṃ dassento “**Bhagavā kira**”ti-ādimāha. **Āgatamaggenevāti** pubbe yāva veḷuvagāmakā āgatamaggeneva **paṭinivattento**. **Yathāparicchedenāti** yathāparicchinnakālena. **Tatoti** phalasaṃpattito. **Ayanti** idāni vuccamānakāro. **Divāṭṭhānolokaṇāti** parinibbānassa ekantikabhāvadassanaṃ. **Ossaṭṭhoti** vissaṭṭho **āyusaṅkhāro** “sattāhameva mayā jīvitabban”ti.

Jeṭṭhakaniṭṭhabhātikananti sabbeva sabrahmacārino sandhāya vadati.

Paṭipādessāmīti maggapaṭipattiyā niyojessāmi. **Maṇiphalaketi** maṇikhacite pamukhe atthataphalake. **Taṃ paṭhamam dassananti** yaṃ veḷuvane pariḷḷajakarūpena āgatassa siddhaṃ dassanaṃ, taṃ paṭhamadassanaṃ. Yaṃ vā anomadassissa Bhagavato vacanaṃ saddahantena tadā abhinīhārakāle

1. Khu 1. 37, 67 piṭṭhesu.

2. Khu 1. 52 piṭṭhe Dhammapade.

paccakkhato viya tumhākaṃ dassanaṃ siddhaṃ, taṃ paṭhamadassanaṃ.

Paccāgamana cārikanti paccāgamanatthaṃ cārikaṃ.

Sattāhanti accantasāmyoge upayogavacanaṃ. Therassa jāto varakagehaṃ kira itaragehato vivekaṭṭhaṃ, vivaṭaṅgaṇaṅca, tasmā devabrahmānaṃ upasaṅkamanayogyanti “**jāto varakaṃ paṭijaggathā**”ti vuttaṃ. **Soti** Uparevato. **Taṃ pavattinti** tattha vasitukāmatāya vuttaṃ taṃ.

“Jānantāpi Tathāgatā pucchanti”¹ti iminā nīhārena **thero “ke tumhe”**ti pucchi. “Tvam catūhi mahārājehi mahantataro”ti puṭṭho attano mahattaṃ satthu upari pakkhipanto “**ārāmikasadisā ete upāsike amhākaṃ satthuno**”ti āha. Sāvakasampattikittanampi hi atthato satthu sampattimyeva vibhāveti.

Sotāpattiphale patiṭṭhāyāti therassa desanānubhāvena, attano ca upanissayasampattiyā ñāṇassa paripakkattā sotāpattiphale patiṭṭhahitvā.

Ayanti yathāvuttā. **Etthāti** “Vesālim piṇḍāya pāvisi”ti etasmim vesālipavese. **Anupubbī kathāti** anupubbādīpanī kathā.

167. **Udenayakkhassa cetiyaṭṭhāneti** udenassa nāma yakkhassa āyatanabhāvena iṭṭhakāhi cite mahājanassa cittikataṭṭhāne. **Katavihāro**ti Bhagavantaṃ uddissa katavihāro. **Vuccatī**ti purimavohārena “udenacetian”ti vuccati. **Gotamakādīsūpī** “Gotamakacetian”ti evamādīsūpi. **Eseva nayoti** cetiyaṭṭhāne katavihārabhāvaṃ atidi sati. **Vaḍḍhitāti** bhāvanāpāripūrivaseṇa paribrūhitā. **Punappunam katāti** bhāvanāya bahulīkaraṇeṇa aparāparaṃ pavattitā. **Yuttayānam viya katāti** yathā yuttamājaññayānaṃ chekena sārathinā adhiṭṭhitaṃ yathārucci pavattati, evaṃ yathārucipavattirahataṃ gamitā. **Patiṭṭhānaṭṭhena**ti adhiṭṭhānaṭṭhena. **Vatthu viya katāti** sabbaso upakkilesavisodhanena iddhivisayatāya pavattiṭṭhānabhāvato suvisodhitaparissayavatthu viya katā. **Adhiṭṭhitāti** paṭipakkhadūrībhāvato subhāvitabhāvena taṃtamadhiṭṭhānayogyatāya

1. Vi 1. 7, 114 piṭṭhesu.

ṭhapitā. **Samantato citāti** sabbabhāgena bhāvanupacayaṃ gamitā. Tenāha “**suvaddhitā**”ti. **Suṭṭhu samāradhāti** iddhibhāvanāya sikhāppattiyā sammadeva saṃsevitā.

Aniyamenāti “yassa kassacī”ti aniyamavacanena. **Niyametvāti** “tathāgatassā”ti sarūpadassanena niyametvā. **Āyuppamāṇanti** paramāyuppamāṇaṃ vadati, tasseva gahaṇe kāraṇaṃ **brahmajālasuttavaṇṇanāyaṃ**¹ vuttanayeneva veditabbaṃ. Mahāśivatthero pana “Mahābodhisattānaṃ carimabhava paṭisandhidāyino kammaṃ asaṅkhyeyyāyukatāsaṃvattanasamatthataṃ hadaye ṭhapetvā Buddhānaṃ āyusaṅkhārassa pariṣsayavikkhambhanasamatthataṃ pāḷiyāṃ āgatā evāti imaṃ Bhaddakappameva tiṭṭheyyā”ti avoca. “**Khaṇḍiccādīhi abhibhuyyati**”ti etena yathā iddhibalena jarāya na paṭighāto, evaṃ tena maraṇassapi na paṭighātoti atthato āpannamevāti. “Kva saro khitto, kva ca nipatito”ti aññathā vuṭṭhitenāpi theravādena aṭṭhakathāvacanameva samatthitanti daṭṭhabbaṃ. Tenāha “**so na ruccati -pa- niyamitan**”ti.

Pariyuṭṭhitacittoti yathā kiñci atthānatthaṃ sallakkhetuṃ na sakkā, evaṃ abhibhūtacitto. So pana abhibhavo mahatā udakoghena appakassa udakassa ajjhottharaṇaṃ viya ahoṣīti vuttaṃ “**ajjhotthatacitto**”ti. **Aññopīti** therato, ariyehi vā aññopi yo koci **puthujjano**. Puthujjanaggahaṇaṇācetta yathā sabbena sabbaṃ appahīnavipallāso Mārena pariyuṭṭhitacitto kiñci atthaṃ sallakkhetuṃ na sakkoti, evaṃ thero Bhagavatā kataṃ nimittobhāsaṃ sabbaso na sallakkhesīti dassanatthaṃ. Tenāha “**Māro hī**”ti-ādi. **Cattāro vipallāsāti** asubhe “subhan”ti saññāvipallāso, cittavipallāso, dukkhe “sukhan”ti saññāvipallāso, cittavipallāsoti ime cattāro vipallāsā. **Tenāti** yadipi itare aṭṭha vipallāsā pahīnā, tathāpi yathāvuttānaṃ catunnaṃ vipallāsānaṃ appahīnabhāvena. **Assāti** therassa. **Maddatīti** phusanamattena maddanto viya hoti, aññathā tena maddite sattānaṃ maraṇameva siyā. **Kiṃ sakkhissati**, na sakkhissatīti adhippāyo.

1. Dī-Ṭṭha 1. 102; Dī-Ṭī 1. 156 piṭṭhesu.

Kasmā na sakkhissati, nanu esa aggasāvakaassa kucchim pavittḥoti? Saccam pavittḥo, tañca kho attano ānubhāvadassanattam, na vibādhanādhippāyena. Vibādhanādhippāyena pana idha “kim sakkhissati”ti vuttam hadayamaddanassa adhigatattā. **Nimittobhāsanti** ettha “tiṭṭhatu Bhagavā kappan”ti sakalakappam avatṭhānayāca nāya “yassa kassaci ānanda cattāro iddhipādā bhāvitā”ti-ādinā aññāpadesena attano caturiddhipādabhāvanānubhāvena kappam avatṭhāna samatthatāvasena saññuppādanam **nimittam**, tathā pana pariyāyam muñcitvā ujukamyeva attano adhippāyavibhāvanam **obhāso**. **Jānantoyeva vāti** mārena pariyuṭṭhitabhāvam jānanto eva. Attano aparādhahetuto sattānam soko tanuko hoti, na balavāti āha “**dosāropanena sokatanukaraṇatthan**”ti. Kim pana thero mārena pariyuṭṭhitacittakāle pavattim pacchā jānātī? Na jānāti sabhāvena, buddhānubhāvena pana anujānāti.

Mārayācanakathāvaṇṇanā

168. **Anatthe niyojento** guṇamāraṇena māreti, virāgavibandhanena vā jātinimittatāya tattha tattha jātam jātam mārento viya hotīti “**māretīti Māro**”ti vuttam. Ativiya pāpatāya **pāpimā**. Kaṇhadhammehi samannāgato **kaṇho**. Virāgādiguṇānam antakaraṇato **antako**. Sattānam anattāhāvahapaṭipattim na mucatīti **namuci**. Attano mārapāsenā pamatte bandhati, pamattā vā bandhū etassāti **pamattabandhu**. Sattamasattāhato param satta ahāni sandhāyāha “**aṭṭhame sattāhe**”ti na pana pallaṅkasattāhādi viya niyatakiccassa aṭṭhamasattāhassa nāma labbhanato. Sattamasattāhassa hi parato ajapālanigrodhamūle mahābrahmuno, sakkassa ca devaraṅṅo paṭiññātadhammadesanam bhagavantam ṇatvā “idāni satte dhammadesanāya mama visayam atikkamāpessati”ti sañjātadomanasso hutvā ṭhito cintesi “handā dānāham nam upāyena parinibbāpessāmi, evamassa manoratho aññathattam gamissati, mama ca manoratho ijjhissati”ti. Evam pana cintetvā bhagavantam upasaṅkamitvā ekamantam ṭhito “parinibbātu dāni bhante Bhagavā”ti-ādinā parinibbānam yāci, tam sandhāya vuttam “**aṭṭhame sattāhe**”ti-ādi. Tattha **ajjāti** āyusaṅkhārossajjanadivasam sandhāyāha. Bhagavā cassa abhisandhim

jānantopi taṃ anāvikatvā parinibbānassa akālabhāvameva pakāsentō yācanam paṭikkhipi. Tenāha “**na tāvāhan**”ti-ādi.

Maggavasena viyattāti saccasampañivedhaveyyattiyena byattā. **Tatheva vinītāti** maggavasena kilesānam samucchadavinayanena vinītā. **Tathā visāradāti** ariyamaggādhigameneva satthusāsane vesārajappattiyā visāradā, sārājajakarānam diṭṭhivicikicchādipāpadhammānam vigamena visāradabhāvaṃ pattāti attho. Yassa sutassa vasena vaṭṭadukkhatō nissaraṇam sambhavati, taṃ idha ukkaṭṭhaniddesena “sutan”ti adhippetanti āha “**tepiṭakavasena**”ti. Tiṇṇam piṭakānam samūho **tepiṭakam**, tiṇi vā piṭakāni tipīṭakam, tipīṭakameva **tepiṭakam**, tassa vasena. **Tamevāti** yaṃ taṃ tepiṭakam sotabbabhāvena “sutan”ti vuttam, tameva. **Dhammanti** pariyaṭṭidhammam. **Dhārentīti** suvaṇṇabhājane pakkhittasīhavasam viya avinassantam katvā suppaṇṇasuppavattibhāvena dhārenti hadaye ṭhapenti. Iti pariyaṭṭidhammavasena bahussutadhammadharabhāvaṃ dassetvā idāni paṭivedhadhammavasenapi taṃ dassetuṃ “**atha vā**”ti-ādi vuttam. **Ariyadhammassāti** maggaphaladhammassa, navavidhassāpi vā lokuttaradhammassa. **Anudhammabhūtanti** adhigamāya anurūpadhammabhūtam. **Anucchavikapāṭipadanti** ca teme va vipassanādhammamāha, chabbidhā visuddhiyo vā. **Anudhammanti** tassā yathāvuttapaṭipadāya anurūpaṃ abhisallekhitam appicchatādidhammam. **Caraṇasīlāti** samādāya pavattanasīlā. Anu maggaphaladhammo etissāti vā **anudhammā**, vuṭṭhānagāminivipassanā, tassā caraṇasīlā. **Attano ācariyavādanti** attano ācariyassa Sammāsambuddhassa vādam. Sadevakassa lokassa ācārasikkhāpanena ācariyo, bhagavā. Tassa vādo, catusaccadesanā.

Ācikkhissantīti-ādito kathessanti, attanā uggahitaniyāmena pare uggahāpessantīti attho. **Desessantīti** vācessanti, pālīm sammā pabodhessantīti attho. **Paññāpessantīti** pajānāpessanti, saṅkāpessantīti attho. **Paṭṭhapessantīti** pakārehi ṭhapessanti, pakāsessantīti attho. **Vivarissantīti** vivaṭam karissantīti. **Vibhajissantīti** vibhattam karissantīti. **Uttānim karissantīti** anuttānam gambhīram uttānam pākāṭam karissantīti. **Saha dhammenāti** ettha **dhamma**-saddo kāraṇapariyāyo “hetumhī nāṇam

dhammapaṭisambhidā”ti-ādīsu¹ viyāti āha “**sahetukena sakāraṇena vacanenā**”ti. **Sappāṭihāriyanti** sanissaraṇam, yathā paravādam bhañjitvā sakavādo paṭiṭṭhahati, evam hetudāharaṇehi yathādhigatamattham sampādetvā dhammam kathessanti. Tenāha “**niyyānikam katvā dhammam desessanti**”ti, navavidham lokuttaradhammam pabodhessantīti attho. Ettha ca “paññāpessanti”ti-ādīhi chahi padehi cha atthapadāni dassitāni, ādito pana dvīhi padehi cha byañjanapadāni. Ettāvataṭā tepiṭakam Buddhavacanam samvaṇṇanāyena saṅgahetvā dassitam hoti. Vuttañhetam **nettiyam** “dvādasapadāni suttam, tam sabbam byañjanañca attho cā”ti².

Sikkhattayasaṅgahitanti adhisīlasikkhādisikkhattayasaṅgahaṇam. **Sakalam sāsanabrahmacariyanti** anavasesam satthusāsanabhūtam seṭṭhacariyam. **Samiddhanti** sammadeva vaḍḍhitam. **Jhānassādavasenāti** tehi tehi bhikkhūhi samadhigatajhānasukhavasena. **Vuddhippattanti** ulārapaṇitabhāvagamanena sabbaso parivuddhimupagatam. **Sabbapāliphullam viya abhiññāsampattivasena** abhiññāsampadāhi sāsanābhivuddhiyā matthakappattito. **Paṭiṭṭhitavasenāti** paṭiṭṭhānavasena, paṭiṭṭhappattiyāti attho. Paṭivedhavasena bahuno janassa hi tanti bāhujaññam. Tenāha “**bahujanābhisamayavasenā**”ti. Puthuputhulam bhūtam jātam, puthu vā puthuttam bhūtam pattanti **puthubhūtam**. Tenāha “**sabbākāra-pa-pattan**”ti. **Suṭṭhu pakāsitanti** suṭṭhu sammadeva ādikalyāṇādibhāvena paveditam.

Āyusañkhāra-ossajjanavaṇṇanā

169. **Satim sūpaṭṭhitam katvāti** ayam kāyādivibhāgo attabhāvasaññito dukkhabhāro mayā ettakam kālam vahito, idāni pana na vahitabbo, etassa avahanattham cirataram kālam ariyamaggasambhāro sambhato, svāyam ariyamaggo paṭividdho, yato ime kāyādayo asubhādito sammadeva pariññātā, catubbidhampi sammāsatiṃ yathātatham visaye suṭṭhu upaṭṭhitam katvā. **Ñānena paricchinditvāti** yasmā imassa attabhāvasaññitassa dukkhabhārasa vahane payoanabhūtam attahitam tāva mahābodhimūle eva parisamāpitam, parahitam pana buddhaveneyyavinayanam parisamāpitabbam,

1. Abhi 2. 307 piṭṭhe.

2. Khu 10. 1 piṭṭhe.

taṃ idāni māsattayeneva parisamāpanaṃ pāpuṇissati, tasmā abhāsi
 “visākhapuṇṇamāyaṃ parinibbāyissāmī”ti, evaṃ Buddhañāṇena
 paricchinditvā sabbabhāgena nicchayaṃ katvā. **Āyusaṅkhāraṃ vissajjīti**
 āyuno jīvitassa abhisaṅkhāraṃ phalasaṃpattidhammaṃ “na
 saṃpajjissāmī”ti vissajji taṃvissajjaneneva tena abhisaṅkhariyamānaṃ
 jīvitasāṅkhāraṃ “nappavattessāmī”ti vissajji. Te nāha **“tathā”**ti-ādi.
 Ṭhānamahantatāyapi pavatti-ākāramahantatāyapi **mahanto pathavīkampo**.
 Tattha ṭhānamahantatāya bhūmicālassa mahattaṃ dassetuṃ **“tadā kira -pa-
 kampitthā”**ti vuttaṃ. Sā pana jātikkhettabhūtā dasasahassī lokadhātu eva, na
 yā kāci, yā mahābhinihāramahājāti-ādisupi kampittha. Tadāpi tattikāya eva
 kampane kiṃ kāraṇaṃ? Jātikkhettabhāvena tasseva ādito pariggahassa
 katattā. Pariggahakaraṇaṅcassa dhammatāvasena vedittabbaṃ. Tathā hi
 purimabuddhānampi tāvatakameva jātikkhettaṃ ahosi. Tathā hi vuttaṃ
 “dasasahassī lokadhātū, nissaddā honti nirākulā -pa- mahāsamuddo ābhujati,
 dasasahassī pakampatī”ti ca ādi¹. Udakapariyantaṃ katvā
 chappakārapavedhanaena avītarāge bhīmsetīti bhīmsano, so eva **bhīmsanakoti**
 āha **“bhayajanako”**ti. **Devabheriyoti** devadundubhisaddassa
 pariyaṃvacanamattaṃ. Na cettha kāci bherī “devadundubhī”ti adhippetā,
 atha kho uppātabhāvena labbhamāno ākāśagato nigghosāsaddo. Tenāha
“devo”ti-ādi. **Devoti** megho. Tassa hi acchabhāvena ākāśassa vassābhāvena
 sukkhagajjitasaññite sadde niccharante devadundubhisamaññā. Tenāha
“devo sukkhagajjitaṃ gajjī”ti.

Pītivegavissaṭṭhanti “evaṃ cirataraṃ kālaṃ vahito ayaṃ
 attabhāvasaññito dukkhabhāro, idāni nacirasseva nikkhipissatī”ti
 sañjātasomanasso bhagavā sabhāveneva pītivegavissaṭṭhaṃ **udānaṃ udānesi**.
 Evaṃ pana udānentena ayampi attho sādhitō hotīti dassanattamaṃ
 aṭṭhakathāyaṃ **“kasmā”**ti-ādi vuttaṃ.

Tuliyatīti **tulanti tula**-saddo kammasādhanaṃ dassetuṃ **“tulitaṃ”**ti
 vuttaṃ. Appānubhāvātāya paricchinnaṃ. Tathā hi taṃ parito
 khaṇḍitabhāvena “parittaṃ”ti vuccati. Paṭipakkhāvikkhambhanaṃ
 dīghasantānatāya,

1. Khu 4. 313 piṭṭhe Buddhavaṃse.

vipulaphalatāya ca **na tulaṃ** na paricchinnāṃ. Yehi kāraṇehi pubbe avisesato mahaggatāṃ “atulaṃ”ti vuttaṃ, tāni kāraṇāni rūpāvacarato āruppassa sātisayāni vijjantīti “**arūpāvacaraṃ atulaṃ**”ti vuttaṃ, itarañca “**tulaṃ**”ti, **appavipākaṃ** tisupi kammesu yaṃ tanuvipākaṃ hīnaṃ, taṃ **tulaṃ**. **Bahuvipākanti** yaṃ mahāvipākaṃ paṇītaṃ, taṃ **atulaṃ**. Yaṃ panettha majjhimāṃ, taṃ hīnaṃ, ukkaṭṭhanti dvidhā bhindivā dvīsu bhāgesu pakkhipitabbaṃ. **Hīnattikavaṇṇanāyaṃ**¹ vuttanayeneva appabahuvipākataṃ niddhāretvā tassa vasena tulātulabhāvo vedītabbo. Sambhavati etasmāti **sambhavoti** āha “**sambhavassa hetubhūtaṃ**”ti. **Niyakajjhattaratoti** sasantānadhamesu vipassanāvasena, gocarāsevanāya ca nirato. Savipākaṃ samānaṃ pavattivipākamattadāyikammaṃ savipākaṭṭhena **sambhavaṃ**. Na ca taṃ kāmādhivā bhisaṅkhārakanti tato visesanatthaṃ “sambhavan”ti vatvā “**bhavasāṅkhāraṃ**”ti vuttaṃ. **Ossajjīti** ariyamaggena avassajji. **Kavacaṃ viya** attabhāvaṃ pariyonandhitvā ṭhitaṃ attani sambhūtattā **attasambhavaṃ kilesaṅca abhindīti** kilesabhedasahabhāvikkammossajjanaṃ dassento tadubhayassa kāraṇamavoca “**ajjhattarato samāhito**”ti.

Tīrentoti “uppādo bhayaṃ, anuppādo khemaṃ”ti-ādinā vīmaṃsanto. “Tulento tīrento”ti-ādinā saṅkhepato vuttamatthaṃ vitthārato dassetuṃ “**pañcakkhandhā**”ti-ādiṃ vatvā bhavasāṅkhārassa avassajjanākāraṃ sarūpato dassesi. “**Evaṃ**”ti-ādinā pana **udānavāṇṇanāyaṃ**² ādīto vuttamatthaṃ nigamanavasena dassesi.

Mahābhūmicālavaṇṇanā

171. **Yanti** karaṇe vā adhikaraṇe vā paccattavacananti adhippāyena āha “**yana samayena, yasmiṃ vā samaye**”ti. **Ukkhepakavātāti** udakasandhārakavātāṃ upacchindivā ṭhitaṭṭhānato khepakavatā. “**Saṭṭhi -pa-bahalan**”ti idaṃ tassa vātassa ubbedhappamāṇameva gahetvā vuttaṃ āyāmaṃvithā rato pana dasasahassacakkavāḷappamāṇampi udakasandhārakavātāṃ upacchindatiyeva. **Ākāseti** pubbe vātena patiṭṭhitokāse. **Puna vātoti** ukkhepakavāte tathākatvā vigate udakasandhārakavāto puna

1. Abhi-Ṭṭha 1. 87 piṭṭhe.

2. Udāna-Ṭṭha 6 piṭṭhe.

ābandhitvā gaṇhāti yathā taṃ udakaṃ na bhassati, evaṃ utthambhentaṃ ābandhanavitānavasena bandhitvā gaṇhāti. **Tato udakaṃ uggacchatīti** tato ābandhitvā gahaṇato tena vātena utthambhitaṃ udakaṃ uggacchati upari gacchati. **Hotiyevāti** antarantarā hotiyeva. **Bahalabhāvenāti** mahāpathaviyā mahantabhāvena. Sakalā hi mahāpathavī tadā oggacchati, uggacchati ca, tasmā kampanaṃ **na paññāyati**.

Ijghanassāti icchitatthasijghanassa. **Anubhavitabbassa** issariyasampatti-ādikassa. **Parittāti** paṭiladdhamattā nātisubhāvitā. Tathā ca bhāvanā balavatī na hotīti āha “**dubbalā**”ti. Saññāsīsena hi bhāvanā vuttā. **Appamāṇāti** paguṇā subhāvitā. Sā hi thirā daḷhatarā hotīti āha “**balavā**”ti. “Parittā pathavīsaññā, appamāṇā āposaññā”ti desanāmattameva, āposaññāya pana subhāvitāya pathavīkampo sukheveva ijhatīti ayamettha adhippāyo veditabbo. **Saṃvejento** dibbasampattiyā pamattaṃ sakkāṃ devarājānaṃ. **Vīmaṃsanto vā** tāvadeva samadhigataṃ attano iddhibalaṃ. Mahāmogallānattherassa pāsādakampanaṃ pākatanti taṃ anāmasitvā saṃgharakkhitasāmaṇerasa pāsādakampanaṃ dassetuṃ “**so kirāyasmā**”ti-ādi vuttaṃ. Pūtimisso gandho etassāti **pūtigandho**, tena **pūtigandheneva** adhigatamātukucchisambhavaṃ viya gandheneva **sīsena**, ativiya dārako evāti attho.

Ācariyanti ācariyūpadesaṃ. Iddhābhisaṅkhāro nāma iddhividhappaṭipakkhādibhāvena icchitabbo, so ca upāye kosallassa attanā nasammā-uggahitattā na tāva sikkhitoti āha “**asikkhitvāva yuddham pavitṭhosi**”ti. “**Pilavantā**”ti iminā sakalameva pāsādavatthum udakaṃ katvā adhiṭṭhātabbapāsādova tattha pilavatīti dasseti. Adhiṭṭhānakkamaṃ pana upamāya dassento “**tāta -pa- jānāhi**”ti āha. Tattha **kapallakapūvanti** āsittakapūvaṃ, **taṃ pacantā** kapāle paṭhamaṃ kiñci piṭṭhaṃ ṭhapetvā anukkamena vaḍḍhetvā antantena **paricchindanti** pūvaṃ samantato paricchinnaṃ katvā ṭhapenti, evaṃ “āpokasiṇavasena ‘pāsādena patiṭṭhitaṭṭhānaṃ udakaṃ hotū’ti adhiṭṭhahanto samantato pāsādassa yāva pariyaṅtā yathā udakaṃ hoti, tathā adhiṭṭhātabban”ti upamāya upadisati.

Mahāpadāne vuttamevāti “dhammatā esā bhikkhave, yadā bodhisatto tusitā kāyā cavitvā mātukucchim okkamati”¹ vatvā “ayañca dasasahassī lokadhātu saṅkampati sampakampati sampavedhati”¹, tathā “dhammatā esā bhikkhave, yadā Bodhisatto mātukucchimhā nikkhamati”² vatvā “ayañca dasasahassī lokadhātu saṅkampati sampakampati sampavedhati”² ca mahābodhisattassa gabbhokkantiyam, abhijātiyañca dhammatāvasena mahāpadāne pathavīkampassa vuttattā itaresupi catūsu ṭhānesu pathavīkampe dhammatāvasenevāti mahāpadāne atthato vuttamevāti adhippāyo.

Idāni nesaṃ pathavīkampanaṃ kāraṇato, pavatti-ākārato ca vibhāgaṃ dassetuṃ “**iti imesū**”³ti-ādi vuttaṃ. **Dhātukopenāti** ukkhepakadhātusaṅkhātāya vāyodhātuyā pakopena. **Iddhānubhāvenāti** nāṇiddhiyā vā kammavipākajiddhiyā vā pabhāvena, tejenāti attho. **Puññatejenāti** puññānubhāvena, mahābodhisattassa puññabalenāti attho. **Ñāṇatejenāti** paṭivedhañāṇānubhāvena. **Sādhukāradānavasenāti** yathā anaññasādhāraṇena paṭivedhañāṇānubhāvena abhihatā mahāpathavī abhisambodhiyaṃ akampittha, evaṃ anaññasādhāraṇena desanāñāṇānubhāvena abhihatā mahāpathavī akampittha, taṃ panassa sādhukāradānaṃ viya hotīti “sādhukāradānavasena”³ti vuttaṃ.

Yena pana Bhagavā asīti-anubyañjana³ paṭimaṇḍitadvattimsamahāpurisalakkhaṇa⁴ vicitrarūpakāyo sabbākāraparisuddhasīlakkhandhādiguṇaratanasamiddhidhammakāyo puññamahattathāmamahattayasamahatta-iddhimahattapaññāmahattānaṃ paramukkaṃsagato asamo asamasamo appaṭipuggalo arahāṃ sammāsambuddho attano attabhāvasaññitaṃ khandhapañcakaṃ kappaṃ vā kappāvesesaṃ vā ṭhapetuṃ samatthopi saṅkhatadhammaṃ paṭijjigucchanākārappavattena nāṇavisesena tiṇāyapi amaññamāno āyusaṅkhārossajjanavidhinā nirapekkho ossajji. Tadanubhāvābhihatā mahāpathavī āyusaṅkhārossajjane akampittha, taṃ panassa kāruññasabhāvasaṅghitā viya hotīti vuttaṃ

1. Dī 2. 10 piṭṭhe.

3. Jinālaṅkāraṭīkāya vijātamaṅgalavaṇṇanāyaṃ vitthāro.

4. Dī 2. 13; Dī 3. 117; Ma 2. 336 piṭṭhesu vitthāro.

2. Dī 2. 13 piṭṭhe.

“**kāruṇṇasabhāvenā**”ti. Yasmā bhagavā parinibbānasamaye catuvīsati koṭisatasahasasāṅkhyā samāpattiyo samāpajji antarantarā phalasarāpattisamāpajjanena, tassa pubbabhāge sātisayaṃ tikkhaṃ sūraṃ vipassanāñāṇaṅca pavattesi, “yadatthaṅca mayā evaṃ sucirakālaṃ anaññasādhāraṇo paramukkaṃsagato ñāṇasambhāro sambhato, anuttaro ca vimokkho samadhigato, tassa vata me sikhāppattaphalabhūtā accantaniṭṭhā anupādisesanibbānadhātu ajja samijjhatī”ti bhiiyo ativiya somanassappattassa Bhagavato pītivipphārādiguṇavipulatarānubhāvo parehi asādhāraṇaṅñāṇātisayo udapādi, yassa samāpattibalasamupabrūhitassa ñāṇātisayassa ānubhāvaṃ sandhāya idaṃ vuttaṃ “dve me piṇḍapātā samasamaphalā samasamavipākā”ti-ādi¹, tasmā tassa ānubhāvena samabhihatā mahāpathavī akampittha. Tam panassā tassam velāyaṃ ārodanākārappatti viya hotīti “**aṭṭhamo ārodanenā**”ti vuttaṃ.

Idāni saṅkhepato vuttamatthaṃ vivaranto “**mātukucchim okkamante**”ti-ādimāha. **Ayam panatthoti** “sādhukāradānavasenā”ti-ādinā vutto attho. **Pathavīdevatāya vassenāti** ettha samuddadevatā viya mahāpathaviyā adhidevatā² kira nāma atthi. Tādise kāraṇe sati tassā cittavasena ayam mahāpathavī saṅkampati sampakampati sampavedhati, yathā vātavalāhakadevatānaṃ cittavasena vātā vāyanti, sītuṅha-abbhavassavalāhakadevatānaṃ cittavasena sītādayo bhavanti. Tathā hi visākhapuṇṇamāyaṃ abhisambodhi-atthaṃ bodhirukkhamūle nisinnassa lokanāthassa antarāyakaṇṇatthaṃ upaṭṭhitam mārabalāṃ vidhamitum—

“Acetanāyaṃ pathavī, aviññāya sukhaṃ dukhaṃ.

Sāpi dānabalā mayhaṃ, sattakkhattum pakampathā”ti³—

vacanasamanantaraṃ mahāpathavī bhijjitvā saparisam mārāṃ parivattesi. **Etanti** sādhukāradānādi. Yadi pi natthi acetanattā, dhammatāvasena pana vuttanayena siyāti sakkā vattum. Dhammatā pana atthato dhammasabhāvo, so puññadhammassa vā ñāṇadhammassa vā ānubhāvasabhāvoti. Tayidaṃ sabbaṃ vicāritameva, evaṅca katvā—

1. Khu 1. 182, 183 piṭṭhesu.

2. Adhivatthā devatā (?)

3. Khu 4. 396 piṭṭhe Cariyāpiṭṭake.

“Ime dhamme sammasato, sabhāvasarasalakkhaṇe.

Dhammatejena vasudhā, dasasahassī pakampathā”¹ādivacanañca—
samatthitaṃ hoti.

Niddiṭṭhanidassananti niddiṭṭhassa atthassa niyyātanam, nigamananti attho. **Ettāvatāti** pathavīkampādi-uppādajananena ceva pathavīkampassa Bhagavato hetunidassanena ca. “**Addhā ajja bhagavatā āyusañkhāro ossaṭṭho**”²ti **sallakkhesi** pārisesañāyena. Evañhi tadā thero tamattham vīmaṃseyya nāyaṃ bhūmikampo dhātuppakopahetuko tassa apaññāyamānarūpattā, bāhirakopi isi evaṃ mahānubhāvo Buddhakāle natthi, sāsanikopi satthu anārocetvā evaṃ karonto nāma natthi, sesānam pañcannaṃ idāni asambhavo,² evaṃ bhūmikampo cāyaṃ mahābhimśanako salomahaṃso ahosi, tasmā pārisesato āha “ajja Bhagavato āyusañkhāro ossaṭṭhoti sallakkhesī”³ti.

Aṭṭhapaṇṇanā

172. **Okāsaṃ adatvāti** “tiṭṭhatu bhante Bhagavā kappan”³ti
ādinayappavattāya therassa āyācanāya avasaraṃ adatvā. **Aññānīpi aṭṭhakāni sampiṇḍento** hetu-aṭṭhakato aññāni parisābhibhāyatana vimokkhavasena tīṇi aṭṭhakāni saṅgahetvā dassento “**aṭṭha kho imā**”³ti-**ādīmāha**. “Āyasmato Ānandassa sokuppattim pariharanto vikkhepaṃ karonto”³ti keci, sahasā bhaṇite balavasoko uppajjeyyāti.

Samāgantabbato, samāgacchatīti vā **samāgamo**, parisā.
Bimbisārapamukho samāgamo **bimbisārasamāgamo**. Sesadvayepi eseva nayo. Bimbisāra -pa- samāgamādisadisam khattiyaparisanti yojanā. **Aññesu cakkavālesupi labbhateyeva** satthu khattiyaparisādi-upasaṅkamaṇaṃ. Ādito tehi saddhim satthu bhāsaṇaṃ **ālāpo**. Kathanapaṭikathanam **sallāpo**.
Dhammupasañhitā pucchā paṭipucchā **dhammasākacchā**. **Sanṭhānaṃ paṭicca kathanam**

1. Khu 4. 319 piṭṭhe Buddhavaṃse.

2. Asambhavoti (?)

3. Dī 2. 96 piṭṭhe.

saṅghānapariyāyattā vaṇṇa-saddassa “mahantaṃ hatthirājavaṇṇaṃ abhinimminivā”ti-ādīsu¹ viya. “**Tesan**”ti padaṃ ubhayapadāpekkhaṃ “tesampi lakkhaṇasaṅghānaṃ viya satthu sarīrasaṅghānaṃ, tesam kevalaṃ paññāyati evā”ti. Nāpi āmukkamaṇikuṇḍalo bhagavā hotīti yojanā.

Chinnassarāti dvidhābhūtassarā. **Gaggarassarā**ti jajjaritassarā. **Bhāsantaranti** tesam sattānaṃ bhāsato aññaṃ bhāsaṃ. **Vīmaṃsā**ti cintanā. “Kimatthaṃ -pa- desetī”ti idaṃ nanu attānaṃ jānāpetvā dhamme kathite tesam sātisayo pasādo hotīti iminā adhippāyena vuttaṃ? Yesam attānaṃ ajānāpetvāva dhamme kathite pasādo hoti, na jānāpetvā, tādise sandhāya satthā tathā karoti. Tattha payojanamāha “**vāsanatthāyā**”ti. **Evam sutopī**ti evaṃ aviññādesako aviññātagamanopi suto **dhammo** attano dhammasudhammatāyeva **anāgate paccayo** hoti suṇantassa.

“**Ānandā**”ti-ādiko saṅgīti-anāruḷho pāliddhammo eva tathā dassito. Esa nayo ito paresupi evarūpesu ṭhānesu.

Atṭha-abhibhāyatanavaṇṇanā

173. Abhibhavatīti **abhibhu**, parikammaṃ, ñāṇaṃ vā. Abhibhu āyatanam etassāti **abhibhāyatanam**, jhānaṃ. Abhibhavitabbaṃ vā ārammaṇasaṅkhātāṃ āyatanam etassāti **abhibhāyatanam**. Ārammaṇābhibhavanato abhibhu ca taṃ āyatanañca yogino sukhavisesānaṃ adhiṭṭhānabhāvato, manāyatanadhammāyatanabhāvato vātipi sasampayuttaṃ jhānaṃ **abhibhāyatanam**. Tenāha “**abhibhavanakāraṇāni**”ti-ādi. **Tāni hī**ti abhibhāyatanasaññitāni jhānāni. “**Puggalassa ñāṇuttariyatāyā**”ti idaṃ ubhayatthāpi yojetabbaṃ. Kathaṃ? Paṭipakkhabhāvena paccanīkadhamme abhibhavanti puggalassa ñāṇuttariyatāya ārammaṇāni abhibhavanti. Ñāṇabaleneva hi ārammaṇābhibhavanam viya paṭipakkhābhibhavopīti.

Parikammavasena ajjhataṃ rūpasāññī, na appanāvasena. Na hi paṭibhāganimittārammaṇā appanā ajjhattavisayā sambhavati, taṃ pana ajjhattaparikammavasena

1. Saṃ 1. 105 piṭṭhe.

laddhaṃ kaṣiṇanimittaṃ **avisuddhameva hoti**, na bahiddhāparikkammavasena laddhaṃ viya visuddhaṃ.

Parittānīti yathāladdhāni suppasarāvamattāni. Tenāha “**avaḍḍhitānī**”ti. **Parittavasenevā**ti vaṇṇavasena ābhoge vijjamānēpi parittavaseneva **idaṃ abhibhāyatanam vuttam**. Parittatā hettha abhibhavanassa kāraṇam. Vaṇṇābhoge satipi asatipi abhibhāyatanabhāvanā nāma tikkhapaññasseva sambhavati, na itarassāti āha “**ñāṇuttariko puggalo**”ti. **Abhibhavitvā samāpajjati**ti ettha abhibhavanam, samāpajjanañca upacārajjhānādhiḡamasamanantameva appanājjhānuppādananti āha “**saha nimittuppādenevettha appanam pāpeti**”ti. **Saha nimittuppādenā**ti ca appanāparivāsābhāvassa lakkhaṇavacanametam. Yo “khippābhiñño”ti vuccati, tatopi ñāṇuttarasseva abhibhāyatanabhāvanā. **Etthā**ti etasmim nimitte. **Appanam pāpeti**ti bhāvanam appanam neti.

Ettha ca keci “uppanne upacārajjhāne taṃ ārabba ye heṭṭhimantena dve tayo javanavārā pavattanti, te upacārajjhānapakkhikā eva, tadanantarañca bhavaṅgaparivāseṇa, upacārāsevanāya ca vinā appanā hoti, saha nimittuppādeneva appanam pāpeti”ti vadanti, taṃ tesam matimattam. Na hi parivāsitarikkammena appanāvāro icchito, nāpi mahaggaṭappamāñajjhānesu viya upacārajjhāne ekantato paccavekkhaṇā icchitabbā, tasmā upacārajjhānādhiḡamanato param katipayabhavaṅgacittāvasāne appanam pāpuṇanto “saha nimittuppādenevettha appanam pāpeti”ti vutto. **Saha nimittuppādenevā**ti ca adhippāyikamidam vacanam, na nītattham, adhippāyo vuttanayeneva veditabbo, na antosamāpattiyam tadā tathārūpassa ābhogassa asambhavato. Samāpattito vuṭṭhitassa ābhogo pubbabhāgabhāvanāya vasena jhānakkhaṇe pavattam abhibhavanākāram gahetvā pavattoti daṭṭhabbam. **Abhidhammaṭṭhakathāyam** pana “iminā tassa pubbābhogo kathito”ti¹ vuttam. Anto samāpattiyam tathā ābhogābhāve kasmā “jhānasaññāyapī”ti vuttanti āha “**abhibhavana -pa- atthī**”ti.

1. Abhi-Ṭṭha 1. 233 piṭṭhe.

Vaḍḍhitappamaṇānīti vipulappamaṇānīti attho, na ekaṅguladvaṅgulādivasena vaḍḍhim pāpitānīti tathāvaḍḍhanassevettha asambhavato. Tenāha “**mahantānī**”ti. **Bhattavaḍḍhitakanti** bhuñjanabhājanam vaḍḍhetvā dinnabhataṃ, ekāsane purisena bhuñjitabbhattato upaḍḍhabhattanti attho.

Rūpe saññā **rūpasaññā**, sā assa atthīti **rūpasaññī**, na rūpasaññī **arūpasaññī**, saññāsīsenā jhānam vadati. Rūpasaññāya anuppādanamevettha alābhitā.

Bahiddhāva uppananti bahiddhā vatthusmiṃyeva uppanam. **Abhidhamme** pana “ajjhataṃ arūpasaññī bahiddhā rūpāni passati parittāni suvaṇṇadubbaṇṇāni -pa- appamaṇāni suvaṇṇadubbaṇṇāni”ti¹ evam catunnam abhibhāyatanānam āgatattā **Abhidhammaṭṭhakathāyam**² “kasmā pana ‘yathā suttante ajjhataṃ rūpasaññī eko bahiddhā rūpāni passati parittānīti-ādi vuttaṃ, evam avatvā idha catūsipi abhibhāyatanesu ajjhataṃ arūpasaññītāva vuttā’ti codanam katvā “ajjhatarūpānam anabhibhavanīyato’ti kāraṇam vatvā tattha vā hi idha vā bahiddhā rūpāneva abhibhavittāni, tasmā tāni niyamato vattānīti tatrāpi idhāpi vuttāni. ‘Ajjhataṃ rūpasaññī’ti idaṃ pana satthu desanāvīlāsamattamevā”ti vuttaṃ. Ettha ca vaṇṇābhogarahitāni, sahitāni ca sabbāni parittāni “parittāni suvaṇṇadubbaṇṇāni”ti vuttāni, tathā appamaṇāni “appamaṇāni suvaṇṇadubbaṇṇāni”ti. Atthi hi so pariyāyo parittāni abhibhuyya tāni ce kadāci vaṇṇavasena ābhujitāni honti, suvaṇṇadubbaṇṇāni abhibhuyyāti. Pariyāyakathā hi suttantadesanāti. **Abhidhamme**¹ pana nippariyāyadesanattā vaṇṇābhogarahitāni visum vuttāni, tathā sahitāni. Atthi hi ubhayattha abhibhavanavisesoti. Tathā idha pariyāyadesanattā vimokkhānampi abhibhavanapariyāyo atthīti “ajjhataṃ rūpasaññī”ti-ādinā paṭhamadutiya-abhibhāyatanesu paṭhamavimokkho, tatiyacatuttha-abhibhāyatanesu dutiyavimokkho, vaṇṇābhāyatanesu tatiyavimokkho ca abhibhavanappavattito saṅgahito. **Abhidhamme**¹ pana nippariyāyadesanattā vimokkhābhāyatanāni asaṅkarato dassetuṃ vimokkhe vajjētvā abhibhāyatanāni kathitāni, sabbāni ca vimokkhakiccāni jhānāni vimokkhadesanāyam vuttāni.

1. Abhi 1. 29 piṭṭhe.

2. Abhi-Ṭṭha 1. 234 piṭṭhe.

Tadetam “ajjhattam rūpasaññī”ti āgatassa abhibhāyatanadvayassa **Abhidhamme** abhibhāyatanesu avacanato “rūpī rūpāni passatī”ti-ādīnañca sabbavimokkhakiccasādhāraṇavacanabhāvato vavatthānam katanti viññāyati. “Ajjhatarūpānam anabhibhavanīyato”ti idam katthacipi “ajjhattam rūpāni passatī”ti avatvā sabbattha yaṃ vuttam “bahiddhā rūpāni passatī”ti, tassa kāraṇavacanam, tena yaṃ aññahetukam, tam tena hetunā vuttam. Yaṃ pana desanāvilāsahetukam ajjhattam arūpasaññitāya eva Abhidhamme¹ vacanam, na tassa aññam kāraṇam maggitabbanti dasseti. Ajjhatarūpānam anabhibhavanīyatā ca tesam bahiddhā rūpānam viya abhūtattā. Desanāvilāso ca yathāvuttavavatthānavasena veditabbo veneyyajjhāsayasasena vijjamānapariyāyakathābhāvato. “Suvaṇṇadubbaṇṇānī”ti eteneva siddhattā na nīlādi-abhibhāyatanāni vattabbānīti ce? Tam na, nīlādīsu katādhikārānam nīlādibhāvasseva abhibhavanakāraṇattā. Na hi tesam parisuddhāparisuddhavaṇṇānam parittatā, appamāṇatā vā abhibhavanakāraṇam, atha kho nīlādibhāvo evāti. Etesu ca parittādikasiṇarūpesu yaṃ yaṃ caritassa imāni abhibhāyatanāni ijjhanti, tam dassetuṃ “imesu panā”ti-ādi vuttam.

Sabbasaṅgāhakavasenāti sakalanīlavaṇṇanīlanidassananīlanibhāsānam sādharmaṇavasena. **Vaṇṇavasenā**ti sabhāvavaṇṇavasena. **Nidassanavasenā**ti passitabbatāvasena cakkhuviññādiviññānavīthiyā gahetabbatāvasena. **Obhāsavasenā**ti sappabhāsatāya avabhāsanasena. **Umāpupphanti** atasipuppham. **Nīlameva hoti** vaṇṇasaṅkarābhāvato. **Bārāṇasīsambhavanti** bārāṇasiyaṃ samuṭṭhitam.

Ekaccassa ito bāhirakassa appamāṇam ativithāritam kasiṇanimittam olokentassa bhayaṃ uppajjeyya “kiṃ nu kho idam sakalam lokam abhibhavitvā ajjhottharivā gaṇhātī”ti, tathāgatassa pana tādisam bhayaṃ vā sārājjam vā natthīti **abhītabhāvadassanathameva ānītāni**.

1. Abhi 1. 59 piṭṭhe.

Aṭṭhavimokkhavaṇṇanā

174. **Uttānatthāyeva** heṭṭhā atthato vibhattattā. Ekaccassa vimokkhotighosopi bhayāvaho vaṭṭābhiraṭṭabhāvato, tathāgatassa pana vimokkhe upasampajja viharatopi taṃ natthīti **abhītabhāvadassanattameva ānītāni**.

Ānandayācanakathāvaṇṇanā

178. **Bodhīti** sabbaññutaññāṇaṃ. Tañhi “**catumaggañāṇapaṭivedhan**”tveva vuttaṃ sabbaññutaññāṇappaṭivedhassa taṃmūlakattā. **Evam vuttabhāvanti** “ākaṅkhamāno Ānanda Tathāgato kappam vā tiṭṭheyyā”ti¹ evam vuttabhāvaṃ.

179. **Tampi** oḷārikanimittaṃ kataṃ tassa mārena pariyaṭṭhitacetaso **na paṭividdhaṃ** na sallakkhitaṃ.

183. **Ādikehīti** evamādīhi mittāmaccasuhajjāhi. Piyāyitabbato **piyehi**. Manavaḍḍhanato **manāpehi**. **Jātiyāti** jāti-anurūpagamanena. **Nānābhāvo** visumbhāvo asambhaddhabhāvo. **Marāṇena vinābhāvoti** cutiyā tenattabhāvena apunarāvattanato vippayogo. **Bhavana aññathābhāvoti** bhavantaraggahaṇena purimākārato aññākārata “kāmāvacarasatto rūpāvacaro hotī”ti-ādinā, tatthāpi “manusso devo hotī”ti-ādināpi yojetabbo. **Kutettha labbhāti** kuto kuhiṃ kismiṃ nāma ṭhāne ettha etasmim khandhappavatte “yaṃ taṃ jātaṃ -pa- mā palujjī”ti laddhuṃ sakkā, na sakkā eva tādisassa kāraṇassa abhāvato āha “**netam ṭhānam vijjati**”ti. **Evam acchariyabbhutadhammaṃ tathāgatassāpi sarīraṃ**, kimaṅgaṃ pana aññesanti adhippāyo. “Paccāvamissati”ti netam ṭhānam vijjati satim sūpaṭṭhitaṃ katvā nāṇena paricchinditvā āyusaṅkhārānaṃ ossaṭṭhattā, Buddhakiccassa ca pariyoṣāpitattā. Na hettha māsaṭṭayato paraṃ Buddhaveneyyā labbhantīti.

184. Sāsanassa ciraṭṭhiti nāma sasambhārehi ariyamaggadhammehi kevalehīti āha “**sabbaṃ lokiyalokuttaravaseneva kathitaṃ**”ti

lokiyāhi sīlasamādhipaññāhi vinā lokuttaradhammasamadhigamassa
asambhavato.

Tatīyabhāṇavāraṇṇanā niṭṭhitā.

Nāgāpalokitavaṇṇanā

186. **Nāgāpalokitanti** nāgassa viya apalokitaṃ, hatthināgassa
apalokanasadisam apalokananti attho. **Āhaccāti** phusitvā. **Aṅkusakalaggāni**
viyāti aṅkusakāni viya aññamaññasmim laggāni āsattāni hutvā ṭhitāni.
Ekābaddhānīti aññamaññam ekato ābaddhāni. **Tasmāti** gīvaṭṭhīnam
ekagghanānam viya ekābaddhabhāvena, na kevalam gīvaṭṭhīnamyeva, atha
kho sabbānīpi tāni buddhānam ṭhapetvā bāhusandhi-ādikā dvādasa
mahāsandhiyo, aṅgulisandhiyo ca itarasandhīsu ekābaddhāni hutvā ṭhitāni,
yato nesam pakatihatthīnam koṭīsaḥassabalappamāṇam kāyabalam hoti.
Vesālinagarābhīmukhaṃ akāsi kaṇṭakaparivattane viya
kapīlanagarābhīmukhaṃ. Yadi evam katham taṃ nāgāpalokitaṃ nāma
jātam? Tadajjhāsayaṃ upādāya. Bhagavā hi nāgāpalokitavaseneva
apaloketukāmo jāto, puññānubhāvena panassa patiṭṭhitaṭṭhānam parivatti,
tena taṃ “nāgāpalokitan”tveva vuccati.

“Idam pacchimakam ānanda tathāgatassa vesāliyā dassanan”ti nayidam
vesāliyā apalokanassa kāraṇavacanam anekantikattā, bhūtakathanamattam
panetam. Maggasodhanavasena taṃ dassetvā aññadevettha
apalokanakāraṇam dassetukāmo “**nanu cā**”ti-ādimāha. **Tam tam sabbam**
pacchimidassanameva anukkamena kusināram gantvā parinibbātukāmatāya
tato tato nikkhantattā. “**Anacchariyattā**”ti iminā yathāvuttam anekantikattam
pariharati, tayidam sodhanamattam. Idam panettha aviparitam kāraṇanti
dassetum “**apicā**”ti-ādi vuttam. Na hi bhagavā sāpekkho vesālim apalokesi,
“idam pana me gamanam apunarāgamanam”ti dassanamukhena
bahujanahitāya bahujanasukhāya lokānukampāya apalokesi. Tenāha “**apica**
vesālirājāno”ti-ādi.

Antakaroti akalavaṭṭadukkhassa sakasantāne, parasantāne ca vināsakaro abhāvakaro.

Buddhacakkhudhammacakkhudibbacakkhumāṃsacakkhusamantacakkhusaṅkhātehi **pañcahi cakkhūhi cakkhumā**. Savāsanānaṃ kilesānaṃ samucchinnattā sātisayaṃ **kilesaparinibbānena parinibbuto**.

Catumahāpadesavaṇṇanā

187. **Mahā-okāseti** mahante okāse. Mahantāni dhammassa patiṭṭhāpanaṭṭhānāni. Yesu patiṭṭhāpito dhammo nicchīyati asandehato, kāni pana tāni? Āgamanavisitṭhāni suttotaraṇādīni. Dutiyavikappe apadisantīti **apadesā**, “sammukhā metaṃ āvuso Bhagavato sutan”ti-ādinā kenaci ābhatassa “dhammo”ti vinicchīnane kāraṇaṃ. Kim pana tanti? Tassa yathātatassa suttotaraṇādi eva. Yadi evaṃ kathaṃ cattāro? Yasmā dhammassa dve samparāyā satthā, sāvaka ca, tesu ca sāvaka saṅghaṇapuggalavasena tividdhā, evaṃ “tumahākaṃ mayā yaṃ dhammo paṭiggahito”ti apadisitabbānaṃ bhedenā cattāro. Tenāha “sammukhā metaṃ āvuso bhagavato sutan”ti-ādi. Tathā ca vuttaṃ **nettiyaṃ** “cattāro mahāpadesā Buddhāpadeso saṅghāpadeso sampahulattherāpadeso ekattherāpadeso. Ime cattāro mahāpadesā”ti¹. Buddho apadeso etassāti **Buddhāpadeso**. Esa nayo sesesupi. Tenāha “**buddhādayo -pa-mahākāraṇāni**”ti.

188. **Neva abhinanditabbanti** na sampaṭicchitabbāni. Ganthassa sampaṭicchanaṃ nāma savananti āha “**na sotabban**”ti. **Padabyañjanānīti** padāni ca byañjanāni ca, atthapadāni, byañjanapadāni cāti attho. Pajjati attho etehīti **padāni**, akkharādīni byañjanapadāni. Pajjitabbato **padāni**, saṅkāsanādīni atthapadāni. Aṭṭhakathāyaṃ pana “padasaṅkhātāni byañjanāni”ti byañjanapadāneva vuttāni”ti keci, taṃ na, atthaṃ byañjentīti byañjanāni, byañjanapadāni, tehi byañjitabbato byañjanāni, atthapadānīti ubhayaṅgahato. **Imasmim thāneti** tenābhatasuttassa imasmim padese. **Pāli vuttāti** kevalo pāḷidhammo pavatto. **Attho vuttoti** pāḷiyā attho pavatto niddiṭṭho. **Anusandhi kathitoti** yathāraddhadesanāya, upari desanāya ca anusandhānaṃ kathitaṃ sambandho

1. Khu 10. 20 piṭṭhe.

kathito. **Pubbāparam kathitanti** pubbenāparam avirujjhanañceva visesādhānañca kathitam pakāsitam. Evaṃ pālīdhammādīni sammadeva sallakkhetvā gahaṇaṃ sādhuḥkaṃ uggahaṇanti āha “**suṭṭhu gahetvā**”ti. **Sutte otāre tabbānī**ti nāṇena sutte ogāhetvā tāretabbāni, taṃ pana ogāhetvā taraṇaṃ tattha otaraṇaṃ anuppavesanaṃ hotīti vuttaṃ “**sutte otāretabbānī**”ti. Saṃsandetvā dassanaṃ **sandassananti** āha “**vinaye saṃsandetabbānī**”ti.

Kim pana taṃ suttam, ko vā vinayoti vicāraṇāya ācariyānaṃ matibhedamukhena tamattham dassetuṃ “**ettha cā**”ti-ādi vuttaṃ. **Vinayoti** vibhaṅgapāṭhamāha. So hi mātīkāsaññitassa suttassa atthasūcanato “suttan”ti vattabbataṃ arahati. Vividhanayattā, viṭṭhanayattā ca **vinayo**, khandhakapāṭho. **Evanti** evaṃ suttavinayesu pariggayhamānesu **vinayapiṭakampi na pariyādiyati** parivārapāḷiyā asaṅgahitattā. **Suttantābhidhammapiṭakāni vā suttam** atthasūcanādi-atthasambhavato. **Evampīti** “suttantābhidhammapiṭakāni suttam, vinayapiṭakaṃ vinayo”ti evaṃ suttavinayavibhāge vuccamānepi. **Na tāva pariyādiyanti**ti na tāva anavasesato pariggayhanti, kasmāti āha “**asuttanāmakañhī**”ti-ādi. Yasmā “suttan”ti imaṃ nāmaṃanāropetvā saṅgītampi Jātakādibuddhavacanaṃ atthi, tasmā vuttanayena tīṇi piṭakāni na pariyādiṇṇānīti. Suttanipāta-udāna-itivuttakādīni dighanikāyādayo viya suttanāmaṃ āropetvā asaṅgītānīti adhippāye panettha jātakādīhi saddhim tānīpi gahitāni. Buddhavaṃsacariyāpiṭakānaṃ panettha aggahaṇe kāraṇaṃ maggitabbaṃ, kim vā tena magganena, sabbopāyaṃ vaṇṇanāyayo theravādassanamukhena paṭikkhitto evāti.

Atthīti kim atthi, asuttanāmakaṃ buddhavacanaṃ natthi evāti dasseti. Tathā hi nidānavāṇṇanāyaṃ¹ amhehi vuttaṃ “suttanti sāmāññavidhi, visesavidhayo pare”ti. **Tam sabbam paṭikkhipitvā** “suttanti vinayo”ti-ādinā vuttaṃ saṃvaṇṇanāyayaṃ “nāyamattho idhādhippeto”ti paṭisodhetvā. Vineti etena kileseti **vinayo**, kilesavinayanūpāyo so eva ca naṃ karotīti **kāraṇanti** āha “**vinayo pana kāraṇan**”ti.

1. Dī-Ṭī 1. 32 piṭṭhe; Netti-Ṭīha 13; Sārattha-Ṭī 1. 93 piṭṭhesupi.

Dhammeti pariyattidhamme. **Sarāgāyāti** sarāgabhāvāya kāmārāgabharāgaparibrūhanāya. **Saññogāyāti** bhavasaṃyojanāya. **Ācayāyāti** vaṭṭassa vaḍḍhanatthāya. **Mahicchatāyāti** mahicchabhāvāya. **Asantuṭṭhiyāti** asantuṭṭhibhāvāya. **Saṅgaṇikāyāti** kilesasaṅgaṇaṅasaṅgaṇavihārāya. **Kosajjāyāti** kusītabhāvāya. **Dubbharatāyāti** dupposatāya. **Virāgāyāti** sakalavaṭṭato virajjanatthāya. **Visaññogāyāti** kāmabhavādīhi viṣaṃyujjanatthāya. **Apacayāyāti** sabbassāpi vaṭṭassa apacayanāya, nibbānāyāti attho. **Appicchatāyāti** paccayappicchatādivasena sabbaso icchāpagamāya. **Santuṭṭhiyāti** dvādasavidhasantuṭṭhibhāvāya. **Pavivekāyāti** pavivittabhāvāya, kāyavivekāditadaṅgavivekādivivekasiddhiyā. **Vīriyārambhāyāti** kāyikassa ceva, cetasikassa ca vīriyassa paggaṇatthāya. **Subharatāyāti** sukhaposanatthāya. Evaṃ yo pariyattidhammo uggahaṇadhāraṇaparipucchāmanasikāravasena yoniso paṭipajjantassa sarāgādibhāvaparivajjanassa kāraṇaṃ hutvā virāgādibhāvāya saṃvattati, ekaṃsato **eso dhammo. Eso vinayo**, sammadeva apāyādīsu apatanavasena dhāraṇato, kilesānaṃ vinayanato, satthu sammāsambuddhassa ovādānusiṭṭhibhāvato **etaṃ satthusāsananti dhāreyyāsi jāneyyāsi**, avabujjheyysīti attho. Catusaccassa sūcanaṃ suttanti āha “**sutteti tepiṭake Buddhavacane**”ti. Tepiṭakaṃhi buddhavacanaṃ saccavinimuttaṃ natthi. Rāgādivinayanakāraṇaṃ tathāgatena suttapadena pakāsi tanti āha “**vinayeti etasmim rāgādivinayakāraṇe**”ti.

Sutte osaraṇaṅcettha tepiṭake buddhavacane pariyāpannatāvaseneva vedītabbaṃ, na aññathāti āha “**suttapaṭipāṭiyā katthaci anāgantvā**”ti. **Challim uṭṭhapetvāti** arogassa mahato rukkhassa tiṭṭhato upakkamena challiyā sakalikāya, papaṭikāya vā uṭṭhapanāṃ viya arogassa sāsanaḍḍhammassa tiṭṭhato byañjanamattena tappariyāpannaṃ viya hutvā challisadisāṃ pubbāparaviruddhatādidosāṃ uṭṭhapetvā paridīpetvā. Tādisāni pana ekaṃsato guḷhavessantarādipariyāpannāni hontīti āha “**guḷhavessantara-pa- paññāyantīti attho**”ti. Rāgādivinayeti rāgādīnaṃ vinayanatthe. Tadakāratāya **na paññāyamānāni** na dissamānāni **chaḍḍetabbāni** vajjitabbāni na gahetabbāni. **Sabbatthāti** sabbavāresu.

Imasmim̄ pana thāneti imasmim̄ mahāpadesaniddesaṭṭhāne. “**Sutte cattāro mahāpadesā**”ti-ādinā vuttampi avuttena saddhim̄ gahetvā pakiṇṇakakathāya mātikaṃ uddisati. Ñātum̄ icchito attho **pañho**, tassa vissajjanāni **pañhābyākaraṇāni**, atthasūcanādi-atthena **suttam̄**, pāli, tam̄ suttam̄ anulometi anukūletīti **suttānulomam̄**, mahāpadeso. Ācariyā vadanti samvaṇṇenti pālim̄ etenāti **ācariyavādo** aṭṭhakathā. Tassa tassa therassa attano eva mati adhippāyoti **attanomati**. **Dhammavinicchaye patteti** dhamme vinicchinitabbe upaṭṭhite. **Imeti** anantaram̄ vuttā cattāro mahāpadesā. Pamīyati dhammo paricchijjati vinicchī yati etenāti **pamāṇam̄**. Tenāha “**yam̄ ettha sameti**”ti-ādi. **Itaranti** mahāpadesesu asamentam̄. Puna **itaranti** akappiyam̄ anulomentam̄ kappiyam̄ paṭibāhantam̄ sandhāyāha.

Ekamseneva byākātabbo vissajjetabboti **ekamsabyākaraṇīyo**. **Vibhajjāti** pucchitamattam̄ avadhāraṇādibhedena vibhajjivā. **Paṭipucchāti** pucchantam̄ puggalam̄ paṭipucchivā. **Ṭhapanīyoti** tidhāpi avissajjanīyattā ṭhapanīyo byākaraṇam̄ akatvā ṭhapetabbo. “Cakkhum̄ aniccan”ti pañhe uttarapadāvadhāraṇam̄ sandhāya “**ekamseneva byākātabban**”ti vuttam̄ niccatāya lesassāpi tattha abhāvato. Purimapadāvadhāraṇe pana vibhajjabyākaraṇīyatā cakkhusotesu visesatthasāmaññatthānam̄ asādhāraṇabhāvato. Dvinnam̄ tesam̄ sadisatācodanā paṭipucchānamukheneva byākaraṇīyā paṭikkhepavasena, anuññātavasena ca vissajjitabboti āha “**yathā cakkhu, tathā sotam̄ -pa- ayam̄ paṭipucchābyākaraṇīyo pañho**”ti. **Tam̄ jivam̄ tam̄ sarīranti** jīvasarīraṇam̄ anaññatāpañho. Yassa yena anaññatācoditā so eva paramatthato nupalabbhatīti vañjhātanayassa matteyyatākittanasadisoti abyākātabbatāya ṭhapanīyo vuttoti. **Imāni cattāri pañhabyākaraṇāni pamāṇam̄** teneva nayena tesam̄ pañhānam̄ byākātabbato.

Vinayamahāpadeso kappiyānulomavidhānato nippariyāyato **anulomakappiyam̄** nāma, mahāpadesabhāvena pana tam̄sadisatāya suttantamahāpadesesupi “**anulomakappiyan**”ti ayam̄ aṭṭhakathāvohāro. Yadipi tattha tattha Bhagavatā pavattitapakiṇṇakadesanāva aṭṭhakathā, sā pana dhammasaṅgāhakehi paṭhamam̄ tīṇi piṭakāni saṅgāyivā tassa

atthavaṇṇanānurūpeneva vācanāmaggaṃ āropitattā “**ācariyavādo**”ti vuccati ācariyā vadanti saṃvaṇṇenti pāḷim etenāti. Tenāha “**ācariyavādo nāma aṭṭhakathā**”ti. Tisso saṅgītiyo āruḷho eva ca buddhavadanassa atthasaṃvaṇṇanābhūto kathāmaggo mahindattherena tambapaṇṇidīpam ābhato pacchā tambapaṇṇiyehi mahātherehi sihaḷabhāsāya ṭhapito nikāyantaraladdhisāṅkarapariharaṇattham. **Attanomati nāma** theravādo. **Nayaggāhenāti** suttādito labbhamānanayaggahaṇena. **Anubuddhiyāti** suttādīniyeva anugatabuddhiyā. **Attano paṭibhānanti** attano eva tassa atthassa vuttanayena upaṭṭhānam, yathā upaṭṭhitā atthā eva tathā vuttā. **Samentameva gahetabbanti** yathā suttana saṃsandati, evaṃ mahāpadesato atthā uddharitabbāti dasseti. Pamādapāṭhavasena ācariyavādassa kadāci pāḷiyā asaṃsandanāpi siyā, so na gahetabboti dassento āha “**ācariyavādopi suttana samentoyeva gahetabbo**”ti. **Sabbadubbalā** puggalassa sayam paṭibhānabhāvato. Tathā ca **sāpi gahetabbā**, kīdisī? **Suttana samentāyevāti** yojanā. **Tāsūti** tīsu saṅgītīsu. “**Āgatameva pamāṇan**”ti iminā mahākassapādīhi saṅgītameva “suttan”ti idhādhippetanti tadaññassa suttabhāvameva paṭikkhipati. Tadatthā eva hi tisso saṅgītiyo. **Tatthāti** Gārayhasutte. **Na ceva sutte osaranti, na ca vinaye sandissantīti veditabbāni** tassa asuttabhāvato, tena “anulomakappiyam suttana samentameva gahetabban”ti vuttamevattham nigamanavasena nidasseti. Sabbattha “na itaran”ti vacanam tattha tattha gahitāvadhāraṇaphaladassanam daṭṭhabbam.

Kammāraputtacundavatthuvaṇṇanā

189. **Sūkaramaddavanti** vanavarāhassa mudumaṃsam. Yasmā cundo ariyasāvako sotāpanno, aññe ca Bhagavato, bhikkhusaṃghassa ca āhāram paṭiyādentā anavajjameva paṭiyādenti, tasmā vuttam “**pavattamaṃsan**”ti. **Tamkirāti** “nātitaruṇassā”ti-ādinā vuttavisesam. Tathā hi tam “**muduceva siniddhañcā**”ti vuttam. Mudumaṃsabhāvato, hi abhisāṅkharāṇavisesena ca “maddavan”ti vuttam. **Ojam pakkhipimsu** “ayam Bhagavato pacchimako āhāro”ti puññavisesāpekkhāya, tam pana tathāpakkhittadibbojatāya garutaram jātam.

Aññe yaṃ dujjīraṃ, taṃ aṅānantā “kassaci adatvā vināsitaṃ”ti upavadeyyunti **parūpavādamocanattaṃ** bhagavā “nāhaṃ taṃ”ti-ādinā sīhanādaṃ nadati.

190. Kathaṃ paṇāyaṃ sīhanādo, nanu taṃ bhagavatopi sammāpariṇāmaṃ na gataṃ? Nayidamevaṃ daṭṭhabbaṃ, yasmā “sammadeva taṃ Bhagavato pariṇāmaṃ gataṃ”ti vattuṃ arahati tappaccayā uppanassa vikārasa abhāvato, aññapaccayassa ca vikārasa mudubhāvaṃ āpāditattā. Tenāha “**na pana bhuttappaccayā**”ti-ādi. Na hi Bhagavā, aññe vā pana khīṇāsavā navavedanuppādanavasena āhāraṃ paribhuñjanti aṭṭhaṅgasamannāgatameva katvā āhārasa upabhuñjanato. Yadi evaṃ kasmā Pāḷiyaṃ “bhattaṃ bhuttāvissa kharo ābādho uppajjī”ti-ādi vuttaṃ? Taṃ bhojanuttarakālaṃ uppanattā vuttaṃ. “Na pana bhuttappaccayā”ti vuttovāyamatto aṭṭhakathāyaṃ. Katupacitassa laddhokāsassa kammaṃ vasena balavatipi roge uppanne garusiniddhabhojanappaccayā vedanāniggaho jāto, tenāha “**yadi hī**”ti-ādi. **Patthitaṭṭhāneti** icchitaṭṭhāne, icchā cassa tattha gantvā vinetabbaveneyyāpekkhā daṭṭhabbā. Gāthāyampi “**sutaṃ**”ti iminā sutamattaṃ, paresaṃ vacanamattametaṃ, na pana bhojanappaccayā ābādhaṃ phusi dhīroti dasseti.

Pāṇiyāharaṇavaṇṇanā

191. Pasannabhāvena udakassa acchabhāvo veditabboti āha “**acchodakāti pasannodakā**”ti. Sādurasattā sātātāti āha “**madhurodakā**”ti. Tanukameva salilaṃ visesato sītalaṃ, na bahalanti āha “**tanusītalasalilā**”ti. **Nikkaddamāti** setabhāvassa kāraṇamāha. Paṅkacikkhallādivasena hi udakassa vivaṇṇatā, sabhāvato pana taṃ setavaṇṇamevāti.

Pukkusamallaputtavattuvaṇṇanā

192. **Dhuravātetī** paṭimukhavāte. **Dīghapiṅgaloti** dīgho hutvā piṅgalacakkhuko. Piṅgalakkhiko hi so “**āḷāro**”ti paññāyittha. **Evarūpanti** dakkhati karissati bhavissatīti īdisaṃ. **Īdisesūti** yatra yañcāti evarūpanipātasaddayuttaṭṭhānesu.

193. Vicarantiyo meghagabbhato niccharantiyo viya hontīti vuttam̃
“niccharantīsūti vicarantīsū”ti. **Navavidhāyā**ti navappakārāya. Navasu hi
 pakāresu ekavidhāpi asani tappariyāpānātāya “navavidhā”tveva vuccati.
 Īdisī hi esā ruḷhi aṭṭhavimokkhapattipi samaññā viya. **Asaññam̃ karoti**, yo
 tassā saddena, tejasā ca ajjhotthaṭo. **Ekam̃ cakkanti** ekamaṇḍalam̃. Saṅkāram̃
 tīrentī paricchijantī viya dassētīti **saterā**. **Gaggarāyamānā**ti gaggarātisaddam̃
 karontī. Anuravadassanañhetam̃. **Kapisīsā**ti kapisīsākāravatī.
Macchavilolikāti udake paripphandamānamaccho viya viluḷitākārā.
Kukkuṭasadisāti pasāritapakkhakukkuṭākārā. Naṅgalassa kassanakāle
 kassakānam̃ hatthena gahettabbaṭṭhāne maṇikā hoti, tam̃ upādāya naṅgalam̃
 “daṇḍamaṇikā”ti vuccati, tasmā daṇḍamaṇikākārā **daṇḍamaṇikā**. Tenāha
 “**naṅgalasadisā**”ti. Deve vassantepi sajotibhūtātāya udakena atemetabbato
 mahāsani “**sukkhāsani**”ti vuttā. Tenāha “**patitaṭṭhānam̃ samugghāṭeti**”ti.

Bhusāgāraketi bhusamaye agārake. Tattha kira mahantam̃ palālapuñjam̃
 abhantarato palālam̃ nikkadḍhitvā sālāsadisam̃ pabbajitānam̃
 vasanayoggaṭṭhānam̃ katam̃, tadā bhagavā tattha vasi, tam̃ pana
 khalamāṇḍalam̃ sālāsadisanti āha “**khalasālāyan**”ti. **Etthā**ti hetumhi
 bhummavacananti āha “**etasmim̃ kāraṇe**”ti, asanipātena channam̃ janānam̃
 hatakāraṇeti attho. **So tvam̃ bhanteti** ayameva vā pāṭho.

194. Siṅgī nāma kira uttamam̃ ativiya pabhassaram̃ Buddhānam̃
 chavivaṇṇobhāsam̃ devalokato āgatasuvaṇṇam̃. Tenevāha
 “**siṅgīsuvavaṇṇavaṇṇan**”ti. “Kim̃ pana thero tam̃ gaṇhī”ti sayameva puccham̃
 samuṭṭhāpetvā tattha kāraṇam̃ dassento “**kiñcāpi**”ti-ādimāha. **Teneva**
kāraṇenāti upaṭṭhākaṭṭhānassa matthakappatti, paresam̃
 vacanokāsapacchedanam̃, tena vatthena satthu pūjanam̃, satthum̃
 ajjhāsayaṇuvattananti iminā teneva yathāvuttana catubbidhena kāraṇena.

195. Thero ca tāvadeva tam̃ siṅgīvaṇṇam̃ maṭṭhadussam̃ Bhagavato
 upanāmesi “paṭiggaṇhatu me bhante Bhagavā imam̃ maṭṭhadussam̃, tam̃
 mamassa dīgharattam̃ hitāya sukhāyā”ti, paṭiggahesi Bhagavā,
 paṭiggahetvāva nam̃

paribhuñji. Tena vuttaṃ “**Bhagavāpi tato ekaṃ nivāsesi, ekaṃ pārupī**”ti. Tāvadeva kira taṃ bhikkhū ovaṭṭikaraṇamattena tunnakammaṃ niṭṭhāpetvā therassa upanesuṃ, thero Bhagavato upanāmesi. **Hataccikaṃ viyāti** paṭihatappabhaṃ, **viya**-saddo nipātamattaṃ. Bhagavato hi sarīrappabhāhi abhibhuyyamānā tassavattahayugassa pabhassaratā nāhosi. **Antantenevāti** anto anto eva, abbhantarato evāti attho. Tenāha “**bahipanassa pabhā natthī**”ti.

“**Passannarūpaṃ samuṭṭhāpeti**”ti etenetassa āhārassa bhuttappaccayā na so rogoti ayamattho dīpito. **Dvīsu kālesu evaṃ hoti** dvinnaṃ nibbānadhātūnaṃ samadhigamasamayabhāvato. **Upavattane antarena yamakasālānanti** ettha vattabbaṃ parato āgamissati.

196. **Sabbaṃ suvaṇṇavaṇṇameva ahoṣi** ativiya parisuddhāya pabhassarāya ekagghanāya Bhagavato sarīrappabhāya nirantaraṃ abhibhūtattā.

Dhammeti pariyattidhamme. **Pavattāti** pāvacaṇabhāvena desetā. **Puratova nisīdi** ovādappaṭikaraṇabhāvato.

197. **Dānānisamsasaṅkhātā lābhāti** vaṇṇadānabaladānādibhedā dānassa ānisamsasaññitā diṭṭhadhammikā, samparāyikā ca lābhā icchitabbā. **Te alābhāti** te sabbe tuyhaṃ alābhā, lābhā eva na honti. Diṭṭheva dhamme paccakkhabhūte imasmiṃyeva attabhāve bhavā **diṭṭhadhammikā**. Samparetabbato pecca gantabbato “samparāyo”ti laddhanāme paraloke bhavā **samparāyikā**. Diṭṭhadhammikā ca samparāyikā ca **diṭṭhadhammikasamparāyikā**. **Dānānisamsasaṅkhātā lābhāti** dānānisamsabhūtā lābhā. Sabbathā samameva hutvā samaṃ phalaṃ etesaṃ na ekadesenāti **samasaphalā**. **Piṇḍapātāti** tabbisayaṃ dānamayapuññaṃ māha.

Yadi khattavasena nesaṃ samaphalatā adhippetā, satipi ekasantānabhāve puthujjana-arahantabhāvasiddhaṃ nanu tesāṃ khattavisiṭṭhanti dassetuṃ “**nanu cā**”ti-ādimāha. **Parinibbānasamatāyāti** kilesaparinibbāna khandhaparinibbānabhāvena parinibbānasamatāya. “**Paribhuñjitvā parinibbuto**”ti

etena yathā paṇṭapiṇḍapātāpari bhogūpatthambhitarūpakāyasannissayo dhammakāyo sukheveva kilese pariccaji, bhojanasappāyasamsiddhiyā evaṃ sukheveva khandhe pariccajīti evaṃ kilesapariccāgassa, khandhapariccāgassa ca sukhasiddhinimittatāya ubhinnāṃ piṇḍapātānaṃ samaphalatā jotitā. “Piṇḍapātasīsenā ca piṇḍapātādānaṃ jotitaṃ”ti vuttovāyamatto. Yathā hi sujātāya “imaṃ āhāraṃ nissāya mayhaṃ devatāya vaṇṇasukhabalādiguṇā sammadeva sampajjeyyūṃ”ti uḷāro ajjhāsāyo tadā ahosi, evaṃ cundassapi kammāraputtassa “imaṃ āhāraṃ nissāya bhagavato vaṇṇasukhabalādiguṇā sammadeva sampajjeyyūṃ”ti uḷāro ajjhāsāyoti evampi nesāṃ ubhinnāṃ samaphalatā veditabbā. Satipi catuvīsati koṭṭisatasahasasamāpattīnaṃ devasikaṃ vaḷaṇṇājanasamāpattibhāve yathā pana abhisambujjhanādivase abhinavavipassanaṃ paṭṭhapento rūpasattakādi¹vasena cuddasahākārehi sannetvā mahāvīpassanāmukheṇa tā samāpattiyo samāpajji, evaṃ parinibbānādivasepi sabbā tā samāpajjīti evaṃ samāpattisamātāyapi tesāṃ samaphalatā. Cundassa tāva anussaraṇaṃ uḷārataṃ hotu bhagavato dinnabhāvena aññathattābhāvato, sujātāya pana kathaṃ devatāya dinnanti? Evaṃsaññibhāvato āha “sujātā cā”ti-ādi. **Aparabhāgeti** abhisambodhito aparabhāge. Puna **aparabhāgeti** parinibbānato parato. **Dhammasīsanti** dhammānaṃ matthakabhūtaṃ nibbānaṃ. **Me gahitanti** mama vasena gahitaṃ. Tenāha “**mayhaṃ kirā**”ti-ādi.

Adhipatibhāvo **ādhipateyyanti** āha “**jetṭhabhāvasaṃvattanikaṃ**”ti.

Saṃvareti sīlasaṃvare. **Veranti** paṇṭipātādipaṅcavidhaṃ veraṃ. Tañhi veridhammabhāvato, verahetutāya ca “veran”ti vuccati. Kosallaṃ vuccati ñāṇaṃ, tena yutto **kusaloti** āha “**kusalo pana ñāṇasampanno**”ti. Ñāṇasampadā nāma ñāṇapāripūrī, sā ca aggamaggavasena veditabbā, aggamaggo ca niravasesato kilese pajahatīti āha “**ariyamaggena -pajahātī**”ti. **Imaṃ pāpakaṃ jāhitvāti** dānena tāva lobhamacchariyādipāpakaṃ, sīlena paṇṭipātādipāpakaṃ jāhitvā tadaṅgavasena pahāya tato samathavipassanādhammehi vikkhambhanavasena, tato maggapaṭipāṭiyā samucchēdavasena anavasesaṃ pāpakaṃ pahāya.

1. Visuddhi-Ṭī 2. 405 piṭṭhe vitthāro.

Tathā pahīnattā eva **rāgādīnaṃ khayā kilesanibbānena** sabbaso kilesavūpasamena **nibbuto** parinibbutoti sa-upādisesāya nibbānadhātuyā desanāya kūṭaṃ gaṇhanto “**īti cundassa -pa- sampassamāno udānaṃ udānesī**”ti.

Catutthabhāṇavāraṇṇanā niṭṭhitā.

Yamakasālavaṇṇanā

198. **Evaṃ taṃ kusinārāyaṃ hotīti** yathā anurādhapurassa thūpārāmo dakkhiṇapacchimadisāyaṃ, evaṃ taṃ uyyānaṃ kusinārāya dakkhiṇapacchimadisāyaṃ hoti. **Tasmāti** yasmā nagaraṃ pavisitukāmā uyyānato upecca vattanti gacchanti etenāti “**upavattanan**”ti **vuccati, taṃ** sālāpantibhāvena ṭhitaṃ sālavanaṃ. **Antarenāti** vemajjhe. **Tassa kira mañcakassāti** tattha paññapiyamānassa tassa mañcakassa. **Tatrāpi -pa- eko pādabhāgassa,** tasmā “antarena yamakasālānan”ti vuttaṃ. **Saṃsibbitvāti** aññamañña-āsattaviṭṭapasaṅkhatāya saṃsibbitvā¹ viya. “**Ṭhitasākhā**”**tipi vuttaṃ** aṭṭhakathāyaṃ. Yaṃ pana pāḷiyaṃ “uttarasīsakaṃ mañcakaṃ paññapehī”ti vuttaṃ, taṃ pacchimadassanaṃ daṭṭhum āgatānaṃ devatānaṃ daṭṭhum योग्यतवासena vuttaṃ. Keci pana “uttaradisāviloکانامukhaṃ pubbadisāsīsakaṃ katvā mañcakaṃ paññapehīti attho”ti vadanti, taṃ tesam matimattaṃ.

Ete nāgānamuttamāti ete gottato gocari-ādināmakā hatthināgesu balena seṭṭhatamā. **Majjhimaṭṭhakathāyaṃ**² pana keci hatthino ito aññathā āgatā, so pana nesaṃ nāmamattakato bhedo daṭṭhabbo.

Paribhuttakālato paṭṭhāya -pa- parikkhayaṃ gataṃ, “na pana paribhuttappaccayā”ti heṭṭhā vuttanayeneva attho daṭṭhabbo. **Caṅgavāreti** ūmiyaṃ. Katokāsassa kammaṃ vasena yathāsamuṭṭhito rogo ārogyaṃ abhimaddatīti katvā etamatthaṃ dassento “**viyā**”ti vuttaṃ. Yasmā bhagavā heṭṭhā vuttanayena kappam, kappāvasesaṃ vā ṭhātuṃ samattho eva, tattakaṃ

1. Ṭhito saṃsibbitvā (Ka)

2. Ma-Ṭṭha 1. 331 piṭṭhe.

kālaṃ ṭhāne payoĵaṇābhāvato āyusaṅkhāre ossajjitvā tādisassa kammaṣṣa okāsaṃ adāsi, tasmā etamatthaṃ dassento “viyā”tipi vattuṃ yujjatiyeva.

Kusalaṃ katabbaṃ maññissanti “evaṃmahapphalaṃ, evaṃmahānisaṃsaṃ, mahānubhāvañca taṃ kusalan”ti.

Ekassāpi sattassa vaṭṭadukkhavūpasamo Buddhānaṃ garutaro hutvā upaṭṭhāti atidullabhabhāvato, tasmā **“aparampi passatī”**ti-ādi vuttaṃ, svāyamattho **Māgaṇḍiyasuttena**¹ dīpetabbo.

Tatiyaṃ pana kāraṇaṃ sattānaṃ uppajjanaka-anatthapariharaṇanti taṃ dassento puna **“aparampi passatī”**ti-ādimāha.

Sīhaseyyanti ettha sayanaṃ **seyyā**, sīhassa viya seyyā, sīhaseyyā, taṃ **sīhaseyyaṃ**. Atha vā **sīhaseyyanti** seṭṭhaseyyaṃ, yadidaṃ atthadvayaṃ parato āgamissati.

“Vāmena passena senti”ti evaṃ vuttā **kāmabhogiseyyā**, **dakkhiṇapassena sayāno nāma natthi** dakkhiṇahatthassa sarīraggahaṇādiyogakkhamato, purisavasena cetam vuttaṃ.

Ekena passena sayitum na sakkonti dukkhupattito.

Ayaṃ sīhaseyyāti ayaṃ evaṃ vuttā sīhaseyyā. **“Tejussadattā”**ti iminā sīhassa abhīrubhāvaṃ dasseti. Bhīrukā hi sesamigā attano āsayam pavisitvā santāsapubbakaṃ yathā tathā sayanti, sīho pana abhīrubhāvato satokārī bhikkhu viya satim upaṭṭhāpetvāva sayati. Tenāha **“purimapāde”**ti-ādi. Dakkhiṇe purimapāde vāmassa purimapādassa ṭhapanavasena **dve purimapāde ekasmiṃ ṭhāne** ṭhapetvā. **Pacchimapādeti** dve pacchimapāde. Vuttanayeneva idhāpi ekasmiṃ ṭhāne pādaṭṭhapanam veditabbaṃ, **ṭhitokāsasallakkhaṇam** abhīrubhāveneveva. **“Sīsam pana ukkhipitvā”**ti-ādinā vuttā sīhakiriyā anutrāsapabujjhanam viya abhīrubhāvasiddhā dhammatāvasenevāti veditabbā. **Sīhavijambhitavijambhanaṃ** ativelam ekākārena ṭhapitānaṃ sarīravayavānaṃ gamanādikiriyāsu yogyabhāvāpādanattaṃ. **Tikkhattum sīhanādanadanam** appesakkhamigajātapariharaṇattham.

1. Khu 1. 409 piṭṭhe.

Seti abyāvaṭabhāvena pavattati etthāti **seyyā**, catutthajjhānameva seyyā **catutthajjhānaseyyā**. Kim pana taṃ catutthajjhānanti?
 Ānāpānacatutthajjhānaṃ, tato hi vuṭṭhahitvā vipassanaṃ vaḍḍhetvā Bhagavā anukkamena aggamaggaṃ adhigantvā tathāgato jātoti. “Tayidaṃ padaṭṭhānaṃ nāma, na seyyā, tathāpi yasmā ‘catutthajjhānā vuṭṭhahitvā samanantarā Bhagavā parinibbāyī’¹ vakkhati, tasmā lokiyacatutthajjhānasamāpatti eva tathāgataseyyā”ti keci, evaṃ sati parinibbānakālikāva tathāgataseyyāti āpajjati, na ca Bhagavā lokiyacatutthajjhānasamāpajjanabahulo vihāsi. Aggaphalavasena pavattaṃ panettha catutthajjhānaṃ veditabbaṃ. Tattha yathā sattānaṃ niddupagamanalakkhaṇā seyyā bhavaṅgacittavasena hoti, sā ca nesam paṭhamajātisamanvayā yebhuyyavuttikā, evaṃ Bhagavato ariyajātisamanvayaṃ yebhuyyavuttikaṃ aggaphalabhūtaṃ catutthajjhānaṃ “tathāgataseyyā”ti veditabbaṃ. Sīhaseyyā nāma seṭṭhaseyyāti āha “**uttamaseyyā**”ti.

Natthi etissā uṭṭhānanti **anuṭṭhānā**, seyyā, taṃ **anuṭṭhānaseyyaṃ**. “Ito uṭṭhahissāmī”ti manasikārassa abhāvato “**uṭṭhānasaññaṃ mana’si karitvā**”ti **na vuttaṃ**. Etthāti etasmim̐ anuṭṭhānaseyyupagamane. **Kāyavasena anuṭṭhānaṃ**, na cittavasena, cittavasena ca anuṭṭhānaṃ nāma niddupagamananti tadabhāvaṃ dassetuṃ “**niddāvasenā**”ti-ādi vuttaṃ. **Bhavaṅgassāti** niddupagamanalakkhaṇassa bhavaṅgassa.

Sabbapāliphullāti sabbatthakameva vikasanavasena phullā, na ekadesa vikasanavasena. Tenāha “**sabbe samantato pupphitā**”ti. **Ekacchannāti** samphullapupphehi ekākārena sabbattheva chādītā. **Ullokapadumānī**¹ heṭṭhā oloketāni viya tiṭṭhanapadumāni. **Morapiñchakalāpo viya** pañcavaṇṇapupphasañchādītātā.

Nandapokkharāṇīsambhavānīti Nandapokkharāṇīrasambhavāni. **Mahātumbamattanti** ālhakamattaṃ. **Paviṭṭhānī**ti khittāni. **Sarīrameva okirantī**ti sarīrameva ajjhokiranti.

1. Dī 2. 128 piṭṭhe.

2. Ākāsapadumāni (Aṭṭhākathāyaṃ.)

Devatānaṃ upakappanacandanacuṇṇānīti saṭṭhipi paññāsampi yojanāni vāyanakasetavaṇṇacandanacuṇṇāni. **Dibbagandhajālacuṇṇānīti** dibbagandhadibbacuṇṇāni. **Haritāla-añjanacuṇṇādīnīpi** dibbāni paramasugandhāni evāti veditabbāni. Tenevāha “sabbadibbagandhavāsavikatiyo”ti.

Ekacakkavāḷe sannipatitvā antalikkhe vajjanti mahābhinikkhamanakāle viya.

Tāti devatā. Ganthamānāvāti mālaṃ racantiyo eva. **Apariniṭṭhitāvāti** yathādhippāyaṃ pariyositā eva. **Hatthena hatthanti** attano hatthena parassa hattham. **Gīvāya gīvanti** kaṇṭhagāhavasena attano gīvāya parassa gīvaṃ. **Gahetvāti** āmasitvā. **Mahāyaso mahāyasoti** āmeditavasena aññaamañña-ālāpavacanam.

199. **Mahantaṃ ussāhanti** tathāgatassa pūjāsakkāravasena pavattiyamānaṃ mahantaṃ ussāhaṃ **disvā**.

Sāyeva pana paṭipadāti pubbhāgapaṭipadā eva. **Anucchavikattāti** adhigantabbassa navavidhalokuttaradhammassa anurūpattā.

Sīlanti cārittasīlamāha. **Ācārapaññattīti** cārittasīlam. **Yāva gotrabhutoti** yāva gotrabhuññaṃ, tāva pavattetabbā samathavipassanā **sammāpaṭipadā**. Idāni taṃ sammāpaṭipadaṃ byatirekato, anvayato ca vibhāvetuṃ “**tasmā**”ti-ādi vuttaṃ. **Jinakālasuttanti** jinamahāvaḍḍhakinā ṭhapitaṃ vajjetabbagahetabbadhammasandassanakālasuttaṃ sikkhāpadamariyādaṃ, upāsakopāsikāvāresu “**gandhapūjaṃ mālāpūjaṃ karoti**”ti vacanaṃ cārittasīlapakkhe ṭhapetvā karaṇaṃ sandhāya vuttaṃ, tena bhikkhubhikkhunīnampi tathākaraṇaṃ anuññātamevāti daṭṭhabbaṃ.

Ayañhīti dhammānudhammapaṭipadaṃ sandhāya vadati.

Upavāṇattheravaṇṇanā

200. **Apanesīti** ṭhitappadesato yathā apagacchati, evaṃ akāsi, na pana nibbhacchi. Tenāha “**ānando**”ti-ādi. **Vuttasadisāvāti** **samacittapariyāyadesanāyaṃ**¹ vuttasadisā eva. **Āvārentoti** chādentoti.

1. Am 1. 66 piṭṭhe.

Yasmā kassapassa buddhassa cetiye ārakkhadevatā ahosi, tasmā therova tejussado, na aññe arahantoti ānetvā yojanā.

Idāni āgamanato paṭṭhāya tamattham vitthārato dassetuṃ “**vipassimhī kira sammāsambuddhe**”ti-ādi āradham. “**Catumahārājikā devatā**”ti idam gobalībaddañāyena gahetabham bhummadevatādīnampi tappariyāpannattā. **Tesam** manussānam.

Tatthāti kassapassa bhagavato cetiye.

201. **Adhivāsenti**ti rocenti.

Chinnapāto viya chinnapāto, tam **chinnapātām**, bhāvanapuṃsakaniddeso yaṃ. **Āvaṭṭanti**ti abhimukhabhāvena vaṭṭanti. Yattha patitā, tato katipayaratanaṭṭhānam vaṭṭanavaseneva gantvā puna yathāpatitameva ṭhānam vaṭṭanavasena āgacchanti. Tenāha “**āvaṭṭantiyo patitaṭṭhānameva āgacchanti**”ti. **Vivaṭṭanti**ti yattha patitā, tato vinivaṭṭanti. Tenāha “**patitaṭṭhānato parabhāgaṃ vaṭṭamānā gacchanti**”ti. Purato vaṭṭam **āvaṭṭanam**, itaram tividhampi **vivaṭṭananti** dassetuṃ “**apicā**”ti-ādi vuttam. **Devatā dhāretuṃ na sakkoti** udakam viya osīdanato. Tenāha “**tatthā**”ti-ādi. **Tatthāti** pakatipathaviyam. **Devatā osīdanti** dhātūnam saṅhasukhumālabhāvato. **Pathaviyam pathaviṃ māpesunti** pakatipathaviyam attano sarīram dhāretuṃ samattham iddhānubhāvena pathaviṃ māpesuṃ.

Kāmaṃ domanasse asatipi ekacco rāgo hotiyeva, rāge pana asati domanassassa asambhavo evāti¹ tadekaṭṭhabhāvatoti āha “**vītarāgāti pahīnadomanassā**”ti. **Silāthambhasadisā** iṭṭhāniṭṭhesu nibbikāratāya.

Catusamvejanīyatṭhānavañṇanā

202. **Apāraṅgāyāti** gaṅgāya orambhāge.

“**Saṅkārachaddakasammajjaniyo gahetvā**”ti-ādi attano attano vasanaṭṭhāne vattakaraṅkārādassanam. “**Evaṃ dvīsu kālesū**”ti-ādi nidassanattham paccāmasanam, tam heṭṭhā adhigatam.

1. Eva (?)

Kammasādhano sambhāvanattho **bhāvanīya**-saddoti āha “**manasā bhāvite sambhāvite**”ti. Dutiyavikappe pana bhāvanam, vaḍḍhanañca paṭipakkhapahānatoti āha “**ye vā**”ti-ādi.

Buddhādīsutīsu vatthūsu **pasannacittassa**, na kammaphalasaddhāmattena. Sā cassa saddhāsampadā evam veditabbāti phalena hetum dassento “**vattasampannassa**”ti āha. **Saṁvego** nāma sahottappañānam, abhijātiṭṭhānādīnipi tassa uppattihetūni bhavantīti āha “**saṁvegajanakānī**”ti.

Cetiya-pūjanattham cārikā **cetiya-cārikā**. Sagge **paṭiṭṭhahissantiyeva** Buddhaguṇārammaṇāya kusalacetanāya saggasaṁvattaniyabhāvato.

Ānandapucchākathāvaṇṇanā

203. **Etthāti** mātuḡāme. **Ayam uttamā paṭipatti**, **yadidaṁ adassanaṁ** dassanamūlakattā tappaccayānam sabbānatthānam. **Lobhoti** kāmarāgo. **Cittacalanā** paṭipatti-antarāyakaro citta-kkhobho. **Murumurāpetvāti** sa-aṭṭhikaṁ katvā khādane anuravadassanaṁ. Aparimitaṁ kālaṁ dukkhānubhavanaṁ **aparicchinnadukkhānubhavanaṁ**. **Vissāsoti** visaṅgo ghaṭṭanābhāvo. **Otaroti** tattha cittassa anuppaveso. **Asihatthena** verīpurisena, **pisācenāpi** khādītukāmena. **Āsīdeti** akkamanādivasena bādheyya. **Assāti** mātuḡāmassa. **Pabbajitehi kattabbakammanti** āmisapaṭiggahaṇādi pabbajitehi kātabbakammaṁ. **Satīti** vā kāyagatāsati **upaṭṭhāpetabbā**.

204. **Atantibaddhāti** abhāravahā. **Pesitacittāti** nibbānaṁ pati pesitacittā.

205. **Vihatenaṁ**ti kappāsavihananadhanunā pabbajaṇānam vijaṭṭhanavasena hatena. Tenāha “**supoṭhitenā**”ti, asaṅkaraṇavasena suṭṭhu pothitenāti attho, dassanīyasaṁvejanīyaṭṭhānakittanena ca vasanaṭṭhānam kathitaṁ.

Ānanda-acchariyadhammaṇṇanā

207. **Theraṁ adisvā āmantesīti** tattha adisvā āvajjanto therassa ṭhitaṭṭhānam, pavattiñca ṇatvā āmantesi.

Kāyakamassa hitabhāvo hitajjhāsayena pavattitattāti āha “**hitavuddhiyā katenā**”ti. Sukhabhāvo kāyikadukkhābhāvo, cetasi kasukhabhāvo cetasikasukhasamuṭṭhitattā cāti vuttaṃ “**sukhasomanasseneva katenā**”ti. Āvirahovibhāgato advayabhāvato **advayenā**ti imamatthaṃ dassetuṃ “**yathā**”ti-ādi vuttaṃ. Satthu khettabhāvasampattiyā, therassa ajjhāsayasampattiyā ca “**ettakaṃ idan**”ti pamāṇaṃ gahetuṃ asakkuṇeyyatāya pamāṇavirahitattā tassa kammassāti āha “**cakkavāḷampī**”ti-ādi.

Evam pavattitenāti evaṃ odissakamettābhāvanāya vasena pavattitena. Vivaṭṭūpanissayabhūtaṃ kataṃ upacitaṃ puññaṃ etenāti **katapuñño**, arahattādhigamāya katādhikāroti attho. Tenāha “**abhinīhārasampannosīti dasseti**”ti.

208. Katthaci saṅkucitaṃ hutvā ṭhitaṃ mahāpathaviṃ pattharanto viya, paṭisaṃhaṭaṃ hutvā ṭhitaṃ ākāsaṃ vitthārento viya, catusaṭṭhādhikayojanasatasahasubbedhaṃ cakkavāḷagiriṃ adho osārento viya, aṭṭhasaṭṭhādhikasahasayojanasatasahas ubbedhaṃ sineruṃ ukkhipento viya, satayojanāyāmaṃvitthāraṃ mahājambuṃ khandhe gahetvā cārento viyāti pañcahi upamāhi therassa guṇakathā mahantabhāvadassanattañceva aññesaṃ dukkaṭabhāvadassanattañca āgatāva. **Eteneva cāti ca**-saddena “**ahaṃ etarahi arahaṃ sammāsambuddho,**¹ **sadevakasmim lokasmim natthi me paṭipuggalo**”ti² ca evamādināṃ saṅgaho daṭṭhabbo. **Byattoti** khandhakoṣallādisaṅkhātena veyyattiyena samannāgato. **Medhāvī**ti medhāsaṅkhātāya sammābhāvitāya paññāya samannāgato.

209. **Paṭisanthāraddhammanti** pakaticārittavasena vuttaṃ, upagatānaṃ pana bhikkhūnaṃ, bhikkhunīnaṃ pucchāvissajjanavasena ceva cittarucivasena ca yathākālaṃ dhammaṃ desetiyeva, upāsakopāsikānaṃ pana upanisinnakathāvasena.

1. Dī 2. 2 piṭṭhe. 2. Ma 1. 227; Ma 2. 295; Vi 3. 12; Abhi 4. 218; Khu 11. 228 piṭṭhesu.

Mahāsudassanasuttadesanāvaṇṇanā

210. **Khuddaka-saddo** patirūpavācī, **ka-saddo** appatthoti āha “**khuddakanagaraketi nagarapatirūpake sambādhe khuddakanagarake**”ti. Dhupara¹ visālasaṅṭhānatāya taṃ “ujjaṅgalanagarakan”ti vuttanti āha “**visamanagarake**”ti. **Aññesaṃ mahānagarānaṃ** ekadesappamāṇatāya **sākhāsadise**. Ettha ca “khuddakanagarake”ti iminā tassa nagarassa appakabhāvo vutto, “ujjaṅgalanagarake”ti iminā bhūmivipattiyā nihīnabhāvo, “sākhānagarake”ti iminā appadhānabhāvo. **Sārappattāti** vibhavasārādinā sāramahattaṃ pattā.

Kahāpaṇasakaṭanti ettha “dvikumbhaṃ **sakaṭaṃ**. **Kumbho** pana dasambaṇo”ti vadanti. **Dve pavisantīti** dve kahāpaṇasakaṭāni āyavasena pavisanti.

Subhikkhāti sulabhāhārā, sundarāhārā ca. Tenāha “**khajjabhojjasampannā**”ti. **Saddaṃ karonteti** ravasārīnā tuṭṭhabhāvena koñcanādaṃ karonte. **Avivittāti** asuññā, kadāci ratho paṭhamāṃ gacchati, tamañño anubandhanto gacchati, kadāci dutiyavuttaratho paṭhamāṃ gacchati, itaro taṃ anubandhanti evaṃ **aññamaññaṃ anubandhamānā**. **Etthāti** kusāvatinagare. Tassa mahantabhāvato ceva iddhādibhāvato ca niccaṃ payojitāneva **bheri-ādīni tūriyāni**, samma sammāti vā aññamaññaṃ piyālāpasaddo **samma-saddo**. Kaṃsatāḷadisabbatāḷāvacarasaddo **tāla-saddo**, **kuṭabheri-saddo** kumbhathūpasaddo.

Evarūpā saddā honti kacavarākiṇṇavīthitāya, araññe kandamūlapaṇṇādiggahaṇāya, tattha dukkhajīvikatāya cāti yathākkamaṃ yojetabbam. **Idha na evaṃ ahosi** devaloke viya sabbaso paripuṇṇasampattikatāya.

Mahantaṃ kolāhalanti saddhāsampannānaṃ devatānaṃ, upāsakānañca vasena purato purato mahatī ugghosanaṃ hoti. Tattha bhagavantaṃ uddissa katassa vihārassa abhāvato, bhikkhusaṃghassa ca mahantabhāvato **te āgantvā -pa- pesesi**. Pesento ca “kathañhi nāma bhagavā pacchime kāle attano pavattim amhākaṃ nārocesi², nesaṃ domanassaṃ mā ahosī”ti ajja kho vāseṭṭhā”ti-ādīnā sāsanam pesesi.

1. Ūsara (?)

2. Nārocesi (?)

Mallānaṃvandanāvaṇṇanā

211. Aghaṃ dukkhaṃ āventi pakāsentīti **aghāvino**, pākaṭṭibhūta dukkhāti āha “**uppannadukkhā**”ti. Nātisālohitabhāvena kulāṃ parivattati etthāti **kulaparivattam**. Taṃtaṃkulīnabhāgena ṭhito sattanikāyo “kulaparivattaso”ti vuttanti āha “**kulaparivattan**”ti. Te pana taṃtaṃkulaparivattaparicchinnā mallarājāno tasmim nagare vīthi-ādisabhāgena vasantīti vuttam “**vīthisabhāgenaceva racchāsabhāgena cā**”ti.

Subhaddaparibbājakavattuvaṇṇanā

212. Kaṅkhā eva **kaṅkhādhammo**. **Ekatovā**ti bhūmim avibhajitvā sādharmaṇatova. Bijato ca aggaṃ gahetvā āhāraṃ sampādetvā dānaṃ **bijaggam**. **Gabbhakā**leti gabbhadhāraṇato paraṃ khīraggaḥaṇakāle. Tenāha “**gabbhaṃ phāletvā khīraṃ nīharitvā**”ti-ādi. **Puthukakā**leti sassānaṃ nātipakke puthukayogyaphalakāle. **Lāyanagganti** pakkassa sassassa lavane lavanārambhe dānaṃ adāsī. Lunassa sassassa veṇivasena bandhitvā ṭhapanam **veṇikaraṇam**. Tassa ārambhe dānaṃ **veṇaggam**. Veṇiyo pana ekato katvā rāsikaraṇam **kalāpo**. Tattha aggadānam **kalāpaggam**. Kalāpato nīharitvā maddane aggadānam **khalaggam**. Madditam ophuṇitvā dhañṇassa rāsikaraṇe aggadānam **khalabhaṇḍaggam**. Dhañṇassa khalato koṭṭhe pakkhipane aggadānam **koṭṭhaggam**. **Uddharitvā**ti koṭṭhato uddharitvā.

“**Nava aggadānāni adāsī**”ti iminā “kathaṃ nu kho aham Satthu santike aggatova mucceyyan”ti aggaggadānavasena vivaṭṭūpanissayassa kusalassa katūpacitattā, nāṇassa ca tathā paripākaṃ gatattā aggadhammadesanāya tassa bhājanabhāvaṃ dasseti. Tenāha “**imam aggadhammam tassa desessāmi**”ti-ādi. **Ohiyivā** saṅkocam āpajjitvā.

213. **Aññātukā**moḃa, na sandiṭṭhim parāmāsī. **Abbhaññimsū**ti sandehajātassa pucchāvacananti katvā **jānimsū**ti atthamāha. Tenāha pāḷiyam “sabbeva na abbhaññimsū”ti. **Nesanti** pūraṇādīnam. **Sā paṭiññāti** “karoto kho mahārāja kārayato”ti-ādinā¹ paṭiññātā.

1. Dī 1. 49 piṭṭhe.

sabbaññupaṭiññā eva vā. **Niyyānikā**ti sappāṭihāriyā, tesam vā siddhantaṣaṅkhātā¹ paṭiññā vaṭṭato nissaraṇaṭṭhena **niyyānikā**ti. Sāsanassa sampattiyā tesam sabbaññutam, tabbipariyāyato ca asabbaññutam gacchatīti daṭṭhabbam. Tenāha “**tasmā**”ti-ādi. **Atthābhāvatoti** Subhaddassa sādhetabba-atthābhāvato. **Okāsābhāvatoti** tathā vitthāritam katvā dhammam desetum avasarābhāvato. Idāni tameva okāsābhāvam dassetum “**paṭhamayāmasmin**”ti-ādi vuttam.

214. Yesam samaṇabhāvakarānam dhammānam sampādanena samaṇo, te pana ukkaṭṭhaniddesena ariyamaggadhammāti catumaggasaṁsiddhiyā pāḷiyam cattāro samaṇā vuttāti te bāhirasamaye sabbena sabbam natthīti dassento “**paṭhamo sotāpannasamaṇo**”ti-ādimāha. **Purimadesanāyā**ti “yasmiṅca kho subhadda dhammavinaye”ti-ādinā vuttāya desanāya. Byatirekato, anvayato ca adhippeto attho vibhāvīyatīti paṭhamanayopettha “purimadesanāya”ti padena saṅgahitovāti daṭṭhabbo. Attano sāsanam niyamento āha “imasmiṁ kho”ti yojanā. **Āraddhavipassakehī**ti samādhikammikavipassakehi², sikhāppattavipassake sadhāya vuttam, na paṭṭhapitavipassane. Apare pana “bāhirakasamaye vipassanārambhassa ganthopi nathevāti avisesavacanametam”ti vadanti. **Adhigataṭṭhānanti** adhigatassa kāraṇam, tadattham pubbabhāgapaṭipadanti attho, yena sotāpattimaggo adhigato, na uparimaggo, so sotāpattimagge ṭhito akuppadhammatāya tassa, tattha vā siddhito ṭhitapubbo bhūtapubbagatiyāti sotāpattimaggaṭṭho sotāpanno, na sesa-ariyā bhūmantaruppattito. Sotāpanno hi attanā adhigataṭṭhānam sotāpattimaggam aññassa kathetvā sotāpattimaggaṭṭham kareyya, na aṭṭhamako asambhavato. **Esa nayo sesamaggaṭṭhesūti** etthāpi imināva nayena attho veditabbo. **Paguṇam kammaṭṭhānanti** attano paguṇam vipassanākammaṭṭhānam, eteneva “avisesavacanam”ti vādo paṭikkhittoti daṭṭhabbo.

Sabbaññutaññānam adhippetam. Tañhi sabbañeyyadhammāvabodhane “kusalam chekam nipuṇam”ti vuccati tattha asaṅga-appaṭihataṁ pavattatīti katvā.

1. Siddhitaṣaṅkhātā (Ka)

2. Samparāyikavipassakehi (Ka)

Samadhikāni ekena vassena. Ñāyanti etena catusaccadhammaṃ yāthāvato paṭivijjhantīti **ñāyo**, lokuttaramaggoti āha “**ariyamaggadhammassā**”ti. Padissati etena ariyamaggo paccakkhato dissatīti **padeso**, vipassanāti vuttaṃ “**padese vipassanāmagge**”ti. **Samaṇopīti** ettha **pi**-saddo “padesavattī”ti etthāpi ānetvā sambandhitabboti āha “**padesavatti -pa- natthīti vuttaṃ hotī**”ti.

215. **Soti** tathāvutto antevāsī. **Tenāti** ācariyena. **Attano ṭhāne ṭhapito hoti** parapabbājanādīsu niyuttattā.

Sakkhisāvakoti paccakkhasāvako, sammukhasāvako attho. **Bhagavati dharamāneti** dharamānassa Bhagavato santike. Sesadvayepi eseva nayo. **Sabbopi** soti sabbo so tividhopi. **Ayaṃ pana arahattaṃ patto**, tasmā paripuṇṇagatāya matthakappatto **pacchimo sakkhisāvako**ti.

Pañcamabhāṇavāraṇṇanā niṭṭhitā.

Tathāgatapacchimavācāvaṇṇanā

216. **Tanti** bhikkhusaṅghassa ovādakaṅgaṃ **dassetuṃ -pa- vuttaṃ** dhammasaṅgāhakehīti adhippāyo. Suttābhidhammasaṅgahitassa dhammassa atisaṅgamaṃ sambodhanaṃ **desanā**, tasseva pakārato ñāpanaṃ veneyyasantāne ṭhapanam **paññāpananti** “**dhammopi desito ceva paññatto cā**”ti vuttaṃ. Tathā vinayatantisāṅgahitassa kāyavācānaṃ vinayanato “vinayo”ti laddhādhivacanassa atthassa atisaṅgamaṃ sambodhanaṃ **desanā**, tasseva pakārato ñāpanaṃ asaṅkarato ṭhapanam **paññāpananti** “**vinayopi desito ceva paññatto cā**”ti vuttaṃ. Adhisīlasikkhāniddesabhāvena sāsanassa mūlabhūtatā vinayo paṭhamaṃ sikkhitabboti taṃ tāva ayamuddesaṃ sarūpato dassento “**mayā hi vo**”ti-ādimāha. Tattha **sattāpattikkhandhavasenā**ti sattannaṃ āpattikkhandhānaṃ avītikkamaṇiyatāvasena. **Satthukiccaṃ sādhesati** “idam vo kattabbaṃ, idam vo na kattabban”ti kattabbākattabbassa vibhāgena anusāsanato.

Tena tenākārenāti tena tena veneyyānaṃ ajjhāsayanurūpena pakārena. **Ime dhammeti** ime sattatimsabodhipakkhiyadhamme. Tappadhānattā suttantadesanāya “**suttantapiṭakam**¹ **desitan**”ti vuttam. **Satthukiccam sādhesati** taṃtaṃcariyānurūpaṃ sammāpaṭipattiyā anusāsanato. Kusalākusalābyākatavasena **nava hetū**. “**Satta phassā**”ti-ādi sattaviññānadhātusampayogavasena vuttam. Dhammānulome tikapaṭṭhānādayo cha, tathā dhammapaccanīye, dhammānulomappaccanīye, dhammapaccanīyanulometi catuvīsati samantapaṭṭhānāni etassāti **catuvīsatisamantapaṭṭhānam**, taṃ pana paccayanulomādivasena vibhajiyamānaṃ aparimāṇanayamevāti āha “**anantanayamahāpaṭṭhānapaṭimaṇḍitan**”ti. **Satthukiccam sādhesatīti** khandhādivibhāgena nāyamānaṃ catusaccasambodhāvahattā satthārā sammāsambuddhena kātābbakiccam nipphādessati.

Ovadissanti anusāsissanti ovādānusāsanīkiccanipphādanato.

Cārittanti samudācārā, navesu piyālāpaṃ vuḍḍhesu gāravālāpanti attho. Tenāha “bhanteti vā āyasmāti vā”ti. Gāravavacanañhetam, yadidaṃ bhanteti vā āyasmāti vā, loke pana “tatra bhavan”ti, “devānaṃ piyā”ti ca gāravavacanameva.

“Ākaṅkhamāno samūhanatū”ti vutte “na ākaṅkhamāno na samūhanatū”tipi vuttameva hotīti āha “**vikappavacaneneva ṭhapesī**”ti. **Balanti** nāṇabalaṃ. Yadi asamūhananaṃ diṭṭham, tadeva ca icchitam, atha kasmā bhagavā “ākaṅkhamāno samūhanatū”ti avocāti? Tathārūpapuggalajjhāsayavasena. Santi hi keci khuddānukhuddakāni sikkhāpadāni samādāya saṃvattitum anicchanta, tesam tathā avuccamāne bhagavati vighāto uppajjeyya, taṃ tesam bhavissati dīgharattam ahitāya dukkhāya, tathā pana vutte tesam vighāto na uppajjeyya “amhākamevāyaṃ doso, yato amhesu eva keci samūhananaṃ na icchantī”ti. Keci “sakalassa pana sāsanassa saṃghāyattabhāvakarāṇattham tathā vuttan”ti vadanti. Yañca kiñci satthārā sikkhāpadaṃ paññattaṃ, taṃ samaṇā sakyaputtīyā sirasā sampaṭicchitvā jīvitam viya rakkhanti. Tathā hi te “khuddānukhuddakāni sikkhāpadāni ākaṅkhamāno saṃgho

1. Suttantaṃ vā piṭakam (Ka)

samūhanatū”ti vuttepi na samūhaniṃsu, aññadatthu “purato viya tassa accayepi rakkhiṃsu evā”ti satthusāsanassa, saṃghassa ca mahantabhāvadassanattampī tathā vuttanti daṭṭhabbāṃ. Tathā hi āyasmā ānando, aññepi vā bhikkū “katamaṃ pana bhante khuddakaṃ, katamaṃ anukhuddakaṃ”ti na pucchīṃsu samūhanajjhāsayasēva abhāvato.

Na taṃ evaṃ gahetabbanti “Nāgasenatthero khuddānukhuddakaṃ jānāti”ti-ādīnā vuttaṃ taṃ nesaṃ vacanaṃ iminā vuttākārena na gahetabbāṃ adhippāyassa aviditattā. Idāni taṃ adhippāyaṃ vibhāvetuṃ “**Nāgasenattherohī**”ti-ādī vuttaṃ. Yasmā Nāgasenatthero¹ paresaṃ vādapathopacchedanattamaṃ saṅgītikāle dhammasaṅgāhakamahātherehi gahitakoṭṭhāsēsu ca antimakoṭṭhāsēva gahetvā Milindarājānaṃ paññāpesi. Mahākassapattthero pana ekasikkhāpadampi asamūhanitukāmatāya tathā kammavācaṃ sāveti, tasmā taṃ tesāṃ vacanaṃ tathā na gahetabbāṃ.

217. **Dvelhakanti** dvidhāgāho, anekāṃsaggāhoti attho. **Vimatīti** saṃsayāpatti. Tenāha “**vinicchitūṃ asamattatā**”ti. **Taṃ vo vadāmīti** taṃ saṃsayavantaṃ bhikkhūṃ sandhāya vo tumhe vadāmi.

Nikkaṅkhabhāvapaccakkhakarāṇāñāṇānyevāti Buddhādīsu tesāṃ bhikkhūnaṃ nikkaṅkhabhāvassa paccakkhakāriyābhāvato tamattamaṃ paṭivijjhivā ṭhitāṃ sabbaññutaññāṇameva. **Ettha** etasmīṃ atthe.

218. Appamajjanaṃ **appamādo**, so pana atthato ñāṇūpasañhitāsati. Yasmā tattha satiyā byāpāro sātisayo, tasmā “**sati-avippavāsenā**”ti vuttaṃ. **Appamādapadeyeva pakkhipivā adāsi** tamattathato, tassa sakalassa buddhavacanaṃ saṅgaṇhanato ca.

Parinibbutakathāvaṇṇanā

219. Jhānādīsu citte ca paramukkaṃsagatavasībhāvatāya “ettake kāle ettakā samāpattiyo samāpajjitvā parinibbāyissāmī”ti kālaparicchedaṃ katvā samāpatti samāpajjanaṃ “**parinibbānaparikammaṃ**”ti adhippetāṃ. **Theroti** Anuruddhatthero.

1. Khu 11. 145 piṭṭhe Milindapañhe vitthāro.

Ayampi cāti yathāvuttapañcasaṭṭhiyā jhānānaṃ samāpannabhāvakathāpi **saṅkhepakathā** eva, kasmā? Yasmā Bhagavā tadāpi devasikaṃ vaḷañjanasamāpattiyo sabbāpi aparihāpetvā samāpajji evāti dassento “**nibbānapuraṃ pavisanto**”ti-ādimāha.

Imāni dvepi samanantarāneva paccavekkhaṇāyapi yebhuyyenānantariyakatāya jhānapakkhikabhāvato, yasmā bhavaṅgacittaṃ sabbapacchimaṃ, tato Bhavato cavanato “cuti”ti vuccati, tasmā na kevalaṃ ayameva Bhagavā, atha kho sabbepi sattā bhavaṅgacitteneva cavantīti dassetuṃ “**ye hi keci**”ti-ādi vuttaṃ.

220. **Paṭibhāgapuggalavirahitoti** silādiguṇehi asadisatāya sadisapuggalarahito.

221. Saṅkharā vūpasamanti etthāti **vūpasamoti** evaṃsaṅkhātaṃ ñātaṃ kathitaṃ **nibbānaṃ**.

222. **Yanti** paccatte upayogavacananti āha “**yo kālaṃ akari**”ti.

Suvikasitenevāti pītisomanassayogato suṭṭhu vikasitena muditena. **Vedanaṃ adhvāsesi** abhāvasamudayo kato suṭṭhu pariññātattā. **Anāvaraṇavimokkho** sabbaso nibbutabhāvato.

223. Ākaronti attano phalāni samānākāre karontīti **ākārā**, kāraṇāni. **Sabbākāravarūpeteti** sabbehi ākāravarehi uttamakāraṇehi silādiguṇehi samannāgateti attho.

225. **Kathambhūtāti** kīdisābhūtā.

Cullakaddhānanti parittaṃ kālaṃ dvattināḍikāmattaṃ velaṃ.

Buddhasarīrapūjāvaṇṇanā

227. Kamsatāḷādi tālaṃ avacarati etthāti “**tāḷavacaran**”ti vuccati ātatādītūriyabhaṇḍaṃ. Tenāha “**sabbaṃ tūriyabhaṇḍan**”ti.

Dakkhiṇadisābhāgenevāti aññaena disābhāgena anāharitvā yamakasālānaṃ ṭhānato dakkhiṇadisābhāgeneva, tatopi **dakkhiṇadisābhāgaṃ** haritvā netvā.

Jetavanasadiseti sāvattihyā jetavanasadise ṭhāne, “jetavanasadise ṭhāne”tipi paṭho.

228. **Pasādhanamaṅgalasālāyā**ti abhisekakāle alaṅkaraṇamaṅgalasālāya.

229. **Devadāniyoti** tassa corassa nāmaṃ.

Mahākassapattheravatthuvaṇṇanā

231. **Pāvāyā**ti pāvānagarato. Āvajjanapaṭibaddhattā jānanassa anāvajjitattā Satthu parinibbānaṃ ajānanto “**dasabalaṃ passissāmī**”ti thero cintesi, satthusarīre vā satthusaññaṃ uppādentō tathā cintesi. Tenevāha “atha bhagavantaṃ ukkhipitvā”ti. “**Dhuvāṃ parinibbutō bhavissatī**”ti cintesi pārisesañāyena. Jānantopi thero ājīvakaṃ pucchiyeva, pucchane pana kāraṇaṃ sayameva pakāsetuṃ “**kiṃ panā**”ti-ādi āradhmaṃ.

Ajja sattāhparinibbutoti ajja divasato paṭilomato sattame ahani parinibbuto.

232. **Nāliyā vāpakenā**ti nāliyā ceva thavikāya ca.

Mañjuketi mañjubhāṇine madhurassare. **Paṭibhāneyyakeri** paṭibhānavante. **Bhuñjitvā pātabbayāgūti** paṭhamāṃ bhuñjitvā pivitabbayāgu.

Tassāti subhaddassa vuḍḍhapabbajitassa.

Ārādhitasāsaneti samāhitasāsane. **Alanti** samattho. **Pāpoti** pāpapuggalo. **Osakkāpetunti** hāpetuṃ antaradhāpetuṃ.

Pañhavārāti pañhā viya vissajjanāni “yasmim samaye kāmāvacaraṃ kusalaṃ cittaṃ uppannaṃ hoti”ti-ādinā¹, “yasmim samaye rūpūpapattiyā maggaṃ bhāve-

1. Abhi 1. 17 piṭṭhe.

tī”ti-ādinā¹ ca pavattāni **ekam dve bhūmantarāni. Mūlenaṭṭhe pisācasadisā bhavissāmāti** yathā rukkhe adhivattho pisāco tassa sākḥāparivāre naṭṭhe khandham nissāya vasati, khandhe naṭṭhe mūlam nissāya vasati, mūle pana naṭṭhe anissayova hoti, tathā bhavissāmāti attho. Atha vā **mūle naṭṭheti** pisācena kira rukkḥagacchādīnam kiñcideva mūlam chinditvā attano puttassa dīnam, yāva tam tassa hatthato na vigacchati, tāva so tam padesaṃ adissamānarūpo vicarati. Yadā pana tasmim kenaci acchinnabhāvena vā sativippavāsavasena vā naṭṭhe manussānampi dissamānarūpo vicarati, tam sandhāyāha “**mūle naṭṭhe pisācasadisā bhavissāmā**”ti.

Mam kāyasakkhim katvāti tam paṭipadam kāyena sacchikatavantam tasmā tassā desanāya sakkhibhūtam mam katvā. **Paṭicchāpesi** tam paṭicchāpanam kassapasuttēna dīpetabbam.

233. Candanaghaṭikābhullato **candanacitakā.**

Tam sutvāti tam āyasmātā anuruddhattherena vuttam devatānam adhippāyam sutvā.

234. **Dasikatantam vāti** paliveṭṭhita-ahatakāsikavatthānam dasaṭṭhānena tantamattampi vā. **Dārukḥkhandham vāti** candanādicitakadārukḥkhandham vā.

235. Samudāyesu pavattavohārānam avayavesu dissanato sarīrassa avayavabhūtāni aṭṭhīni “**sarīrāni**”ti vuttāni.

Na vippakirimsūti sarūpeneva ṭhitāti attho. “Sesā vippakirimsū”ti vatvā yathā pana tā vippakiṇṇā ahesum, tam dassetum “**tatthā**”ti-ādi vuttam.

Udakadhārā nikkhamitvā nibbāpesunti devatānubhāvena. Evaṃ mahatiyo bahū udakadhārā kimatthāyāti āha “**Bhagavato citako mahanto**”ti. Mahā hi so vīsaratanasatiko. **Aṭṭhadantakehīti** naṅgalehi aṭṭheva hi nesam dantasadisāni potthāni honti, tasmā “aṭṭhadantakāni”ti vuccati.

1. Abhi 1. 66 piṭṭhe.

Dhammakathāva pamāṇanti ativiya acchariyabbhutabhāvato passantānaṃ, suṇantānañca sātisayaṃ pasādāvahabhāvato, savisesaṃ Buddhānubhāvadīpanato. Parinibbutassa hi buddhassa bhagavato evarūpo ānubhāvoti taṃ pavattiṃ kathentānaṃ dhammakathikānaṃ attano ñāṇabalānurūpaṃ pavattiyamānā dhammakathā evettha pamāṇaṃ vaṇṇetabbassa atthassa mahāvisayattā, tasmā vaṇṇanā bhūmi nāmesāti adhippāyo. **Catujjātiyagandhaparibhaṇḍaṃ kāretvāti** tagarakuṅkumayavanapupphatamālapattāni pisitvā katagandhena paribhaṇḍaṃ kāretvā. **Khacitvāti** tattha tattha olambanavasena racetvā, gandhavatthūni gahetvā ganthitamālā **gandhadāmāni** ratanāvaḷiyo **ratanadāmāni**. Bahikilañjaparikkhepassa, antosāṇiparikkhepassa karaṇena **sāṇikilañjaparikkhepaṃ kāretvā**. Vātaggāhiniyo paṭākā **vātapāṭākā**. Sarabharūpapādako pallaṅko sarabhamayapallaṅko, tasmīṃ **sarabhamayapallaṅke**.

Sattihatthā purisā **sattiyo** taṃsahacaraṇato yathā “kuntā pacaranti”^{ti}, tehi samantato rakkhāpanaṃ pañcakaraṇanti āha “**sattihatthehi purisehi parikkhipāpetvā**”^{ti}. **Dhanūhīti**¹ etthāpi eseva nayo. **Sannāhagavacchikaṃ viya katvā** nirantarāvaṭṭhita-ārakkhasannāhena gavacchijālaṃ viya katvā.

Sādhukīlīnti saparahitaṃ sādhanatṭhena sādhu, tesaṃ kīlītaṃ uḷārapuññapasavanato, samparāyikatthāvirodhikaṃ kīlāvihāraṇti attho.

Sarīradhātuvibhajanaṇṇanā

236. **Imināva niyāmenāti** yena nīhārena mahātale nisinnokañci parihāraṃ akatvā kevalaṃ iminā niyāmeneva. **Supinakoti** dussupinako. **Dukūladupaṭṭaṃ nivāsetvāti** dve dukūlavatthāni ekajjhaṃ katvā nivāsetvā. Evañhi tāni sokasamappitassāpi abhassitvā tiṭṭhanti.

Abhisekasiñcakoti rajjābhiseke abhisekamaṅgalasiñcako uttamamaṅgalabhāvato. **Visāññī**² **jāto** yathā taṃ Bhagavato guṇavisesāmatarasaññūtāya avaṭṭhitapemo pothujjanikasaddhāya patiṭṭhitapasādo katūpakāratāya sañjanitacittamaddavo.

1. Dhanūni (Aṭṭhakathāyaṃ)

2. Visāñño (Ka)

Suvaṇṇabimbisakavaṇṇanti suviracita-apassenasadisaṃ.

Kasmā panettha pāveyyakā pāliyaṃ sabbapacchato gahitā, kiṃ te kusinārāya āsannatarāpi sabbapacchato uṭṭhitā? Āma sabbapacchato uṭṭhitāti dassetuṃ “**tattha pāveyyakā**”ti-ādi vuttam.

Dhātupāsanatthanti satthu dhātūnaṃ payirupāsanāya. **Nesaṃ pakkhā ahesuṃ** “ñāyena tesam santakā dhātuyo”ti.

237. **Doṇagajjitaṃ nāma avoca** Satthu avatthattayūpasañhitaṃ. Etadatthameva hi Bhagavā maggaṃ gacchanto “pacchato āgacchanto Doṇo brāhmaṇo yāva me padavaḷaṅjaṃ passati, tāva mā vigacchatū”ti adhiṭṭhāya aññatarasmiṃ rukkhamūle nisīdi. Doṇopi kho brāhmaṇo “imāni sadevake loke aggapuggalassa padāni”ti sallakkhento padānusārena Satthu santikaṃ upagacchi, Satthāpissa dhammaṃ desesi, tenapi so Bhagavati nivīṭṭhasaddho ahoṣi. Etadavoca, kiṃ avocāti āha “**suṇāntu -pa- avocā**”ti.

Kāyena ekasannipātā vācāya ekavacanā abhinnavacanā evaṃ samaggā hotha. Tassa pana idaṃ kāraṇanti āha “**sammodamānā**”ti. Tenāha “**cittenāpi aññamaññaṃ sammodamānā hothā**”ti.

238. **Tato tato samāgatasamghānanti** tato tato attano vasanaṭṭhānato samāgantvā sannipatitabhāvena samāgatasamghānaṃ. Tathā samāpatitasamūhabhāvena **samāgatagaṇānaṃ**. Vacanasampañchanena **paṭissuṇitvā**.

Dhātuthūpapūjāvaṇṇanā

239. **Yakkhaggāho** devatāveso. **Khipitakaṃ** dhātukkubhamṃ uppādetvā khipitakarogo. **Arocako** āhārassa aruccanarogo.

Sattamadivaseti sattavassasattamāsato parato sattame divase. **Balānurūpenā**ti vibhavabalānurūpena.

Pacchā saṅgītikārakāti dutiyaṃ tatiyaṃ saṅgītikārakā. **Dhātūnaṃ antarāyaṃ disvāti** tattha tattha cetiye yathāpatiṭṭhāpitabhāveneva

ṭhitānaṃ dhātūnaṃ micchādiṭṭhikānaṃ vasena antarāyaṃ disvā,
mahādhātunidhānena sammadeva rakkhitānaṃ anāgate asokena
dhammaraññā tato uddharitvā vitthāritabhāve kate sadevakassa lokassa
hitasukhāvahabhāvañca disvāti adhippāyo. **Paricaraṇamattamevāti** gahetvā
paricaritabbadhātumattameva. Rājūnaṃ hatthe **ṭhapetvā**, na cetiyesu. Tathā
hi pacchā asokamahārājā cetiyesu dhātūnaṃ na labhati.

Purimapurimakatassa gaṇhanayogyāṃ pacchimaṃ pacchimaṃ kārento
aṭṭha aṭṭha haricandanādīmaye karaṇḍe ca thūpe ca kāresi.
Lohitacandanamayādīsupi eseva nayo. **Maṇikaraṇḍesūti**
lohitaṅkamasāragallaphalikamaye ṭhapetvā avasesamaṇiviccittakesu
karaṇḍesu.

Thūpārāmacetiyappamāṇanti Devānaṃpiyatissamahārājena
kāritacetiyappamāṇaṃ.

Mālā mā milāyantūti “yāva Asoko Dhammarājā bahi cetiyāni kāretum
ito dhātuyo uddharissati, tāva mālā mā milāyantū”ti **adhittahitvā.**
Āviñchanarajjuyanti aggaḷāviñchanarajjuyaṃ. **Kuñcikaṃmuddikanti**
dvāravivaraṇatthaṃ kuñcikañceva muddikañca.

Vālasaṅghātayantanti kukkulaṃ paṭibhayadassanaṃ
aññamaññapaṭibaddhagamanādītāya saṅghāṭitarūpakayantaṃ yojesi. Tenāha
“**kaṭṭharūpakāni**”ti-ādi. **Āṇiyā bandhitvāti** anekakaṭṭharūpavicittayantaṃ
attano devānubhāvena ekāya eva āṇiyā bandhitvā vissakammo
devalokameva gato. “**Samantato**”ti-ādi pana tasmim dhātunidāne
Ajātasattuno kiccavisesānuṭṭhānadassanaṃ.

“Asukaṭṭhāne nāma dhātunidhānaṃ”ti raññā pucchite “tasmim sannipāte
vissesalābhino nāhesun”ti keci. “Attānaṃ nigūhitvā tassa vuḍḍhatarassa
vacanaṃ nissāya vīmaṃsanto jānissatīti na kathesun”ti apare.
Yakkhadāsaketi upahārādividhinā devatāvesanake bhūtāviggāhake.

Imaṃ padanti “evametaṃ bhūtapubban”ti dutiyasaṅgītikārehi ṭhapitaṃ
imaṃ padaṃ. Mahādhātunidhānampi tassa atthaṃ katvā **tatīyasaṅgītikārāpi**
ṭhapayimsu.

Mahāparinibbānasuttavaṇṇanāya līnatthappakāsanā.

4. Mahāsudassanasutta

Kusāvatarājadhānīvaṇṇanā

242. **Sovaṇṇamayāti** suvaṇṇamayā. **Ayaṃ pākāro**ti sabbaratanamayo pākāro. **Tayo tayoti** anto ca tayo, bahi ca tayoti tayo tayo.

Esikatthambho indakhīlo nagarasobhano alaṅkāratthambho. Aṅgīyati ñāyati puthulabhāvo etenāti **aṅgaṃ**, parikkhepo. Tiporisaṃ aṅgaṃ etissāti **tiporisaṅgā**. Tenāha “**tenā**”ti-ādi. **Tena** pañcahatthappamāṇena tiporisena. **Paṇṇaphalesupī**ti sabbaratanamayānaṃ tālānaṃ paṇṇaphalesupi. **Eseva nayoti** “paṇṇesu ekaṃ pattakaṃ sovaṇṇamayaṃ, ekaṃ rūpiyamayaṃ. Phalesupi eko lekhābhāvo sovaṇṇamayo, eko rūpiyamayo”ti-ādiko ayamatto atidiṭṭho. **Pākārantareti** dvinnāṃ dvinnāṃ pākārānaṃ antare. **Ekekā hutvā ṭhitā** tālapanti.

Chekoti paṭu suvisado, so cassa paṭubhāvo manosāroti āha “**sundarā**”ti. **Raṅjetunti** rāgaṃ uppādetuṃ. **Khamatevāti** rocateva. **Na bībhacchetī**ti na tajjeti, sotasukhabhāvato piyāyitabbo ca hoti. Kumbhathuṇadaddarikādi **ekatalaṃ tūriyaṃ**. **Ubhayatalaṃ** pākaṭameva. **Sabbato pariyaṇaddhaṃ** caturassa-ambaṇakaṃ, paṇavādi ca. **Vaṃsādī**ti ādi-saddena saṅkhādikaṃ saṅgaṇhāti. **Sumucchitassāti** suṭṭhu pariyattassa. **Pamaṇeti** nātidaḷhanātisithilatāsaṅkhāte majjhime mucchanappamāṇe. **Hatthaṃ vā pādaṃ vā cāletvāti** hatthalayapādalaye sajjetvā. **Naccantāti** sākhaṇaccāṃ naccantā.

Cakkaratanavaṇṇanā

243. **Uposathaṃ** vuccati aṭṭhaṅgasamannāgataṃ sabbadivasesu gahaṭṭhehi rakkhitabbasīlaṃ, samādānavasena taṃ tassa atthīti uposathiko, tassa **uposathikassa**. Tenāha “**samādinna-uposathaṅgassā**”ti. **Tadāti**

tasmim̄ kāle. Kasmim̄ pana kāleti? Yasmim̄ kāle
 cakkavattibhāvasamvattaniyadānasīlādipuññasambhārasamudāgamasampann
 o pūritacakkavattivatto kāladīpadesavisesapaccājātiyā ceva
 kularūpabhogādhipateyyādiguṇavisesasampattiyā ca tadanurūpe attabhāve
 ṭhito hoti, tasmim̄ kāle. Tādise hi kāle cakkavattibhāvī purisaviseso
 yathāvuttaguṇasamannāgato rājā khattiyō muddhāvasitto visuddhasīlo
 anuposathaṃ satasahassavissajjanādinā sammāpaṭipattim̄ paṭipajjati, na yadā
 cakkaratanaṃ uppajjati, tadā eva. Ime ca visesā sabbacakkavattīnaṃ
 sādharmaṇavasena vuttā. Tenāha “**Pātova -pa- dhammatā**”ti. Bodhisattānaṃ
 pana cakkavattibhāvāvahaguṇāpi cakkavattiguṇāpi sātisayāva honti.

Vuttappakārapuññakammapaccayanti

cakkavattibhāvāvahadānadamasāmyamādipuññakammahetukaṃ.

Nīlamanisaṅghātasadisanti indanīlamanisaṅcayasamānaṃ.

Dibbānubhāvayuttattāti dassaneyyatā, manuññaghosatā, ākāśagāmitā,

obhāsavissajjanā, appaṭighātātā, rañño icchitatthanipphattikāraṇatāti

evamādīhi dibbasadisēhi ānubhāvehi samannāgatattā, etena dibbaṃ viyāti

dibbanti dasseti. Na hi taṃ devalokapariyāpannaṃ. Sahassaṃ arā etassāti vā

sahassāraṃ. Sabbehi ākārehiti sabbehi sundarehi paripuṇṇāvayave

lakkhaṇasampanne cakke icchitabbehi ākārehi. **Paripūranti** paripuṇṇaṃ, sā

cassā pāripūrim̄ idāneva vitthāressati.

Panālīti chiddaṃ. **Suddhasiniddhadantapantiyā** nibbivarāyāti adhippāyo.

Tassā pana panālīyā samantato passassa rajatamayattā **sārarajatamayā** vuttā.

Yasmā cassa cakkassa rathacakkassa viya antobhāvo nāma natthi, tasmā

vuttaṃ “**ubhosupi bāhirantesū**”ti. Kataparikkhepā hoti panālīti yojanā.

Nābhipanālīparikkhepapaṭṭesūti nābhi parikkhepapaṭṭe ceva nābhiyā

panālīparikkhepapaṭṭe ca.

Tesanti arānaṃ. **Ghaṭakā** nāma alaṅkārahūtā khuddakapuṇṇaghaṭā.

Tathā **maṅikā** nāma muttāvaḷikā. **Paricchedalekhā** tassa tassa

paricchedadassanavasena ṭhitā paricchinnalekhā. **Ādi**-saddena

mālākammādim¹ saṅgaṇhāti. **Suvibhattānevāti** aññamaññaṃ asaṃkiṇṇattā

suṭṭhu vibhattāni.

1. Gahitā phalakā mālākammādim̄ (Ka)

“**Surattā**”ti-ādīsu **surattaggahaṇena** mahānāmavaṇṇataṃ paṭikkhipati, **suddhaggahaṇena** saṃkiliṭṭhataṃ, **siniddhaggahaṇena** lūkhataṃ. Kāmaṃ tassa cakkaratanassa nemimaṇḍalaṃ asandhikameva nibbattaṃ, sabbatthakameva pana kevalaṃ pavāḷavaṇṇena ca sobhatīti pakaticakkassa sandhiyuttaṭṭhāne surattasuvaṇṇapaṭṭādimayāhi vaṭṭaparicchedalekhāhi paññāyamānāhi sasandhikā viya dissantīti āha “**sandhīsu panassā**”ti-ādi.

Nemimaṇḍalapiṭṭhiyanti nemimaṇḍalassa piṭṭhipadese. Ākāsa-caribhāvato hissa tattha vātaggāhī pavāḷadaṇḍo hoti. **Dasannaṃ dasannaṃ arānaṃ antareti** dasannaṃ dasannaṃ arānaṃ antare samīpe padese. **Chiddamaṇḍalakhacitoti** maṇḍalasaṅṭhānachiddavicitto. **Sukusalasamannāhatassāti** suṭṭhu kusalena sippinā pahatassa, vāditassāti attho. **Vaggūti** manorama. **Rajanīyoti** suṇantānaṃ rāguppādako. **Kamanīyoti** kanto. **Samosaritakusumadāmāti** olambitasugandhakusumadāmā. **Nemiparikkhepassāti** nemipariyantaparikkhepassa. Nābhipanāliyā dvinnāṃ passānaṃ vasena “**dvinnampi nābhipanāliṇan**”ti vuttaṃ. Ekā eva hi sā panāli. **Yehīti** yehi dvīhi mukhehi. Puna **yehīti** yehi muttakalāpehi.

Odhāpayamānanti sotuṃ avahitāni kurumānaṃ.

Cando purato cakkarataṃ pacchāti evaṃ **pubbāpariyena** pubbāparabhāvena.

Antepurassāti anurādhapure rañño antepurassa. **Uttarasīhapañjarasadiseti** tadā rañño pāsāde tādisassa uttaradisāya sīhapañjarassa labbhamānattā vuttaṃ. **Sukhena sakkāti** kiñci anāruhitvā, sarīrañca anullaṅghitvā yathāṭhiteneva hatthena pupphamuṭṭhiyo khipitvā **sukhena sakkā hoti**¹ **pūjetuṃ**.

Nānāvīrāgaratanappabhāsamujjalanti nānāvīdhavicittavaṇṇaratanobhāsapabhāssaraṃ. **Ākāsaṃ abbhuggantvā pavatteti** āgantvā ṭhitaṭṭhānato upari ākāsaṃ abbhuggantvā pavatte.

244. **Rājāyuttāti** rañño kicce āyuttakapurisā.

Sineruṃ vāmapassena katvā tassa dhurataraṃ gacchanto “**Vamapassena sineruṃ pahāyā**”ti vuttaṃ.

Vinibbedhenāti tiriyaṃ vinivijjhanavasena. **Sannivesakkhamoti** khandhāvārasannivesayogyo. **Sulabhāhārupakaraṇoti** sukheveva laddhabbadhaññagorasadārutiṇādibhojanasādhanā.

Paracakkanti parassa rañño senā, āṇā vā.

Āgamananandanoti āgamanena nandijanano. Gamanena socetīti **gamanasocano**. **Upakappethā**ti uparūpari kappetha, saṃvidahatha upanethāti attho. **Upaparikkhitvā**ti hetutopi sabhāvatopi phalatopi diṭṭhadhammikasamparāyikādi-ādīnavatopi vīmaṃsitvā. Vibhāventi paññāya atthaṃ vibhūtaṃ karontīti **vibhāvino**, paññavanto. **Anuyantā**ti anuvattakā, anuvattakabhāveveva, pana rañño ca mahānubhāvena te jigucchānavasena pāpato anoramantāpi ekacce ottappavasena oramantīti veditabbaṃ.

Ogacchamānanti osīdantaṃ. **Yojanamattanti** vitthārato yojanamattaṃ padesaṃ. Gambhīrabhāvena pana yathā bhūmi dissati, evaṃ ogacchati. Tenāha “**mahāsamuddatalan**”ti-ādi. **Ante cakkaratanam** udakena senāya anajjhottharaṇatthaṃ. Puratthimo mahāsamuddo pariyanto etassāti puratthimamahāsamuddapariyanto, taṃ **puratthimamahāsamuddapariyantam**, puratthimamahāsamuddam pariyantaṃ katvāti attho.

Cāturantāyāti catusamuddantāya, puratthimadisādicatukoṭṭhāsantāya vā. **Sobhayamānam viyā**ti viya-saddo nipātamattaṃ. Attano acchariyaguṇehi sobhantameva hi taṃ tiṭṭhati. Pāḷiyampi hi “upasobhayamānan”tveva vuttaṃ.

Hatthiratanavaṇṇanā

246. **Haricandanādihīti ādi**-saddena catujjātiyagandhādīm saṅgaṇhāti. **Āgamanam cintethā**ti vadanti cakkavattivattassa pūritatāya paricitattā. Kāḷatilakādīnam abhāvena **visuddhasetasarīro**. **Sattapatiṭṭhoti** bhūmiphusanakehi vāladhi, varaṅgam, hatthoti imehi ca tīhi, catūhi pādehi

cāti sattahi avayavehi patiṭṭhitatā sattapatiṭṭho. **Sabbakaniṭṭhoti** sabbehi Chaddantakulahatthīhi hīno. **Uposathakulā sabbajēṭṭhoti** uposathakulato āgacchanto tatha sabbappadhāno āgacchatīti yojanā. **Vuttanayenāti** “mahādānaṃ datvā”ti-ādinā vuttana nayena. Cakkavattīnaṃ, cakkavattiputtānaṃ cakkavattim uddissa **cintayantānaṃ āgacchati**. **Apanetvāti** attano ānubhāvena apanetvā. Gandhameva hi tassa itare hatthī na sahani.

Gharadhenuvacchako viyāti ghare paricitadhenuyā tattheva jātasaṃvaddhavacchako viya. **Sakalopathavinti** sakalajambudīpasaññitapathaviṃ.

Assaratanavaṇṇanā

247. **Sindhavakulatoti** sindhavassājāniyakulato.

Maṇiratanavaṇṇanā

248. **Sakaṭanābhisamapariṇāhanti**¹ pariṇāhato mahāsakaṭassa nābhiyā samappamānaṃ. **Ubhosu antesūti** heṭṭhā, upari cāti dvīsu antesu. **Kaṇṇikapariyantatoti** dvinnāṃ kaṇcanapadumānaṃ kaṇṇikāya pariyantato. **Muttājālake ṭhapetvāti** suvisuddhe muttamaye jālake patiṭṭhāpetvā. **Aruṇuggamanavelā viyāti** aruṇuggamanasīsenā sūriya-udayakkhaṇaṃ upalakkheti.

Itthiratanavaṇṇanā

249. “Itthiratanāṃ pātubhavatī”ti vatvā kutassā pātubhāvoti dassetuṃ “**maddarājakulato**”ti-ādi vuttam. Maddaraṭṭham kira jambudīpe abhirūpānaṃ itthīnaṃ uppattiṭṭhānaṃ. Tathā hi “siṅcayamahārājassa devī, vessantaramahārājassa devī, bhaddakāpilānī”ti evamādi itthiratanāṃ maddaraṭṭhe eva uppannaṃ. **Puññānubhāvenāti** Cakkavattirañño puññatejena.

Sanṭhānapāripūriyāti hatthapādādisarīravayavānaṃ susaṅṭhitāya. Avayavapāripūriyā hi samudāyapāripūrisiddhi. Rūpanti sarīraṃ “rūpantveva saṅkhaṃ gacchatī”ti-ādīsu² viya. **Dassanīyāti** surūpabhāvena passitabbayuttā.

1. ...samapparimāṇanti (?)

2. Ma 1. 248 piṭṭhe.

Tenāha “**dissamānāvā**”ti-ādi. **Somanassavasena cittaṃ pasādeti** yoniso cintentānaṃ kammaphalasaddhāya vasena. **Pasādāvahattāti** kāraṇavacanena yathā pāsādikatāya vaṇṇapokkharatāsiddhi vuttā, evaṃ dassanīyatāya pāsādikatāsiddhi, abhirūpatāya ca dassanīyatāsiddhi vattabbāti nayaṃ dasseti. Paṭilomato vā vaṇṇapokkharatāya pāsādikatāsiddhi, pāsādikatāya dassanīyatāsiddhi, dassanīyatāya abhirūpatāsiddhi yojetabbā. Evaṃ sarīrasampattivāsena abhirūpatādike dassetvā idāni sarīre dosābhāvavāsenaṃ te dassetuṃ “**abhirūpā vā**”ti-ādi vuttaṃ. Tattha yathā pamāṇayuttā, evaṃ ārohapariṇāhayogato ca pāsādikā nātidīghatādayo, evaṃ manussānaṃ dibbarūpatāsampattipīti “**appattā dibbavaṇṇan**”ti vuttaṃ.

Ārohasampatti vuttā ubbedhena pāsādikabhāvato. **Pariṇāhasampatti** vuttā kisathūladosaḥbhāvato. **Vaṇṇasampatti vuttā** vivaṇṇatābhāvato. **Kāyavipattiyāti** sarīradosassa. **Satavāravihatassāti** satakkhattuṃ vihatassa, “satavāravihatassā”ti ca idaṃ kappāsapicivasena vuttaṃ, tūlapicuno pana vihananameva natthi. Kuṅkumatagaraturukkhayavanapupphāni **catujjāti**. “Tamālatagaraturukkhayavanapupphāni”ti apare.

Aggidaddhā viyāti āsanagatena agginā daddhā viya. **Paṭhamamevāti** rājānaṃ disvāpi kiccantarappasutā ahutvā kiccantarato paṭhamameva, dassanasamakāramevāti attho. Rañño nisajjāya pacchā nipātanaṃ nisīdanaṃ sīlaṃ etissāti **pacchānipātini**. Tam tam attanā rañño kātabbakiccaṃ “kim karomī”ti pucchitabbatāya kimkaraṇaṃ paṭisāvetīti **kimkārapaṭissāvinī**.

Mātugāmo nāma yebhuyyena saṭhajātiko, itthiratanassa pana tam natthīti dassetuṃ “**svāssā**”ti-ādi vuttaṃ.

Guṇāti rūpaguṇā ceva ācāraguṇā ca. **Purimakammānubhāvenāti** katassa purimakammassānubhāvena itthiratanassa tabbhāvasaṃvattaniyassa purimakammassa ānubhāvena. Cakkavattinopi parivārasampattisaṃvattaniyapuñṇakammaṃ tādissa phalavisesassa upanissayo hotiyeva. Tenāha

“**cakkavattino puññaṃ upanissāyā**”ti, etena sesesupi saviññāṇakaratanesu attano kammavasena nibbattesupi tesam tesam visesānaṃ tadupanissayatā vibhāvītā evāti daṭṭhabbā. Pubbe ekadesavasena labbhamānā pāripūrī rañño Cakkavattibhāvūpagamanato paṭṭhāya sabbākāraparipūrā jātā.

Gahapatiratanavaṇṇanā

250. **Pakatiyāvāti** sabhāveneva cakkaranapātubhāvato pubbepi. Yādisaṃ Rañño Cakkavattissa puññabalaṃ nissāya yathāvuttā cakkaranānubhāvanibbatti, tādisametassa puññabalaṃ nissāya gahapatiratanassa kammavipākajaṃ dibbacakkhum nibbattetī āha “**cakkaranānubhāvasahitan**”ti. Kāraṇassa hi ekasantatipatitāya, phalassa ca samānakālikatāya tathāvacaṇaṃ.

Pariṇāyakaratanavaṇṇanā

251. “Ayaṃ dhammo, ayaṃ adhammo”ti-ādinā kammassakatāvabodhanasaṅkhātassa paṇḍitabhāvassa atthitāya **paṇḍito**. Bāhusaccabyattiyā **byatto**. Sabhāvasiddhāya medhāsaṅkhātāya pakatipaññāya atthitāya **medhāvī**. Attano yāthāvabuddhamatthaṃ paresaṃ vibhāvetuṃ pakāsetuṃ samatthatāya **vibhāvī**. **Vavatthapetunti** nicchitum.

Catu-iddhisamannāgatavaṇṇanā

252. Vipaccanaṃ vipāko, vipāko eva **vepāko** yathā “vikatameva vekatan”ti. Samaṃ nātisītanāccuḥhatāya avisamaṃ bhuttassa vepāko etissā atthīti samavepākinī, tāya **samavepākinīyā**.

Dhammapāsādapokkharāṇivaṇṇanā

253. **Janarāsīm karetvā** tena janarāsīnā khaṇitvā **na māpesi**. Kiñcarahīti āha “**rañño panā**”ti-ādi. Tattha kāraṇaṃ parato āgamissati. **Ekāya** vedikāya **parikkhittā** pokkharāṇiyo. **Pariveṇaparicchedapariyanteti** ettha **pariveṇaṃ** nāma samantato vivaṇṇaṅgaṇabhūtaṃ pokkharāṇiyā tīraṃ, tassa paricchedabhūte pariyanthe **ekāya**

vedikāya parikkhittā pokkharāṇiyo. **Etadahosīti** etaṃ “yannūnāhaṃ imāsu pokkharāṇīsū”ti-ādikaṃ ahosīti. **Sabbotukanti** sabbesu utūsu pupphanakaṃ. **Nānāvaṇṇa-uppalabījādīni** rattanīlādinānāvaṇṇapupphena pupphanaka-uppalabījādīni. **Jalajathalajamālanti** jalajathalajapupphamālaṃ.

254. **Paricāravasenāti** taṅkhaṇikaparicāravasena, idaṅca paṭhamam paṭṭhapitaniyāmeneva vuttaṃ, pacchā pana yānasayanādīni viya itthiyopi atthikānaṃ pariccattā eva. Tenāha “itthīhipī”ti-ādi. **Pariccāgavasenāti** nirapekkhapariccāgavasena. Dīyatīti **dānaṃ**, deyyavatthu. Taṃ aggīyati nissajjīyati etthāti **dānaggam**, parivesanaṭṭhānaṃ. **Tādisāni atthīti** yādisāni rañño dānagge khomasukhumādīni vatthāni, tādisāni **yesam** attano santakāni santi. **Ohāyāti** pahāya tattheva ṭhapetvā. Attho atthi yesam teti **atthikā**. Evaṃ **anatthikāpi** daṭṭhabbā.

255. **Kalahasaddopīti pi**-saddena dānādhippāyena gehato nīhataṃ puna gehaṃ pavesetuṃ na yuttanti imamatthaṃ samucceti. Tenāha “**na kho etaṃ amhākaṃ patirūpan**”ti-ādi¹.

257. **Uṇhīsamatthaketi** sikhāpariyantamatthake. **Paricchedamatthaketi** pāsādaṅgaṇaparicchedassa matthake.

258. **Haratīti** ativiya pabhassarabhāvena cakkhūni paṭiharantaṃ² duddikkhatāya diṭṭhiyo harati apanentaṃ viya hoti. Taṃ pana haraṇaṃ nesaṃ paripphandaṇenāti āha “**phandāpeti**”ti.

Paṭhamabhāṇavāravaṇṇanā niṭṭhitā.

Jhānasampattivaṇṇanā

260. **Mahatiyā iddhiyāti** mahantena icchitatthasamijjhanena. **Tesaṃyeva** icchiticchitatthānaṃ. “**Anubhavitabbānaṃ**”ti iminā ānubhāva-saddassa kammaśādhanaṃ dasseti. Pubbe sampannaṃ katvā deyyadhammapariccāgassa katabhāvaṃ dassento “**sampattipariccāgassā**”ti āha. Attānaṃ dameti etenāti **damo**.

1. Dī 2. 147 piṭṭhe.

2. Paṭihanantaṃ (?)

Bodhisattapubbayogaṇṇā

Assāti mahāsudassanarañño. **Eko theroti** appaññāto nāmagottato aññataro puthujjano thero. **Theraṃ disvāti** aññatarasmim̐ rukkhamūle nisinnam̐ disvā. **Kaṭṭhattharaṇanti** kaṭṭhamayaṃ attharaṇam̐, dāruphalakanti attho.

Paribhogabhājanti pāṇiyaparibhojanīyādiparibhogayogyaṃ bhājanam̐. **Āraṇṭhakanti** sūcivijjhanakaraṇṭakam̐. **Pipphalikanti** khuddakasatthakam̐. **Udakatumbakanti** kuṇḍikam̐.

Kūṭāgāradvāreyeva nivattesīti kūṭāgāram̐ pavitṭhakālato paṭṭhāya tesam̐ micchāvitakkānam̐ pavattiyā okāsam̐ nādāsi.

261. **Kasiṇameva paññāyati** mahāpurisassa tattha tattha katādhikārattā, tesaṅca padesaṅgam̐ suparikammakatakasiṇasadisattā.

262. **Cattāri jhānānti** cattāri kasiṇajjhānāni.
Kasiṇajjhānappamaññānam̐yeva vacanam̐ tāsam̐ tadā ādaragāravavasena nibbattitattā. Mahābodhisattānaṅhi arūpajjhānesu ādaro natthi, abhiññāpadaṭṭhānataṃ pana sandhāya tānipi nibbattenti, tasmā mahāsatto tāpasaparibbājatakāle yattake lokiyaguṇe nibbatteti, te sabbepi tadā nibbattesiye. Tenāha “**mahāpuriso panā**”ti-ādi.

Caturāsītinagarasahassādivaṇṇā

263. **Abhiharitabbabhattanti** upanetabbabhattam̐.

264. **Nibaddhavattanti** pubbe upanibaddhapākavattam̐.

Subhaddādevi-upasaṅkamanavaṇṇā

265. **Āvaṭṭetvāti** ativisitvā. Yaṃ yaṃ rañño icchitam̐ dānūpakaraṇaṅceva bhogūpakaraṇaṅca, tassa tassa tatheva samiddhabhāvaṃ vitthavati.

266. Sace pana rājā jīvite chandaṃ janeyya, ito parampi ciraṃ kalam̐ tiṭṭheyya mahiddhiko mahānubhāvoti evaṃ mahajjhāsaya devī bhogesu, jīvite ca rājānam̐ sāpekkham̐ kātum̐ vāyami. Tena vuttam̐

“mā heva kho rājā”ti-ādi. Tenevāha “tassa kalamkiriyaṃ aniccamānā”ti-ādi. Chandam janehīti ettha chanda-saddo taṇhāpariyāyoti āha “pemaṃ uppādehi”ti. Apekkhati ārammaṇaṃ etāya na vissajjetīti **apekkhā**, taṇhā.

267. **Garahitā**ti ettha kehi garahitā, kasmā ca garahitāti antolīnacodanaṃ vissajjento “**buddehi**”ti-ādimāha, tena viññugarahitattā, duggatisaṃvattaniyato ca sāpekkhakālakiriyaṃ parivajjetabbāti dasseti.

268. **Ekamantaṃ gantvā**ti rañño cakkhupathaṃ vijahitvā.

Brahmalokūpagamanavaṇṇanā

269. **Soṇassā**ti koṭivīsassa soṇassa. **Ekā bhattapātī**ti ekaṃ bhattavaḍḍhitakaṃ. **Tādisaṃ bhattanti** tathārūpaṃ garuṃ madhuraṃ siniddhaṃ bhattaṃ. **Bhuttānanti** bhuttavantānaṃ.

271. **Dāsamanussā**ti dāsā ceva āyuttakamanussā ca.

Idāni yathāvuttāya rañño mahāsudassanassa bhogasampattiyā kammasarikkhataṃ uddharanto “**etāni panā**”ti-ādimāha, taṃ suviññeyyameva.

272. **Ādito paṭṭhāyā**ti samudāgamanato paṭṭhāya. Yattha taṃ puññaṃ āyūhitaṃ, yato sā sampatti nibbattā, tato tatiyattabhāvato pabhuti. Mahāsudassanassa jātakadesanā hi tadā samudāgamanato paṭṭhāya Bhagavatā desitāti. **Paṃsvāgārakīlaṃ viyā**ti yathā nāma dārakā paṃsūhi vāpigeḥabhojanādīni dassentā yathārucci kīḷitvā gamanakāle sabbaṃ taṃ vidhaṃsentā gacchanti, evameva Bhagavā Mahāsudassanakāle attanā anubhūtaṃ dibbasampattisadisam acinteyyānubhāvasampattiṃ vitthārato dassetvā puna attano desanaṃ ādīnavanissaraṇadassanavasena vivaṭṭābhimukhaṃ viparivattento “sabbā sā sampatti aniccatāya vipariṇatā vidhaṃsitā”ti **dassento “passānandā**”ti-ādimāha. **Vipariṇatā**ti vipariṇāmaṃ sabhāvavigamaṃ gatā. Tenāha “**pakativijahanenā**”ti-ādi. **Pakatī**ti sabhāvadhammānaṃ udayavayapari-

cchinno kakkhaḷāphusanādisabhāvo, so bhaṅgakkhaṇato paṭṭhāya jahito, pariccajanto sabbaso nattheva. Tenāha “**nibbutapadīpo viya apaññattikabhāvaṃ gatā**”ti.

Ettāvatāti-ādito paṭṭhāya pavattena ettakena desanāmaggena. Anekāni vassakoṭṭisatasahassāniyeva ubbedho etissāti **anekavassakoṭṭi satasahassubbedhā**. **Aniccalakkhaṇaṃ ādāyāti** taṃ sampattigataṃ aniccalakkhaṇaṃ desanāya gahetvā vibhāvetvā. Yathā nisseṇimuccane tādīsaṃ satahatthubbedhaṃ rukkhaṃ pakatipurisena ārohituṃ na sakkā, evaṃ aniccatāvibhāvanena tassā sampattiyā apekkhā nisseṇimuccane kenaci ārohituṃ na sakkāti āha “**aniccalakkhaṇaṃ ādāya nisseṇim muñcanto viyā**”ti. **Tenevāti** yathāvuttakāraṇeneva, ādito sātīsayāṃ kāmesu assādaṃ dassetvāpi upari nesāṃ “passānandā”ti-ādinā ādīnavāṃ, okāraṃ, saṃkilesāṃ, nekkhamme ānisaṃsañca vibhāvetvā desanāya niṭṭhāpitattā. **Pubbeti** atītakāle. **Vasabharājāti** Vasabhanāmakko Sīhaḷamahārājā.

Udakapuppuḷādayoti ādi-saddena tiṇagge ussāvabindu-ādike saṅgaṇhāti.

Mahāsudassanassa panāti pana-saddo visesatthajotano, tena Mahāsudassanamahārājā jhānābhīññāsamāpattiyo nibbattesi, tadaggena parisuddhe ca samaṇabhāve paṭiṭṭhito, yato vidhuya eva kāmavitakkādisamaṇabhāvasaṃkilesāṃ suññāgāraṃ pāvīsi, evambhūtasāpi tassa kālaṃ kiriyaṭo sattame divase sabbā cakkavattisampatti antarāhitā, na tato paraṃ, aho acchariyamanusso anaññāsādhāraṇaguṇavisesoti imaṃ visesaṃ dasseti.

Anāruḷhanti “rājā kira pubbe gahapatikule nibbattī”ti-ādinā¹ “puna therāṃ āmantesī”ti-ādinā²ca vuttamatthaṃ sandhāyāha. So hi imasmim sutte saṅgītiṃ anāruḷho, aññattha pana āgato imissā desanāya piṭṭhivattakabhāvena. Yaṃ panettha atthato na vibhattaṃ, taṃ suviññeyyamevāti.

Mahāsudassanasuttavaṇṇanāya līnatthappakāsānā.

1. Dī-Ṭṭha 2. 223 piṭṭhe.

2. Dī-Ṭṭha 2. 228 piṭṭhe.

5. Janavasabhasutta

Nātikiyādibyākaraṇavaṇṇanā

273-275. “**Parito**”ti padam̄ yathā samantatthavācako, evam̄ samīpatthavācakopi hotīti **samantā sāmantā**ti attho vutto. Āmedītena pana samantattho jotito. Yassa pana sāmantā janapadesu “nālike viharatī”ti vuttatā nātikassatī viññātoyamattho. Yassa parito janapadesu byākaroti, tattha paricārakārakānam̄ byākaraṇam̄ avuttasiddham̄, nidassanavasena vā tassa vakkhamānattā “parito parito janapadesu”icceva vuttam̄. **Paricāraketi** upasake. Tenāha “**Buddhadhammasamghānam̄ paricārake**”ti. **Upapattīsūti** nibbattīsu. **Ñāṇagatipuññānam̄ upapattīsūti** ettha **ñāṇagatūpapatti** nāma tassa tassa maggañāṇagamanassa nibbatti. Yam̄ sandhāya vuttam̄ “pañcannam̄ orambhāgiyānam̄ parikkhayā”ti-ādi. **Puññūpapatti** nāma taṁtam̄devanikāyūpapatti. **Sabbatthā**ti “vajjimallesū”ti-ādike sabbattha catūsūpi padesu. **Purimesūti** pāḷiyam̄ vutte sandhāyāha. **Dasasuyevā**ti tesu eva dasasu janapadesu. **Paricārake byākaroti** byakātabbānam̄ bahūnam̄ tattha labbhanato. Nālike bhavā **nātikiyā**.

Niṭṭhaṅgatīti niṭṭham̄ nicchayam̄ upagatā.

Ānandaparikathāvaṇṇanā

276. Yasmā Saṁghasuppaṭipatti nāma Dhammasudhammatāya, Dhammasudhammatā ca Buddhasubuddhatāya, tasmā “aho Dhammo, aho Saṁgho”ti Dhammasamghaguṇakittanāpi atthato Buddhaguṇakittanā eva hotīti “Bhagavantam̄ kittayamāna rūpā”ti padassa “aho dhammo”ti-ādināpi attho vutto.

278. **Ñāṇagatī**ti “pañcannam̄ orambhāgiyānam̄ samyojanānam̄ parikkhayā”ti-ādinā āgatam̄ pahātabbapahānavasena pavattam̄ maggañāṇagamanam̄. Yasmā tassā eva ñāṇagatiyā vasena tassa tassa ariyapuggalassa opapātikatādiviseso, tasmā tam̄ tādīsam̄ tassa abhisamparāyam̄ sandhāyāha “**ñāṇābhisamparāyamevā**”ti.

279. Upasantaṃ pati sammati ālokīyatīti **upasantapatiso**¹.
Upasantadassano upasanta-ussanno. **Bhātirivāti** ettha **ra-kāro**
 padasandhikaro, **iva-saddo** bhusatthoti āha “**ativiya bhāti**”ti.

Janavasabhayakkhavaṇṇanā

280. Jeṭṭhakabhāvena jane vasabhasadisoti janavasabhoti assa
 devaputtassa nāmaṃ ahoṣi.

Ito devalokā cavitvā sattakkhattuṃ manussaloke rājabhūtassa.
 Manussalokā cavitvā sattakkhattuṃ devabhūtassa. **Etthevāti** etasmimīyeva
 cātumahārājīkabhave, etthāpi vessavaṇassa saḥabyatāvasena.

281. Āsisaṃ **āsā**, patthanā. Āsāsīsenā cetha
 kattukamyatākusalacchandaṃ vadati. Tenevāha
 “**sakadāgāmigmaggatthāyā**”ti-ādi. **Yadaggeti** ettha **agga-saddo** ādipariyāyoti
 āha “**taṃ divasaṃ ādiraṃ katvā**”ti. “**Purimaṃ -pa- avinipāto**”ti idaṃ yathā
 tattakaṃ kālāṃ sugatito sugatūpapattiyeva ahoṣi, tathā
 katūpacitakusalakammattā. Phussassa Sammāsambuddhassa kālato pabhūti
 hi sambhatavivatṭūpanissayakusalasambhāro esa devaputto. **Anacchariyanti**
 anu anu acchariyaṃ. Tenāha “**punappunaṃ acchariyamevā**”ti.
Sayamparisāyāti sakāya parisāya. **Bhagavato diṭṭhasadisamevāti**
 āvajjanasamanantaraṃ yathā te Bhagavato catuvīsatisatasahassamattā sattā
 ñāṇagatito diṭṭhā, evaṃ tumhehi diṭṭhasadisameva. **Vessavaṇassa sammukhā**
sutaṃ mayāti vadati.

Devasabhāvaṇṇanā

282. **Vassūpanāyikasaṅgahatthanti** vassūpanāyikāya
 ārakkhāsaṃvidhānavasena bhikkhūnaṃ saṅgahaṇatthaṃ “vassūpagatā
 bhikkhū evaṃ sukhena samaṇadhammaṃ karontī”ti, **pavāraṇasaṅgato**
 panassa pavāretvā satthu santikaṃ gacchantānaṃ bhikkhūnaṃ antarāmagge
 parissayapariharaṇatthaṃ. Dhammassavanatthaṃ

1. Upasantapadisso (Aṭṭhakathāyaṃ)

dūraṭṭhānaṃ gacchantesupi eseva nayo. Attanāpi āgantvā dhammassavanatthaṃ sannipatiyeva. **Etthetthāti** ettha ettha ayyānaṃ vasanaṭṭhāne.

Tadāpīti “purimāni bhante divasānī”ti vuttakālepi. **Eteneva kāraṇenāti** vassūpanāyikanimittameva. Tenāha pāḷiyaṃ “tadahuposathe pannarase vassūpanāyikāyā”ti-ādi. Āsanepi nisajjāya sudhammāya devasabhāya paṭhamam devesu tāvatimsesu nisennesu tassā catūsu dvāresu cattāro mahārājāno nisīdanti, idaṃ nesaṃ āsane nisajjāya cārittaṃ hoti.

Yenatthenāti yena kiccena yena payojanena. **Ārakkhatthanti** ārakkhabhūtaṃ atthaṃ. Vuttaṃ vacanaṃ etesanti **vuttavacanā**, mahārājāno.

283. **Atikkamivāti** abhibhavitvā.

Sanānkumārakathāvaṇṇanā

284. Abhisambhavitum adhigantum asakkuṇeyyo **anabhisambhavanīyo**. Tenāha “**appattabbo**”ti-ādi. Cakkhuyeva patho rūpadassanassa maggo upāyoti cakkhupatho, tasmim **cakkhupathasminti** āha “**cakkhupasāde**”ti, cakkhussa gocarayoggo vā **cakkhupathoti** āha “**āpāthe vā**”ti. **Nābhibhavatīti** na abhibhavati, gocarabhāvaṃ na gacchatīti attho. **Heṭṭhā heṭṭhāti** tāvatimsato paṭṭhāya heṭṭhā heṭṭhā, na cātumahārājikato paṭṭhāya, nāpi brahmapārisajjato paṭṭhāya. “Cātumahārājikā hi tāvatimsānaṃ yathā jātirūpāni passitum sakkonti, tathā brahmāno heṭṭhimā uparimānaṃ”ti keci, taṃ na yuttaṃ. Na hi heṭṭhimā brahmāno uparimānaṃ mūlapaṭṭisandhirūpaṃ passitum sakkonti, māpitameva passitum sakkontīti daṭṭhabbaṃ.

Suṇantova niddaṃ okkamīti gatiyo upadhārento bahi viṣaṭavittakkavicchedena saṅkocaṃ āpannacittatāya. **Mayhaṃ ayyakassāti** Bhagavantam sandhāya vadati.

Pañca sikhā etassāti pañcasikho, pañcasikho viya **pañcasikhoti** āha “**pañcasikhagandhabbasadiso**”ti. **Mamāyantīti** piyāyanti.

285. **Sumuttoti** saradosehi suṭṭhu mutto. Yehi pittasemhādīhi palibuddhattā saro avissaṭṭho siyā, tadabhāvato vissaṭṭhoti dassento āha “**apalibuddho**”ti. Viññāpetīti **viññeyyo**, antogadhahetu-attho kattusādhano esa viññeyyasaddoti āha “**atthaviññāpano**”ti. Sarassa madhuratā nāma maddavanti āha “**madhuro mudū**”ti. Savanaṃ arahatīti **savanīyo**. Savanārahatāya ca āpāthasukhatāyāti āha “**kaṇṇasukho**”ti. **Bindūti** piṇḍito. Ākoṭitabhinnakaṃsasaddo viya anekāvayavo ahutvā niravayavo, ekabhāvoti attho. Tenāha “**ekagghano**”ti, etenevassa avisāritā saṃvaṇṇitā daṭṭhabbā. Gambhīruppattiṭṭhānatāya cassa gambhīratāti āha “**nābhimūlato**”ti-ādi. **Evaṃ samuṭṭhitoti** jīvhādippahāramattasamuṭṭhito. **Amadhuro ca hoti** uppattiṭṭhānānaṃ parilahubhāvato. **Na ca dūraṃ sāveti** vīrabhāvābhāvato. **Ninnādī** suvipulabhāvato savisesaṃ ninnādo, pāsamsaninnādo vā. Tenāha “**mahāmegha -pa- yutto**”ti.

Pacchimaṃ pacchimanti dutiyaṃ, catutthaṃ, chaṭṭhaṃ, aṭṭhamañca padaṃ. **Purimassa purimassāti** yathākkamaṃ paṭhamassa, tatiyassa, pañcamassa, sattamassa ca. **Atthoyevāti** atthaniddeso eva. Vissaṭṭhatā hissa viññeyyatāya veditabbā, mañjubhāvo savanīyatāya, bindubhāvo avisāritāya, gambhīrabhāvo ninnāditāyāti. **Yathāparisanti** ettha **yathā**-saddo parimāṇavācī, na pakārādivācīti āha “**yattakā parisā**”ti, tena parisappamāṇamevassa saro niccharati, ayamassa dhammatāti dasseti. Tenāha “**tattakamevā**”ti-ādi.

“Ye hi keci”ti-ādi “yāvañca so Bhagavā”ti-ādinā vuttassa atthassa hetukittanavasena samatthanam saraṇesu nesam niccasevanena, sīlesu ca patiṭṭhāpanena chakāmasaggasampatti-anuppādanato. Tenāha “**ye hi keci -pa- vadati**”ti. **Nibbematikagahitasaraṇeti** maggenāgatasaraṇagamane. Te hi sabbaso samugghātivicikicchatāya ratanattaye aveccappasādena samannāgatāyeva, pothujjanikasaddhāya vasena Buddhādīnaṃ guṇe ogāhetvā jānanti, aparaneyyabuddhino te pariyāyato nibbematikagahitasaraṇā veditabbā. **Gandhabbadevagaṇanti** gandhabbadevasamūhaṃ.

Tukā vuccati khīriṇī yā tukātipi vuccati. Tassā cuṇṇaṃ **tukāpiṭṭhaṃ**¹. Tam koṭṭetvā pakkhittaṃ ghaṇaṃ nirantaracitaṃ hutvā tiṭṭhati.

Bhāvita-iddhipādavaṇṇanā

287. **Supaññattā**ti suṭṭhu pakārehi ñāpitā bodhitā, asaṅkarato vā ṭhapitā, taṃ pana bodhanaṃ, asaṅkarato ṭhapaṇaṅca atthato desanā evāti āha “**sukathitā**”ti. **Ijjhanatṭhenā**ti samijjhanatṭhena, nippajjanassa kāraṇabhāvenāti attho. **Patitṭhānatṭhenā**ti adhitṭhānatṭhena. Iddhiyā pādoti **iddhipādo**, iddhiyā adhigamupāyoti attho. Tena hi yasmā uparūpari visesasaṅkhātāṃ iddhiṃ pajjanti pāpuṇanti, tasmā “pādo”ti vuccati. Ijjhatīti **iddhi**, samijjhati nippajjatīti attho. Iddhi evapādo **iddhipādo**, iddhiakoṭṭhāsoti attho. Evaṃ tāva “cattāro iddhipādā”ti ettha attho veditabbo.

Iddhipahonakatāyāti iddhiyā nipphādane samatthabhāvāya. **Iddhivisavitāyā**ti iddhiyā nipphādane yogyabhāvāya. Anekatthattā hi dhātūnaṃ yogyattho **vi-**pubbo **su-**saddo, visavanaṃ vā pajjanaṃ **visavitā**, tatha kāmakāritā visavitā. Tenāha “**Punappunan**”ti-ādi. **Iddhivikubbanatāyā**ti vikubbaniddhiyā vividharūpakaraṇāya. Tenāha “**nānappakārato katvā dassanatthāyā**”ti.

“Chandañce bhikkhu adhipatiṃ karitvā labhati samādhiṃ, labhati cittassekaggataṃ, ayaṃ vuccati chandasamādhi”ti² imāya pāḷiyā chandādhipati samādhi **chandasaṃmādhī**ti adhipatisaddalopaṃ katvā samāso vuttoti viññāyati, adhipatisaddatthadassanavasena pana “**chandahetuko, chandādhiko vāsamādhi chandasasamādhi**”ti aṭṭhakathāyaṃ vuttanti veditabbaṃ. “**Padhānabhūtā**ti vīriyabhūtā”ti keci vadanti. Saṅkhatasaṅkhārādinivattanatthañhi padhānaggahaṇanti. Atha vā taṃ taṃ visesaṃ saṅkharotīti **saṅkhāro**, sabbampivīriyaṃ. Tattha catukiccasādhakato aññassa nivattanatthaṃ padhānaggahaṇanti **padhānabhūtā** seṭṭhabhūtāti attho. Catubbidhassa pana vīriyassa adhippetattā bahuvacananiddeso kato. Visuṃ samāsayojanavasena yo pubbe iddhipādattho pādassa upāyatthataṃ, koṭṭhāsattathaṅca gahetvā yathāyogavasena

1. Piṭṭhaṃ (Aṭṭhakathāyaṃ)

2. Abhi 2. 225 piṭṭhe.

idha vutto, so vakkhamānānaṃ paṭilābhapubbabhāgānaṃ
kattukaraṇiddhibhāvaṃ, uttaracūḷabhājanīye vā vuttehi chandādīhi
iddhipādehi sādhetabbāya iddhiyā kattiddhibhāvaṃ, chandādīnaṃ
karaṇiddhibhāvaṃ sandhāya vuttoti veditabbo, tasmā “ijjhanatṭhena iddhī”ti
ettha kattu-attho, karaṇattho ca ekajjhaṃ gahetvā vuttoti kattu-atthaṃ tāva
dassetuṃ “nippattipariyāyena ijjhanatṭhena vā”ti vatvā itaraṃ dassento
“**ijjhanti etāyā**”ti-ādimāha. **Vuttanti** kattha vuttaṃ?

Iddhipādavibhaṅgapāṭhe¹. **Tathābhūtassāti** tenākārena bhūtassa, te
chandādiddhamme paṭilābhivā ṭhitassāti attho. “**Vedanākkhandho**”ti-ādīhi
chandādayo antokatvā cattāropi khandhā kathitā. **Sesesūti** sesiddhipādesu.

Vīriyiddhipādaniddese “vīriyasamādhipadhānasāṅkhārasamannāgatan”ti
dvikkhattuṃ vīriyaṃ āgataṃ. Tattha purimaṃ samādhivisesanaṃ
“vīriyādhipati samādhi vīriyasamādhi”ti, dutiyaṃ
samannāgamaṅgadassanaṃ. Dveyeva hi sabbattha samannāgamaṅgāni,
samādhi, padhānasāṅkhāro ca. Chandādayo hi samādhivisesanāni,
padhānasāṅkhāro pana padhānavacaneneva visesito, na chandādīhīti na idha
vīriyādhipatitā padhānasāṅkhārassa vuttā hoti. Vīriyaṅca samādhim
visesetvā ṭhitameva, samannāgamaṅgavasena pana
padhānasāṅkhāravacanena vuttanti nāpi dvīhi vīriyehi samannāgamo vutto
hoti. Yasmā pana chandādīhi visiṭṭho samādhi, tathāvisiṭṭheneva ca tena
sampayutto padhānasāṅkhāro, sesadhammā ca, tasmā samādhivisesanānaṃ
vasena cattāro iddhipādā vuttā, visesanabhāvo ca chandādīnaṃ
taṅtamavassayadassanavasena hotīti “chandasaṃmādhī -pa- iddhipādan”ti
ettha nissayatṭhepi pāda-sadde upāyatṭhena chandādīnaṃ iddhipādātā vuttā
hoti. Teneva hi abhidhamme **uttaracūḷabhājanīye**² “cattāro iddhipādā
chandiddhipādo”ti-ādinā chandādīnameva iddhipādātā vuttā.
Pañhapucchake³ “cattāro iddhipādā idha bhikkhu chandasamādhi”ti-ādinā
ca uddesaṃ katvāpi puna chandādīnaṃyeva kusalādibhāvo vibhatto.
Upāyiddhipādadassanatṭhameva hi nissayiddhipādadassanaṃ kataṃ, aññathā
catubbidhatā na siyāti. Ayamettha pālīvasena atthavinicchayo veditabbo.
Idāni paṭilābhapubbabhāgānaṃ vasena iddhipāde vibhajitvā dassetuṃ

1. Abhi 2. 226 piṭṭhe.

2. Abhi 2. 232 piṭṭhe.

3. Abhi 2. 233 piṭṭhe.

“**apicā**”ti-ādi vuttaṃ, taṃ suviññeyyameva. Idha iddhipādakathā saṅkhepeneva vuttāti āha “**vitthārena pana -pa- vuttā**”ti.

Kecīti abhayagirivāsino. Tesu hi ekacce “iddhi nāma anipphannā”ti vadanti, ekacce “iddhipādo pana anipphanno”ti vadanti, **anipphannoti** ca paramatthato asiddho, natthīti attho. **Ābhatoti** abhidhammapāṭhato¹ **dīghanikāyaṭṭhakathāyam**² ānīto purimanayato aññenākārena desanāya pavattattā. Chando eva iddhipādo **chandiddhipādo**. Eseva nayo sesesupi. **Ime panāti** imasmim̐ sutte āgatā iddhipādā. **Raṭṭhapālatthero**³ “chande sati kathāṃ nānujānissanti”ti sattāhaṃ bhattāni abhuñjitvā mātāpitaro anujānāpetvā pabbajitvā chandameva avassāya lokuttaraṃ dhammaṃ nibbattesīti āha “**raṭṭhapālatthero -pa- nibbattesī**”ti. **Soṇatthero**⁴ bhāvanamanuyutto āraddhavīriyo paramasukhumālo pādesu phoṭesu jātesupi vīriyaṃ nappaṭipassambhesīti āha “**soṇatthero vīriyaṃ dhuraṃ katvā**”ti. **Sambhūtatthero**⁵ “cittavato kiṃ nāma na sijjhatī”ti cittaṃ pubbaṅgamaṃ katvā bhāvanaṃ ārādhesīti āha “**Sambhūtatthero cittaṃ dhuraṃ katvā**”ti. **Moghatthero** vīmaṃsaṃ avassāyi, tasmā tassa Bhagavā “suññato lokaṃ avekkhassū”ti⁶ suññatākathāṃ kathesi, paññānissitamānaniggahatthaṃ, paññāya pariggahatthaṃca dvikkhattuṃ pucchito samāno pañhaṃ kathesi. Tenāha “**Āyasmā Mogharājā vīmaṃsaṃ dhuraṃ katvā**”ti.

Punappunaṃ chanduppādanaṃ pesanaṃ viya hotīti chandassa upaṭṭhānasadisatā vuttā.

Parakkamenāti parakkamasīsena sūrabhāvaṃ vadati. Thāmahāvato ca vīriyassa sūrabhāvasadisatā daṭṭhabbā.

Cintanappadhānattā cittassa mantasaṃvidhānasadisatā vuttā.

1. Abhi 2. 232 piṭṭhe.

2. Dī-Ṭṭha 2. 235 piṭṭhe.

3. Ma 2. 245; Am̐-Ṭṭha 1. 197; Theragāthā-Ṭṭha 2. 288; Apadāna-Ṭṭha 2. 19 piṭṭhesu vitthāro.

4. Vi 3. 267; Am̐ 2. 329; Am̐-Ṭṭha 1. 181; Theragāthā-Ṭṭha 2. 229; Apadāna-Ṭṭha 2. 199 piṭṭhesu vitthāro.

5. Theragāthā-Ṭṭha 2. 18 piṭṭhe vitthāro.

6. Khu 1. 448; Khu 4. 141; Khu 7. 346; Khu 8. 19, 180; Khu 10. 7, 198, 207 piṭṭhesu.

Jātisampatti nāma visiṭṭhajātītā. “Sabbadhammesu ca paññā seṭṭhā”ti vīmaṃsāya jātisampattisadisatā vuttā. **Sammohavinodaniyaṃ**¹ pana cittiddhipādassa jātisampattisadisatā, vīmaṃsiddhipādassa mantabalasadisatā ca yojitā.

Anekaṃ vihitam vidham etassāti **anekavihitanti** āha “**anekavidhan**”ti. **Vidha**-saddo koṭṭhāsapariyāyo “ekavidhena ñāṇavatthū”ti-ādīsu² viyāti āha “**iddhividhanti iddhikoṭṭhāsan**”ti.

Tividha-okāsādhigamavaṇṇanā

288. “**Sukhassā**”ti idaṃ tiṇṇampi sukhānaṃ sādharmaṇavacananti āha “**jhānasukhassa maggasukhassa phalasukhassā**”ti. Nānappanāpattatāya pana appadhānattā upacārajjhānasukhassa, vipassanāsukhassa cettha aggahaṇaṃ. Purimesu tāva dvīsu okāsādhigamesu tiṇipi sukhāni labbhanti, tatiye pana kathanti? Tattha kāmaṃ tiṇi na labbhanti, dve pana labbhantiyeva. Yathālābhavasena hetam vuttam “sakkharakathalampi macchagumbampi carantampi tiṭṭhantampi”ti-ādīsu³ viya. **Saṃsaṭṭhoti** saṃsaggaṃ upagato samaṅgībhūto, so pana tehi samannāgatacittopi hotīti vuttam “**sampayuttacitto**”ti. **Ariyadhammanti** ariyabhāvakaram dhammam. **Upāyatoti** vidhito. **Pathatoti** maggato. **Kāraṇatoti** hetuto. Yena hi vidhinā dhammānudhammapaṭipatti hoti, so upeti etenāti **upāyo**, so tadadhigamassa maggabhāvato **patho**, tassa karaṇato **kāraṇanti** ca vuccati.

“Aniccanti-ādivasena manasi karotī”ti saṅkhepatto vuttamattham vivarituṃ “**yonisomanasikāro nāmā**”ti-ādi vuttam. Tattha **upāyamanasikāro**ti kusaladhammappavattiyā kāraṇabhūto manasikāro. **Pathamanasikāro**ti tassa eva maggabhūto manasikāro. **Anicceti**-ādi-antavantatāya, anaccantikātāya ca anicce tebhūmake saṅkhāre “aniccan”ti manasikāroti yojanā. Eseva nayo sesesupi. Ayam pana viseso tasmīmyeva udayabbayapaṭipīḷanatāya dukkhanato, dukkhamato ca **dukkhe**, avasavattanatthena, anattasabhāvatāya ca **anattani**,

1. Abhi-Ṭṭha 2. 292 piṭṭhe.

2. Abhi 2. 323 piṭṭhe.

3. Dī 1. 79; Ma 1. 347; Ma 2. 213; Aṃ 1. 8 piṭṭhesu.

asucisabhāvatāya **asubhe**. Sabbampi hi tebhūmakam saṅkhatam kilesāsucipaggharaṇato “asubhan”tveva vattumarahati. **Saccānulomikena vāti** saccābhisamayassa anulomanavasena. “**Cittassa āvaṭṭanā**”ti-ādinā āvajjanāya paccayabhūtā tato purimuppannā manodvārikā kusalajavanappavatti phalavohāreneva tathā vuttā. Tassā hi vasena sā kusaluppattiyā upanissayo hotīti. Āvajjanā hi bhavaṅgacittam āvaṭṭetīti **cittassa āvaṭṭanā**, anu anu āvaṭṭetīti **anvāvaṭṭanā**. Bhavaṅgārammaṇato aññam ābhujatīti **ābhogo**. Samannāharatīti **samannāhāro**. Tadevārammaṇam attānam anubandhitvā anubandhitvā uppajjamāne manasi karoti ṭhapetīti **manasikāro**. **Ayam vuccatīti** ayam upāyamanasikāralakkhaṇo **yonisomanasikāro** nāma vuccati, yassa vasena puggalo dukkhādīni saccāni āvajjitum sakkoti.

Asamsaṭṭhoti na samsaṭṭho kāmādīhi vivitto vinābhūto.

Kāmādivisamsaggahetu uppajjanakasukham nāma vivekajam pītisukhanti āha “**paṭhamajjhānasukhan**”ti. Kāmam paṭhamajjhānasukhampi somanassameva, suttesu pana tam kāyikasukhassāpi paccayabhāvato visesato “sukhan”tveva vuccatīti idhāpi jhānabhūtam somanassam sukhanti, itaram somanassam. Tena vuttam “**sukhā**”ti. Hetumhi nissakkavacananti āha “**jhānasukhapaccayā**”ti. **Aparāparam somanassanti** jhānādhigamahetu paccavekkhaṇādivasena punappunam uppajjanakasomanassam.

Pamodanam pamudo, taruṇapīti, tato **pamudā**. “Pāmojjam pītathā yā”ti-ādisu taruṇapīti “pāmojjan”ti vuccati, idha pana pakaṭṭho mudo **pamudo** pāmojjanti adhippetam, tañca somanassarahitam natthīti avinābhāvitāya “**balavataram pītisomanassan**”ti vuttam. Jhānassa ujuvipaccanīkatam sandhāya “**pañca nīvaraṇāni vikkhambhetvā**”ti vuttam. Jhānam pana tadekaṭṭhe sabbepi kilese, sabbepi akusale dhamme vikkhambhetiyeva, **attano okāsam gahetvā tiṭṭhati** paṭipakkhadhammehi anabhibhavanīyato. **Tasmāti** okāsaggahaṇato, laddhokāsātāyāti attho. Maggaphalasukhādhigamāya okāsabhāvato vā **okāso**, assa adhigamo **okāsādhigamo**. Purimapakkhe pana okāsam avasaram adhigacchati etenāti **okāsādhigamo**.

Rūpasabhāvatāya, ekantarūpādhīnavuttitāya, savipphārikatāya ca ānāpānavitakkavicārānaṃ thūlabhāvaṃ anujānanto “**kāyavacīsāṅkhārā tāva oḷārikā hontū**”ti āha. Tabbidhuratāya pana ekaccānaṃ vedanāsaññānaṃ thulataṃ ananujānanto “**cittasaṅkhārā kathaṃ oḷārikā**”ti āha. Itaro “appahīnattā”ti kāraṇaṃ vatvā “**kāyasaṅkhārā hī**”ti-ādinā tamatthaṃ vivarati. **Teti** cittasaṅkhārā. Appahīnā saṅkhārā labbhamānasaṅkhāranimittatāya “oḷārikā”ti vattum arahanti, pahīnā pana tadabhāvato “sukhumā”ti-āha “**pahīne upādāya appahīnattā oḷārikā nāma jātā**”ti. Pāliyaṃ “kāyasaṅkhārānaṃ paṭippassaddhiyā”ti vuttattā “**sukhanti catutthajjhānikaphalasaṃpattisukhaṃ**”ti vuttam. “Cittasaṅkhārānaṃ paṭippassaddhiyā”ti pana vuttattā “**nirodhā vuṭṭhahantassā**”ti vuttam. Vacīsāṅkhārapaṭippassaddhi kāyasaṅkhārapaṭippassaddhiyāva siddhāti veditabbā. Tenevāha “**duṭṭiya -pa- visum na vuttāni**”ti. Pāliyaṃ pana atthato siddhāpi supākaṭabhāvena vibhāvetum sarūpato gaṇhāti. Na hi ariyavinaye atthāpattivibhāvanā abhidhammadesanāya pakatīti. Yathā nīvaraṇavikkhambhanaṅca paṭhamassa jjhānassa adhigamāya upāyo, evaṃ sukhadukkhavikkhambhanaṃ catutthassajjhānassa adhigamāya upāyoti “**catutthajjhānaṃ sukhaṃ dukkhaṃ vikkhambhetvā**”ti vuttam. Sesam heṭṭhā vuttanayameva.

Avijjārāgādīhi saha vajjehīti **savajjaṃ**, akusalaṃ, tadabhāvato **anavajjaṃ**, kusalaṃ. Attano hitasukhaṃ ākaṅkanta sevanīyato **sevitabbaṃ**, kusalaṃ, tabbipariyāyato **na sevitabbaṃ**, akusalaṃ, lāmakabhāvena **hīnaṃ**, akusalaṃ, seṭṭhabhāvena **paṇītaṃ**, kusalanti **sāvajjadukādayo** tayopi dukā yathārahaṃ **etesaṃ** kusalākusalakammapathānaṃ **vaseneva veditabbā**. **Sabbanti** yathāvuttam sabbam catūhi dukehi saṅgahitaṃ dhammajātaṃ. Yathārahaṃ kaṇhaṅca sukkaṅca paṭidvandibhāvato, sappātibhāgaṅca appātibhāgaṅca advayaabhāvato. **Vaṭṭapaṭicchādikā avijjā pahīyati** catunnaṃ ariyasaccānaṃ sammadeva paṭivijjanato. Tato eva **arahattamaggavijjā uppajjati**. **Sukhanti** evaṃ kammaathamukhena tebhūmakadhamme sammāsivā vipassanaṃ ussukkāpetvā maggapaṭipāṭiyā arahatte paṭiṭṭhahantassa yaṃ arahattamaggasukhaṅceva arahattaphalasukhaṅca, taṃ idha “sukhaṃ”ti adhippetam. **Antogadhā eva** nānantariyabhāvato.

Aṭṭhatimsārammaṇavasenati pāliyaṃ āgatānaṃ aṭṭhatimsāya kammaṭṭhānānaṃ vasena. **Vitthāretvā kathetabbā** paṭhamajjhānādivasena āgatattāti adhippāyo. “**Kathan**”ti-ādinaṃ tameva vittahāretvā kathanānaṃ nayato dasseti. “**Catuvīsatiyā ṭhānesū**”ti-ādīsu yaṃ vattabbaṃ, taṃ **mahāparinibbānavannaṇāyaṃ**¹ vuttameva. “**Nirodhasamāpattiṃ pāpetvā**”ti iminā arūpajjhānānīpi gahitāni honti tehi vinā nirodhasamāpatti samāpajjanassa sambhavato, catutthajjhānasabhāvattā ca tesāṃ. **Dasa upacārajjhānāni**ti ṭhapetvā kāyagatāsatiṃ ānāpānañca aṭṭha anussatiyo, saññāvavattthānañcāti dasa upacārajjhānāni. Adhisīlaṃ nāma samādhisaṃvattaniyanti tassa heṭṭhimantena paṭhamajjhānaṃ pariyosānanti vuttaṃ “**adhisīlasikkhāpaṭhamānaṃ okāsādhigamaṃ bhajati**”ti. Adhicittaṃ nāma catutthajjhānāniṭṭhaṃ tadantogadhattā arūpajjhānānaṃ tappariyosānattā phalajjhānānanti vuttaṃ “**adhicittasikkhā dutiyan**”ti. Matthakappattā adhipaññāsikkhā nāma aggamaggavijjāti āha “**adhipaññāsikkhā tatiyan**”ti. Sikkhattayavasena tayo okāsādhivame nīharantena yathārahaṃ taṃtaṃsuttavasenaṃ nīharitabbanti dassento “**sāmaññaphalepi**”ti-ādīmāha.

Yadaggena ca tisso sikkhā yathākkamaṃ tayo okāsādhigame bhajanti, tadaggena tappadhānattā yathākkamaṃ tīṇi piṭakāni te bhajantīti dassetuṃ “**tīsu panā**”ti-ādi vuttaṃ. **Tīṇi piṭakāni vibhajitvā**ti tiṇṇaṃ okāsādhigamānaṃ vasena yathānupubbaṃ tīṇi piṭakāni vitthāretvā **kathetuṃ labhissāmāti**. **Samodhānetvā**ti samāyojetvā tattha vuttamatthaṃ imassa suttassa atthabhāvena samānetvā. **Dukkathitanti** asambandhakathanena, atipapañcakathanena vā duṭṭhu kathitanti **na sakkā vattuṃ** tathākathanasseva sukathanabhāvatoti āha “**tepiṭakaṃ -pa- sukathitaṃ hotī**”ti.

Catusatipaṭṭhānavannaṇā

289. Na kevalaṃ abhidhammapariyāyeneva kusalaṭṭho gahetabbo, atha kho bāhitikapariyāyenaṃpīti āha “**phalakusalassa cā**”ti. **Khematṭhenā**ti catūhipi yogehi anupaddavabhāvena. **Sammāsamāhitoti**

1. Dī-Ṭṭha 2. 186 piṭṭhe.

samathavasena ceva vipassanāvasena ca suṭṭhu samāhito. **Ekaggacittoti** vikkhepassa dūrasamussāritattā ekaggataṃ avikkhepaṃ pattacitto. **Attano kāyatoti** ajjhattaṃ kāye kāyānupassanāvasena sammā samāhitacitto samāno “samāhito yathābhūtaṃ pajānāti passatī”¹ti vacanato. Tattha ñāṇadassanaṃ nibbattento tato bahiddhā parassa kāyepi ñāṇadassanaṃ nibbatteti. Tenāha “**parassa kāyābhimukhaṃ ñāṇaṃ pesetī**”ti. **Sammā vipasīdatīti** sammā samādhānapaccayena abhippasādena ñāṇūpasañhitena ajjhattaṃ kāyaṃ okappeti. **Sabbatthāti** sabbatthānesu. Sati kathitāti yojanā. **Lokiyalokuttaramissakā kathitā** anupassanāñāṇadassanānaṃ tadubhayasādhāraṇabhāvato.

Sattasamādhiparikkhāraṇaṇā

290. **Etthāti** imissā kathāya. Jhānakkhassa vīriyacakkassa ariyamaggarathassa sīlaṃ vibhūsanabhāvena vuttanti āha “**alaṅkāro parikkhāro nāma**”ti. **Sattahi nagaraparikkhārehīti** nagaraṃ parivāretvā rakkhaṇakehi kataparikkhepo, parikhā, uddāpo, pākāro, esikā, palighā, pākārapakkhaṇḍilanti imehi sattahi nagaraparikkhārehi. Sambharīyati phalaṃ etenāti **sambhāro**, kāraṇaṃ. Bhesajjañhi byādhivūpasamanena jīvitassa kāraṇaṃ. **Parivāraparikkhārasenāti** parivārasaṅkhātaparikkhārasena. Parikkhāro hi sammādiṭṭhiyādayo maggadhammā sammāsamādhissa saha jātādipaccayabhāvena parikaraṇato abhisāṅkharāṇato. Upecca nissīyatīti **upanisā**, saha upanisāyāti **sa-upanisoti** āha “**sa-upanissayo**”ti, saha kārikāraṇabhūto dhammasamūho idha “upanissayo”ti adhippeto. Sammā pasatthā sundarā diṭṭhi etassāti sammādiṭṭhi, puggalo, tassa **sammādiṭṭhissa**. So pana yasmā patiṭṭhitasammādiṭṭhiko, tasmā vuttaṃ “**sammādiṭṭhiyaṃ ṭhitassā**”ti. **Sammāsaṅkappo pahotīti** maggasammādiṭṭhiyā dukkhādisu pari jānanādikkiccam sādhentiyā kamavitakkādike samugghātentō sammāsaṅkappo yathā attano kiccāsādhane pahoti, tathā pavattim panassa dassento āha “**sammāsaṅkappo pavattati**”ti. **Esa nayo sabbapadesūti** “sammāsaṅkappassa sammāvācā pahotī”ti-ādīsu sesapadesu yathāvuttamatthaṃ atidisati.

1. Saṃ 2. 12, 302; Saṃ 3. 363; Khu 10. 50; Khu 11. 38 piṭṭhesu.

Ettha ca yasmā nibbānadhigamāya paṭipannassa yogino bahūpakārā sammādiṭṭhi. Tathā hi sā “paññāpajjoto, paññāsatthan”ti ca vuttā. Tāya hi so avijjandhakāraṃ vidhamitvā kilesacore ghātento khemena nibbānaṃ pāpuṇāti, tasmā ariyamaggakathāyaṃ sammādiṭṭhi ādito gayhati, idha pana puggalādhīṭṭhānadesanāya “sammādiṭṭhissā”ti vuttaṃ. Yasmā pana sammādiṭṭhipuggalo nekkhammasaṅkappādivasena sammadeva saṅkappeti, na micchākāmasaṅkappādivasena, tasmā sammādiṭṭhissa sammāsaṅkappo pahoti. Yasmā ca sammāsaṅkappo sammāvācāya upakārako. Yathāha “pubbe kho gahapati vitakketvā vicāretvā pacchā vācaṃ bhindatī”ti¹, tasmā sammāsaṅkappassa sammāvācā pahoti. Yasmā pana “idañcidañca karissāma”ti hi paṭhamāṃ vācāya saṃvidahitvā yebhuyyena te te kammantā sammā payojjanti, tasmā vācā kāyakammaṃ upakārīkāti sammāvācassa sammākammanto pahoti. Yasmā pana catubbidhaṃ vacīduccaritaṃ, tividhañca kāyaduccaritaṃ pahāya ubhayaṃ sucaritaṃ purentasseva ājīvaṭṭhamakasīlaṃ pūراتi, na itarassa, tasmā sammāvācassa, sammākammantassa ca sammā-ājīvo pahoti.

Visuddhiṭṭhisamudāgatasammā-ājīvassa yoniso padhānassa sambhavato sammā-ājīvassa sammāvāyāmo pahoti. Yoniso padahantassa kāyādīsu catūsu vatthūsu sati sūpaṭṭhitā hotīti sammāvāyāmassa sammāsati pahoti. Yasmā evaṃ sūpaṭṭhitā sati samādhissa upakārānupakārānaṃ dhammānaṃ gatiyo samannesitvā pahoti ekattārammaṇe cittaṃ samādhātuṃ, tasmā sammāsatisaṃ sammāsamādhī pahotīti. Ayañca nayo pubbhāge nānākkhaṇikānaṃ sammādiṭṭhi-ādīnaṃ vasena vutto, maggakkhaṇe pana sammādiṭṭhi-ādīnaṃ tassa tassa saha-jātādivasena vutto “sammādiṭṭhissa sammāsaṅkappo pahoti”ti-ādīnaṃ padānaṃ attho yutto, ayameva ca idhādhippeto. Tenāha “**ayaṃ panattho**”ti-ādi.

Maggañāṇeti maggapariyāpannañāṇe **ṭhitassa** taṃsamaṅgino. Maggapaññā hi catunnaṃ saccānaṃ sammā-dassanaṭṭhena “maggasammādiṭṭhi”ti vuttā, sā eva nesaṃ yāthāvato jānanato paṭivijjhanato idha “maggañāṇan”tipi vuttā. **Maggavimuttī**ti maggena kilesānaṃ vimuccanaṃ samucchadappahānaṃ eva. Phalassammādiṭṭhi

1. Saṃ 2. 483 piṭṭhe.

eva “phalassammāñāṇaṃ”ti pariyāyena vuttaṃ, pariyāyavacanaṅca vuttanayānusāreṇa veditabbaṃ. **Phalavimutti** pana paṭippassaddhippahānaṃ daṭṭhabbaṃ.

Amatassa dvārāti ariyamaggamāha. So pana vinā ca ācariyamuttihinā anantaraṃ abāhiraṃ karitvā yāvadeva manussehi suppakāsitattā **vivaṭo**. **Dhammavinītā**ti ariyadhamme vinītā. So panettha kilesānaṃ samucchadavinayavasena veditabboti āha “**sammāniyyānena niyyātā**”ti.

Atthīti puthutthavisayaṃ nipātapadaṃ “atthi imasmiṃ kāye kesā”ti-ādīsu¹ viyāti āha “**anāgāmino ca atthī**”ti. Tenevāha “atthi cevetha sakadāgāmino”ti. Bahiddhā saṃyojanapaccayo nibbattihetubhūto puññabhāgo etissā atthīti puññabhāgā, atisayavisiṭṭho cettha atthi-attho veditabbo. **Ottappamā**noti uttasanto bhāyanto. **Na pana natthi**, atthi evāti dīpeti.

291. **Assā**ti vessavaṇassa. **Laddhi pana na atthi** paṭividdhasaccattā. “**Abhisamaye viseso natthī**”ti etena sabbepi sabbaññuguṇā sabbabuddhānaṃ sadisā evāti dasseti.

292. Kāraṇassa ekarūpattā **imāni pana padānī**ti na kevalaṃ “tayidaṃ brahmacariyaṃ”ti-ādīni padāni, atha kho “imamatthaṃ janavasabho yakkho”ti-ādīni adānipīti.

Janavasabhasuttavaṇṇanāya līnatthappakāsanā.

1. Dī 2. 233, Ma 1. 72-3; Ma 3. 132-3; Saṃ 2. 329; Am 2. 285; Am 3. 343; Abhi 2. 200; Khu 1. 2; Khu 10. 63 piṭṭhesu.

6. Mahāgovindasutta

293. **Pañcakuṇḍalikoti** vissatṭhapañcaveṇiko. **Catumaggaṭṭhānesūti** catunnaṃ maggānaṃ vinivijjhivā gataṭṭhānesu. Tattha hi katā sālādayo catūhi disāhi āgatamanussānaṃ upabhogakkhamā honti. “**Evarūpāni**”ti iminā rukkhamaṇḍalāni ceva yathāsatti annadānādāni ca puñṇāni saṅgaṇhāti. “Suvaṇṇakkhandhasadiso attabhāvo iṭṭho kanto manāpo ahoṣi”ti pāṭho. **Sakaṭasahassamattanti** vāhasahassamattaṃ, **vāho** pana vīsati khārī, **khārī** soḷasadoṇamattā, **doṇaṃ** soḷasa nāliyo veditabbā. **Kumbhaṃ** dasambaṇāni. “Sahassanāliyo”ti keci. **Rattasuvaṇṇakaṇṇikanti** rattasuvaṇṇamayaṃ vaṭaṃsakam.

Yasmā majjhimayāme eva devatā satthāraṃ upasaṅkamtum avasaraṃ labhanti, tasmā “**ekakoṭṭhāsaṃ atītāyā**”ti vuttaṃ. **Atikkantavaṇṇoti**¹ ativiya kamaṇiyarūpo. **Kevalakappanti** vā manaṃ ūnaṃ avasesaṃ, īsakaṃ asamattanti attho². Bhagavato hi samīpaṭṭhānaṃ muñcitva sabbo giṃṇhakūṭavahāro tena obhāsito. Tenāha “**candimā viyā**”ti-ādi.

Devasabhāvaṇṇanā

294. **Ratanamattakaṇṇikarukkhaniṣṣandenāti** ratanappamaṇarukkhamaṇḍalāni puñṇāniṣṣandena, tassa vā puñṇāniṣṣandaphalabhāvena. **Nibbattasabhāyanti** samuṭṭhita-upaṭṭhānasālāyānaṃ. **Maṇimayāti** padumaṇḍalāniṣṣandena. **Āṇiyoti** thambhatulāsaṅghāṭakādīsuvālarūpādisaṅghāṭanaka āṇiyoti.

Gandhabbarājāti gandhabbakāyikānaṃ devatānaṃ rājā. Ye Tāvatiṃsānaṃ āsannaṃvāsino cātumahārājikā devā, te purato karonto “**dvīsu devalokesu devatā purato katvā nisinna**”ti vutto. Sesesupi tīsu ṭhānesu eseva nayo.

Nāgarājāti nāgānaṃ adhipati, na pana sayānaṃ nāgajātiko.

Āsati nisīdati etthāti **āsaṇaṃ**, nisajjāṭṭhānanti āha “**nisīditum okāso**”ti. “**Etthā**”ti padaṃ nipātamattaṃ, etthāti vā etasmim pāṭhe.

1. Abhikkantavaṇṇo (Aṭṭhakathāyaṇaṃ)

2. Asamanti attho kappasaddo. Asamatthanti attho kappasaddo (Ka)

Atthuddhāranayena vattabbaṃ **pubbe vuttaṃ catubbidhameva**. Tāvatiṃsā, ekacce ca cātumahārājikā yathāladdhāyā sampattiyā thāvarabhāvāya, āyatim̄ sodhanāya ca pañca sīlāni rakkhanti, te tassa visodhanatthaṃ pavāraṇāsaṅgahaṃ karonti. Tena vuttaṃ “**mahāpavāraṇāyā**”ti-ādi.

Vassasahassanti manussagaṇanāya vassasahassaṃ.

Pannapalāsoti patitapatto. **Khārakajātoti** jātakhuddakamakuḷo. Ye hi nīlapattakā ativiya khuddakā makuḷā, te “khārakā”ti vuccanti. **Jālakajātoti** tehiyeva khuddakamakuḷehi jātajālako sabbaso jālo viya jāto. Keci pana “**jālakajātoti** ekajālo viya jāto”ti atthaṃ vadanti. Pārichattako kira khārakaggahaṇakāle sabbatthakameva pallaviko hoti, te cassa pallavā pabhassarapavāḷavaṇṇasamujjalā honti, tena so sabbaso samujjalanto tiṭṭhati. **Kuṭumalakajātoti** sañjātamahāmakuḷo. **Korakajātoti** sañjātasūcibhedo sampati vitasamānavattho. **Sabbapāliphulloti** sabbaso phullitavikasito.

Kantanakavātoti devānaṃ puññakammappaccayā pupphānaṃ chindanakavāto. **Kantatīti** chindati. **Sampañcchanakavātoti** chinnānaṃ chinnānaṃ pupphānaṃ sampañcigaṇhanakavāto. **Naccantoti** nānāvidhabhattim̄ sannivesavasena naccanaṃ karonto. **Aññītaradevatānanti** nāmagottavasena appaññātadevatānaṃ.

Reṇuvaṭṭīti reṇusaṅghāto. **Kaṇṇikaṃ āhaccāti** sudhammāya kūṭaṃ āhantvā.

Aṭṭha divaseti pañcamiyā saddhim̄ pakkhe cattāro divase sandhāya vuttaṃ. Yathāvuttesu aṭṭhasu divasesu dhammassavanaṃ nibaddhaṃ tadā pavattatīti tato aññadā kāritaṃ sandhāyāha “**akāladhammassavanaṃ kāritan**”ti. Cetiye chattassa heṭṭhā kātabbavedikā **chattavedikā**. Cetiyaṃ parikkhipitvā padakkhiṇakaraṇaṭṭhānaṃ antokatvā kātabbavedikā **puṭavedikā**. Cetiyaṃ kucchim̄ parikkhipitvā taṃsambandhameva katvā kātabbavedikā **kucchivedikā**. Siharūpapādakaṃ āsanaṃ **sīhāsanaṃ**. Ubhosu passesu sīharūpayuttaṃ sopānaṃ **sīhasopānaṃ**.

Attamanā honti aniyāmanakabhāvato. Tenevāha “**mahāpuññe purakkhatvā**”ti-ādi. **Pavāraṇāsaṅgahatthāya sannipatitāti veditabbā** “tadahuposathe pannarase pavāraṇāya puṇṇāya puṇṇamāya rattiyā”ti¹ vacanato.

295. **Navahi kārāṇehīti** “itipi so Bhagavā arahan”ti-ādinā² vutthehi arahattādīhi navahi Buddhānubhāvādīpanehi karaṇehi. **Dhammassa cāti** ettha ca-saddo avuttasamuccayatthoti tena sampiṇḍitamattham dassento “**ujjuppaṭipannatādibhedam saṅghassa ca suppaṭipattin**”ti āha.

Aṭṭhayathābhuccavaṇṇanā

296. Yathā anantameva ānañcam, bhisakkameva bhesajjam, evam yathābhūtā eva **yathābhuccāti** pāḷiyam vuttanti āha “**yathābhucceti yathābhūte**”ti. Vaṇṇetabbato kittetabbato **vaṇṇā**, guṇā. **Katham paṭipannoti** hetu-avatthāyam, phala-avatthāyam, sattānam upakārā vatthāyanti tīsupi avatthāsu lokanāthassa bahujanahitāya paṭipattiyā kathetukamyatapucchā. Tathā hi nam ādito paṭṭhāya yāva pariyosānā saṅkhepeveva dassento “**dīpaṅkarapādamūle**”ti-ādimāha. Tatha **abhinīharamānoti** abhinīhāram karonto. Yam panettha mahābhinihāre, pāramīsu ca vattabham, tam **brahmajālaṭīkāyam**³ vuttamevāti tattha vuttanayeneva veditabham.

“**Khantivādītāpasakāle**”ti⁴ ādi hetu-avatthāyameva anaññasādhāraṇāya sudukkarāya bahujanahitāya paṭipattiyā vibhāvanam. Yathādhippetam hitasukham yāya kiriyāya vinā na ijjhati, sāpi tadatthā evāti dassetuṃ “**tusitapure yāvatāyukam tiṭṭhantopi**”ti-ādi vuttam.

Dhammacakkappavattanādi⁵ pana nibbattitā bahujanahitāya paṭipatti. **Āyusaṅkhārossajjanampi** “ettakam kālam tiṭṭhāmī”ti pavattiyā bahujanahitāya paṭipatti. Anupādisesāya nibbānadhātuyā parinibbānavasena bahujanahitāya paṭipatti. Tenāha “**yāvassā**”ti-ādi. **Sesapadānīti** “bahujanasukhāyā”ti-ādīni padāni. **Pacchimanti** “atthāya hitāya

1. Dī 2. 178 piṭṭhe.

4. Khu 5. 99 piṭṭhe.

2. Dī 1. 46, 82 piṭṭhesu.

5. Saṃ 3. 368; Vi 3. 14; Khu 9. 329 piṭṭhesu.

3. Dī-Ṭī 1. 67 piṭṭhe.

sukhāyā”ti padattayaṃ. **Purimassā**ti tato purimassa padattayassa. **Atthoti** atthaniddeso.

Yadipi atītenaṅgena samannāgatā satthāro ahesuṃ, tepi pana buddhā evāti atthato amhākaṃ satthā anaññoti āha “**atītepi buddhato aññaṃ na samanupassāmā**”ti. Yathā ca atīte, evaṃ anāgate cāti ayamatto nayato labbhatīti katvā vuttam “**anāgatepi na samanupassāmā**”ti. Sakko pana devarājā tamattham atthāpannameva katvā “**na panetarahi**” iccevāha. **Kim sakko kathetīti vicāretvā**ti “neva atītaṃse samanupassamā”ti vadanto sakko kim kathetī”ti vicāraṇam samuṭṭhapetvā. Yasmā atīte buddhā ahesuṃ, anāgate bhavissantīti nāyamattho sakkena devarājena pariññāto, te pana buddhasāmaññaena amhākaṃ bhagavatā saddhiṃ gahetvā etarahi aññaṃsa sabbena sabbam abhāvato tathā vuttanti dassetuṃ “**etarahi**”ti-ādi vuttam. **Svākkhātādīni**ti svākkhātapadādīni. **Kusalādīni**ti “idam kusalan”ti-ādīni padāni.

Gaṅgāyamunānam asamāgamaṭṭhāne udakaṃ bhinnavaṇṇam hontampi samāgamaṭṭhāne abhinnavaṇṇamevāti āha “**vaṇṇenapi saṃsandati sametī**”ti. Tattha kira gaṅgodakasadisameva yamunodakaṃ. Yathā nibbānam kenaci kilesena anupakkiliṭṭhatāya parisuddham, evaṃ nibbānagāminipaṭipadāpi kenaci kilesena anupakkiliṭṭhatāya parisuddhāva icchitabbā. Tenāha “**na hī**”ti-ādi. Yena parisuddhatthena nibbānassa, nibbānagāminiyā paṭipadāya ca ākāsupamatā, so kenaci anupalepo, anupakkilesa cāti āha “**ākāsampi alaggaṃ parisuddhan**”ti. Idāni tamattham nidassanena vibhūtam katvā dassetuṃ “**candimasūriyānan**”ti-ādi vuttam. **Saṃsandati** yujjati paṭipajjitabbatā paṭipajjanehi aññaṃamaññānucchavikatāya.

Paṭipadāya thitānanti paṭipadam maggapaṭipattim paṭipajjamānānam. **Vusitavatanti** brahmacariyavāsam vusitavantānam etesaṃ. **Laddhasahāyoti** etāsam paṭipadānam vasena laddhasahāyo. **Tattha tattha** sāvakehi satthu kātabbakkicce. **Idam pana** “adutiyo”ti-ādi suttantare āgatavacanam aññehi **asadisatṭhena vuttam**, na yathāvuttasahāyābhāvato. **Apanujjāti** apanīya vivajjetvā. “**Apanujjā**”ti ca antogadhāvadhāraṇam idam vacanam ekantikattā tassa apanodassāti vuttam “**apanujjevā**”ti.

Labbhatīti **lābho**, so pana ukkaṃsagativijānanena sātisayo, vipulo eva ca idhāhippetoti āha “**mahālābho uppanno**”ti.

Ussannapuññanissandasamuppannoti yathāvuttakālaṃ sambhatusvipula-
uḷāratarapuññābhisandato nibbatto. “Ime nibbattā, ito param mayhaṃ okāso
natthī”ti ussāhajāto viya uparūpari vaḍḍhamāno udapādi. Sabbadisāsu hi
yamakamahāmegho uṭṭhahitvā mahāmeghaṃ viya sabbapāramiyo “ekasmim
attabhāve vipākam dassāmā”ti sampiṇḍitā viya Bhagavato idaṃ
lābhasakārasilokam nibbattayimsu, tato
annapānavatthayānamālāgandhavilepanādihattā Khattiyabrāhmaṇādayo
upagantvā “kahaṃ Buddho, kahaṃ Bhagavā, kahaṃ Devadevo, kahaṃ
Narāsabho, kahaṃ Purisasīho”ti Bhagavantam pariyesanti, sakaṭasatehipi
paccaye āharitvā okāsam alabhamānā samantā gāvutappamāṇampi
sakaṭadhurena sakaṭadhuram āhacca tiṭṭhanti ceva anubandhanti ca
Andhakavindabrāhmaṇādayo viya. Sabbam khandhake, tesu tesu ca suttesu
āgatanayena veditabbam. Tenāha “**lābhasakkāro mahogho viyā**”ti-ādi.

Paṭipāṭibhattanti bahūsu “dānam dassāmā”ti āhaṭapaṭipāṭikāya uṭṭhitesu
anupaṭipāṭiyā dātābabbhattam.

Matthakam patto anaññasādhāraṇattā tassa dānassa. **Upāyam ācikkhi**
nāgarānam asakkuṇeyyarūpena dānam dāpetum. Sālakalyāṇirukkhā
rājapariggahā aññehi āsādhāraṇā, tasmā tesam padarehi maṇḍapo kārito,
hattino ca rājabhaṇḍabhūtā nāgarehi na sakkā laddhanti tehi chattam
dhārāpitaṃ, tathā khattiyadhītāhi veyyāvaccam kāritam. “**Pañca**
āsanatāni”ti idaṃ sālakalyāṇimaṇḍape paññatte sandhāya vuttam, tato
bahi pana bahūni paññattāni ahesum. **Catujjātiyagandham pisati**
Buddhappamukhassa samghassa pūjanatthañceva pattassa ubbaṭanatthañca.
Udakanti pattadhovana-udakam. **Anagghāni ahesum**
anaggharatanābhisaṅkhatattā.

Sattādhā muddhā phalissati anādarakāraṇādinā. **Kālam olokessāmīti**
kālam evam anupekkhissāmi, tassa uppajjanakam anattam pariharissāmīti
attho.

Kadariyāti thaddhamaccharino puññakammavimukhā. **Devalokaṃ na vajanti** puññassa akatattā, maccharibhāvena ca pāpassa pasutattā. **Bālā**ti duccintitacintanādinā bālalakkhaṇayuttā. **Nappasaṃsanti dānaṃ** pasamsitumpi na visahanti. **Dhīro**ti dhītisampanno uḷārapañño parehi kataṃ **dānaṃ anumodamānopi**, teneva dānaṇumodaneneva. **Sukhī paratthā**ti paraloke kāyikacetasikasukhasamaṅgī hoti.

Vararojo nāma tasmiṃ kāle eko khattiyo, tassa **vararojassa. Anavajja -pa- phaleyya** abhūtavādibhāvatoti adhippāyo. **Atirekapadasahassena** tiṃsādhikena aḍḍhateyyagāthāsatenā **vaṇṇameva kathesi** rūpappasannatāya ca.

Yāva maññe khattiyāti ettha **yāvā**ti avadhiparicchedavacanāṃ, **aññeti** nipātamattaṃ, yāva Khattiyā Khattiye avadhiṃ katvā sabbe devamanussāti adhippāyo. Tenāha “**khattiyā brāhmaṇā**”ti-ādi. **Madapamattoti** lābhasakkārasilokamadena pamatto ceva tadanvayena pamādena pamatto ca hutvā.

Tadanvayamevāti tadanugatameva. **Vācā -pa- sametī**ti vacīkammakāyakammāni aññamaññaṃ aviruddhāni, aññadatthu saṃsandanti. Ajā eva migāti ajāmigā, te **ajāmige**.

Tiṇṇavicikiccho sabbaso atikkantavicikicchakantāro. Nanu ca sabbepi sotāpannā tiṇṇavicikicchā, vigatakathāṃkathā ca? Saccametāṃ, idaṃ pana na tādisāṃ tiṇṇavicikicchataṃ sandhāya vuttaṃ, atha kho sabbasmiṃ ñeyyadhamme sabbākārāvabodhasaṅkhātasanniṭṭhānavasena sabbaso nirākataṃ sandhāyāti dassento “**yathā hī**”ti-ādimāha. **Ussannussannattā**ti paroparabhāvato, ayañca attho Bhagavato anekadhātunānādhātuñāṇabalenapi ijjhati. **Sabbattha vigatakathāṃkatho** sabbadassāvibhāvato. Sabbesaṃ paramatthadhammānaṃ saccābhisamayavasena paṭividdhattā vuttaṃ “**vohāravasena**”ti vā nāmagottādivasenāti attho.

Pariyositasāṅkappoti sabbaso niṭṭhitamanoratho. Nanu ca ariyamaggena pariyositasāṅkappatā nāma soḷasakiccasiddhiyā katakaraṇīyabhāvena, na sabbañeyyadhammāvabodhenāti codanaṃ sandhāyāha

“**pubbe ananussutesū**”ti-ādi. Sāvakanāṃ sāvakaṃpāramiññaṃ viya, hi Paccekabuddhānaṃ paccekabodhiññaṃ viya ca sammāsambuddhānaṃ sabbaññutaññaṃ catusaccābhisambodhapubbakamevāti. **Ananussutesū**ti na anussutesu. **Sāmanti** sayameva. Padadvayenāpi paratoghosena vināti dasseti. **Tatthāti** nimittatthe bhummaṃ, saccābhisambodhanimittanti attho. Saccābhisambodho ca aggamaggavasenāti daṭṭhabbaṃ. **Balesu ca vasībhāvanti** dasannaṃ balaññaṃ yathāruci pavatti. Jātattā jātāti sammāsambuddhe vadati.

297. Tattha tattha rājadhāni-ādike **nibaddhavāsaṃ vasanto**. Tīsu maṇḍalesu yathākālaṃ **cārikaṃ caranto**.

298. **Assāti** phalassa. Tanti kāraṇaṃ. Dvinnampi ekato uppattiyā **kāraṇaṃ natthi**, pageva tiṇṇaṃ, catunnaṃ vāti. “**Ettha cā**”ti-ādi “ekissā lokadhātuyā”ti vuttalokadhātuyā pamāṇaparicchedadassanattamaṃ āradhmaṃ.

Yāvatāti yattakena ṭhānena. **Paritarantīti** sineruṃ parikkhipantā parivattanti. **Disāti** disāsu, bhummatthe etaṃ paccattavacanaṃ. **Bhanti** dibbanti. **Virocanaṃ**ti obhāsantā, **virocanaṃ** vā sobhamānā **candimasūriyā bhanti**, tato eva **disā** ca **bhanti**. **Tāva sahasadhāti** tattako sahasaloko.

Ettakanti imaṃ cakkavāḷaṃ majjhe katvā imināva saddhiṃ cakkavāḷaṃ dasasahassaṃ. Yaṃ panettha vattabbaṃ, taṃ **mahāpadānavañṇanāyaṃ** vuttameva. **Na paññāyātīti** tīsu piṭakesu anāgatattā.

Sanāṅkumārakathāvāṇṇanā

300. **Vañṇenāti** rūpasampattiyā. Suvīñṇeyyattā taṃ anāmasitvā yasasaddasseva atthamāha. **Alaṅkāraparivārenāti** alaṅkārena ca parivārena ca. **Puññasiriyāti** puññiddhiyā.

301. **Sampasādaneti** sampasādanane. Saṃpubbo khā-saddo jānanattho “saṅkhāyetaṃ paṭisevatī”ti-ādīsu¹ viyāti āha “**jānitvā modāmā**”ti.

1. Ma 2. 127 piṭṭhe.

Govindabrāhmaṇavatthuvaṇṇanā

304. **Yāva dīgharattanti** yāva parimāṇato, aparimitakālaparidīpanametanti āha “**ettakanti -pa- aticirarattan**”ti. **Mahāpañño**va so **Bhagavā**ti tena brahmunā anumati-pucchāvasena devānaṃ vuttanti dassenti “**mahāpañño**va so **bhagavā**. **Noti katham tumhe maññathā**”ti āha. Sayamevetam pañham byākātukāmo “bhūtapubbam bho”ti-ādimāhāti sambandho. Evaṃ pana byākarontena atthato ayampi attho vutto nāma hotīti dassento “**anacchariyametan**”ti-ādimāha. **Tiṇṇam mārānanti** kilesābhisaṅkhāradevapputtamārānaṃ. “Anacchariyametan”ti vuttamevattham nigamanavasena “**kimettha accharian**”ti punapi vuttam.

Raṅṅo diṭṭhadhammikasamparāyika-atthānaṃ puro dhānato pure pure samvidhānato **purohitoti** āha “**sabbakiccāni anusāsanapurohito**”ti. **Govindiyābhisekenāti** govindassa ṭhāne ṭhapanābhisekena. Tam kira tassa brāhmaṇassa kulaparamparāgataṃ ṭhānantaram. **Jotitattāti** āvudhānaṃ jotitattā. **Pālanasamatthatāyāti** raṅṅo, aparimitassa ca sattakāyassa anathato paripālanasamatthatāya.

Sammā vossajjitvāti suṭṭhu tassevāgāravabhāvena vissajjitvā niyyātetvā. Tam tam attham kiccaṃ passatīti **atthadaso**.

305. Bhavanaṃ vaḍḍhanaṃ **bhavo**, bhavati etenāti vā **bhavo**, vaḍḍhikāraṇaṃ, sandhivasena **ma-kārāgamo**, **o-kārassa** ca **a-kārādesaṃ** katvā “**bhavamattū**”ti vuttam. **Bhavantaṃ jotipālanti** pana sāmi-atthe upayogavacananti āha “**bhoto**”ti. **Mā paccabyākāsīti** mā paṭikkhipīti attho. So pana paṭikkhepo paṭivacanaṃ hotīti āha “**mā paṭibyākāsī**”ti. **Abhisambhosīti** kammantānaṃ samvidhāne samattho hotīti āha “**samvidahitvā**”ti. Bhavābhavaṃ paññañca vindi paṭilabhīti **govindo**, mahanto govindo **Mahāgovindo**. “**Go**”ti hi paññāyetaṃ adhivacanaṃ gacchati atthe bujjhatīti.

Rajjasamvibhajanavaṇṇanā

306. **Ekapitikā** vemātukā **kaniṭṭhabhātaro**. **Ayam abhisittoti** ayam Reṇurājakumāro pitu-accayena rajje abhisitto. **Rājakārakāti** rajaputtam rajje patiṭṭhāpetāro.

307. Madentīti **madanīyāti** kattusādhanatam dassento “**madakarā**”ti āha. **Madakaraṇam** pana pamādassa visesakāraṇanti vuttam “**pamādakarā**”ti.

308. Reṇussa rajjasamīpe dasagāvutamattavitthātāni hutvā aparabhāge tiyojanasatam vitthattatā **sabbāni cha rajjāni sakaṭamukhāni paṭṭhapesi**. **Vitānasadisam** caturassabhāvato.

310. **Sahāti** gāthāya padaparipūraṇattham vuttam. Tassa attham dassento “**teneva saha**”ti āha. **Sahāti** vā avinābhāvatthe nipāto, so saha āsum satta bhāradhāti yojetabbo, tena te desantare vasantā vicittena sahabhāvino avinābhāvinoti dīpeti. Rajjabhāram dhārenti attani āropenti vahantīti **bhāradhā**.

Paṭhamabhāṇavāravaṇṇanā niṭṭhitā.

Kittisadda-abbhuggamanavaṇṇanā

311. **Anupurohite ṭhapesīti** anupurohite katvā ṭhapesi, anupurohite vā ṭhāne ṭhapesi. Tisavanam karonte sandhāya “**divasassa tikkhattun**”ti vuttam. Dvīsu sandhīsu savanam karonte sandhāya “**sāyam, pāto vā**”ti vuttam. **Tato paṭṭhāyāti** vatacariyam matthakam pāpetvā nhātakālato pabhuti.

312. **Abhi-uggacchīti** uṭṭhahi udapādi. **Acintetvāti** “katham kho aham brahmunā saddhim manteyyan”ti acintetvā evam cittampi anuppādetvā. Tena samāgamanasseva abhāvato **amantetvā**. **Tam disvāti** tam karuṇābrahmavīhārabhāvanam brahmadassanūpāyam disvā nāṇacakkhunā.

313. **Evanti** evaṃ rañño ārocetvā paṭisallānaṃ upagate. **Sabbatthāti** sabbesu channaṃ Khattiyānaṃ, sattannaṃ brāhmaṇamahāsālānaṃ, sattannaṃ nāṭakasatānaṃ, cattārīsāya ca bhariyānaṃ apucchanaṃvāresu.

316. **Sādisiyoti** jātiyā sādisiyoti āha “**samavaṇṇā samajātikā**”ti.

317. **Santhāgāranti** jhānāmanasikārena bahi viṣaṭavitakkavūpasamanena cittassa santhambhanaṃ agāraṃ, jhānasālanti attho. **Gahitāvāti** bhāvanānuyogena mahāsattena attano cittasantāne uppādanavasena gahitā eva. **Natthi** jhānēva vikkhambhitattā. Visesato hissa karuṇāya bhāvitattā **anabhirati-ukkaṇṭhanā** natthi, mettāya bhāvitattā **bhayaparitassanā natthi**. **Ukkaṇṭhanāti** pana brahmadassane ussukkaṃ, **paritassanāti** tadabhipatthanāti āha “**brahmuno panā**”ti-ādi.

Brahmunāsākacchāvaṇṇanā

318. **Cittutrāsoti** cittassa utrāsanamattaṃ. **Kathanti** sattanikāyanivāsaṭṭhānanāmagottādīnaṃ vasena kena pakārena. Tenāha “**kin**”ti-ādi.

Soti ye te panakanasanantabandhasatanasanaṅkumārakālanāmakā loka pākaṭā paññātā brahmāno, tesu **sanaṅkumāro nāmāhanti dasseti**.

Agghanti garuṭṭhāniyānaṃ dātabbaṃ āhāraṃ. **Madhusākanti** madhurāhāraṃ yaṃ kiñci atithino dātabbaṃ āhāraṃ upacāravasena evaṃ vadati. Tenāha “**madhusākam panā**”ti-ādi. **Pucchāmāti** nimantanavasena pucchāma.

319. Mahāsatto cattāro brahmavihāre bhāvetvā ṭhitopi tesu “brahmasahabyatāya maggo”ti anibbematikatāya “**kaṅkhī**”ti avoca. Keci pana “tapokammena parikkhīṇasarīratāya, brahmasamāgamena bhayādisamuppattiyā ca paṭiladdhamattehi brahmavihārehi parihīno ahosi, tasmā avikkhambhitavicikicchatāya ‘kaṅkhī’ti avocā”ti vadanti. Parassa vediyā viditā **paravediyā**, te pana tassa pākaṭā vibhūtāti āha

“**parassa pākaṭesu paravediyesū**”ti. Tattha kāraṇamāha “**parena sayam abhisankhatattā**”ti. Mamāti kammaṃ **mamaṃkāro**, mamattanti āha “**idam mama -pa- taṇhān**”ti. “Maman”ti karoti etenāti hi **mamaṃkāro**, tathāpavattā taṇhā. **Manujesūti** niddhāraṇe bhummaṃ, na visayeti āha “**manujesu yo kocī**”ti. “**Ekodibhūto**”ti padassa bhāvatthaṃ tāva dassento “**ekibhūto**”ti vatvā puna taṃ vivaranto “**eko tiṭṭhanto eko nisīdanto**”ti āha. **Tādisoti** eko hutvā pavattanako. **Bhūtoti** jāto. Jhāne adhimutti nāma tasmim nibbattite, anibbattite kuto adhimuttīti āha “**jhānaṃ nibbattetvāti attho**”ti. Vissagandho nāma kodhādīkilesaparibhāvanāti tesam vikkhambhanaena **vissagandhavirahito**. Etesu **dhammesūti** pabbajjānaṃ vivekavāsakarūṇā brahmavihārādīdhammesu.

320. **Avidvāti** na viditavā. **Āvaritāti** kusalānaṃ uttarimanussadhammānaṃ uppattinivāraṇena āvaritā. **Pūtikāti** byāpannacittatādīnā pūtibhūtā. Kilesavasena duggandhaṃ vissagandhaṃ **vāyati**. Nirayādi-apāyesu nibbattanasīlatāya **āpāyikāti** āha “**āpāyūpagā**”ti. Corādīhi upaddutassa pavisitukāmassa pākārakavāṭaparikhādīhi viya nagaraṃ kodhādīhi **nivuto pihito brahmaloko assāti nivuta brahmaloko**. **Pucchati** “kenāvāṭā”ti vadanto.

Musāvādova **mosavajjaṃ** yathā bhisakkameva bhesajjaṃ. **Kujjhanam** dussanaṃ. Diṭṭhādīsu adiṭṭhādivāditāvasena paresaṃ visaṃvādanaṃ **paravisaṃvādanaṃ**. Sadisaṃ patirūpaṃ dassetvā **palobhanaṃ sadisaṃ dassetvā vañcanaṃ**. Mittānaṃ vihiṃsanaṃ mettibhedo **mittadubbhanaṃ**. Daḷhamaccharitā **thaddhamacchariyaṃ**. Attani vijjamaṇaṃ nihīnataṃ, sadisataṃ vā **atikkamitvā maññaṃ**. Paresaṃ sampattiyā ashanaṃ **khīyanaṃ**. Attasampattiyā nigūhanavasena, parehi sādharmaṇabhāvāsahanavasena ca vividhā icchā ruci etassāti **vivicchā**. Kadariyatāya mudukaṃ **macchariyaṃ**. **Yattha katthacīti** sakasantake, parasantake, hīnādīke cāti yattha katthaci ārammaṇe. **Lubbhanaṃ** ārammaṇassa gahaṇaṃ abhigijjhanaṃ. **Majjanaṃ** seyyādivasena madanaṃ sampaggaho. **Muyhanaṃ** ārammaṇassa anavabodho. **Etesūti** etesu yathāvuttesu kodhādīsu sattasantānassa kilissanato vibādhanato, upatāpanato ca kilesasaññitesu pāpadhammesu. **Yuttā** payuttā sampayuttā avirahitā.

Ettha cāyaṃ brahmā mahāsattena āmagandhe supuṭṭho attano yathā upaṭṭhite pāpadhamme cuddasahi padehi vibhajitvā kathesi, te pana tādisaṃ pavattivisesaṃ upādāya vuttāpi keci puna vuttā, āmagandhasutte¹ pana vuttāpi keci idha sabbaso na vuttā, evaṃ santepi lakkhaṇahāranayena, tadekaṭṭhatāya vā tesampettha saṅgaho daṭṭhabbo. Tenāha “**idaṃ pana suttan**”ti-ādi. **Tattha āmagandhasuttena dīpetvāti** idha sarūpato avutte āmagandhepi vuttehi ekalakkhaṇatādinā āmagandhasuttena pakāsetvā **kathetabbaṃ** tattha nesaṃ sarūpato kathitattā. **Āmagandhasuttampi¹ iminā dīpetabbaṃ** idha vuttānampi kesañci āmagandhānaṃ tattha avuttabhāvato. Yasmā āmagandhasutte¹ vuttāpi āmagandhā atthato idha saṅgahaṃ samosaraṇaṃ gacchanti, tasmā idha vutte parihaṇavasena dassentena yasmā cetta keci abhidhammanayena akilesasabhāvāpi sattasantānassa vibhādhanatṭhena “kilesā”ti vattabbaṃ arahanti, tasmā “cuddasasu kilesesū”ti vuttaṃ.

Nimmādaṃ milāpanaṃ khepananti āha “**nimmādetabbā pahātabbā**”ti. **Buddhatantī**ti buddhabhāvīnaṃ paveṇībuddhabhāvinopi “Buddhā”ti vuccanti yathā “agamā Rājagahaṃ Buddho”ti². **Mahāpurisassa daḷhikammaṃ katvāti** mahāpurisassa “pabbajissāmahan”ti pavattacittuppādassa daḷhikammaṃ katvā.

Reṇurāja-āmantanāvaṇṇanā

321. **Mama manaṃ haritvāti** mama cittaṃ apanetvā tassa vasena avattitvā.

Ekībhāvaṃ upagantvā vutthassāti kāyavivekaparibrūhanena ekībhāvaṃ upagantvā tapokammavasena vutthassa. **Kusapattehi paritthatoti** barihisehi vediyā samantato santharito. **Akācoti** vaṇo vaṇasadisakhaṇḍiccavirahito. Tenāha “**akakkaso**”ti.

Chakhattiya-āmantanāvaṇṇanā

322. **Sikkheyyāmāti** sikkhāpeyyāma, **sikkhāpana**ñcetta atthibhāvāpādananti āha “**upalāpeyyāmā**”ti.

1. Khu 1. 315 piṭṭhe.

2. Khu 1. 340 piṭṭhe Suttanipāte.

323. Yassa vīriyārambhassa, khantibalassa ca abhāvena pabbajitānaṃ samaṇadhammo paripuṇṇo, parisuddho ca na hoti, tesu vīriyārambhakhanṭibalesu te te niyojetuṃ “**ārambhavho**”ti-ādi vuttaṃ.

Karuṇājhānamaggoti karuṇājhānasaṅkhāto maggo. **Ujumaggoti** brahmalokagamane ujubhūto maggo. **Anuttaroti** seṭṭho brahmavihārasabhāvato. Tenāha “**uttamamaggo nāmā**”ti. **Sabbhi rakkhito** sādhuhi yathā parihāni na hoti, evaṃ paṭipakkhadūrīkaraṇena rakkhito gopito. “Saddhammo sabbhi vakkhito”ti keci paṭhanti, tesam saparahi tasādhanena sādhuhi buddhādīhi kathito paveditoti attho.

Taṅkhaṇaviddhamśanadhammanti yasmim̐ khaṇe virodhidhammasamāyogo, tasmim̐yeva khaṇe vinassanasabhāvaṃ, yo vā so gamanassādānaṃ devaputtānaṃ heṭṭhupariyena paṭimukhaṃ dhāvantaṃ sirasi, pāde ca baddhakhuradhārāsamāgamanatopi sīghataratāya ati-ittaro pavattikkhaṇo, teneva vinassanasabhāvaṃ. **Tassa** jīvitassa. **Gatinti** niṭṭham. **Mantāyanti** manteyyanti vuttaṃ hotīti āha “**mantetabban**”ti. **Karaṇatthe vā bhumanti** “mantāyan”ti idaṃ bhumaṃ karaṇatthe daṭṭhabbaṃ yathā “nātāyan”ti. **Sabbapalibodheti** sabbepi kusalakiriyāya vibandhe uparodhe.

Brāhmaṇamahāsālādīnaṃ āmantanāvaṇṇanā

324. **Appesakkhāti** appānubhāvāti āha “**pabbajitakā lato paṭṭhāyā**”ti-ādi. **Cakkavattirājā** viya sambhāvito.

Mahāgovindapabbajjāvaṇṇanā

328. Samāpattīnaṃ ājānanaṃ nāma attapaccakkhatā, sacchikiriyāti āha “**na sakkhimsu nibbattetun**”ti.

329. **Imināti** “sarāmahan”ti iminā **padena**. “Sarāmahan”ti hi vadantena Bhagavato mahābrahmunā kathitaṃ “tatheva tan”ti bhagavatā paṭiññātameva jātanti. **Na vaṭṭe nibbindanattāya** catusaccakammaṭṭhānakathāya abhāvato. Asati pana vaṭṭe nibbidāya virāgānaṃ asambhavo evāti

āha “**na virāgāyā**”ti-ādi. **Ekantameva vaṭṭe nibbindanattāya**
anekākāravokāraṭṭe ādīnavavibhāvanato.

“**Nibbidāyā**”ti iminā padena **vipassanā** vuttā. Esa nayo sesesupi.
Vavatthānakathāti vipassanāmagganibbānānaṃ taṃtāmpadehi vavatthapetvā
kathā. Ayamettha nippariyāyakathāti āha “**pariyāyena panā**”ti-ādi.

330. **Paripūretunti** bhāvanāpāripūrivāsena paripuṇṇe kātum,
nibbattetunti attho. **Brahmacariyacīṇṇakulaputtānanti**
cīṇṇamaggabrahmacariyānaṃ kulaputtānanti ukkaṭṭhaniddesena
arahattanikūṭeṇa desanaṃ niṭṭhapesi.

Abhinandanānaṃ nāma sampañcchanānaṃ “abhinandanti āgatan”ti-ādīsu¹
viya, tañcetha atthato cittassa attamanatāti āha “**cittena sampañcchanto**
abhinanditvā”ti. “Sādhu sādhu”ti vācāya sampahāmsanā **anumodanā**ti āha
“**vācāya sampahāmsamāno anumoditvā**”ti.

Mahāgovindasuttavaṇṇanāya līnatthappakāsanā.

1. Khu 1. 45 piṭṭhe.

7. Mahāsamayasutta

Nidānavañṇanā

331. **Udānanti** raññā okkākena jātisambhedaparihāranimittam pavattitam udānam **paṭicca. Ekopi janapado ruḷisaddena “sakkā”ti vuccatīti** ettha yaṃ vattabbam, taṃ **Mahānidānavañṇanāyaṃ** vuttanayena veditabbam. **Aropiteti** kenaci aropite.

Āvaraṇenāti setunā. **Bandhāpetvāti** paṃsupalāsapāsānamattikākhaṇḍādīhi ālim thiram kārāpetvā.

“Jātim ghaṭṭetvā kalaham vaḍḍhayimsū”ti saṅkhepena vuttamattham pākaṭataram kātum **“koliyakammakarā vadantī”**ti-ādi vuttam.

Tiṇi jātakānīti phandanajātaka¹ pathavī-undriyajātaka² laṭukikajātakāni³. **Dve jātakānīti** rukkhadhamma⁴vaṭṭakajātakāni⁵.

Tenāti bhagavatā. **Kalahakāraṇabhāvoti** kalahakāraṇassa atthibhāvo.

Aṭṭhāneti akāraṇe. **Veram katvāti** virodham uppādetvā. “Kuṭṭhārihattho puriso”ti-ādinā **Phandanajātakam kathesi**. “Duddubhāyati bhaddante”ti-ādinā **Pathavī-undriyajātakam kathesi**. “Vandāmi taṃ kuñjarā”ti-ādinā **laṭukikajātakam kathesi**.

“Sādhū sambahulā ñātī, api rukkhā araññajā.

Vāto vahati ekaṭṭham, brahantampi vanappatin”ti-ādinā—

Rukkhadhammajātakam kathesi.

“Sammodamānā gacchanti, jālamādāya pakkhino.

Yadā te vivadissanti, tadā ehinti me vasan”ti-ādinā—

Vaṭṭakajātakam kathesi.

1. Khu 5. 259 piṭṭhe.

2. Khu 5. 104 piṭṭhe.

3. Khu 5. 124 piṭṭhe.

4. Khu 5. 17 piṭṭhe.

5. Khu 5. 9 piṭṭhe.

“Attadaṇḍā bhayaṃ jātaṃ, janaṃ passatha medhagaṃ.
Saṃvegaṃ kittayissāmi, yathā saṃvijitaṃ mayā”ti-ādinā¹—

Attadaṇḍasuttaṃ kathesi.

Taṃtampalobhanakiriya kāyavācāhi parakkamantiyo “**ukkaṇṭhantū**”ti sāsanaṃ pesenti².

Kuṇāladaheti kuṇāladahaṭṭhāre **paṭiṭṭhāya. Pucchitapucchitaṃ kathesi.**
“Anukkamena kuṇālasakuṇarājassa pucchanappasaṅgena **kuṇālajātakaṃ**³
kathessāmi”ti. **Anabhiratiṃ vinodesi** itthinaṃ dosadassanamukhena
kāmaṇaṃ ādīnavokārasaṃkilesavibhāvanena.

Kosajjaṃ vidhamitvā purisathāmaparibrūhanena “**uttamapurisasadisehi
no bhavituṃ vaṭṭati**”ti uppannacittā.

Avissaṭṭhakammantā⁴ arativinodanato paṭṭhāya
avissaṭṭhasamaṇakammantā, aparicattakammaṭṭhānāti attho. **Nisīdituṃ
vaṭṭati**ti bhagavā cintesīti yojanā.

Paduminiyanti padumassare. **Vikasimsu** guṇagaṇavibodhena. “**Ayaṃ
imassa -pa- na kathesi**”ti iminā sabbepi te bhikkhū tāvadeva paṭipāṭiyā
āgatattā aññaṃaññaṃ lajjamānā attanā paṭividdhavisesaṃ Bhagavato
nārocesunti dasseti. “**Khīṇāsavānaṃ**”ti-ādinā tattha kāraṇamāha.

Osīdamatteti Bhagavato santikaṃ upagatamatte. **Ariyamaṇḍaleti**
ariyasamūhe. **Pācīnayugandharaparikkhepatoti** yugandharapabbatassa
pācīnaparikkhepato, na bāhirakehi uccamāna-udayapabbatato.
Rāmaṇeyyakadassanatthanti Buddhuppādapaṭimaṇḍitattā visesato
ramaṇīyassa lokassa ramaṇīyabhāvadassanattham. **Ullaṅghitvāti** uṭṭhahitvā.
Evarūpe khaṇe laye muhutteti yathāvutte candamaṇḍalassa uṭṭhitakkhaṇe
uṭṭhitavelāyaṃ uṭṭhitamuhutteti uparūpari kālassa
vaḍḍhitabhāvadassanattham vuttaṃ.

1. Khu 1. 424 piṭṭhe Suttanipāte.

2. Pesentīti vuttā (Ka)

3. Khu 6. 113 piṭṭhe.

4. Avissaṭṭhakammaṭṭhānāti (Aṭṭhakathāyaṃ)

Tathā tesam bhikkhūnam jāti-ādivasena Bhagavato anurūpaparivāritam dassento “**tatthā**”ti-ādimāha.

Samāpannadevatāti āsannaṭṭhāne jhānasamāpattisamāpannadevatā. **Calimsūti** uṭṭhahimsu. Kosamattam ṭhānam **saddantaram**. Jambudīpe kira ādito tesatṭhimattāni nagarasahassāni uppannāni, tathā dutiyam, tathā tatiyam, tam sandhāyāha “**tikkhattum tesatṭhiyā nagarasahassesū**”ti. Te pana sampiṇḍetvā satasahassato param asītisahassāni, navasahassāni ca honti. **Navanavutiya doṇamukhasatasahassesūti** navasata sahasādhikesu navutisatasahassesu doṇamukhesu. **Doṇamukhanti** ca mahānagarassa āyuppatiṭṭhānabhūtam pādanagaraṃ vuccati. **Channavutiya paṭṭanakoṭisatasahassesūti** chakoṭi-adhikanavutikoṭisatasahassapaṭṭanesu. Tambapaṇṇidīpādīsu **chapaṇṇāsāya ratanākāresu**. Evaṃ pana nagaradoṇimukhapāṭṭanaratanākārādivibhāgena kathanam taṃtamadhivatthāya vasantīnam devatānam bahubhāvadassanattam. Yadi dasasahassacakkavālesu devatā sannipatitā, atha kasmā pāliyam “dasahi ca lokadhātūhi”ti vuttanti āha “**dasasahassa -pa- adhippetā**”ti, tena sahasilokadhātu idha “ekā lokadhātū”ti vuttāti veditabban.

Lohapāsādeti-ādito kate lohapāsāde. **Brahmaloketi** heṭṭhime brahmaloke. Yadi tā devatā evaṃ nirantarā, pacchā āgatānam okāso eva na bhavyeyyāti codanam sandhāyāha “**yathā kho panā**”ti-ādi. Suddhāvāsakāyam upapannā **suddhāvāsakāyikā**, tāsam pana yasmā suddhāvāsabhūmi nivāsatṭhānam, tasmā vuttam “**suddhāvāsavāsīnan**”ti. **Āvāsāti** āvāsanaṭṭhānabhūtā, devatā pana orambhāgiyānam, itaresaṅca saṃyojanānam samucchindanena suddho āvāso etesanti **suddhāvāsā**.

332. **Puratthimacakkavālamukhavatṭiyam otari** aññattha okāsam alabhamāno. Evaṃ sesāpi. Buddhānam abhimukhamaggo **Buddhavīthi**. Yāva cakkavāḷā **otthariturū** ovariturū **na sakkā**. **Pahaṭabuddhavīthiyāvāti** Buddhānam santikam upasaṅkamantehi tehi devabrahmehi vaḷañjitavīthiyāva. Samiti saṅgati sannipāto **samayo**, mahanto samayo **mahāsamayoti** āha

“mahāsamūho”ti. Pavaddham vanaṃ pavananti āha “vanasaṅḍo”ti. Devaghaṭāti devasamūhā.

Samādahamsūti samādahitaṃ lokuttarasamādhinā suṭṭhu appitaṃ akamsu, yathāsamāhitaṃ pana samādhinā yojitaṃ nāma hotīti vuttaṃ “samādhinā yojesuṃ”ti. Sabbesaṃ gomuttavaṅkādināṃ dūrasamūha nitattā sabbe -pa- akariṃsu. Nayati asse etehīti nettāni, yottāni. Avīthipaṭipannānaṃ assānaṃ vīthipaṭipādanaṃ rasmiggahaṇena pahotīti “sabbayottāni gahetvā acodento”ti vatvā taṃ pana acodanaṃ avāraṇamevāti āha “acodento avārento”ti.

Yathā khīlaṃ bhittiyaṃ vā bhūmiyaṃ vā ākoṭitaṃ dunnīharaṇaṃ, yathā ca palighaṃ nagarappavesanivāraṇaṃ, yathā ca indakhīlaṃ gambhīranemi sunikhātaṃ dunnīharaṇaṃ, evaṃ rāgādayo sattasantānato dunnīharaṇā, nibbānanagarappavesanivāraṇā cāti te “khīlaṃ, palighaṃ, indakhīlaṃ”ti ca vuttā. Taṇhājōya abhāvena anejā paramasantuṭṭhabhāvena cātuddisattā appaṭihatacārikaṃ caranti.

Gatāseti gatā eva, na pana gamissanti pariniṭṭhitasaraṇagamanattāti. Lokuttarasaraṇagamaṇaṃ adhippetanti āha “nibbematikasaraṇagamaṇena gatā”ti. Te hi niyamaṇa apāyabhūmiṃ na gamissanti, devakāyaṇca paripūressanti. Ye pana lokiyena saraṇagamaṇena Buddhāṃ saraṇaṃ gatāse, na te gamissanti apāyabhūmiṃ, satī ca paccayantarasaṃavāye pahāya mānusaṃ dehaṃ, devakāyaṃ paripūressantīti ayamettha attho.

Devatāsannipātavaṇṇanā

333. Etesanti devatāsannipātānaṃ. Idānīti imasmiṃ kāle. Buddhānanti aññesaṃ Buddhānaṃ abhāvā. Cittakallatā cittaṃmaddavaṃ.

Kim pana bhagavatāva mahante devatāsamaṅgame tesāṃ nāmagottaṃ kathetuṃ sakkāti? Āma sakkāti dassetuṃ “buddhā nāma mahantā”ti-ādi vuttaṃ. Tattha diṭṭhanti rūpāyatanamāha, sutanti saddāyatanam, mutanti sampattaḅḅāhi-indriyavisayaṃ gandharasaphoṭṭhabbāyatanam, viññātanti vuttāvasesaṃ

sabbaṃ ñeyyaṃ, **pattanti** pariyesitvā, अपariyesitvā vā sampattaṃ, **pariyesitanti** pattaṃ, appattaṃ vā pariyaṭṭhaṃ. **Anuvaritarā manasā** kevalaṃ manasā ālocitaṃ. **Katthaci nīlādivasena vibhatarūpārammaṇeti** abhidhamme¹ “nīlaṃ pīṭakaṃ”ti-ādinā vibhatte yattha katthaci rūpārammaṇe kiñci rūpārammaṇaṃ vā na atthīti yojanā. **Bherisaddādivasenā**ti etthāpi eseva nayo. **Yanti** yaṃ ārammaṇaṃ. **Etesanti** Buddhānaṃ.

Idāni yathāvuttamatthaṃ pāḷiyā samatthetuṃ “**yathāhā**”ti-ādi vuttaṃ. Tada jānanakiriyāya अपariyosita bhāvadassanattaṃ “jānāmī”ti vatvā yasmā yaṃ kiñci neyyaṃ nāma, sabbaṃ taṃ Bhagavatā aññātaṃ nāma natthi, tasmā vuttaṃ “**tamaḥaṃ abbaññāsī**”ti.

Na oloketi payojanābhavato. **Viparītā** “na kammāvaraṇena samannāgatā”ti-ādinā nayena vuttā. “Yassa maṅgala samūhata”ti² ārabhitvā “rāgaṃ vinayetha mānusesu dibbesu kāmesu cā”ti-ādinā² ca rāganiggahakathābhāhullato **Sammāparibbājanīyasuttaṃ**² rāgacaritānaṃ sappāyaṃ, “piyamappiyabhūtā kalahavivādā paridevasokā sahamaccharā cā”ti-ādinā³ kalahādayo yato dosato samuṭṭhahanti, so ca doso yato piyabhāvato, so ca piyabhāvo yato chandato samuṭṭhahanti, iti phalato, kāraṇaparamparato ca dose ādinavavibhāvanabhāhullato **kalahavivādāsuttaṃ**³ dosacaritānaṃ sappāyaṃ,

“Appaṃ hi etaṃ na alaṃ samāya,

Duve vivādassa phalāni brūmi.

Etampi disvā na vivādayetha,

Khemābhipassaṃ avivādabhūmin”ti-ādinā⁴—

nayena sammohavidhamaṇato, paññāparibrūhanaṇato ca **mahābyūhasuttaṃ** mohacaritānaṃ sappāyaṃ,

1. Abhi 1. 162 piṭṭhe.

2. Khu 1. 332 piṭṭhe Suttanipāte.

3. Khu 1. 413; Khu 7. 198 piṭṭhe Suttanipāte.

4. Khu 1. 418; Khu 7. 237, 239 piṭṭhesu.

“Parassa ce dhammamanānujānaṃ,
 Bālo’ mako hoti nihīnapañño.
 Sabbeva bālā sunihīnapaññā,
 Sabbevime diṭṭhiparibbasānā”ti-ādinā¹—

nayena sandiṭṭhiparāmāsītāpanayanamukhena savisayesu diṭṭhiggahaṇesu
 visaṭṭavitakkavicchindanavasena pavattattā **cūlabyūhasuttaṃ**
 vitakkacaritānaṃ sappāyaṃ,

“Mūlaṃ papañcasaṅkhāya, (iti Bhagavā,
 Mantā asmīti sabbamuparundhe.
 Yā kāci taṇhā ajjhattaṃ,
 Tāsaṃ vinayā sadā sato sikkhe”ti²—

papañcasaṅkhāya mūlaṃ avijjādikilesajātaṃ **asmīti** pavattamānañcāti
sabbaṃ mantā paññāya uparundheyya. **Yā kāci ajjhattaṃ** rūpataṇhādibhedā
taṇhā uppajjeyya, **tāsaṃ vinayā** vūpasamāya **sadā sato** upaṭṭhitassati hutvā
 sikkheyyāti evamādi-upadesassa saddhova bhājanaṃ. Tassa hi so
 atthāvahoti **tuvatṭakasuttaṃ** saddhācaritānaṃ sappāyaṃ,

“Vītataṇho purā bheda, (iti Bhagavā,
 Pubbamantamanissito.
 Vemajjhe nupasaṅkheyyo,
 Tassa natthi purakkhatan”ti³—

yo sarīrabhedato pubbeva pahīnataṇho, tato eva atītaddhasaññitaṃ
 purimakoṭṭhāsaṃ taṇhānissayena anissito, vemajjhe paccuppannepi addhani
 “ratto”ti-ādinā upasaṅkhātabbo, tassa arahato taṇhādiṭṭhipurakkhārānaṃ
 abhāvā anāgate addhani kiñci purakkhataṃ natthīti-ādinā evaṃ
 gambhīrakathābhūllato **pūrābhedasuttaṃ**³ buddhicaritānaṃ sappāyanti
 katvā vuttaṃ “**atha nesaṃ sappāyaṃ -pa- vavatthapetvā**”ti. **Manasākāsīti**
 evaṃ cariyāya vasena manasi katvā puna taṃ sadisaṃ

1. Khu 1. 416; Khu 7. 222, 223 piṭṭhesu. 2. Khu 1. 421; Khu 7. 267, 271 piṭṭhesu.

3. Khu 1. 411; Khu 7. 162, 164 piṭṭhesu.

attano desanānikkhepayogyatāvasena manasi akāsi. **Attajjhāsayena nu kho jāneyyāti** parajjhāsayādiṃ anapekkhitvā mayhamyeva ajjhāsayena āraddhadesanaṃ jāneyya nu kho. **Parajjhāsayenāti** sannipatitāya parisāya kassaci ajjhāsayena. **Aṭṭhuppattikenāti** idha samuṭṭhita-aṭṭhuppattiyā. **Pucchāvasenāti** kassaci pucchantassa pucchāvasena. **Āraddhadesanaṃ jāneyyāti**. “**Sace Paccekabuddho bhaveyyā**”ti idaṃ imesaṃ suttānaṃ desanāya pucchā paccekabuddhānaṃ bhāriyā, avisayā cāti dassanatthaṃ vuttaṃ. Tenāha “**sopi na sakkuṇeyyā**”ti.

Ettha ca yasmā na anumati-pucchā, kathetukamyatā-pucchā vā yuttā, atha kho diṭṭhasaṃsandana-pucchāsadisī vā vimaticchedana-pucchāsadisī vā pucchā yuttā, tāva puggalajjhāsayavasena pavattitā nāma honti, na yathādhammasena tattha yadi bhagavā tathā sayameva pucchitvā sayameva vissajjeyya, suṇantīnaṃ devatānaṃ sammoho bhaveyya “kim nāmetam Bhagavā paṭhamam evamāha, punapi evamāhā”ti, andhakāram paṭiṭṭhā viya honti, tasmā vuttaṃ “**evampetā devatā na sakkhissanti paṭivijjhitaṃ**”ti. Yathādhammasena pana kathetukamyatāvasena pucchanaṃ sammoho hotīti. **Sūriyo uggatoti** āha devasaṃgho āsannatarabhāvena obhāsassa vipula-ujārabhāvato. **Ekissā lokadhātuyāti** sutte¹ āgatanayena sabbattheva pana apubbaṃ acarimaṃ dve buddhā na honteva. Tenevāha “anantāsu -pa- addasā”ti.

Gāthāyaṃ **pucchāmīti** Nimmitabuddho Bhagavantaṃ pucchitum okāsaṃ kārāpesi. **Muninti** Buddhamuniṃ. **Pahūtaṃ paññanti** mahāpaññaṃ. **Tiṇṇanti** caturōghatiṇṇaṃ. **Pāraṅgataṃ** nibbānappattaṃ, sabbassa vā ñeyyassa pāraṃ pariyaṅgaṃ gataṃ. **Parinibbutaṃ** sa-upādi sesanibbānavasena. **Ṭhitattanti** avaṭṭhitacittaṃ lokadhammehi akampaneyyatāya. **Nikkamma gharā panujja kāmeti** vatthukāme panūditvā gharāvāsā nikkamma. **Kathaṃ bhikkhu sammā so loke paribbajeyyāti** so bhikkhu kathaṃ sammā paribbajeyya gaccheyya vihareyya, anupalitto hutvā lokaṃ atikkameyyāti attho.

1. Dī 3. 95; Ma 3. 110; Aṃ 1. 29; Abhi 2. 349; Khu 10. 78; Khu 11. 231 piṭṭhesu.

334. **Silokamanukassāmī**ti ettha **siloko** nāma pādasamudayo, isihi vuccamānā gāthātipi vuccati. Pādova niyatavaṇṇānupubbikānaṃ padānaṃ samūho, taṃ **silokaṃ anukassāmi** pavattayissāmīti atthoti āha “**akkhara -pa-pavattayissāmī**”ti. **Yatthā**ti adhikaraṇe bhummaṃ. Āmeditalopenāyaṃ niddesoti āha “**yesu yesu ṭhānesū**”ti. **Bhummā**ti bhūmipaṭibaddhanivāsā. **Taṃ taṃ nissitā** taṃ taṃ ṭhānaṃ nissitavanto nissāya vasamānā, tehi saddhiṃ silokamanukassāmīti adhippāyo. “**Ye sitāgirigabbharan**”ti iminā tesam vivekavāsaṃ dasseti, “**pahitattā samāhitā**”ti iminā bhāvanābhiyogaṃ.

Bahujanā pañcasatasankhyattā. Paṭipakkhābhībhavanato, tejjussadatāya ca **sīhā viya** pavivittatāya **nilīnā**. **Ekattanti** ekībhāvaṃ. **Odātacittā hutvā suddhā**ti arahattamaggādhigamena pariyodātacittā hutvā suddhā na kevalaṃ sarīrasuddhiyāva. **Vippasannā**ti ariyamaggappasādena viśesato pasannā. Cittassa āvilabhāvakarānaṃ kilesānaṃ abhāvena **anāvilā**.

Bhikkhū jānitvāti bhinnakilese bhikkhū “ime dibbacakkhunā ete devakāye passantīti jānitvā. **Savanante jātattā**ti dhammassavanapariyosāne ariyajātiyā jātattā. **Idaṃ sabbanti** idaṃ “bhiyyo pañcasate”ti-ādikaṃ sabbaṃ.

Tadattāya vīriyaṃ karimsūti dibbacakkhuñāṇābhinihāravasena vīriyaṃ ussāhaṃ akaṃsu. Tenāha “na taṃ tehi”ti-ādi. **Sattarinti** ta-kārassa ra-kārādesaṃ katvā vuttaṃ, sattatinti attho. “Sahassan”ti pana anuvattati, sattatiyogena bahuvacanaṃ. Tenāha “**eke sahasaṃ. Eke sattatisahasāni**”ti.

Anantanti antarahitaṃ, taṃ pana ativiya mahantaṃ nāma hotīti āha “**vipulan**”ti.

Avekkhitvāti nāṇacakkhunā visuṃ visuṃ avekkhitvā, “vavatthitvānā”tipi paṭhanti, so evattho. Taṃ avekkhanaṃ nicchayakaraṇaṃ hotīti āha “**vavatthapetvā**”ti. Pubbe vuttagāthāsu tatiyagāthāya pacchimaddhaṃ, catutthagāthāya purimaddhaṃca sandhāyāha “**pubbe vuttagāthamevā**”ti.

Vijānanampi dassanamevāti āha “**passatha olokethā**”ti.
Vācāyatapavattitabhāvato “anupaṭipāṭiyāva kittayissāmī”ti vadati.

335. Satta sahasāni saṅkhāyāti **sattasahasā. Yakkhāyevāti** yakkhajātikā eva. **Ānubhāvasampannāti** mahesakkhā. **Iddhimantoti** vā mahānubhāvā. **Jutimantoti** mahappabhā. **Vaṇṇavantoti** atikkantavaṇṇā. **Yasassinoti** mahāparivārā ceva patthaṭakittisaddā ca. **Samiti-saddo** samīpatthoti adhippāyenāha “**bhikkhūnaṃ santikaṃ**”ti.

Hemavatapabbateti himavato samīpe ṭhitapabbate.

Ete sabbepīti ete sattasahasā kāpilavatthavā, chasahasā hemavatā, tisahasā sātāgirāti yathāvuttā **sabbepi soḷasahasā.**

Rājagahanagareti rājagahanagarassa samīpe. **Tanti kumbhīraṃ.**

336. Kāmaṃ pācīnadisaṃ pasāsati, tathāpi **catūsupidisāsu** saparivāradīpesu catūsupi mahādīpesu **gandhabbānaṃ jeṭṭhako**, kathaṃ? **Sabbe te tassa vase vattanti. Kumbhaṇḍānaṃ adhipatīti**-ādīsipi eseva nayo.

Tassāpi viruḷhassa. **Tādisāyevāti** dhataṭṭhassa puttasadisā eva puthutthato, nāmato, balato, iddhi-ādivisesato ca.

Sabbasaṅgāhikavasenaṃti dasasahasilokadhātuyā paccekāṃ cattāro cattāro mahārājānoti tesāṃ sabbesaṃ saṅgaṇhanavasena. Tenāha “**ayañcethā**”ti¹ādi.

Caturo disāti catūsu disāsu. **Caturo disā jalamānā** samujjalantā obhāsantā. Yadi evaṃ mahatīyā parisāya āgatānaṃ kathaṃ kāpilavatthave vane ṭhitāti āha “**te panā**”ti-ādi.

337. Tesāṃ mahārājānaṃ dāsāti yojanā. Māyāya yuttā, tasmā **māyāvino**. Vañcanaṃ etesu atthi, vañcane vāniyuttāti **vañcanikā**. **Kerāṭiyasāṭheyenāti** nihīnasāṭhena kammena. Māyā etesaṃ

1. Ayañhettha (Ka)

atthīti māyā, te ca paresaṃ vañcanatthaṃ yena māyākaraṇena “**māyā**”ti vuttā, taṃ dassento “**māyākārakā**”ti āha.

Ettakā dāsāti ettakā kuṇḍu-ādikā nighaṇḍupariyosānā aṭṭhamahārājānaṃ dāsā.

Devarājānoti devā hutvā hutvā taṃtaṃdevakāyassa rājāno. Citto ca seno ca cittaseno cāti tayo ete devaputtā pāḷiyāṃ ekasesanayena vuttāti āha “**citto cā**”ti-ādi.

Bhikkhusaṃgho samito sannipatito etthāti **bhikkhusaṃghasamiti**, imaṃ vanaṃ.

338. **Nāgasadahavāsikāti** nāgasadahanivāsino. Tattheke kira nāgarājā, cirakālaṃ vasato tassa parisā mahatī paramparāgatā atthi, taṃ sandhāyāha “**tacchakanāgaparisāyā**”ti.

Yamunavāsinoti yamunāyaṃ vasanakanāgā. **Nāgavohārenāti** hatthināgavohārena.

Vuttappakāreti kambalassatare ṭhapetvā itare vuttappakāranāgā. **Lobhābhibhūtati** āhāralobhena abhibhūtā. **Dibbānubhāvatāti**¹ dibbānubhāvato, dibbānubhāvahetu vā **dibbā**. “**Citrasupaṇṇā**”ti nāmaṃ vicitrasundarapattavantatāya.

Upavhayantāti upecca kathentā. Kākolūka-ahinakulādayo viya aññamaññaṃ jātisamudāgataverāpi samānā **mittā viya -pa- haṭṭhatuṭṭhacittā** aññamaññasminti adhippāyo. **Buddhaṃyeva te saraṇaṃ gatā** “Buddhānubhāveneva mayaṃ aññamaññasmiṃ mettīṃ paṭilabhimhā”ti.

339. **Bhātaroti** methunabhātaro. Tenāha “**sujāya asurakaññāya kāraṇā**”ti.

Tesūti asuresu. **Kālakañcāti** evaṃnāma. **Mahābhismāti** bhīṃsanakamahāsarīrā. **Abhabbāti** sammattaniyāmaṃ okkamituṃ na bhabbā acchandikattā tādisassa chandasseva abhāvato.

1. Dibbānubhāvatoti (Aṭṭhakathāyaṃ)

Balino mahā-asurassa abbatitattā tassa putte eva kittento Bhagavā “**satañca baliputtānan**”ti-ādimāha. So kira sukhumam attabhāvam māpetvā upagacchi.

340. **Kammaṃ katvāti**¹ parikammaṃ katvā. **Nibbattāti** upacārajjhānena nibbattā. Appanājhānena pana nibbattā brahmāno honti, te parato vakkhati “subrahmā”ti-ādinā², ayañca kāmāvacaradevatā vuccati. Tenevāha “**mettākaruṇākāyikāti mettājhāne ca karuṇājhāne ca parikammaṃ katvā nibbattadevā**”ti. **Mettājhāne karuṇājhāneti** mettājhānanimittam karuṇājhānanimittam, tadatthanti attho.

Te āpodevādayo yathāsakaṃ vaggavasena ʒhitattā **dasadhā ʒhitā**. Yāva karuṇākāyikā dasa **devakāyā**. **Nānattavaṇṇāti** nānāsabhāvavaṇṇavanto.

Veṇḍudevatāti veṇḍunāmadevatā, evaṃ **sahalidevatā**. Asamadevatā, yamakadevatāti “dve ayanio”ti vadanti, tappamukhā dve devanikāyāti. **Candassūpanisā devā** candassa upanissayato vattamānā tassa purato ca pacchato ca passato ca dhāvanakadevā. Tenāha “**candanissitakā devā**”ti. **Sūriyassūpanisā, nakkhattanissitāti** etthāpi eseva nayo. Kevalam vātavāyanahetavo devatā **vātavalāhakā**. Tathā kevalam abbhapaṭalasañcaraṇahetavo **abbhavalāhakā**. Uṇhappavattihetavo **uṇhavalāhakā**. Vassavalāhakā pana pajjunnasadisāti. Te idha na vuttā. Vasudevatā nāma eko devanikāyo, tesam pubbaṅgamattā **vāsavo**, sakkho.

Daseteti ete veṇḍudevatādayo vāsavapariyosānā dasa devakāyā.

Imānīti “jalamaggī”ti ca “sikhārivā”ti ca imāni **tesam nāmāni**. Keci pana ma-kāro padasandhikaro “jalā”ti ca “aggī”ti ca “sikhārivā”ti ca imāni tesam nāmānīti vadanti. **Eteti** tesu eva “ariṭṭhakā, rojā”ti ca vuttadevesu ekacce, **umāpupphanibhāsino** vaṇṇato umāpupphasadisāti evamattho gahetabbo, aññathā ekādasa devakāyā siyūm.

1. Parikammaṃ katvāti (Aṭṭhakathāyam)

2. Dī 2. 209 piṭṭhe.

Daseteti ete dasa sahabhūdevādayo vāsavanesipariyosānā dasa devakāyā. Teneva nikāyabhedavasena dasadhāva āgatā.

“**Samānā**”ti-ādi tesam devānam nikāyasamudāyagatam nāmam. Evam sesānampi.

Daseteti ete samānādikā mahāpāragapariyosānā dasa devakāyā. Teneva nikāyabhedena dasadhā āgatā.

Sukkādayo tayo devakāyā. **Pāmokkhadevāti** pamukhā padhānabhūtā devā.

Disāti disāsu. **Devoti** meggho. **Daseteti** etesukkādayo pajjunnapariyosānā dasa devakāyā, te devanikāyabhedena **dasadhā āgatā**.

Daseteti ete khemiyādayo paranimmitapariyosānā dasadevakāyā, te devanikāyabhedena **dasadhāva āgatā**. Tattha “khemiyā, kaṭṭhakādayo ca pañcāpi sadevakāyā tāvatimsakāyikā”ti vadanti. **Nāmanvayenāti** nāmānugamena “āpodevatā”ti-ādināmasabhāgena. Tenevāha “**nāmabhāgena nāmakoṭṭhāsenā**”ti. **Sabbā devatāti** dasasahassilokadhātūsu sabbāpi devatā. **Niddisati** taṃtaṃnāmasabhāgena ekajjhaṃ katvā.

Pavutthāti pavāsam gatā viya apētāti āha “**vigatā**”ti. **Pavutthā** vā pakārato vutthā vusitā, tena jāti vusitabbā assāti **pavutṭhajāti**. **Kāḷakabhāvā** saṃkilesadhammā, sabbaso tadabhāvato **kāḷakabhāvātītaṃ dasabalaṃ**. Lañcanābhāvena vā **asitātigo** kāḷakabhāvātītāya siriya cando, tādisam **candaṃ** viya **siriya virocamaṇaṃ**.

341. **Eko brahmāti** sagāthakavagge¹ āgato subrahmadevaputto. Brahmaloke nibbattitvā heṭṭhimesu patiṭṭhitā **ariyabrahmaṇo**,

1. Sam 1. 52 piṭṭhe.

na suddhāvāsabrahmāno. **Tissamahābrahmā** puthujjano, yo aparabhāge manussesu nibbattivā moggaliputtatissatthero jāto.

Sahassam brahmalokānanti brahmaloko etesanti brahmalokā, brahmāno, tesam brahmalokānam sahasam, sattalokapariyāyo cāyam lokasaddoti āha “**mahābrahmānam sahasam āgatan**”ti. Anantaragāthāyam “āgatā”ti vuttapadameva atthavasena vadati. **Yatthāti** yasmim brahmasahasse. **Aññe brahmeti** tadaññe brahmāno. **Abhibhavitvā tiṭṭhati** vaṇṇena, yasasā āyunā ca.

Issarāti teneva vasapavattanena sesabrahmānam adhipatino.

342. Kāḷakadhammasamannāgato **kāḷakassa** pāpimassa **mārassa bālabhāvam passatha**, yo attano avisaye niratthakam parakkamitum vāyamaṭi.

Vītarāgabhāvāvahassa dhammassavanassa antarāyakaraṇena avītarāgā rāgena baddhā eva nāma hontīti vuttam “**rāgena baddham hotū**”ti.

Bhayānakam saraṇca katvāti bheravam mahantam saddam samuṭṭhapetvā.

Idāni tam saddam upamāya dassento “**yathā**”ti-ādimāha. **Kañcīti** tasmim samāgame kañci devatam, mānusakam vā attano **vase vatteturam asakkonto asayamvase** sayaṇca na attano vase ṭhito. Tenāha “**asayamvasī**”ti-ādi.

343. “**Vītarāgehi**”ti desanāsīsametaṃ. Sabbāyapi hi tattha samāgataparīsāya mārāsena apakkantāva. **Nesam lomampi iñjayum** tesam lomamattampi na cālesum, kuto antarāyakaraṇam. Iti yattakā tattha visesam adhigacchimsu, tesam sabbesampi antarāyākaraṇavasena attho vibhāvetabbo, vītarāgaggahaṇena vā sarāgavītarāgavibhāvino ca tattha saṅgahitāti veditabbam. **Māro imam gātham abhāsi** acchariyabbhutacittajāto. Kathaṇhi nāma tāva ghorataram mahatim vibhim sakam mayi karontepi sabbepime nibbikārā samāhitā eva. Kasmā? Vijitāvino ime uttamapurisāti. Tenāha “**sabbe**”ti-ādi. Yādiso ariyānam

dhammanissito pamodo, na kadāci tādiso anariyānaṃ hotīti “sāsane bhūtehi ariyehi” iccetaṃ vuttaṃ. Vi-saddena vinā kevalopi suta-saddo vikhyātatthavacano hoti “sutadhammassā”ti-ādīsu¹ viyāti āha “**jane vissutā**”ti.

Dūreti dūre padese. Daharassa antarāyaṃ pariharantī “**na sakkā bhante sakalaṃ kāyaṃ dassetun**”ti avocāti.

Mahāsamayasuttavaṇṇanāya līnatthappakāsanā.

1. Vi 3. 4; Khu 1. 88 piṭṭhesu.

8. Sakkapañhasutta

Nidānavañṇanā

344. Ambasaṇḍānam adūrabhavattā ekopi so brāhmaṇagāmo “**ambasaṇḍā**”tveva bahuvacanavasena **vuccati**, yathā “varaṇā nagaran”ti. Vedi eva vediko, vediko eva vediyo ka-kārassa ya-kāraṃ katvā, tasmim **vediyake**. Tenāha “**maṇivedikāsadisenā**”ti-ādi, indanilādimaṇimayavedikāsadisenāti attho. **Pubbepīti** leṇakaraṇato pubbe, guhārūpena thitā, dvāre indasālarukkhavatī ca, tasmā “indasālaguhā”ti vuttā purimavohārena.

Ussukkaṃ vuccati abhiruci, taṃ pana buddhadassanakāmatāvasena, tathā ussāhanavasena ca pavattiyā “**dhammiko ussāho**”ti vuttaṃ. **Sakkena sadiso -pa- natthīti**. Yathāha “appamādena Maghavā, devānaṃ seṭṭhataṃ gato”ti¹. **Parittakenāti** aparāparaṃ bahum puññakammaṃ akatvā appamattakeneva **puññakammena**.

Sakkopi kāmaṃ mahāpuññakatabhīruttāno hoti, sātisayāya pana dibbasampattiyā viyogahetukena sokena diguṇitena maraṇabhayena saṃtājito jāto. Tenāha “**sakko pana maraṇabhayābhibhūto ahoṣī**”ti.

Dibbacakkhunā devatānaṃ dassanaṃ nāma paṭivijjhanasadisanti āha “**paṭivijjhī**”ti. **Pāṭiyekko vohāro**ti āveṇiko piyasamudāhāro. Marisaniyasampattikāti **mārisā**. Tesañhi² sampattiyō mahānubhāvatāya saṃhanti upaṭṭhahanti, aññe ayonisomanasikāratāya ceva appahukāya ca na saṃhantiyeva, sā pana nesaṃ marisaniyasampattikatā dukkhavirahitāyāti vuttaṃ “**niddukkhatīpi vuttaṃ hotī**”ti. **Ekakovāti** devaparisāya vinā āgatattā vuttaṃ, mātali-ādayo pana tādisā saṃhāyā tadāpi ahesumyeva. Tathā hi vakkhati “apicāyaṃ āyasmato cakkanemisaddena tamhā samādhimhā vuṭṭhito”ti³. **Okāsaṃ**

1. Khu 1. 17 piṭṭhe Dhammapade.

2. Te hi (?)

3. Di-Ṭṭha 2. 298 piṭṭhe.

nākāsi sakkassa nāṇaparipākam āgamento, aññesañca bahūnam devānam dhammābhisamayam upaparikkhamāno. **Soti** sakko.

Evanti vacanasampañcchane nipātoti āha “**evam hotū**”ti-ādi.

Bhaddamāvāti pana sakkam uddissa nesam āsi vādo.

345. **Vallabho -pa- dhammasuṇātīti** ayamatto govindasuttādīhi¹ dīpetabbo. **Iminā katokāseti** iminā pañcasikhena katokāse Bhagavati.

Anucariyanti anucaraṇabhāvam, tam panassa anucaraṇam nāma saddhimgamanamevāti āha “**sahacaraṇam ekato gamanam**”ti.

Sovaṇṇamayanti suvaṇṇamayam. **Pokkharanti** vīṇāya doṇimāha. **Daṇḍoti** vīṇadaṇḍo. **Veṭhakāti** tantīnam bandhanāya ceva uppīlanāya ca dhametabbā veṭhakā. **Pattakanti** pokkharām. **Samapaññāsamucchanā mucchetvāti** yathā samapaññāsamucchanā kamato tattha sammucchanam kātum sakkā, evam tam sajjetvāti. attho. “Samapaññāsamucchanā sammucchetvā”ti ca idam devaloke niyatam vīṇāvādanavidhim sandhāya vuttam. Manussaloke pana ekavīsati mucchanā. Tenevāha
Vīṇopamasuttavaṇṇanāyam—

“Satta sarā tayo gāmā, mucchanā ekavīsati.

Tānā cekūnapaññāsa, iccete saramaṇḍalā”ti².

Tattha chajjo, usabho, gandhāro, majjhimo, pañcama, dhevato, nisādoti ete **satta sarā**. Chajjagāmo, majjhimagāmo, sādharāṇagāmoti **tayo gāmā**, sarasamūhāti attho. Manussaloke vādanavidhinā ekekasēva ca sarassa vasena tayo tayo mucchanā katvā **ekavīsati mucchanā**. Ekekasēva ca sarassa satta satta tānabhedā, yato sarassa mandataravavattānam hoti, te **ekūnapaññāsa tānavisesāti**, tisso duve catasso, catasso tisso duve catassoti **dvāvīsati sutibhedā icchitā**, ayam pana ekekassa sarassa vasena satta satta mucchanā, antarasarassa ca ekāti samapaññāsāya mucchanānam yogyabhāvena vīṇam vajjesi. Tena vuttam

1. Dī 2. 178 piṭṭhe.

2. Am-Ṭṭha 3. 124 piṭṭhe; Sārattha-Ṭī 3. 291 piṭṭhepi.

“samapaññāsamucchanā saṁmucchetvā”ti. Sesadeve jānāpento sakkassa gamanakālanti yojanā.

346. **Atirivāti** ra-kāro padasandhikaro, atīva ativiyaṭi vuttam̄ hoti. **Pakati -pa- agamāsi** maraṇabhayasaṁtājjitattā taramānarūpo. Tenevāha “**nanu cā**”ti-ādi.

347. Buddhā nāma mahākāruṇikā, sadevakassa lokassa hita sukhatthāya eva uppannā, te katham̄ atthikehi durupasaṅgamāti āha “**aham̄ sarāgo**”ti-ādi. **Tadantaram̄ paṭisallīnā**ti yena antarena yena khaṇena upasaṅkameyya, tadantaram̄ paṭisallīnā jhānam̄ samāpannā. Tadantara saddo vā “etarahī”ti iminā samānatthoti āha “**sampati paṭisallīnā vā**”ti.

Pañcasikhagītagāthāvaṇṇanā

348. **Sāvesīti** yathādhippetamucchanam̄ paṭṭhapetvā vīṇam̄ vādentō taṁtam̄ṭhānuppattiyā pākāṭibhūtamandatāvavattham̄ dassento sumadhurakomalamadhupāna mattamadhukāravirutāpahāsinilakkhaṇo pasannabhānī samaravam̄ tantissaram̄ sāvesi.

“Sakyaputtova jhānena, ekodī nipako sato.

Amatam̄ muni jigīsāno, yathāpi muni nandeyya,

Patvā sambodhimuttaman”ti¹ ca—

evam̄ **buddhūpasañhitā**. Buddhūpasañhitā² pana buddhānam̄ dhammasarīram̄ ārabha nissayam̄ katvā pavattitāti āha “dhammo arahatāmivā”ti. Dhammūpasañhitā, arahattūpasañhitā ca veditabbā.

Sūriyasamānasarīrāti sūriyasamānappabhāsarīrā. Tenāha “**tassā kirā**”ti-ādi. Yasmā timbaruno Gandhabbadevarājassa Sūriyavacchasā anke jātā, tasmā āha “**yam̄ timbarum̄ devarājānam̄ nissāya tvaṁ jātā**”ti kalyāṇaṅgatāya “**kalyāṇī**”ti vuttāti āha “**sabbaṅgasobhanā**”ti.

1. Dī 2. 213 piṭṭhe.

2. Dhammūpasañhitā (?)

Rāgāvesavasena pubbe vuttā gāthā idānīpi **tameva ārabha** purato
ṭhitam viya **ālapanto vadati**.

Thanudaranti payodharañca udarañca adhippetanti āha
“**thanavemajjham udarañcā**”ti.

Kiñci kāraṇanti kiñci pīḷam.

Pakatiṃ jahitvā ṭhitam abhirattabhāvena.

Vāmūrūti rucira-ūrū. Tenāha “**vāmākārenā**”ti-ādi.

Vānavikasitarucirasundarābhirūpacārusaddā hi ekatthā daṭṭhabbā. **Na**
tikhīṇanti na tikkham na lūkham na kakkhaḷam. **Mandanti** mudu siniddham.

Anekabhāvoti anekasabhāvo, so pana bahuvidho nāma hotīti āha
“**anekavidho jāto**”ti. **Anekabhāgoti** anekakoṭṭhāso.

Tayā saddhiṃ vipaccatanti tayā sahitānyeva me taṃ kammaṃ
vipaccatu, tayā saheva tassa kamma phalaṃ anubhaveyyanti adhippāyo.
Tayā saddhimevāti yathā cakkavattisaṃvattaniyakammaṃ tassa
nissandaphalabhūtena itthiratanena saddhiṃyeva vipākaṃ deti, evaṃ taṃ
me kammaṃ tayā saddhiṃyeva mayham vipākaṃ detu.

Ekodīti ekodibhāvaṃ gato, samāhitoti attho. **Jigīsānoti** jigīsamāno hoti.
Tathābhūtova jigīsati nāmāti tathā paṭhamavikappo vutto. Dutiyavikappe
pana “**vicarati**”ti kiriyāpadaṃ āharitvā attho vutto.

Nandeyyanti samāgamaṃ patthento vadati atisassirakarūpasobhāya.

349. **Saṃsandatīti** sameti, yāya mucchanāya, yena ca ākārena tantissaro
pavatto, taṃ mucchanam anativattento, teneva ca ākārena gītassaropi
pavattoti attho. Yena ajjhāsayena Bhagavā pañcasikhassa gandhabbe
vaṇṇam kathesi, yadatthañca kathesi, taṃ sabbam vibhāvetum “**tasmā**”ti-
ādimāha. **Natthi** bodhimūle eva samucchinnattā. **Upekkhako Bhagavā**
anupalittabhāvato. **Suvimuttacitto Bhagavā** chandarāgato,

sabbasmā ca kilesā. Yadi evaṃ kasmā pañcasikhassa gandhabbe vaṇṇaṃ kathesīti āha “**sace panā**”ti-ādi.

Ganthitāti sandahitā, tā pana nirantaram kathiyamānā rāsikatā viya honṭīti āha “**piṇḍitā**”ti. **Vohāravacana**nti bhagavato, bhikkhūnañca purato vattabbaṃ upacāravacanaṃ.

Upanaccantiyāti upagantvā naccantiyā.

Sakkūpasaṅkamanavaṇṇanā

350. “Kadā saṃyūḷhā”ti-ādīni vadanto **paṭisammodati**. **Vippakāraṃpi dasseyyā**ti aḍḍhakatābhīnaya vasena naccampi dasseyya.

351. “Abhivadito sakko devānamindo”ti-ādīnaṃ “tena kho pana samayenā”ti-ādīnaṃ¹ viya saṅgītikāravacana bhāve saṃsayo natthi, “evañca pana Tathāgatā”ti idha pana siyā saṃsayoti “dhammasaṅgāhakattherechi ṭhapitavacanaṃ”ti vatvā itarassāpi tathābhāvaṃ dassetuṃ “**sabbametaṇ**”ti-ādi vuttaṃ. **Vuḍḍhivacana**na vuttoti “sukhī hotu pañcasikha sakko devānamindo”ti āsīsavādaṃ vutto. “Bhagavato pāde sirasā vandati”ti vadanto abhivādeti nāma “sukhī hotū”ti āsīsavādassa vadāpanato. Tathā pana āsīsavādaṃ vadanto abhivadati nāma sabbakālaṃ tatheva tiṭṭhanato.

Uruṃ vepullaṃ dassati dakkhatīti **urundā** vibhatti-alopena. **Vivaṭā** aṅgaṇaṭṭhānaṃ. **Yo pakatiyā guhāyaṃ andhakāro, so antarahitoti** yo tassaṃ guhāyaṃ satthu samantato asīti hatthato ayaṃ pākatico andhakāro, so devānaṃ vatthābharaṇasarīrobhāsehi antarahito, āloko sampajji. Asīti hatthe pana buddhāloke neva andhakāro antarahito, na ca samattho devānaṃ obhāso buddhānaṃ abhibhavitum.

352. **Cirappatikāhanti** cirappabhutiko ahaṃ. **Aḍḍakaraṇaṃ nāma natthi** avivādādhikaraṇaṭṭhāne nibbattattā. **Kīḷādīnipīti ādi**-saddena dhammassavanādīṃ saṅgaṇhāti.

1. Vi 1. 7, 13 piṭṭhādīsu.

Salālamayagandhakuṭiyanti salaḷarukkhehi raññā pasenadinā kārītagandhakuṭiyam. **Tenassāti** tena phaladvayādhigamena pahīna-olaṅṅikakāmarāgatāya **assā** bhūjatiyā **devaloke abhiratiyeva natthi**. **Cakkanemisaddena tamhā samādhimhā vuṭṭhitoti** ettha adhippāyam ajānantā “ārammaṇassa adhimattatāya samāpattito vuṭṭhānam jātan”ti maññeyyūnti tam paṭikkhipanto **“samāpanno saddam suṇātīti no vata re vattabbe”**ti āha. Sati ca ārammaṇasaṅghaṭṭanāyam gahaṇenapi bhavitabbanti adhippāyena “suṇātī”ti vuttam, itaro “paṭhamam jhānam samāpannassa saddo kaṇṭako”ti vacanamattam nissāya sabbassāpi jhānassa saddo kaṇṭakoti adhippāyena paṭikkhepam asahanto **“nanu bhagavā -pa- bhaṇatī”**ti imameva suttapadam uddhari. Tattha yathā dosadassanapaṭipakkhabhāvanāvasena paṭighasaññānam suppahīnattā mahatāpi saddena arūpasamāpattito na vuṭṭhānam, evam “uppādo bhayam, anuppādo kheman”ti-ādinā sammadeva dosadassanapaṭipakkhabhāvanāvasena sabbāsampi lokiyasaññānam aggamaggena samatikkantattā ārammaṇādhigamatāya na kadāci¹ phalasamāpattito vuṭṭhānam hotīti. Tathā pana na suppahīnattā paṭighasaññānam sabbarūpasamāpattito vuṭṭhānam hoti, paṭhamajjhānam pana appakampi saddam na sahatīti tam samāpannassa “saddo kaṇṭako”ti vuttam. Yadi pana paṭighasaññānam vikkhambhitattā mahatāpi saddena arūpasamāpattito na vuṭṭhānam hoti, pageva maggaphalasamāpattito. Tenāha **“cakknemisaddenā”**ti-ādi. **Cakkanemisaddenāti** ca nayidam karaṇavacanam hetumhi, karaṇe vā, atha kho sahayoge. Imameva hi attham dassetuṃ **“Bhagavā panā”**ti-ādi vuttam.

Gopakavattuvaṇṇanā

353. **Paripūrakārīnīti** paripuṇṇāni, parisuddhāni ca katvā rakkhitavati. **“Itthittan”**ti-ādi tattha virajjanākāradassanam. Mitthibhāvam itthibhāvassa dhikkāro hetūti attho. **Alanti** paṭikkhepavacanam, payojanam natthīti attho. **Virājetīti** jigucchati. **Etā sampattiyoti** cakkavattisiri-ādikā etā yathāvuttasampattiyo. **Tasmā** pubbapariyayena upaṭṭhitanikantivasena. **Upaṭṭhānasālanti** sudhammadevasabham.

1. Kadācipi (?)

Soti gopakadevaputto. **Vaṭṭetvā vaṭṭetvā**ti tomarādiṃ vattentena viya codanavacanāṃ parivaṭṭetvā parivaṭṭetvā. **Gāḷham vijjhitabbā**ti gāḷhataraṃ ghaṭṭetabbā.

Kutomukhāti kuto pavattañāṇamukhā. Tenāha “**aññavihitakā**”ti. **Katapuññeti** sammā katapuññe dhamme.

Dāyoti lābho. So hi dīyati tehi dātabbattā dāyo, yesaṃ dīyati, tehi laddhattā lābhoti ca vuccati. **Saṅkhāre -pa- patitṭhahimsu** katādhikārattā. **Tattha** Tāvatiṃsabhavane **ṭhitānamyeva nibbatto** yathā Sakkassa Indasālaguhāyaṃ ṭhitasseva sakkattabhāvo.

Nikantiṃ tasmīṃ gandhabbakāye ālayaṃ samucchindituṃ na sakkonto.

354. **Attanāva veditabboti** attanāva adhigantvā veditabbo, na parappaccayikena. **Tumhehi vuccamānānī**ti kevalaṃ tumhehi vuccamānāni.

Viyāyāmāti vissaṭṭhaṃ vīriyaṃ santāne pavattema. **Pakatiyā**ti rūpāvacarabhāvena, “anussaraṇa”ti vā pāṭho.

Kāmarāgo eva “chando rāgo chandarāgo”ti-ādipavattibhedena saṃyojanaṭṭhena “**kāmarāgasamyojanānī**”ti¹, yogaganthādipavatti-ākārabhedena “**kāmabandhanānī**”ti ca vutto. **Pāpimayogānī**ti ettha pana sesayogaganthānampi vasena attho veditabbo.

Duvidhānanti vatthukāmakilesakāmasasena duvidhānaṃ.

“Ettha kiṃ, tattha kiṃ”ti ca padadvaye **kinti** nipātamattaṃ. **Cātuddisabhāveti** tesāṃ Buddhādīnaṃ tiṇṇaṃ ratanānaṃ catuddisayogyabhāve appaṭiṭṭhabhāve. Buddharatanañhi mahākāruṇikatāya, anāvaraṇaṇāṇatāya, paramasantuṭṭhatāya ca cātuddisaṃ, dhammaratanaṃ svākkhātāya, saṃgharatanaṃ suppaṭiṭṭhantaṃ. Tenāha “**sabbadisāsu asajjamāno**”ti.

Majjhimassa paṭhamajjhānassa adhigatattā tāvadeva **kāyaṃ brahmapurohitaṃ adhigantvā** tāvadeva purimaṃ jhānasatiṃ paṭilabhitvā taṃ jhānaṃ pādakaṃ katvā vipassanaṃ vaḍḍhetvā orambhāgiyasamyojanasamucchindanena **maggaphalavisesaṃ** anāgāmiṃ phalasaṅkhātāṃ vīsaṃ **ajjhagaṃsu** adhigacchimsu. Keci pana

1. Kāmasaññojanāni (Aṭṭhakathāyaṃ)

“kāmāvacarattabhāvena maggaphalāni adhigacchimsūti adhippāyena pañcamassa jhānassa anadhigatattā suddhāvāsesu na uppajjimsu, paṭhamajjhānalābhitāya pana brahmapurohitesu nibbattimsū”ti vadanti.

Maghamāṇavavatthuvaṇṇanā

355. **Visuddhoti** visuddha-ajjhāsayo, upanissayasampannoti adhippāyo. **Gāmakammakaraṇaṭṭhānanti** gāmikānaṃ upaṭṭhānaṭṭhānaṃ vadati. **Tāvatakenevāti** attanā sodhitaṭṭhāneva aññassa āgantvā avaṭṭhāneveva. **Satiṃ paṭilabhitvāti** “aho mayā katakammaṃ saphalaṃ jātan”ti yoniso cittaṃ uppādetvā.

Pāsāṇeti maggamajjhe uccatarabhāvena ṭhitapāsāṇe. **Uccāletvāti** uddharitvā. **Etassa saggassa gamanamagganti** etassa candādīnaṃ uppattiṭṭhānabhūtassa saggassa gamanamaggaṃ puññakammaṃ.

Sugativasena laddhabbaṃ, kahāpaṇaṅcāti **kahāpaṇaṃ**, daṇḍavasena laddhabbaṃ bali **daṇḍabali**. **Gahapatikā kiṃ karissantīti** gahapatikā nāma aṭavikā viya visamanissitā, te na kañci anattaṃ karissantī, **evaṃ tayā jānamānena tasmā mayhaṃ na kathitanti** yadipi pubbe na kathitaṃ etarahi pana bhayena kathitaṃ, **mā mayhaṃ dosaṃ kareyyātha**, ārocitakālato paṭṭhāya na mayhaṃ dosoti vadati.

Nibaddhanti ekantikaṃ.

Pisuṇesīti pisuṇakammaṃ akāsi, tumhākaṃ antare mayhaṃ pesuññaṃ upasaṃ haratīti attho. Puna aharaṇīyaṃ¹ brahmadeyyaṃ **katvā**. **Mayhampīti** mayhampi atthāya maṃ uddissa **puññakammaṃ karotha**. Nīluppalaṃ nāma vikasamānaṃ udakato uggantvāva vikaṣati, evaṃ ahutvā **anto-udake pupphitaṃ nīluppalaṃ viya**. Amhākaṃ pana idaṃ puññakammaṃ bhavantarūpapattiyā vinā imasmīṃ yeva attabhāve vipākaṃ detīti yojanā. **Cintāmattakampīti** domanassavasena cintāmattakampi.

Pagevāti² kālasseva, ativiya pātoti attho. **Kaṇṇikūpaganti** kaṇṇikayogyāṃ. **Tacchetvā matthaṃ katvāti** kaṇṇikāya kattabbaṃ sabbhaṃ niṭṭhapetvā. Tathā hi sā vatthena veṭhetvā ṭhapitā.

1. Asāraṇīyaṃ (Ka)

2. Kālasseva (Aṭṭhakathāyaṃ)

Cayabandhanam sālāya adhiṭṭhānasajjanam. **Kaṇṇikamañcabandhanam** kaṇṇikārohanakāle āruhitvā avatṭhāna-aṭṭakaraṇam.

Yassa atthate phalaketi yassa phalake atthateti yojanā.

Avidūreti sālāya, koviḷārarukkassa ca avidūre. **Sabbajettṭhikāti** sabbāsam tassa bhariyānam jettṭhikā sujātā.

Tassevāti sakkasseva. **Santiketi** samīpe santikāvacarā hutvā **nibbattā**. Dhajena saddhim saḥassayojaniko **pāsādo**.

Kakkaṭakavijjhanasūlasadisanti kakkaṭake gaṇhitum tassa bilapariyantassa vijjhanasūcisadisam.

Maccharūpenāti matamaccharūpena. **Osaratīti** pilavanto gacchati. **Tassāpi** bakasakuṇikāya **pañca vassasatāni āyu ahoṣi** devanerayikānam viya manussapetatiracchānānam āyuno aparicchinnattā.

Ukkuṭṭhimakāsīti uccāsaddam akāsi.

Pubbasannivāsenāti purimajātīsu cirasannivāsenā. Evañhi ekaccānam diṭṭhamattenapi sineho uppajjati. Tenāha Bhagavā—

“Pubbe va sannivāsenā, paccuppannahitena vā.

Evam taṃ jāyate pemaṃ, uppalaṃva yathodake”¹.

Avasesasūti asure, sakkam ṭhapetvā dvīsu devalokesu deveva sandhāya vadati.

Atthanissitanti attano, paresaṅca atthameva hitameva nissitam, taṃ pana hitam sukhassa nidānanti āha “**kāraṇanissitan**”^{ti}.

Pañhaveyyākaraṇavaṇṇanā

357. **Kimsamyojanāti** kīdisasamyojanā. Satte anathe samyojenti bandhantīti **samyojanānīti** āha “**kimbābandhanā, kena bandhanena baddhā**”^{ti}. **Puthukāyāti** bahū sattaḥkāyāti āha “**bahū janā**”^{ti}. Veram vuccati dosoti āha “**averāti appaṭighā**”^{ti}.

1. Khu 5. 66 piṭṭhe Jātake.

Āvudhena sarīre daṇḍo **āvudhadaṇḍo**, dhanassa dāpanatthena daṇḍo **dhanadaṇḍo**, tadubhayākaraṇena tato vinimutto **adaṇḍo**, sampatti haraṇato, saha-anatthuppattito ca sapatto, paṭisattūti āha “**asapattāti apaccatthikā**”ti. **Byāpajjham** vuccati cittadukkham, tabbiraḥitā **abyāpajjhāti** āha “**vigatadomanassā**”ti. Pubbe “averā”ti padena sambaddhāghātakābhāvo vutto. Tenāha “appaṭighā”ti. “**Averino**”ti pana imināpi kopamattassapi anuppādanam. Tenāha “**katthaci kopam na uppādetvā**”ti. “Viharemū”ti ca padam purimapadehipi yojetabbam “averā viharemū”ti-ādinā. Ayañca averādibhāvo samvibhāgena pākaṭo hotīti dassetuṃ “**accharāyā**”ti-ādim vatvā “**iti ce nesam hoti**”ti vuttam. Cittuppatti daḥatarāpi hutvā pavattatīti dassetuṃ “**dānam datvā, pūjam katvā ca patthayanti**”ti vuttam. **Iti ceti**¹ ce-saddo anvayasamsaggena parikappetīti āha “**evañca nesan**”ti.

Yāya kāyaci paresam sampattiyā khīyanam usūyanam asahanam lakkhaṇam etissāti **parasampattikhīyanalakkhaṇā**, yadaggena attasampattiyā parehi sādharmaṇabhāvam asahanalakkhaṇam, tadaggenassa “nigūhanalakkhaṇam”tipi vattabbam. Tathā hissa porāṇā “mā idam acchariyam aññesam hotu, mayhameva hotūti macchariyam”ti nibbacanam vadanti. **Abhidhamme** “yā paralābha sakkāragarukāramānavandanapūjanāsu issā issāyanā”ti-ādinā² nikkhepakaṇḍe, “yā etesu paresam lābhādīsu kim iminā imesan”ti-ādinā² tam samvaṇṇanāyañca **vuttāneva**, tasmā tattha vuttanayeneva veditabbānīti adhippāyo.

Yasmā pana issāmacchariyāni bahvādīnavāni, tesam vibhāvanā lokassa bahukārā, tasmā **abhidhammaṭṭhakathāyam**³ vibhāvitānampi tesam diṭṭhadhammikepi samparāyikepi ādīnave dassanto “**āvāsamacchariyena panā**”ti-ādimāha. **Etthāti** etesu issāmacchariyesu, etesu vā āvāsamacchariyādīsu pañcasu macchariyesu. **Saṅkāram sīsena ukkhipitvāva**

1. Iti ca (Pāḷiyam, Aṭṭhakathāyañca,) 2. Abhi 1. 226 piṭṭhe. 3. Abhi-Ṭṭha 1. 404 piṭṭhe.

vicarati tattha laggacittatāya, nihīnajjhāsayatāya ca. **Mamāti** mayā, ayameva vā pāṭho. **Lohitampi mukhato uggacchati** cittavighātena saṁtattahadayatāya. **Kucchivirecanampi hoti** atijalaggino. Añño vibhavapaṭivedhadhammo ariyānaṁyeva hoti, te ca taṁ na maccharāyanti macchariyassa sabbaso pahīnattā. Paṭivedhadhamme macchariyassa asambhavo evāti āha “**pariyattidhammacchariyena cā**”ti. Vaṇṇamacchariyena **dubbaṇṇo**, dhammacchariyena **eḷamūgo** duppañño hoti.

“**Apicā**”ti-ādi pañcannaṁ macchariyānaṁ vasena kammasarikkhakavipākadassanaṁ. **Āvāsamacchariyena lohagehe paccati** paresaṁ āvāsapaccayahitasukhanisedhanato. **Kulamacchariyena appalābho hoti** parehi kulesu laddhabbalābhanisedhanato, **appalābhoti** ca alābhoti attho. **Lābhamacchariyena gūthaniraye nibbattati** lābhahetu parehi laddhabbassa assādanisedhanato. Sabbathāpi nirassādo hi gūthanirayo. **Vaṇṇo nāma na hotīti** sarīravaṇṇo, guṇavaṇṇoti duvidhopi vaṇṇo nāmamattenapi na hoti, tattha tattha nibbattamāno virūpo eva hoti. Sampattinivūhanasabhāvena macchariyena virūpīte santāne yebhuyyena guṇā patiṭṭhameva na labhanti, ye ca patiṭṭhaheyyuṁ, tesampi vasenassa vaṇṇo na bhavēyya. Te hi tassa loke rattim khittā sarā viya na paññāyanti. **Dhammacchariyena kukkuḷaniraye. Sotāpattimaggena pahīyati** apāyagamaṇiyabhāvato. **Verādīhi na parimuccantiyeva** tapparimuccanāya icchāya appattabbattā jāti-ādidhammānaṁ sattānaṁ jāti-ādīhi viya.

Tiṇṇā mettha kaṅkhāti ma-kāro padasandhikaro. **Etasmim pañheti** etasmim “kim saṁyojanā nu kho”ti evaṁ nātum icchite atthe. **Tumhākaṁ vacanaṁ sutvāti** “issāmacchariyasaṁyojanā”ti evaṁ pavattaṁ tumhākaṁ vissajjanavacanaṁ sutvā. **Kaṅkhā tiṇṇāti** yathāpucchite atthe saṁsayo tarito vigato desanānussaraṇamattena, na samucchadavasenāti āha “**na maggavasena**”ti-ādi. **Ayampi kathamkathā vigatāti** kaṅkhāya vigatattā eva tassā pavatti-ākāravisesabhūtā “**idaṁ katham idaṁ kathan**”ti ayampi kathamkathā **vigatā apagatā**.

385. **Nidānādīni** mahānidānasuttavaṇṇanāyaṃ¹ **vuttatthāneve**. Piyānaṃ attano pariggahabhūtānaṃ sattasaṅkhārānaṃ parehi sādharmaṇabhāvāsahanavasena, nigūhanavasena ca pavattanato **piyasattasaṅkhāranidānaṃ macchariyaṃ**, appiyānaṃ pariggahabhūtānaṃ sattānaṃ, saṅkhārānaṃca asahanavasena pavattiyā **appiyasattasaṅkhāranidānā issā**. Yañhi kiñci appiyasambandhaṃ bhaddakampi taṃ kodhanassa appiyamevāti. **Ubhayanti** macchariyaṃ, issā cāti ubhayaṃ. **Ubhayanidānanti** piyanidānaṃceva appiyanidānaṃca. **Piyāti** iṭṭhā. **Keḷāyitāti** dhanāyitā. **Mamāyitāti** mamattaṃ katvā pariggahitā. **Issaṃ karotīti** “kiṃ imassa iminā”ti tassa piyasattalābhāsahanavasena ussūyati, **tameva** piyasattaṃ **yācīto**. **Aho vatassāti** sādhu vata assa. “Imassa puggalassa **evarūpaṃ piyavatthu na bhaveyyā**”ti **issaṃ karoti** usūyaṃ uppādeti. **Mamāyantāti** keḷāyantā. **Appiyeti** appiye satte tesaṃ satāpato. **Assāti** puggalassa, **yena** te laddhā. **Teti** sattasaṅkhārā, **sacepi amanāpā honti** appiyehi samudāgatattā. **Viparītavuttitāyāti** ayāthāvagāhitāya. **Ko añño evarūpassa lābhīti** tena attānaṃ sambhāvento **issaṃ vā karoti**. Aññassa tādissaṃ uppajjamānampi “aho vatassa evarūpaṃ na bhaveyyā”ti **issaṃ vā karoti**, ayaṃca nayo heṭṭhā vuttanayattā na gahito.

Vatthukāmānaṃ pariyesanavasena pavatto chando **pariyesanachando**. Paṭilābhapaccayo chando **paṭilābhachando**. Paribhuñjanavasena pavatto chando **paribhogachando**. Paṭiladdhānaṃ sannidhāpanavasena, saṅgopanasena ca pavatto chando **sannidhichando**. Diṭṭhadhammikameva payojanaṃ cintetvā vissajjanavasena pavatto chando **vissajjanachando**. Tenāha “katamo”ti-ādi.

Ayaṃ pañcavidhopi atthato taṇhāyanaṃevāti āha “**taṇhāmattamevā**”ti.

Evam vutto “lābhaṃ paṭicca vinicchayo”ti evaṃ mahānidānasutte² vutto **vinicchayavitakko vitakko nāma**, na yo koci vitakko. Idāni

1. Dī-Ṭṭha 2. 72 piṭṭhe.

2. Dī 2. 50 piṭṭhe.

yathāvuttam̐ vinicchayavitakkaṃ atthuddhāranayena nīharitvā dassetuṃ “**vinicchayo**”ti-ādi vuttam̐. **Aṭṭhasatanti** aṭṭhādhikaṃ satam̐, tañca kho taṇhāvicari tānam̐ satam̐, na yassa kassacīti dassetuṃ “**taṇhāvicaritan**”ti vuttam̐. **Taṇhāvinicchayo nāma** taṇhāya vasena vakkhamānanayena ārammaṇassa vinicchinanato. Diṭṭhidassanavasena “idameva saccam̐, moghamaññan”ti vinicchinanato **diṭṭhivinicchayo nāma**. **Iṭṭham̐** paṇītam̐, **aniṭṭham̐** appaṇītam̐, piyāyitabbam̐ **piyam̐**, appiyāyitabbam̐ **appiyam̐**, tesam̐ **vavattḥānam̐** taṇhāvasena **na hoti**. Taṇhāvasena hi ekacco kiñci vatthum̐ paṇītam̐ maññati, ekacco hīnam̐, ekacco piyāyati, ekacco nappiyāyati. Tenāha “**tadeva hī**”ti-ādi. “**Dassāmī**”ti idam̐ vissajjanachande vuttanayena ceva paṭṭūpanissayadānavasena ca veditabbam̐. Tampi hi taṇhāchandahetukanti.

Yattha sayam̐ uppajjanti, tam̐ santānam̐ saṃsāre papañcenti vitthārayantīti **papañcā**. Yassa ca uppannā, tam̐ “ratto”ti vā “satto”ti vā “micchābhini vittho”ti vā papañcenti byañjenti **papañcā**. Yasmā taṇhādiṭṭhiyo adhimattā hutvā pavattamānā taṃsamaṅgīpuggalaṃ pamattākāram̐ pāpenti, māno pana jātimadādivasena mattākāram̐pi, tasmā “**mattapamattākārapāpanaṭṭhenā**”ti vuttam̐. **Saṅkhā vuccati koṭṭhāso** bhāgasō saṅkhāyati upaṭṭhātīti. Yasmā papañcasaññā taṃtaṃdvārasena, ārammaṇavasena ca Bhāgasō vitakkassa paccayā honti, na kevalā, tasmā **papañcasaññāsaṅkhānidāno vitakko** vutto, papañcasaññānam̐ vā anekabhedabhinnattā tam̐ samudāyo “papañcasaññāsaṅkhā”ti vutto. Papañcasaññāsaṅkhāggahaṇena ca anavaseso dukkhasamudayo vutto taṃtaṃnimittattā vaṭṭadukkhasāti.

Yo nirodho vūpasamoti nirodhasaccamāha. **Tassa sārūppanti** tassa papañcasaññāsaṅkhāya nirodhassa vūpasamassa adhigamupāyatāya sārūppam̐ anucchavikam̐, etena vipassanam̐ vadati. Tattha yathāvuttanirodhe ārammaṇakaraṇavasena gacchati pavattatīti **tattha gāminī**, etena maggam̐. Tenāha “**saha vipassanāya maggam̐ pucchati**”ti.

Vedanākammaṭṭhānavaṇṇanā

359. **Pucchitameva kathitam̐**. Yasmā Sakkena Devānamindena papañcasaññāsaṅkhānirodhagāminipaṭipadā pucchitāva, Bhagavā ca tadadhigamupāyam̐ arūpakammaṭṭhānam̐

tassa ajjhāsayavasena vedanāmukhena kathento tisso vedanā ārabhi, iti pucchitameva kathentena pucchānusandhivasena **sānusandhimeva ca** kathitaṃ. Na hi buddhānaṃ ananusandhikā kathā nāma atthi. Idānissa vedanāmukhena arūpakammaṭṭhānasseva kathane kāraṇaṃ dassetuṃ “**devatānañhi**”ti-ādi vuttaṃ. Karajakāyassa sukhumatāvacaneneva accantamudusukhumālabhāvāpi vuttā evāti daṭṭhabbaṃ. **Kammajanti** kammajatejaṃ, Tassa balavabhāvo uḷārapuññakammanibbattattā, ativiya garumadhurasiniddhasuddhāhārajaṇato ca. **Ekāhārampī** ekāhāravārampi. “**Vilīyanti**”ti etena karajakāyassa mandatāya kammajatejassa balavabhāvena āhāravelātikkamena nesaṃ balavatī dukkhavedanā uppajjamānā supākaṭā hotīti dasseti. Nidassanamattañcetaṃ, sukhavedanāpi pana nesaṃ uḷārapañitesu ārammaṇesu uparūpari aniggahaṇavasena pavattamānā supākaṭā hutvā upaṭṭhātiyeva. Upekkhāpi tesaṃ kadāci uppajjamānā santapaṇītarūpā eva iṭṭhamajjhatte eva ārammaṇe pavattanato. Tenevāha “**tasmā**”ti-ādi.

Rūpakammaṭṭhānanti rūpariggahaṃ, rūpamukhena vipassanābhinivesanti attho. **Arūpakammaṭṭhānanti** etthāpi eseva nayo. Tattha rūpakammaṭṭhānena samathābhinivesopi saṅgayhati, vipassanābhiniveso pana idhādhippetoti dassento “**rūpariggaho arūpariggahotipi etadeva vuccatī**”ti āha. **Catudhātuvavatthānanti** ettha yebhuyyena catudhātuvavatthānaṃ vitthārento rūpakammaṭṭhānaṃ kathetīti adhippāyo. **Rūpakammaṭṭhānaṃ dassetvāva katheti** “evam rūpakammaṭṭhānaṃ vuccamānaṃ suṭṭhu vibhūtaṃ pākaṭaṃ hutvā upaṭṭhāti”ti. “Etena idhāpi rūpakammaṭṭhānaṃ ekadesena vibhāvitamevā”ti vadanti.

Kāmañcetta vedanāvasena arūpakammaṭṭhānaṃ āgataṃ, tadaññadhammavasena arūpakammaṭṭhānaṃ labbhatīti taṃ vibhāgena dassetuṃ “**tividho hi**”ti-ādi vuttaṃ. Tattha **abhinivesoti** anuppaveso, ārambhoti attho. Ārambhe eva hi ayaṃ vibhāgo, sammasanaṃ pana anavasesatova dhamme pariggahetvā pavattatīti. “**Pariggahite rūpakammaṭṭhāne**”ti idaṃ rūpamukhena vipassanābhinivesaṃ sandhāya vuttaṃ, arūpamukhena pana vipassanābhiniveso yebhuyyena samathayānikassa icchitabbo, so

ca paṭhamam jhānaṅgāni pariggahetvā tato param sesadhamme pariggaṇhāti. **Paṭhamābhiniṭṭoti** sabbe cetasikā cittāyattā cittakiriyābhāvena vuccantīti phasso cittassa paṭhamābhiniṭṭo vutto. **Tam ārammaṇanti** yathāpariggahitaṃ rūpakammaṭṭhanasaññitaṃ ārammaṇaṃ. Uppannaphasso puggalo, cittacetasikarāsi vā ārammaṇena phuṭṭho phassasahajātāya vedanāya taṃsamakārameva vedeti, phasso pana obhāsassa viya paḍīpo vedanādīnaṃ paccayaviseso hotīti purimakālo viya vuccati, yā tassa ārammaṇābhiniropanalakkhaṇatā vuccati. **Phusantoti** ārammaṇassa phusanākārena. Ayañhi arūpadhammattā ekadesena anallīyamānopi rūpaṃ viya cakkhum, saddo viya ca sotaṃ, cittaṃ, ārammaṇaṅca phusanto viya, saṅghaṭṭento viya ca pavattatīti. Tathā hesa “saṅghaṭṭanaraso”ti vuccati.

Ārammaṇam anubhavantiti issaravatāya visavitāya sāmibhāvena ārammaṇarasam samvedentī. Phassādīnañhi sampayuttadhammānaṃ ārammaṇe ekadeseneva pavatti phusanādimmattabhāvato, vedanāya pana iṭṭhākārasambhogādivasena pavattanato ārammaṇe nippadesato pavatti. Phusanādibhāvena hi ārammaṇaggahaṇam ekadesānubhavanaṃ, vedayita bhāvena gahaṇam yathākāmaṃ sabbānubhavanaṃ, evaṃsabhāvāneva tāni gahaṇāntīti na vedanāya viya phassādīnampi yathāsakakiccakaraṇena sāmibhāvānubhavanaṃ codetabbaṃ. **Vijānantanti** paricchindanasena visesato jānantam. Viññānañhi minitabbavattum nāḷiyā minanto puriso viya ārammaṇam paricchijja vibhāventam pavattati, na saññā viya sañjānamattam hutvā. Tathā hi anena kadāci lakkhaṇattayavibhāvanāpi hoti, imesam pana phassādīnam tassa tassa pākāṭabhāvo paccayavisesasiddhassa pubbabhāgassa vasena veditabbo.

Evam tassa tasseva pākāṭabhāvepi “sabbaṃ bhikkhave abhiññeyyan”ti¹ “sabbaṃ ca kho bhikkhave abhi jānan”ti² ca evamādivacanato sabbe sammasanupagā dhammā pariggahetabbāti dassento “**tattha yassā**”ti-ādimāha. Tattha **phassapañcamakeyevāti** avadhāraṇam tadantogadhattā taggahaṇeneva gahitattā catunnam arūpakkhandhānam. Phassapañcamakaggahaṇaṅhi tassa sabbassa

1. Saṃ 2. 258; Khu 9. 6 piṭṭhesu.

2. Saṃ 2. 250 piṭṭhe.

sabbacittuppādasādhāraṇabhāvato. Tattha ca phassacetanāggahaṇena sabbasaṅkhārakkhandhadhammasaṅgaho cetanappadhānattā tesam. Tathā hi suttantabhājanīye **saṅkhārakkhandhavibhaṅge** “cakkhusamphassajā cetanā”ti-ādinā¹ cetanāva vibhattā, itare pana khandhā sarūpeneva gahitā.

Vatthunissitāti ettha **vatthu**-saddo karajakāyavisayo, na chabbatthuvisayoti. Kathamidam viññāyatīti āha “**yam sandhāya vuttan**”ti. Kattha pana vuttam? Sāmaññaphalasutte². **Soti** karajakāyo. “**Pañcakkhandhavinimuttam nāmarūpam natthi**”ti idam adhikāravasena vuttam. Aññathā hi khandhavinimuttampi nāmam athevāti. **Avijjādihetukā**ti avijjātaṇhupādānādihetukā. “Vipassanāpaṭipāṭiyā -pa- vicaratī”ti iminā balavavipassanam vatvā puna tassa ussukkāpanam, visesādhigamaṇca dassento “**so**”ti-ādimāha.

Idhāti imasmim sakkapañhasutte. Vedanāvasena cettha arūpakammaṭṭhānakathane kāraṇam heṭṭhā vuttanayameva. Yathāvuttesu ca tisu kammaṭṭhānabhinivesesu vedanāvasena kammaṭṭhānābhiniveso sukaro vedanānam vibhūtabhāvatoṭi dassetuṃ “**phassavasena hī**”ti-ādi vuttam. “**Na pākaṭam hoti**”ti idam sakkapamukhānam tesam devānam yathā vedanā vibhūtā hutvā upaṭṭhāti, na evam itaradvayanti katvā vuttam. Vedanāya eva ca nesam vibhūtabhāvo vedanā mukhenevettha bhagavatā desanāya āraddhattā. “**Vedanānam uppattiyā pākaṭatāyā**”ti idam sukhadukkhavedanānam vasena vuttam. Tāsāñhi pavatti oḷārikā, na itarāya. Tadubhayaggahaṇa mukhena vā gahetabbattā itarāyapi pavatti viññūnam pākaṭā evāti “**sukhadukkhā vedanānāñhī**”ti visesaggahaṇam daṭṭhabbam. “**Yadā sukham uppajjati**”ti-ādi sukhavedanāya pākaṭabhāvavibhāvanam, tayidam asamāhitabhūmivasena veditabbam. Tattha “**sakalam sarīram khobhentan**”ti-ādinā kāmam pavatti-oḷārikatāya avūpasantasabhāvametaṃ sukham, sātakkhaṇatāya pana sampayuttadhamme, nissayaṇca anuggaṇhantameva pavattatīti dasseti. “**Yadā dukkham uppajjati**”ti-ādīsu vuttavipariyāyena attho viditabbo.

Duddīpanāti nāṇena dīpetum asakkuṇeyyā, dubbīñneyyāti attho. Tenāha “**andhakārā abhibhūtā**”ti. **Andhakārā**ti andhakāragatasadisī,

1. Abhi 2. 8 piṭṭhe.

2. Dī 1. 72 piṭṭhe.

jānitukāme ca andhakārinī. Pubbāparam samam sukare
supalakkhitamaggavasena pāsāṇatale migagamaggo viya
iṭṭhāniṭṭhārammaṇesu sukhadukkhā nubhavanehi majjhattārammaṇesu
anuminitabbatāya vuttam “**sā sukhadukkhānam -pa- pākāṭā hotī**”ti. Tenāha
“**yathā**”ti-ādi. **Nayato gaṇhantassāti** ethāyam nayo—yasmā
iṭṭhāniṭṭhavisayāya ārammaṇūpaladdhiyā anubhavanato
niṭṭhāmajjhattavisayā upaladdhi, tasmā na tāya niranubhavanāya
bhavitabbam, yam tatthānubhavanam, sā adukkhamasukhā. Tathā
anupalabbhamānam rūpādi-anubhuyyamānam diṭṭham upalabbhati, yo pana
majjhattārammaṇam tabbisayassa viññāṇappavattiyam, tasmā
ananubhuyyamānena tena na bhavitabbam. Sakkā hi vattum anubhavamānā
majjhattavisayupaladdhi upaladdhibhāvato.

Iṭṭhāniṭṭhavisayupaladdhivisayam pana niranubhavanam tam
anupaladdhisabhāvameva diṭṭham, tam yathārūpanti. **Nivattetvāti** nīharitvā,
“somanassampāhan”ti-ādinā samānajātiyampi bhindanto aññehi
arūpadhammehi vivecetvā asaṃsaṭṭham katvāti attho.

Ayaṅca rūpakammaṭṭhānam kathetvā arūpakammaṭṭhānam
vedanāvasena nivattetvā desanā thathāvinetabbapuggalāpekkhāya
suttantaesupi¹ āgatā evāti dassento “**na kevalan**”ti-ādimāha. Tattha
mahāsatipaṭṭhāne² tathā desanāya āgatabhāvo anantameva āvi bhavissati,
majjhimanikāye satipaṭṭhānadesanāpi³ tādisī eva. **Cūlatanḥā saṅkhaye**
“evam cetam devānaminda bhikkhuno sutam hoti ‘sabbe dhammā nālam
abhinivesāyā’”ti, so sabbam dhammam abhijānāti, sabbam dhammam
abhiññāya sabbam dhammam pariānāti, sabbam dhammam pariññāya yam
kiñci vedanam vedeti sukham vā dukkham vā adukkhamasukham vā, so tāsu
vedanāsu aniccānupassī viharati, virāgānupassī”ti-ādinā⁴ āgatam. Tena
vuttam “**arūpakammaṭṭhānam vedanāvasena nivattetvā dassesī**”ti.
Mahātanḥāsaṅkhaye pana “so evam anurodhavirodhavippahīno yam kiñci
vedanam vedeti sukham vā dukkham vā adukkhamasukham vā, so tam
vedanam nābhinandati nābhivadati, nājjhosāya tiṭṭhati. Tassa tam vedanam
anabhinandato anabhivadato anajjhosāya tiṭṭhato yā vedanāsu

1. Dī 2. 231; Ma 1. 70, 318, 337, 367, 377, 379; Ma 2. 258, 171; Ma 3. 49, 282;
Saṃ 2. 406 piṭṭhesu.

2. Dī 2. 231 piṭṭhe.

3. Ma 1. 70 piṭṭhe.

4. Ma 1. 318 piṭṭhe.

nandī, sā nirujjhatī”ti-ādinā¹ āgataṃ. **Cūlavedalle** “katipanāyye vedanā”ti-ādinā² āgataṃ. **Mahāvedalle** “vedanāti āvuso vuccati, kittāvata nu kho āvuso ‘vedanā’ti vuccatī”ti-ādinā³ āgataṃ. Evaṃ raṭṭhapālasuttādīsopi⁴ vedanākammaṭṭhānassa āgataṭṭhānaṃ uddharitvā vattabbaṃ.

“Paṭhamam rūpakammaṭṭhānaṃ kathetvā”ti vuttaṃ, kathaṃ taṃ ettha kathitanti āha “**rūpakammaṭṭhānaṃ**”ti-ādi. **Saṅkhittam**, kathaṃ saṅkhittam? **Vedanāya ārammaṇamattakamīeva**, yebhuyyena vedanā rūpadhammārammaṇā pañcadvārasena pavattanato. Tena cassā purimasiddhā eva ārammaṇanti vedanaṃ vadantena tassārammaṇadhammā atthato paṭhamataraṃ gahitā eva nāma hontīti imāya atthāpattiyā rūpakammaṭṭhānassevetha paṭhamam gahitā jotitā, na sarūpeneva gahitattā. Tenāha “**tasmā pāliyaṃ nāruḷhaṃ bhavissatī**”ti.

360. **Dvīhi koṭṭhāsehīti** sevitabbāsevitabbabhāgehi. **Evarūpanti** yaṃ akusalānaṃ abhibuddhiyā, kusalānaṃca parihānāya saṃvattati, evarūpaṃ, taṃ pana kāmūpasañhitāya “gehanissitaṃ”ti vuccatīti āha “**gehasitasomanassaṃ**”ti. **Iṭṭhānanti** piyānaṃ. **Kantānanti** kamañiyānaṃ. **Manāpānanti** manavaḍḍhanakānaṃ. Tāto eva mano ramentīti **manoramānaṃ**. **Lokāmisapaṭisaṃyuttānanti** taṇhāsannissitānaṃ kāmūpasañhitānaṃ. **Paṭilābhato samanupassatoti** “aho mayā imāni laddhāni”ti yathāladdhāni rūpārammaṇādīni assādayato. **Atītanti** atikkantaṃ. **Niruddhanti** nirodhappattaṃ. **Vipariṇatanti** sabhāvavigamena vigataṃ. **Samanussaratoti** assādanavasena anucintayato. **Gehasitanti** kāmaguṇanissitaṃ. Kāmaguṇā hi kāmāragassa gehasadisattā idha “gehan”ti adhippetā.

Evarūpanti yaṃ akusalānaṃ parihānāya, kusalānaṃca abhibuddhiyā saṃvattati, evarūpaṃ, taṃ pana pabbajjādivasena pavattiyā nekkhammūpasañhitanti āha “**nekkhammasitaṃ somanassaṃ**”ti. Idāni taṃ pālivaseneva dassetuṃ “**tattha katamāni**”ti-ādi vuttaṃ. Tattha vipassanālakkaṇaṃ

1. Ma 1. 337 piṭṭhe. 2. Ma 1. 377 piṭṭhe. 3. Ma 1. 367 piṭṭhe. 4. Ma 2. 258 piṭṭhe.

nekkhamme dassite itarāni tassa kāraṇato, phalato, atthato ca dassitāneva hontīti vipassanālakkaṇameva taṃ dassento “**rūpānantvevā**”ti-ādimāha. **Vipariṇānavirāgaṇirodhanti** jarāya vipariṇāmetabbatañceva jarāmarañehi palujjanaṃ nirujjhanañca viditvāti yojanā. **Uppajjati somanassanti** vipassanāya vīthipaṭipattiyā kamena uppannānaṃ pāmojjapītipassaddhīnaṃ upari anappakaṃ somanassaṃ uppajjati. Yaṃ sandhāya vuttaṃ—

“Suññāgāraṃ pavitṭhassa, santacittassa bhikkhuno.
Amānusi rati hoti, sammā dhammaṃ vipassato,
Yato yato sammasati, khandhānaṃ udayabbayaṃ.
Labhaṭi pītipāmojjaṃ, amataṃ taṃ vijānatan”ti¹ ca.

Nekkhammavasenāti pabbajjādivasena. “Vaṭṭadukkhatto nittharissāmi”ti¹ pabbajitūṃ bhikkhūnaṃ santikaṃ gacchantassa, pabbajantassa, catupārisuddhisīlaṃ anutiṭṭhantassa, taṃ sodhentassa, dhutaḡuṇe samādāya vattantassa, kasiṇaparikkammādīni karontassa ca yā paṭipatti, sabbā sā idha “nekkhammaṃ”ti adhippetā. Yebhuyyena anussatiyā upacārajjhānaṃ niṭṭhātīti katvā “anussativasenā”ti vatvā “**paṭhamajjhānādivasenā**”ti vuttaṃ. Ettha ca yathā pabbajjā gharabandhanato nikkhamanaṭṭhena **nekkhammaṃ**, evaṃ vipassanādayopi taṃpaṭipakkhato. Tenāha—

“Pabbajjā paṭhamaṃ jhānaṃ, nibbānañca vipassanā.
Sabbepi kusalā dhammā, nekkhammanti pavuccare”ti³.

Yaṃ ceti ettha **ce**-ti nipātamattaṃ somanassassa adhippetattā. Catukkanayavaseneva ca suttantesu jhānakathāti vuttaṃ “**dutiyatatiyajjhānavasenā**”ti. **Dvīsūti** “savitakkaṃ savicāraṃ avitakkaṃ avicāraṃ”ti vuttessu dvīsu somanassesu.

Savitakkasavicāre somanasseti parittabhūmike paṭhamajjhāne vā somanasse. **Abhinivīṭṭhasomanassesūti** vipassanaṃ paṭṭhapitasomanassesu. **Pi**-saddena saṃmaṭṭhasomanassesupīti imamatthaṃ dasseti.

1. Khu 1. 67 piṭṭhe Dhammapade. 2. Niddharissāmi (Ka) 3. Itivuttaka-Ṭṭha 331 piṭṭhe.

somanassavipassanātopīti savitakkasavicārasomanassappavattivipassanātopi. **Avitakka-avicāravipassanā paṇītatarā** sammāsītadhammavasēnapi vipassanāya visesasiddhito, yato maggepi tathārūpā visesā ijjhanti. Ayaṃ panattho “ariyamaggabojjhaṅgādivisesaṃ vipassanāya ārammaṇabhūtā khandhā niyamenti”ti evaṃ pavattena moravāpīvāsi mahādattattheravādena dīpetabbo.

361. **Gehasitadomanassaṃ** nāma kāmaguṇānaṃ appaṭilābhanimittaṃ, vigatanimittaṃca uppajjanakadomanassaṃ. **Appaṭilābhato samanupassatoti** appaṭilābhena “ahameva na labhāmī”ti paritassanato. **Samanussaratoti** “aho vata me taṃ vata natthī”ti-ādinā anussaraṇavasena cintayato. Tenāha “**evaṃ chasu dvāresū**”ti-ādi.

Anuttaresu vimokkhesūti suññataphalādi-ariyaphalavimokkhesu. **Pihanti** apekkhaṃ, āsanti attho. Kathaṃ pana lokuttaradhamme ārabha āsā uppajjatīti? Na kho panetaṃ evaṃ daṭṭhabbaṃ “yaṃ ārammaṇakaraṇavasena tattha pihā pavattatī”ti avisayattā, puggalassa ca anadhigatabhāvato. Anussavūpaladdhe pana anuttaravimokkhe uddissa pihaṃ upaṭṭhapento “tattha pihaṃ upaṭṭhapetī”ti vutto. Tenāha “**kudāssunāmāhan**”ti-ādi. Chasu dvāresu iṭṭhārammaṇe āpāthagate aniccādivasena vipassanaṃ paṭṭhapetvāti yojanā. “**Iṭṭhārammaṇe**”ti ca iminā nayidaṃ domanassaṃ sabhāvato aniṭṭhadhammeyeva ārabha uppajjanakaṃ, atha kho icchitālābhahetukaṃ icchābhigātavasena yattha katthaci ārammaṇe uppajjanakanti dasseti. **Evaṃ** “kudāssu nāmāhan”ti vuttākārena pihaṃ upaṭṭhapetvā **evaṃ** imampi pakkhaṃ-**pa-** nāsakkhinti anusocatoti yojanā. “Imasmiṃ pakkhe, imasmiṃ māse, imasmiṃ saṃvacchare pabbajituṃ nāladdhaṃ, kasiṇaparikkammaṃ kātuṃ nāladdhan”ti-ādivasena pavattīm sandhāya “**nekkhammasena**”ti vuttaṃ. “**Vipassanāvasenā**”ti-ādīsupi iminā nayena yojanā veditabbā.

Yato evakāro, tato aññattha niyamoti katvā “**tasmimpi -pa-gehasitadomanassamevā**”ti vuttaṃ. Na hettha gehasitadomanassatā savitakkasavicāre niyatā, atha kho gehasitadomanasse

savitakkasavicāratā niyatā paṭiyoginivattanatthattā evakārassa
 “gehasitadomanassam savitakkasavicārameva, na avitakka-avicāran”ti.
 Nekkhammasitadomanassam pana siyā savitakkasavicāram, siyā avitakka-
 avicāram. Savitakkasavicārasseva kāraṇabhūtam domanassam
savitakkasavicāradomanassam. Kim tam? Gehasitadomanassam, yam pana
 nekkhammā divasena uppannam tam avitakka-avicārassa kāraṇabhūtam
avitakka-avicāradomanassanti. Ayañca nayo pariyāyavasena vuttoti āha
 “**nippari yāyena panā**”ti-ādi. Yadi evam kasmā “yam ce avitakkaṃ
 avicāran”ti pāḷiyam vuttanti āha “**etassa panā**”ti-ādi. **Maññanavasenāti**
 parikappanavasena. **Vuttaṃ** pāḷiyam.

Tatrāti tasmim maññane. **Ayam** idāni vuccamāno **nayo**.
Domanassapaccayabhūteti domanassassa paccayabhūte. Upacārajjhānañhi
 paṭhamajjhānādini vā padakāni katvā maggaphalāni nibbattetukāmassa
 tesam alābhe domanassassa uppajjane tāni tassa paccayā nāma honti iti te
 dhammā phalūpacārena “domanassan”ti vuttā. Yo pana tathā
 uppannadomanasso dhuranikkhepaṃ akatvā anukkamena vipassanam
 ussukkāpetvā maggaphaladhamme nibbatteti, te kāraṇūpacārena
 “**domanassan**”ti vuttāti imamatham dassento “**idha bhikkhū**”ti-ādimāha.
 Nanu etassa tadā domanassameva uppannam, na domanassahetukā
 vipassanāmaggaphaladhammā uppannā, tatha katham domanassasamaññam
 āropetvā voharatīti āha “**aññesam paṭipattidassanavasena domanassanti**
gahetvā”ti-ādi. **Savitakkasavicāradomanasseti** savitakkasavicāranimitte
 domanasse. Tīhi māsehi nibbattetabbā temāsikā, tam **temāsikam**. Imā ca
 temāsikādayo paṭipadā tathāpavatta-ukkaṭṭhamajjhimamudindriyavasena
 veditabbā, adhikamajjhimamudussāhavasena vā. **Jaggatīti** jāgarikam
 anuyuñjati.

Mahāsivattheravatthuvaṇṇanā

Sahassadvisahassasaṅkhyattā **mahāgaṇe**.

Aṭṭhakathātherāti aṭṭhakathāya atthapaṭipucchanakatherā.
Antarāmaggeti bhikkham gahetvā gāmato vihāram paṭigamanamagge. **Tayo**
-pa- gāhāpetvāti tīṇi cattāri uñhāpanāni.

Kenaci papañcenāti kenaci sarīrakiccabhūtena papañcena. **Saññaṃ akāsi** rattiyaṃ pacchayo gacchantāṃ asallakkhento.

Kasmā pana thero antevāsikānaṃ anārocetvāva gatoti āha “**thero kirā**”ti-ādi. **Arahattaṃ nāma kinti** tadadhigamassa adukkarabhāvaṃ sandhāya vadati. **Catūhi iriyāpathehīti** catūhipi iriyāpathehi pavattamānassa, tasmā yāva arahattādhigamā sayanaṃ paṭikkhipāmīti adhippāyo.

“**Anucchavikaṃ nu kho te etan**”ti saṃvegajāto vīriyaṃ samuttejento **arahattaṃ aggahesi** ettakaṃ kālaṃ vipassanāya suciṇṇabhāvato ñāṇassa paripākaṃ gatattā.

Parimajjīti parimasi. Keci pana “**parimajjīti** parivattetvā therena dhoviyamānaṃ pariggahetvā dhovī”ti atthaṃ vadanti.

Vipassanāya ārammaṇaṃ nāma upacārajjhānapaṭhamajjhānādi.

“**Savitakkasavicāradomanasse**”ti-ādīsu vattabbaṃ somanassesu vuttanayānusārena veditabbaṃ.

362. **Evarūpāti** yā akusalānaṃ abhibuddhiyā, kusalānaṃ parihānāya ca saṃvattati, evarūpā, sā pana kāmūpasañhitatāya “gehasitā”ti vuccatīti āha “**gehasita-upekkhā**”ti. “**Bālassa**”ti-ādīsu bālakaradhammayogato **bālassa** attahitaparahitabyāmūḷhatāya **mūḷhassa** puthūnaṃ kilesādīnaṃ jananādihi kāraṇehi **puthujjanassa** kilesodhīnaṃ maggo dhīhi ajitattā **anodhijinassa**, **odhijino** vāyapekkho odhiso ca¹ kilesānaṃ jitattā, tenassa sekkhabhāvaṃ paṭikkhipati. Sattamabhavādito uddhaṃ pavattanavipākassa ajitattā **avipākajinassa**, **vipākajinā** vā arahanto appaṭisandhikattā, tenassa asekkhattaṃ paṭikkhipati. Anekādīnave sabbesampi pāpadhammaṇaṃ mūlabhūte sammohe ādīnavānaṃ adassanasīlatāya **anādīnavadassāvino**. Āgamādhigamābhāvā **assutavato**. Ediso ekaṃsena andhaputhujjano nāma hotīti tassa andhaputhujjanabhāvaṃ dassetuṃ punapi “**puthujjanassa**”ti vuttaṃ. **Evarūpāti**

1. Odhijino vā sekkho odhisova (?)

vuttappakārā sammohapubbikā. **Rūpaṃ sā nātivattatī** rūpānaṃ samatikkamanāya kāraṇaṃ na hoti, rūpārammaṇe kilese nātikkamatī adhippāyo. Aññāṇāvibhūtatāya ārammaṇe ajjupekkhanavasena pavattamānā lobhasampayutta-upekkhā idhādhippetāti tassa lobhassa anucchavikameva ārammaṇaṃ dassento “**iṭṭhārammaṇe**”ti āha.

Anativattamānā anādīnavadassitāya. Tato eva assādānupassanato **tattheva laggā**. Abhisāṅgassa lobhassa vasena, dummocanīyatāya ca tena **laggitā** viya hutvā uppannā.

Evarūpāti yā akusalānaṃ pahānāya, kusalānañca abhibuddhiyā saṃvattati, evarūpā, sā pana pabbajjādivasena pavattiyā nekkhammūpasañhitāti āha “**nekkhammasitā**”ti. Idāni taṃ pāḷivasena dassetuṃ “**tattha katamā**”ti-ādi vuttaṃ, tassattho heṭṭhā vuttanayānusārena veditabbo. **Rūpaṃ sā ativattatī** rūpasmiṃ sammadeva ādīnavadassanato. Rūpaniyatāti¹ kilesehi anabhibhavanīyato. **Iṭṭheti** sabhāvato, saṅkappato ca iṭṭhe ārammaṇe. **Arajantassāti** na rajjantassa rāgaṃ anuppādentassa. **Aniṭṭhe adussantassāti** ettha vuttanayena attho veditabbo. Samaṃ sammā yoniso na pekkhanaṃ **asamapekkhanaṃ**, taṃ pana iṭṭhāniṭṭhamajjhatte viya iṭṭhāniṭṭhesupi bālassa hotīti “**iṭṭhāniṭṭhamajjhatte**”ti avatvā “**asamapekkhanena asammuyhantassā**”ti vuttaṃ, tividhepi ārammaṇe asamapekkhanavasena muyhantassāti attho. Vipassanā **ñāṇasampayuttā upekkhā**. Nekkhammasitā upekkhā **vedanāsabhāgā**ti udāsīnākārena pavattiyā, upekkhāvedanāya ca sabhāgā. **Ettha upekkhāvāti** ettha etasmiṃ upekkhānidese “**upekkhā**”ti gahitā eva. **Tasmāti** tatramajjhattupekkhā yapi idha upekkhāggahaṇena gahitattā. Tañhi sandhāya “**paṭhamadutiyatatiyacatutthajjhānavasena uppajjanaka-upekkhā**”ti vuttaṃ.

Tāyapi nekkhammasita-upekkhāyāti niddhāraṇe bhummaṃ. “**Yaṃ nekkhammavasenā**”ti-ādi heṭṭhā vuttanayattā uttānatthameva.

363. Yadi sakkassa tadā sotāpattiṭṭhalapattiyāva upanissayo. Atha kasmā Bhagavā yāva arahattaṃ desanaṃ vaḍḍhesīti āha “**buddhānañhi**”ti-ādi. **Taruṇasakkoti** abhinavo adhunā pātubhūto sakkoti.

1. Ādīnavadassanato, Rūpaniratchi (?)

sampati pātubhāvañhi sandhāya “taruṇasakko”ti vuttam, na tassa kumāratā, vuddhatā vā atthi. **Gatāgataṭṭhānanti** gamanāgamanakāraṇam. **Na paññāyati na** upalabbhati. Gabbhaseyyakānañhi cavantānam kammajarūpam vigacchati anudeva cittajam, āhārajañca paccayābhāvato, utujam pana sucirampi kālam pavenim ghaṭṭentam bhassantam vā sosantam vā kilesantam vā viṭṭhatam vā hoti, na evam devānam. Tesañhi opapātikattā kammajarūpe antaradhāyante sesatisantatirūpampi tena saddhim antaradhāyati. Tenāha **“dīpasikhāgamanam viya hoti”**ti. **Sesadevatā na jānimsu** punapi sakkattabhāvena tasmimyeva ṭhāne nibbattattā. **Tīsu ṭhānesūti** somanassadomanassa-upekkhāvissajjanāvasānaṭṭhānesu. **Nibbattitaphalamevāti** sappimhā sappimaṇḍo viya āgamanīyapaṭipadāya nibbattitaphalabhūtam lokuttaramaggaphalameva **kathitam**. **Sakuṇikāya viya** kiñci gayhūpagam **uppativā** uḍḍetvā ullaṅghitvā. **Assāti** maggaphalasaññitassa ariyassa dhammassa.

Pātimokkhasamvaravaṇṇanā

364. **Pātimokkhasamvarāyāti** pātimokkhabhūtasīlasamvarāyāti ayamettha atthoti āha **“uttamajetṭhakasīlasamvarāyā”**ti. “Pātimokkhasīlañhi sabbasīlato jetṭhakasīlan”ti dīghavāpīvihāravāsisumatthero vadati, antevāsiko panassa tepiṭakacūlanāgatthero “pātimokkhasamvaro eva sīlam, itarāni pana ‘sīlanti vuttaṭṭhānam nāma atthi’”ti ananujānanto indriyasamvaro nāma chadvārarakkhāmatkam, ājīvapārisuddhi dhammena samena paccayuppādanamattakam, paccayasannissitam paṭiladdhapaccaye ‘ida matthan’”ti paccavekkhitvā paribhuñjanamattakam, nippariyāyena pātimokkhasamvarova sīlam. Tathā hi yassa so bhinno, so itarāni rakkhitum abhābattā asīlo hoti. Yassa pana sabbaso arogo sesānam rakkhitum bhābattā sampannasīlo”ti vadati, tasmā itaresam tassa parivārabhāvato, sabbaso ekadesena ca tadantogadhabhāvato tadeva padhānasīlam nāmāti āha **“uttamajetṭhakasīlasamvarāyā”**ti. Tattha yathā heṭṭhā papañcasaññāsañkhānirodhasārūppagāminim paṭipadam pucchitena bhagavatā papañcasaññānam, paṭipadāya ca mūlabhūtam vedanam vibhajitvā paṭipadā desitā sakkassa ajjhāsayasasena samkilesadhammapphānamukhena vodānadhammapāripūrīti, evam tassā eva paṭipadāya mūlabhūtam sīlasamvaram pucchitena

bhagavatā yato so visujjhati, yathā ca visujjhati, tadubhayaṃ sakkassa ajjhāsayaavasena vibhajitvā dassetuṃ “**kāyasamācārampī**”ti-ādi vuttamā saṃkilesadhammapahānamukhena vodānadhammapāripūrīti katvā. Sīlakathāyaṃ asevitabbakāyasamācārādīkathane kāraṇaṃ vuttameva, tasmā **kammapathavasenā**ti kusalākusalakammapathavasena.

Kammapathavasenāti ca kammapathavicāravasena.

Kammapathabhāvaṃ apattānampi hi kāyaduccarītādīnaṃ asevitabbādīnaṃ asevitabbakāyasamācārādībhāvo idha vuccatīti. **Paṇṇattivasenā**ti sikkhāpadapaṇṇattivasena. Yato yato hi yā yā veramaṇī, tadubhayepi vibhāvento paṇṇattivasena katheti nāma. Tenāha “**kāyadvāre**”ti-ādi. Sikkhāpadaṃ vītikkamati etenāti **sikkhāpadavītikkamo**, sikkhāpadassa vītikkamanākārena pavatto akusaladhammoyaṃ, tassa asevitabbakāyasamācārādītā. Vītikkamapaṭipakkho **avītikkamo**, na vītikkamati etenāti **avītikkamo**, sīlaṃ.

Micchā, sammā ca pariyesati etāyāti **pariyesanā**, ājīvo, atthato paccayagavesanabyāpāro kāyavacīdvāriko. Yadi evaṃ kasmā viṣuṃ gahaṇanti āha “**yasmā**”ti-ādi. Ariyā niddosā pariyesanā gavesanāti **ariyapariyesanā**, ariyehi sādhuhi pariyesitabbātipi **ariyapariyesanā**ti. Vuttavipariyāyato **anariyapariyesanā** veditabbā.

Jātidhammoti jāyanasabhāvo jāyanapakatiko. **Jarādhammoti** jīraṇasabhāvo. **Byādhidhammoti** byādhisabhāvo. **Maraṇadhammoti** mīyanasabhāvo. **Sokadhammoti** socanakasabhāvo. **Saṃkilesadhammoti** saṃkilissanasabhāvo.

Puttabhariyanti puttā ca bhariyā ca. Esa nayo sabbattha.

Dvande-kattavasena tesamā niddeso. **Jātarūparajatanti** ettha pana yato vikāraṃ anāpajjitvā sabbaṃ jātarūpameva hotīti **jātarūpaṃ** nāma suvaṇṇaṃ. Dhavalasabhāvatāya rajatīti **rajataṃ**, rūpiyaṃ. Idha pana suvaṇṇaṃ ṭhapetvā yaṃ kiñci upabhogaparibhogārahaṃ “rajatan”tveva gahitaṃ vohārūpagamāsakādi. **Jātidhammā** hete **bhikkhave upadhayoti** etc kāmagaṇūpadhaya nāma honti, te sabbepi jātidhammāti dasseti.

Byādhidhammavārādisu jātarūparaḷataṃ na gaḷitaṃ. Na hetassa sīsarogādayo byādhayo nāma santi, na sattānaṃ viya cutisaṅkhātaṃ maraṇaṃ, na soke uppajjati, **cutisaṅkhātaṃ maraṇanti** ca ekabhavapariyāpannakhandhanirodho, so tassa natthi, khaṇikanirodho pana khaṇe khaṇe labbhateva. Rāgādīhi pana saṅkilesehi saṅkilissatīti **saṅkilesadhammavāre** gaḷitaṃ jātarūpaṃ, tathā utusamuṭṭhānattā **jātidhammavāre**, malaṃ gaḷetvā jīraṇato **jarādhammavāre ca**. Ariyehi na araṇīyā, pariyesanātipi **anariyapariyesanā**.

Idāni anesanāvaseṇāpi taṃ dassetuṃ “**apicā**”ti-ādi vuttaṃ. Iminā nayena sukkapakkehi attho veditaḷbo.

Sambhārapariyesanaṃ paharaṇavisādigavesanaṃ, payogavasena **payogakaraṇaṃ** tājāvāyāmajanaṃ tādisaṃ upakkamaṇibbattaṇaṃ, pāṇātipātādi-atthaṃ **gamaṇaṃ**, paccekaṃ **kāla**-saddo yojettaḷbo “sambhārapariyesanakālato paṭṭhāya, payogakaraṇakālato paṭṭhāya, gamaṇakālato paṭṭhāyā”ti. **Itaroti** “sevitattaḷbo”ti vuttakāyasamaṇcārādiko. **Cittampi uppādetattaṃ**. Tathā uppāditacitto hi sati paccayasamaṇvāye tādisaṃ payogaṃ parakkamaṃ karonto paṭipattiyā matthakaṃ gaṇhāti. Tenāha “cittuppādetampi kho ahaṃ bhikkhave kusalesu dhammesu bahupakāraṃ vadāmi”ti¹.

Idāni taṃ matthakappattaṃ asevitattaṃ, sevitattaṇca dassetuṃ “**apicā**”ti-ādi vuttaṃ. **Saṅghabhedādinanti ādi**-saddena lohituppādanādiṃ saṅgaṇhāti. Buddharatanaṃgharatanupaṭṭhāneheva dhammaratanupaṭṭhānasiddhīti āha “**divasassa dvattikkhattuṃ tiṇṇaṃ ratanānaṃ upaṭṭhānagamaṇādivaseṇā**”ti. **Dhanuggahapesanaṃ** dhanuggahapurisaṇaṃ uyyojaṇaṃ. **Ādi**-saddena paṇcavarayācaṇādiṃ saṅgaṇhāti. “Ajātasattūṃ pasādetvā lābhuppādasena pariḷhānalābhasakkārasa kulesu viṇṇāpanaṇ”ti evamaḷdiṃ anariyapariyesanaṃ pariyesantaṇaṃ.

Pāripūriyāti pāripūri-atthaṃ. Aggamaḷgaphalavaseneva hi sevitattaṇaṃ pāripūriti tadatthaṃ sabbā pubbabhāḷgapaṭipadā, pātimoḷkhasaṇvaropi aggamaḷgeneva

paripuṇṇo hotīti tadattham pubbhāgapaṭipadam vatvā nigamento
“pātimokkho -pa- hoti”ti āha.

Indriyasamvaravaṇṇanā

365. **Indriyānam pidhānāyāti** indriyānam pidahanatthāya. **Indriyāni** ca cakkhādāni dvārāni, tesam **pidhānam** samvaraṇam akusaluppattito gopānāti āha “**guttadvāratāyā**”ti. Asevitabbarūpādivasena indriyesu aguttadvāratā asaṃvaro, saṃkilesadhammavippahānavasena vodānadhammapārisuddhīti. Kāmam pāliyam asevitabbampi rūpādi dassitam, sakkena pana indriyasamvarāya paṭipatti pucchitāti tameva nivattetvā dassetum aṭṭhakathāyam vuttam “**cakkhuvīññeyyam rūpampī**”ti-ādi **sevitabbarūpādivasena indriyasamvaradassanattam vuttam**”ti. “Tuṇhī ahoṣī”ti vatvā tuṇhī bhāvassa kāraṇam byatirekamukhena vibhāvetum “**kathetukāmopī**”ti-ādi vuttam. **Ayanti** sakko devānamindo.

Rūpanti rūpāyatanam, tassa asevanam nāma adassanamevāti āha “**na sevitabbaram na datṭhabban**”ti. Yam pana sattasantānagatam rūpam **passato** paṭikūlamanasikāravasena, **asubhasaññā vā saṅṭhāti** dassanānuttariyavasena¹. Atha vā kammaphalasaddahanavasena **pasādo vā uppajjati**. Hutvā abhāvākārasallakkaṇena **aniccasaññāpaṭilābho vā hoti**.

Pariyāyakkharaṇato **akkharam**, vaṇṇo, so eva nirantaruppattiyā samuddito padavākyasaññito, adhippetamattham byañjetīti **byañjanam**, tayidam kābyanāṭakādigatavevacānavasena, uccāraṇavasena ca vicittasannivesatāya tathāpavattavikkappānavasena cittavicittabhāvena upatiṭṭhanakam sandhāyāha “**yam cittakkharam cittabyañjanampi saddam suṇato rāgādayo uppajjanti**”ti. **Atthanissitanti** samparāyikatthanissitam. **Dhammanissitanti** vivaṭṭadhammanissitam, lokuttararatanattayadhammanissitam vā. **Pasādoti** ratanattayasaddhā, kammaphalasaddhāpi. **Nibbidā vāti** aniccasaññādivasena vaṭṭato ukkaṇṭhā vā.

Gandharasāvīparodhādivasena seviyamānam ayoniso paṭipannattā **asevitabbaram** nāma. Yoniso paccavekkhitvā seviyamānam sampajāññavasena gahaṇato **sevitabbaram** nāma. Tena vuttam “**yam gandham ghāyato**”ti-ādi.

1. Dassanānuttariyavasena pasādo vā uppajjati (?)

Yaṃ pana phusatoti yaṃ pana sevitabbaṃ phoṭṭhabbaṃ anipphanasseva phusato. **Āsavakkhayo ceva** hoti jāgariyānuyogassa matthakappattito. **Vīriyañca supaggahitaṃ hoti** catutthassa ariyavaṃsassa ukkaṃsanato. **Pacchimā ca -pa- anuggahitā hoti** sammāpaṭipattiyāṃ niyojanato.

Ye **manoviññeyye dhamme** iṭṭhādibhede **samannāharantassa** āvajantassa **āpāthaṃ āgacchanti**. “Manoviññeyyā dhammā”ti vibhatti vipariṇāmetabbā, mettādivasena samannāharantassa ye manoviññeyyā dhammā āpāthaṃ āgacchanti, evarūpā sevitabbāti yojanā. **Ādi-saddena** karuṇādīnañceva aniccādīnañca saṅgaho daṭṭhabbo. **Tiṇṇaṃ therānaṃ dhammā**ti idāni vuccamānapaṭipattīnaṃ tiṇṇaṃ therānaṃ manoviññeyyā dhammā. **Bahi dhāvituṃ na adāsinti** antopariveṇaṃ āgatameva rūpādīnā ārabha imasmiṃ temāse kammaṭṭhānavinimuttaṃ cittaṃ kadāci uppannapubbaṃ, antopariveṇe ca visabhāgarūpādīnaṃ asambhavo eva, tasmā visaṭavittakkavasena cittaṃ bahi dhāvituṃ na adāsinti dasseti. **Nivāsagehato** nivāsanagabbhato. **Niyakajjhatakkhandhapañcakato** vipassanāgocarato. Thero kira sabbampi attanā kātabbakiriyaṃ kammaṭṭhānasīseneva paṭipajjati.

366. Asammohasampajaññavasena advejjhābhāvato eko anto etassāti **ekanto**, ekanto vādo etesanti **ekantavādā**. Tenāha “**ekānyeva vadantī**”ti, abhinnavādāti attho. **Ekācārāti** samānācārā. **Ekaladdhikāti** samānaladdhikā. **Ekapariyosānāti** samānaniṭṭhānā.

Iti sakko pubbe attanā suttaṃ puthusamaṇabrāhmaṇānaṃ nānāvādācāraladdhiniṭṭhānaṃ idāni saccapaṭivedhena asārato ñatvā ṭhito, tassa kāraṇaṃ ñātukāmo tameva tāva byatirekamukhena pucchati, “sabbeva dhammā nu kho”ti-ādīnā.

Dhātūti ajjhāsaya dhātu uttarapadalopena vuttā, **ajjhāsaya dhātūti** ca atthato ajjhāsayo evāti āha “**anekajjhāsaya nā ajjhāsayo**”ti. “**Ekasmim gantukāme eko ṭhātukāmo hoti**”ti idaṃ nidassanavasena vuttaṃ iriyāpathepi nāma sattā ekajjhāsaya dullabhā,

pageva laddhīsūti dassanattham. **Yaṃ yadeva ajjhāsayaṃti** yaṃ yaṃ eva sassaṭādi-ajjhāsayaṃ. **Abhinivisaṃti** taṃ taṃ laddhiṃ diṭṭhābhinivesavasena abhimukhā hutvā duppaṭinissaggibhāvena nivisaṃti, ādānaggāhaṃ **gaṇhanti**. **Thāmena ca parāmāseṇa cāti** diṭṭhithāmena ca diṭṭhiparāmāseṇa ca. **Suṭṭhu gaṇhitvāti** ativiya dalhaggāhaṃ gaṇhitvā. **Voharaṃti** yathābhiniviṭṭhaṃ diṭṭhivādaṃ paññāpenti parehi gāhenti patiṭṭhapenti. Tenāha “**kathenti dīpenti kittenti**”ti, ugghosenti attho.

Antaṃ atitā **accantā**, accantā niṭṭhā etesaṃti **accantaniṭṭhā**. **Sabbesaṃti** sabbesaṃ samaṇabrāhmaṇānaṃ. **Yogakkhemoti**pi nibbānaṃ catūhipi yogehi anuppaduṭṭhattā. “Accantayogakkhemā”ti vattabbe i-kāreṇa niddesena “**accantayogakkhemī**”ti vuttam, accantayogakkhemo vā etesaṃ atthīti **accantayogakkhemīti**. **Caranti** upagacchanti, adhigacchantīti attho. Pariyassati parikkhissati vaṭṭadukkhantaṃ āgammāti **pariyosānantipi nibbānassa nāmaṃ**.

Saṅkhiṇātiti samucchindanena khepeti. **Vināseti**ti tato eva sabbaso adassanaṃ pāpeti. **Vimuttāti** vaṭṭadukkhato accantaniggamena visesena muttā.

“Issāmacchariyaṃ eko paṇho”ti kasmā vuttam, nanu issāmacchariyaṃ vissajjananti? Saccametaṃ, yo pana ñātuṃ icchito attho, so paṇho. So eva ca vissajjīyatīti nāyaṃ doso, aññathā ambaṃ puṭṭhassa labujam byākaraṇam viya siyā, evaṃ paṇhasisena paṇhabyākaraṇam vadati. Tathā hi “piyāppiyaṃ”ti-ādinā vissajjanapadāneva gahitāni, “**piyāppiyaṃ eko**”ti-ādisupi eseva nayo. **Papañcasaññāti** saññāsīsena papañcā eva vuttāti āha “**papañco eko**”ti. Ettha ca yathā pātimokkhasamvarapucchā kāyasamācārādivibhāgena vissajjitattā tayo paṇhā jātā, evaṃ indriyasamvarapucchā rūpādivibhāgena vissajjitattā cha paṇhā siyurū. Tathā sati ekūnavīsati pucchā siyurū, atha indriyasamvaratāsāmaññena ekova paṇho kato, evaṃ sati pātimokkhasamvarapucchābhāvasāmaññena tepi tayo ekova paṇhoti sabbeva dvādaseva paṇhā bhavēyyūnti? Nayidamevaṃ. Yasmā kāyasamācārādisu vibhajja vuccamānesu mahāvisayatāya aparimāṇo vibhāgo

sambhavati vissajjetum. Sakalampi vinayapiṭakam tassa niddeso. Rūpādīsu pana vibhajja vuccamānesu appavisayatāya na tādīso vibhāgo sambhavati vissajjetum. Iti mahāvisayatāya pātimokkhasamvarapucchā tayo pañhā katā, indriyasamvarapucchā pana appavisayatāya ekova pañho kato. Tena vuttam “cuddasa mahāpañhā”ti.

367. **Calanaṭṭhenā**ti kampanaṭṭhena. Taṇhā hi kāmarāgarūparāga-arūparāgādivasena pavattiyā anavaṭṭhitatāya sayampi calati, yattha uppannā, tampi santānam bhavādīsu parikaḍḍhanena cāleti, tasmā calanaṭṭhena taṇhā ejā nāma. **Pīlanaṭṭhenā**ti vibādhanatṭhena tassa tassa dukkhassa hetubhāvena. **Padussanaṭṭhenā**ti adhammarāgādibhāvena, sammukhaparammukhena, kilesāsucipaggharaṇena ca pakārato dussanaṭṭhena **gaṇḍo**. **Anuppaviṭṭhatṭhenā**ti āsayassa dunnīharaṇīyabhāvena anuppavisanaṭṭhena. **Kaḍḍhati** attano ca ruciyā upaneti. **Uccāvacanti** paṇītabhāvam, nihīnabhāvañca. **Yesū** samaṇabrāhmaṇesu. “yesāhan”tipi pāli, tassā keci “yesam ahan”ti attham vadanti. **Evanti** sutānurūpaṃ, uggahānurūpañca. “Aham kho pana bhante aññesam samaṇabrāhmaṇānam dhammācariyo hontopi bhagavato sāvako -pa- sambodhiparāyaṇo”ti evam **attano sotāpannabhāvam jānāpeti**.

Somanassa paṭilābhakathāvaṇṇanā

368. **Samāpannoti** samogāḷho pavattasampahāro viyātibyūḷho. **Jinimsūti** yathā asurā puna sīsam ukkhipitum nāsakkhimsu, evam devā vijinimsuyevāti dassento āha “**devā puna apaccāgamanāya asure jinimsū**”ti. Tādīso hissa jayo sātīsayam vedapaṭilābhāya ahoṣi. **Duvidhampi** ojanti dībbam, asuram cāti dvippakārampi ojam. **Devāyeva** paribhuñjissanti asurānam pavesābhāvato. Daṇḍassa avacaraṇam āvaraṇam **daṇḍāvacaro**, saha daṇḍāvacarenāti **sadaṇḍāvacaro**, daṇḍena paharītvā vā āvarītvā vā sādhetabbanti attho.

369. **Imasmimyeva okāseti** imissam eva indasālaguhāyam. **Devabhūtassa meti** pubbepi devabhūtassa sakkasseva me bhūtassa. **Satoti** idānīpi sakkasseva sato **punarāyu ca me laddho**.

Diviyā kāyāti **dibbā**, khandhapañcakasaṅkhātā kāyāti āha “**dibbā attabhāvā**”ti. “**Amūlho gabbhamesāmī**”ti iminā ariyasāvakanāṃ andhaputhujjanānaṃ viya sammohamaraṇaṃ, asampajānagabbhokkamanañca natthi, atha kho asammohamaraṇañceva sampajānagabbhokkamanañca hotīti dasseti. Ariyasāvakā niyatagatikattā sugatīsu eva uppajjanti, tatthāpi manussesu uppajjantā uḷāresu eva kulesu paṭisandhiṃ gaṇhissanti, sakkassāpi tādiso ajjhāsayo. Tena vuttaṃ pāliyaṃ “yattha me ramatī mano”ti, taṃ sandhāyāha “**yattha me**”ti-ādi. Sakko pana attano dibbānubhāvenāpi tādisaṃ jānituṃ sakkotiyeva.

Kāraṇenāti yuttena ariyasāvakabhāvassa anucchavikena. Tenāha “**samenā**”ti.

Sakadāgāmimaggaṃ sandhāya vadati chaṭṭhe atthavase anāgāmimaggassa vakkhamānattā. **Ājānitukāmoti** appattavisesaṃ paṭivijjhītukāmo. **Manussaloke anto bhavissati** puna mānussūpapattiyā abhāvato.

Punadevāti manussesu uppanno tato cavitvā punadeva. Imasmim tāvatiṃsadevalokasmim. **Uttamo**, kīdisoti āha “**sakko**”ti-ādi.

Antime bhaveti mama sabbabhavesu antime sabbapariyosāne bhave. “**Āyuna**”ti iminā ca taṃsahabhāvino sabbepi vaṇṇādike saṅgaṇhāti. “**Paññāyā**”ti ca iminā sabbepi saddhāsativīriyādike. **Tasmim attabhāveti** tasmim sabbantime sakkattabhāve. **Akaniṭṭhagāmī hutvāti** antarāyapariniḃbāyi-ādibhāvaṃ anupagantvā ekāmsato uddhāmsoto akaniṭṭhagāmī eva hutvā. Tato eva anukkamena **avihādīsu nibbattanto**. **Evamāhāti** “so nivāso bhavissatī”ti evamāha. “Avihādīsu -pa- nibbattissatī”ti saṅkhepato vuttamatthaṃ vivarituṃ “**esakirā**”ti-ādi vuttaṃ. Ayañca nayo na kevalaṃ sakkasseva, atha kho mahāseṭṭhimahā-upāsikānampi hotiyevāti dassento “**sakko devarājā**”ti-ādimāha.

370. Bhavasampattinibbānasampattīnaṃ vasena aparipuṇṇajjhāsayatāya **aniṭṭhitamanoratho** taṃ taṃ pattukāmoyeva hutvā ṭhito. **Ye ca**

samaṇeti ye ca pabbajite. **Pavivittavihārinoti** “anekavivekattayaṃ paribrūhetvā viharanti”ti **maññāmi**.

Sampādanāti maggassa upasampādanam tassa sampāpanam sammadeva pāpanam¹. **Virāadhanā**ti anārāadhanā anupāyapaṭipatti. **Na sambhontī**² anabhisambhuṇanti. Yathāpucchite atthe anabhisambhuṇanam nāma sammā kathetuṃ asamatthatā evāti āha “**sampādetvā kathetuṃ na sakkontī**”ti.

Tasmāti yasmā ādiccena samānagottatāya. Tenevāha “**ādiccanāmaggottenā**”ti, tasmā. Ādicco bandhu etassāti ādiccabandhu, atha vā ādiccassa bandhūti ādiccabandhu, Bhagavā, tam **ādiccabandhunam**. Ādicco hi sotāpannatāya Bhagavato orasaputto. Tenevāha—

“Yo andhakāre tamasi pabhaṅkaro,
Verocano maṇḍalī uggatejo.
Mā rāhu gilī caramantalikkhe,
Pajam mamaṃ rāhu pamuṅca sūriyan”ti³.

Sāmanti sāmampayogaṃ, satthu pana sāvakassa sāmampayogo nāma sanipāto⁴ evāti āha “**namakkāram karomā**”ti.

371. **Parāmasitvā**ti “imāya nāma pathaviyaṃ nisinnena mayā ayaṃ acchariyadhammo adhigato”ti somanassajāto, imāya nāma pathaviyaṃ evaṃ acchariyabbhutaṃ Buddharatanam uppannaṃ”ti acchariyabbhutacittajāto ca pathaviṃ parāmasitvā. **Patthitapañhā**ti dīgharattānusayitasamsayasamuggahātattam “kadā nu kho Bhagavantam pucchituṃ labhāmī”ti evaṃ abhipatthitapañhā. Yaṃ panettha atthato na vibhattam, tam suviññeyyamevāti.

Sakkapañhasuttavaṇṇanāya līnatthappakāsanā.

1. Tassa sambharaṇam sammadeva sambharaṇam. (Ka)

2. Na sampāyanti (Pāḷiyam)

3. Sam 1. 49 piṭṭhe.

4. Paṇipāto. (?)

9. Mahāsatipaṭṭhānasutta

Uddesavāra-kathāvaṇṇanā

373. “Kasmā Bhagavā idam suttamabhāsī”ti asādhāraṇam samuṭṭhānam pucchati, sādharmaṇam pana “pākaṭan”ti anāmasitvā “**kururaṭṭhavāsīnan**”ti-ādi vuttam. **Samuṭṭhānanti** hi desanānidānam, tam sādharmaṇāsādhāraṇabhedato duvidham, sādharmaṇampi ajjhattikabāhirabhedato duvidham. Tatha **sādharmaṇam ajjhattikam samuṭṭhānam** nāma Bhagavato mahākaruṇā. Tāya hi samussāhitassa Bhagavato veneyyānam dhammadesanāya cittam udapādi. Yathāha “sattesu ca kāruṇīyatam paṭicca Buddhacakkhunā lokam volokesī”ti-ādi¹. **Bāhiram** pana **sādharmaṇam samuṭṭhānam** nāma dasasahassamahābrahmaparivārassa sahapatimahābrahmuno ajjhesanam. Tathā cāha “brahmuno ca ajjhesanam veditvā”ti¹. Tadajjhesanuttarakālaṇhi dhammapaccavekkhaṇājanitam appossukkataṃ paṭipassambhetvā Bhagavā dhammam desetuṃ ussāhajāto ahoṣi. Yathā ca mahākaruṇā, evam dasabalaṇṇādayo ca desanāya ajjhattasamuṭṭhānabhāve vattabbā. Sabbaṇhi ñeyyadhammam, tesam desetabbappakāram, sattānaṇca āsayānusayādim yāthāvato jānitvā Bhagavā ṭhānāṭṭhānādīsu kosallena veneyyajjhāsāyānurūpaṃ vicittanayadesanam pavattesīti. Asādhāraṇampi ajjhattikabāhirabhedato duvidhameva. Tatha **ajjhattikam** yāya mahākaruṇāya, yena ca desanāṇṇena idam suttam pavattitam, tadubhayam veditabbam, **bāhiram** pana dassetuṃ “**kururaṭṭhavāsīnan**”ti-ādimāha. Tena vuttam “asādhāraṇam samuṭṭhānam pucchati”ti, tena “attajjhāsāyādīsu catūsu suttanikkhepesu kataroyan”ti suttanikkhepo pucchito hotīti itaro “kururaṭṭhavāsīnan”ti-ādinā “parajjhāsāyoyam suttanikkhepo”ti dasseti.

Kururaṭṭham kira tadā tamnivāsisattānam yonisomanasikāravantatādīnā yebhuyyena suppaṭipannatāya, pubbe ca katapuṇṇatābalena tadā utu-ādisampattiyuttameva ahoṣi. Tena vuttam “**utupaccayādisampannattā**”ti. **Ādi**-saddena bhojanādisampattim saṅgaṇhāti. Keci pana

1. Dī 2. 33; Ma 1. 225; Ma 2. 293; Saṃ 1. 139; Vi 3. 9 piṭṭhesu.

“pubbe pavattakuruvattadhammānuṭṭhānavāsanāya uttarakuru viya yebhuyyena utu-ādisampannameva hontaṃ bhagavato kāle sātisaṃ utusappāyādiyuttaṃ taṃ raṭṭhaṃ ahoṣi”ti vadanti. **Cittasarīrakallatāyāti** cittassa, sarīrassa ca arogatāya. **Anuggahitapaññābalāti** laddhūpakārañānubhāvā, anu anu vā āciñṇapaññātejā. **Ekavīsatiyā ṭhānesūti** kāyānupassanāvasena cuddasasu ṭhānesu, vedanānupassanāvasena ekasmim ṭhāne, tathā cittānupassanāvasena, dhammānupassanāvasena pañcasu ṭhānesūti evaṃ ekavīsatiyā ṭhānesu. **Kammaṭṭhānaṃ arahatte pakkhipitvāti** catusaccakammaṭṭhānaṃ yathā arahattaṃ pāpeti, evaṃ desanāvasena arahatte pakkhipitvā. Suvaṇṇacaṅkoṭakasuvaṇṇamañjūsāsu pakkhittāni sumanacampakādīnānāpupphāni, maṇimuttādisattaratanāni ca yathā bhājanasampattiyā savisesaṃ sobhanti, kiccakarāni ca honti manuññabhāvato, evaṃ sīladassanādisampattiyā bhājanavisesabhūtāya kururaṭṭhavāsiparisāya desitā Bhagavato ayaṃ desanā bhīyyoso mattāya sobhati, kiccakārī ca hotīti imamatthaṃ dasseti “**yathā hi puriso**”ti-ādīnā. **Etthāti** kururaṭṭhe.

Pakatiyāti¹ sarasatopi, imissā satipaṭṭhānasuttadesanāya pubbepīti adhippāyo. **Anuyuttā viharanti** satthu desanānusārato bhāvanānuyogaṃ.

Vissatṭha-attabhāvenāti aniccādivasena kismiñci yonisomanasikāre cittaṃ aniyojetvā rūpādi-ārammaṇe abhirativasena vissatṭhacittena **bhavitum na vaṭṭati**, pamādavihāraṃ pahāya appamattena bhavitabbanti adhippāyo.

Ekāyanoti ettha **ayana**-saddo maggapariyāyo. Na kevalaṃ ayanameva, atha kho aññepi bahū maggapariyāyāti paduddhāraṃ karonto “maggassa hī”ti-ādīni vatvā yadi maggapariyāyo ayana-saddo, kasmā puna “maggio”ti vuttanti codanaṃ sandhāyāha “**tasmā**”ti-ādi. Tattha **ekamaggoti** eko eva maggo. Na hi nibbānagāmimaggo añño atthīti. Nanu satipaṭṭhānaṃ idha maggoti adhippetam, tadaññe ca bahū maggadhammā atthīti? Saccam atthi, te pana satipaṭṭhānaggahaṇeneva gahitā tadavinābhāvato.

1. Pakatiyā cāti (?)

Tathā hi nāṇavīriyādayo niddese gahitā, uddese pana satiyā eva gahaṇaṃ veneyyajjhāsavasenāti daṭṭhabbaṃ. **“Na dvidhāpathabhūto”**ti iminā imassa maggassa anekamagghabhāvābhāvaṃ viya anibbānagāmbhāvābhāvaṃ dasseti. **Ekenāti** asahāyena. Asahāyatā ca duvidhā attadutiyaṭābhāvena vā, yā **“vūpakaṭṭhakāyatā”**ti vuccati, taṇhādutiyaṭābhāvena vā, yā **“pavivittacittatā”**ti vuccati. Tenāha **“vūpakaṭṭhena pavivittacittena”**ti. Seṭṭhopi loke **“eko”**ti vuccati **“yāva pare ekāhaṃ vo karomī”**ti-ādīsūti āha **“ekassāti seṭṭhassā”**ti. Yadi saṃsārato nissaraṇaṭṭho ayaṇaṭṭho, aññesampi upanissayasampannānaṃ sādharmaṇato kathaṃ bhagavatoti āha **“kiñcāpī”**ti-ādi. **Imasmim khoti** ettha **kho**-saddo avadhāraṇe, tasmā imasmim yevāti attho. **Desanābhedoyeva heso**, yadidaṃ **“maggo”**ti vā **“ayano”**ti vā. **Ayana**-saddo vā kammakaraṇādivibhāgo. Tenāha **“atthato pana ekovā”**ti.

Nānāmukhabhāvanāyappavattoti kāyānupassanādimukhena tatthāpi ānāpānādimukhena bhāvanāyena pavatto. **Ekāyananti** ekagāmināṃ, nibbānagāminanti attho. Nibbānañhi adutiyaṭābhāvato, seṭṭhabhāvato ca **“ekan”**ti vuccati. Yathāha **“ekam hi saccam na dutiyamatthi”**ti¹, **“yāvata bhikkhave dhammā saṅkhatā vā asaṅkhatā vā virāgotesam aggamakkhāyatī”**ti². Khayo eva antoti **khayanto**, jātiyā khayantaṃ diṭṭhavāti **jātikhayantadassī**. Avibhāgena sabbepi satte hitena anukampatīti **hitānukampī**. **Atarimsūti** tarimsu. **Pubbeti** purimakā buddhā, pubbe vā atītakāle.

Tanti taṃ tesam vacanaṃ, **taṃ** vā kiriyāvuttivācakattaṃ **na yujjati**. Na hi saṅkhyeyyappadhānatāya sattavācino ekasaddassa kiriyāvuttivācakatā atthi. **“Sakimpi uddham gaccheyyā”**ti-ādīsu³ viya **sakim ayanoti iminā byañjanena bhavitabbaṃ**. **Evam attham yojetvāti** **“ekam ayanamassā”**ti evam samāsapadatthaṃ yojetvā. **Ubhayathāpīti** purimanayena, pacchimanayena ca. **Na yujjati** idhādhippetamaggassa anekavāraṃ pavattisabbhāvato. Tenāha **“kasmā”**ti-ādi. **“Anekavārampi ayatī”**ti purimanayassa ayuttatādassanaṃ, **“anekañcassa ayanam hotī”**ti pacchimanayassa.

1. Khu 1. 416 piṭṭhe Suttanipāte.

2. Am 1. 343; Khu 1. 254 piṭṭhesu.

3. Am 2. 499 piṭṭhe.

Imasmim padeti “ekāyano ayaṃ bhikkhave maggo”ti imasmim vākye imasmim vā “pubbabhāgamaggo, lokuttaramaggo”ti vidhānapade.

Missakamaggoti lokiyena missako lokuttaramaggo. Visuddhi-ādīnaṃ nippariyāyahetukaṃ saṅgaṇhanto ācariyatthero “**missakamaggo**”ti āha. Itaro pariyāyahetu idhādhippetoti “**pubbabhāgamaggo**”ti avoca.

Saddaṃ sutvāvāti “kālo bhante dhammasavanāyā”ti kālārocanasaddaṃ paccakkhato, paramparāya ca sutvā. **Evam ukkhipitvāti** evaṃ “sundaraṃ manoharaṃ imaṃ kathaṃ chaḍḍema”ti achaddentā ucchubhāraṃ viya paggahetvā **na vicaranti**. **Āluletīti** viluḷito ākulo hotīti attho. **Ekāyanamaggo vuccati pubbabhāgasatipatthānamaggoti** ettāvata idhādhippetatthe siddhe tasseva alaṅkāratthaṃ so pana yassa pubbabhāgamaggo, taṃ dassetuṃ “**maggānatthāngiko**”ti-ādikā gāthāpi paṭisambhidāma ggatova ānetvā ṭhapitā.

Nibbānagamaṇaṭṭhenāti nibbānaṃ gacchati adhigacchati etenāti nibbānagamaṇaṃ, soyeva aviparītasabhāvatāya attho, tena nibbānagamaṇaṭṭhena nibbānādhiagamūpāyatāyāti attho. **Magganīyaṭṭhenāti** gavesitabbatāya. “Gamanīyaṭṭhenā”ti vā pāṭho, upagantabbatāyāti attho. “**Rāgādīhī**”ti iminā rāgadosamohānaṃyeva gahaṇaṃ “rāgo malaṃ, doso malaṃ, moho malan”ti¹ vacanato. “**Abhijjhāvisamalobhādīhī**”ti pana iminā sabbesampi upakkilesānaṃ saṅgaṇhanatthaṃ te visuṃ uddhaṭā. “Sattānaṃ visuddhiyā”ti vuttassa atthassa ekantikataṃ dassento “**tathā hī**”ti-ādimāha. Kāmaṃ “visuddhiyā”ti sāmāññajotanā, cittasseva pana visuddhi idhādhippetāti dassetuṃ “**rūpamalavasena panā**”ti-ādi vuttaṃ. Na kevalaṃ aṭṭhakathāvacanameva, atha kho idamettha āhaccabhāsītanti dassento “**tathā hī**”ti-ādimāha.

Sā panāyaṃ cittavisuddhi sijjhamānā yasmā sokādīnaṃ anuppādāya saṃvattati, tasmā vuttaṃ “**sokaparidevānaṃ samatikkamāyā**”ti-ādi. Tattha socanaṃ ñātibyasanādinimittaṃ cetaso santāpo antonijjhānaṃ **soko**. Ñātibyasanādinimittameva sokāvatiṇṇato “kahaṃ ekaputtaka kahaṃ ekaputtakā”ti-ādīnā² paridevanavasena vācāvippalāpo

1. Abhi 2. 382 piṭṭhe.

2. Ma 2. 309, 310; Saṃ 1. 323 piṭṭhe.

paridavanam̐ **paridevo**. Āyatim̐ anuppajjanam̐ idha samatikkamoti āha “**pahānāyā**”ti. Tam̐ panassa samatikkamāvahatam̐ nidassanavasena dassento “**ayañhī**”ti-ādimāha.

Tattha **yam̐ pubbe, tam̐ visodhehīti** atītesu khandhesu taṇhāsam̐kilesavisodhanam̐ vuttam̐. **Pacchāti** parato. **Teti** tuyham̐. **Māhūti** mā ahu. **Kiñcananti** rāgādikiñcanam̐, etena anāgatesu khandhesu sam̐kilesavisodhanam̐ vuttam̐. **Majjheti** tadubhayavemajjhe. **No ce gahessasīti** na upādiyissasi ce, etena paccuppanne khandhappabandhe upādānappavatti vuttā. **Upasanto carissasīti** evam̐ addhattayagatasam̐kilesavisodhane sati nibbutasabbapariḷāhatāya upasanto hutvā viharissasīti arahattanikūṭena gātham̐ niṭṭhapesi. Tenāha “**imam̐ gāthan**”ti-ādi.

Puttāti orasā, aññepi vā dinnakakittimādayo ye keci. **Pitāti** janako, aññepi vā pituṭṭhāniyā. **Bandhavāti** ñātakā. Ayañhettha attho—puttā vā pitā vā bandhavā vā **antakena** maccunā **adhipannassa** abhibhūtassa maraṇato tāṇāya na honti. Kasmā? **natthi ñātīsu tāṇatāti**. Na hi ñātīnam̐ vasena maraṇato ārakkhā atthi, tasmā paṭācāre “ubho puttā kālaṅkatā”ti-ādinā¹ mā niratthakam̐ paridevi, dhammam̐yeva pana yāthāvato passāti adhippāyo. **Sotāpattiphalepatiṭṭhitāti** yathānulomam̐ pavattitāya sāmukkam̐sikāya dhammadesanāya pariyosāne sahasanayapaṭimaṇḍite sotāpattiphale patiṭṭhahi. Katham̐ panāyam̐ satipaṭṭhānamaggavasena sotāpattiphale patiṭṭhāsīti āha “**yasmā panā**”ti-ādi. Na hi catusaccakammaṭṭhānakathāya vinā sāvakānam̐ ariyamaggādhigamo atthi. “**Imam̐ gātham̐ sutvā**”ti pana idam̐ sokavinodanavasena pavattitāya gāthāya paṭhamam̐ sutattā vuttam̐, sāpi hi saccadesanāya parivārabandhā eva aniccatākathāti katvā. Itaragāthāyam̐ pana vattabbameva natthi. **Bhāvanāti** paññābhāvanā. Sā hi idha adhippetā. **Tasmāti** yasmā rūpādīnam̐ aniccādito anupassanāpi satipaṭṭhānabhāvanāva, tasmā. **Tepīti** santatimahāmattapaṭācārāpi.

1. Khu 4. 238 piṭṭhe.

Pañcasate coreti satasatacoraparivāre pañcacore paṭipāṭiyā **pesesi**, te araññaṃ pavisitvā theram̐ pariyesantā anukkamena therassa samīpe samāgacchimsu. Tenāha “**te gantvā theram̐ parivāretvā nisidimsū**”ti. **Vedanam̐ vikkhambhetvā**ti ūruṭṭhibhedapaccayaṃ dukkhavedanam̐ amanasikārena vinodetvā. **Pītipāmojjam̐ uppajji** vippaṭisāralesassapi asambhavato. Tenāha “**parisuddham̐ sīlam̐ nissāyā**”ti. Therassa hi sīlam̐ paccavekkhato parisuddham̐ sīlam̐ nissāya uḷāram̐ pītipāmojjam̐ uppajjamānam̐ ūruṭṭhibhedajanitam̐ dukkhavedanam̐ vikkhambhesi. **Tiyāmarattinti** accantasamyoge upayogavacanam̐, tenassa vipassanāyam̐ appamādam̐, paṭipatti-ussukkāpanaṅca dasseti. **Pādānīti** pāde. **Saṅnyamessāmīti**¹ saññapessāmi, saññattim̐ karissāmīti attho. **Aṭṭiyāmīti** jgucchāmi. **Harāyāmīti** lajjāmi. **Vipassisanti** sampassim̐.

Pacalāyantānanti pacalāyikānam̐ niddam̐ upagatānam̐. **Agatinti** agocaram̐. **Vatasampannoti** dhutaguṇasampanno. **Pamādanti** pacalāyanam̐ sandhāyāha. **Oruddhamānasoti** uparuddha-adhicitto. **Pañjarasminti** sarīre. Sarīrañhi nhārusambandha-aṭṭhisañghāṭatāya idha “pañjaran”ti vuttam̐.

Pītavaṇṇāya pana paṭākāya kāyam̐ pariharaṇato, mallayuddhacittakatāya ca “pītamallo”ti paññāto pabbajitvā **pītamallatthero nāma** jāto. **Tisu rajjesūti** paṇḍucolaḷarajjesu. “Sabbamallā sihaḷadīpe sakkarasammānam̐ labhanti”ti **tambapaṇṇidīpam̐ āgamma**. **Taṃyeva aṅkusam̐ katvā**ti “rūpādayo ‘mamā’ti na gahetabbā”ti Natumhākavaggena pakāsitamattam̐ attano cittamattahatthino aṅkusam̐ katvā. **Pādesu avahantesūti** ativelam̐ caṅkamanena akkamitum̐ asamatthesu. **Jaṇṇukehi caṅkamati** “nisinne niddāya avasaro hoti”ti. **Byākaritvā**ti attano vīriyārambhassa saphalatāpavedanamukhena sabrahmacārīnam̐ tattha ussāham̐ janento aññaṃ byākaritvā. **Bhāsītanti** vacanam̐, kassa pana tanti āha “**buddhassetṭhassa sabbalokaggavādino**”ti. “**Na tumhākan**”ti-ādi tassa pavatti-ākāradassanam̐. Tayidam̐ me saṅkhārānam̐ accantavūpasamakāraṇanti dassento “**aniccā vatā**”ti gāthamāhari, tena idānāham̐ saṅkhārānam̐ khaṇe khaṇe bhaṅgasañkhātassa rogassa abhāvena arogo parinibbutoti dasseti.

1. Saññapessāmi (Aṭṭhakathāyam̐)

Assāti sakkassa. **Upapattīti** devūpapatti. **Puna pākatikāva ahoṣi** sakkabhāveveva upapannattā.

Subrahmāti evaṃnāmo. Accharānaṃ nirayūpapattim disvā tato pabhuti satataṃ pavattamānaṃ attano cittutrāsaṃ sandhāyāha “**niccaṃ ustrastamidaṃ cittaṃ**”ti-ādi. Tattha **ustrastanti** santasta bhītaṃ. **Ubbigganti** saṃvaggam. **Ustrastanti** vā saṃvaggam. **Ubbigganti** bhayavasena saha nissayena sañcalitaṃ. **Anuppannesūti** anāgatesu. **Kiccesūti** tesu tesu itikattabbesu. “**Kicchesū**”ti vā pāṭho, dukkhesūti attho, nimittatthe cetam bhummaṃ, bhāvidukkhānimittanti attho. **Uppatitesūti** uppannesu kiccesūti yojanā. Tadā attano parivārassa uppannaṃ dukkhaṃ sandhāya vadati.

Bojjhāti bodhito, ariyamaggatoti attho. “**Aññatrā**”ti ca padaṃ apekkhitvā nissakkavacanaṃ, bodhim ṭhapetvāti attho. Sesesupi eveda nayo. **Tapasāti** tapokammato, tena maggādhiḡamaṃ upāyabhūtaṃ sallekhaṇaṭṭipadaṃ dasseti. **Indriyasamvarāti** manacchaṭṭhānaṃ indriyānaṃ saṃvaraṇato, etena satisaṃvarasīna sabbampi saṃvarasīlaṃ, lakkhaṇaḡānaṃ vā sabbampi catupārisuddhisīlaṃ dasseti. **Sabbanissaggāti** sabbassapi nissajjanato sabbakilesappahānato. Kilesesu hi nissatṭhesu kammavattānaṃ, vipākaṇaṇca nissatṭhameva hotīti. **Sotthinti** khemaṃ anupaddavataṃ.

Ñāyati nicchayena kamati nibbānaṃ, taṃ vā ñāyati paṭivijjhīyati etenāti **ñāyo**, ariyamaggoti āha “**ñāyo vuccati ariyo aṭṭhaṅgiko maggo**”ti. **Taṇhāvānavirahitattāti** taṇhāsaṅkhātavānavivittattā. Taṇhā hi khandhehi khandhaṃ, kammaṇā phalaṃ, sattehi ca dukkhaṃ vinati saṃsibbatīti “vānaṃ”ti vuccati, tayidaṃ natthi ettha vānaṃ, na vā etasmiṃ adhigate puggalassa vānanti **nibbānaṃ**, asaṅkhatā dhātu. Parappaccayena vinā paccakkhakaṇaṃ sacchikiriyāti āha “**attapaccakkhatāyā**”ti.

Nanu “visuddhiyā”ti cittavisuddhiyā adhippetattā visuddhiḡaṇenevettha sokasamatikkamādayopi gahitā eva honti, te puna kasmā gahitāti anuyogaṃ sandhāya “**tattha kiṅcāpi**”ti-ādi vuttam. **Sāsanayuttikovideti** saccapaṭiccasamuppādādilakkhaṇāyaṃ dhammanītiyaṃ cheke. **Tam**

taṃ atthaṃ nāpetiti ye ye bodhaneyyapuggalā saṅkhepavitthārādivasena yathā yathā bodhetabbā, attano desanāvilāsena bhagavā te te tathā tathā bodhento taṃ taṃ atthaṃ nāpeti. **Taṃ taṃ pākaṭaṃ katvā dassentoti** atthāpattiṃ agaṇento taṃ taṃ atthaṃ pākaṭaṃ katvā dassento. Na hi sammāsambuddho atthāpattiṃāpakādisādhanīyavacanoti. **Samvattatīti** jāyati, hotīti attho. Yasmā anattikkantasokaparidevassa na kadāci cittavisuddhi atthi sokaparidevasamatikkamanamukheneva cittavisuddhiyā ijghanato, tasmā āha **“sokaparidevānaṃ samatikkamena hotī”**ti. Yasmā pana domanassapaccayehi dukkhadhammehi phuṭṭhaṃ puthujjanaṃ sokādayo abhibhavanti, pariññātesu ca tesu te na honti, tasmā vuttam **“sokaparidevānaṃ samatikkamo dukkhadomanassānaṃ atthaṅgamenā”**ti. **Ñāyassāti** aggamaggassa, tatiyamaggassa ca. Tadadhigamena hi yathākkamaṃ dukkhadomanassānaṃ atthaṅgamo.

Sacchikiriyābhisamayasaḥabhāvīpi itarābhisamayo tadavinābhāvato sacchikiriyābhisamayahetuko viya vutto. **Ñāyassādhigamo nibbānassa sacchikiriyāyāti** phalañāṇena vā paccakkhakaṇaṃ sandhāya vuttam, **“nibbānassa sacchikiriyāyā”**ti sampadānavacanañcetaṃ daṭṭhabbam.

Vaṇṇabhaṇananti pasamsāvacaṇaṃ. Tayidaṃ na idheva, atha kho aññatthāpi satthu āciṇṇamevāti dassento **“yatheva hī”**ti-ādimāha. Tattha ādimhi kalyāṇaṃ, ādi vā kalyāṇaṃ etassāti **ādikalyāṇaṃ**. Sesapadadvayepi eseva nayo. Atthasampattiyā **sātthaṃ**. Byañjanasampattiyā **sabyañjanaṃ**. Sīlādīpañcadhammakhandhapāripūrito, upanetabbassa abhāvato ca **kevalaparipuṇṇaṃ**. Nirupakkilesato, apanetabbassa ca abhāvato parisuddham. Seṭṭhacariyabhāvato sāsana**brahmacariyaṃ**, magga**brahmacariya**ṅca vo **pakāsessāmīti**. Ayamettha saṅkhepo, vitthāro pana visuddhimagge¹ vuttanayeneva veditabbo. **Ariyavaṃsāti** ariyānaṃ buddhādīnaṃ vaṃsā paveṇiyo. **Aggaññāti** aggāti jānitabbā sabbavaṃsehi seṭṭhabhāvato. **Rattaññāti** cirarattāti jānitabbā. **Vaṃsaññāti** Buddhādīnaṃ vaṃsāti jānitabbā. **Porāṇāti** purātaṇā anadhunātanattā. **Asamkiṇṇāti** avikiṇṇā anapanītā. **Asamkiṇṇapubbāti** “kiṃ imehī”ti ariyehi na

1. Visuddhi 1. 207 piṭṭhe.

apanītapubbā. **Na saṅkīyantīti** idānipi tehi na apanīyanti. **Na saṅkīyissantīti** anāgatepi tehi na apanīyissantīti. **Appaṭikuṭṭhā -pa- viññūhīti** ye loke viññū samaṇabrāhmaṇā, tehi appaccakkhatā aninditā, agarahitāti attho. **“Visuddhiyā”ti-ādīhīti** visuddhi-ādidīpanehi. **Padehīti** vākyehi, visuddhi-atthātādibhedabhinnehi vā dhammakotṭhāsehi. **Upaddaveti** anatthe. **Visuddhinti** visujjhanam̐ saṅkilesappahānam̐. Vācuggatakaraṇam̐ **uggaho**. **Pariyāpuṇanam̐** paricayo. Atthassa hadaye ṭhapanam̐ **dhāraṇam̐**. Parivattanam̐ **vācanam̐**.

Gandhārakoti gandhāradese uppanno. **Pahontīti** sakkonti. **Aniyyānikamaggāti** micchāmaggā, micchattaniyatāniyatamaggāpi vā. **Suvaṇṇanti** kūṭasuvaṇṇampi vuccati. **Maṇīti** kācamaṇipi, **muttāti** veḷujāpi, **pavāḷanti** pallavopi vuccatīti **rattajambunadādīpadehi** te visesitā.

Na tato heṭṭhāti idhādhippetakāyādīnam̐ vedanādisabhāvattābhāvā, kāyavedanācittavimuttassa tebhūmakadhammassa visum̐ vipallāsa vatthantarabhāvena gahitattā ca heṭṭhāgahaṇesu vipallāsavatthūnam̐ aniṭṭhānam̐ sandhāya vuttam̐, pañcamassa pana vipallāsavatthuno abhāvā **“na uddhan”**ti āha. Ārammaṇavibhāgena hettha satipaṭṭhānavibhāgoti. **Tayo satipaṭṭhānāti** satipaṭṭhāna-saddassa atthuddhāradassanam̐, na idha pāliyam̐ vuttassa satipaṭṭhāna-saddassa atthadassananti. **Ādisu hi satigocaroti** ettha **ādi**-saddena “phassasamudayā vedanānam̐ samudayo, nāmarūpasamudayā cittassa samudayo, manasikārasamudayā dhammānam̐ samudayo”ti¹ satipaṭṭhānā”ti vuttānam̐ satigocarānam̐ pakāsake suttappadese saṅgaṇhāti. Evam̐ **paṭisambhidāpāliyam̐**² avasesapāḷippadesadassanatto **ādi**-saddo daṭṭhabbo. **Satiyā paṭṭhānanti** satiyā paṭiṭṭhātabbaṭṭhānam̐. Dānādīni karontassa rūpādīni satiyā ṭhānam̐ hontīti tamnivāraṇatthamāha **“padhānam̐ ṭhānan”**ti. **Pa**-saddo hi idha “paṇītā dhammā”ti-ādīsu³ viya padhānatthadīpakoti adhippāyo.

Ariyoti ariyam̐ sabbasattaseṭṭham̐ sammāsambuddhamāha. **Etthāti** etasmim̐ saḷāyatanavibhaṅgasutte⁴. Sutteka desena hi suttam̐ dasseti. Tattha hi—

1. Saṃ 3. 161 piṭṭhe. 2. Khu 9. 406 piṭṭhe. 3. Abhi 1. 3 piṭṭhe. 4. Ma 3. 263 piṭṭhe.

“Tayo satipaṭṭhānā yadariyo -pa- arahatīti iti kho panetaṃ vuttaṃ, kiñcetaṃ paṭicca vuttaṃ. Idha bhikkhave Satthā sāvakaṇaṃ dhammaṃ deseti anukampako hitesī anukampaṃ upādaya ‘idaṃ vo hitāya idaṃ vo sukhāyā’ti. Tassa sāvakā na sussūsanti. Na sotaṃ odahanti, na aññā cittaṃ upaṭṭhapenti, vokkamma ca Satthu sāsanaṃ vattanti. Tatra bhikkhave Tathāgato na ceva anattamaṇo hoti, na ca anattamaṇataṃ paṭisaṃvedeti, anavassuto ca viharati sato sampajāno. Idaṃ bhikkhave paṭhamaṃ satipaṭṭhānaṃ. Yadariyo sevati -pa- arahati.

Puna caparaṃ bhikkhave satthā -pa- idaṃ vo sukhāyāti. Tassa ekacce sāvakā na sussūsanti -pa- na ca vokkamma Satthu sāsanaṃ vattanti. Tatra bhikkhave Tathāgato na ceva anattamaṇo hoti, na ca anattamaṇataṃ paṭisaṃvedeti, na ca attamaṇo hoti, na ca attamaṇataṃ paṭisaṃvedeti, anattamaṇatā ca attamaṇatā ca tadubhayam abhinivajjetvā upekkhako viharati sato sampajāno. Idaṃ vuccati bhikkhave dutiyam.

Puna ca paraṃ bhikkhave -pa- sukhāyāti, tassa sāvakā sussūsanti -pa- vattanti. Tatra bhikkhave Tathāgato attamaṇo ceva hoti, attamaṇatañca paṭisaṃvedeti, anavassuto ca viharati sato sampajāno. Idaṃ vuccati bhikkhave tatiyaṃ”ti¹.

Evam paṭighānunaṃyehi anavassutaṭā, niccaṃ upaṭṭhitassatitāya tadubhayavītivattatā “satipaṭṭhānaṃ”ti vuttā. Buddhānaṃyeva hi niccaṃ upaṭṭhitassatitā hoti āveṇikadhamabhāvato, na paccekabudhādīnaṃ. Pa-saddo ārambhaṃ joteti, ārambho ca pavattīti katvā āha “**pavattayitabbatoti attho**”ti. Satiyā karaṇabhūtāya paṭṭhānaṃ paṭṭhapetabbaṃ **satipaṭṭhānaṃ**. **Ana**-saddo hi bahulaṃ-vacanena kammaṭṭhopi hotīti. Tathāssa kattu-atthopi labbhatīti “**paṭṭhātīti paṭṭhānaṃ**”ti vuttaṃ. **Paṭṭhātīti** ettha pa-saddo bhusatthaviṣiṭṭhaṃ pakkhandanaṃ dīpetīti “**okkanditvā pakkhanditvā pattharivā pavattatīti attho**”ti āha. Puna bhāvattamaṃ sati-saddaṃ,

1. Ma 3. 263, 264 piṭṭhesu.

paṭṭhāna-saddaṅca vaṇṇento **“atha vā”**ti-ādimāha, tena purimavikappe sati, saddo, paṭṭhāna saddo ca kattu atthoti viññāyati. **Saraṇaṭṭhenā**ti cirakatassa, cirabhāsitassa ca anussaraṇaṭṭhena. **Idanti** yaṃ “satiyeva satipaṭṭhāna”ti vuttaṃ, idaṃ. **Idha** imasmim̐ suttapadese **adhippetam̐**.

Yadi evanti yadi sati eva satipaṭṭhānaṃ, sati nāma eko dhammo, evaṃ sante kasmā “satipaṭṭhānā”ti bahuvacananti āha **“satibahuttā”**ti-ādi. Yadi bahukā tā satiyo, atha kasmā “maggo”ti ekavacananti yojanā. **Maggatṭhenā**ti niyyānaṭṭhena. Niyyāniko hi maggadhammo, teneva niyyānikabhāvena ekattūpagato ekantato nibbānaṃ gacchati, atthikehi ca tadatthaṃ maggīyatīti āha **“vuttañhetan”**ti, attanāva pubbe vuttaṃ paccāharati. Tatha **catassopi cetāti** kāyānupassanādivasena catubbidhāpi ca etā satiyo. **Aparabhāgeti** ariyamaggakkhaṇe. **Kiccaṃ sādhayamānā**ti pubbabhāge kāyādīsu subhasaññādividhamanavasena viṣuṃ viṣuṃ pavattitvā maggakkhaṇe satiyeva tatha catubbidhassapi vipallāsassa samucchēdavasena pahānakiccaṃ sādhayamānā ārammaṇakaraṇavasena nibbānaṃ gacchati. Catukiccaśādhaneva hettha bahuvacananiddeso. **Evañca satī**ti evaṃ maggaṭṭhena ekattaṃ upādāya “maggo”ti ekavacanena, ārammaṇabhedena catubbidhataṃ upādāya “cattāro”ti ca vattabbatāya sati vijjamaṇattā. **Vacanānusandhinā** “ekāyano ayan”ti-ādikā **desanā sānusandhikāva**, na ananusandhikāti adhippāyo. Vuttamevatthaṃ nidassanena paṭipādetuṃ **“mārasenappamaddanan”**ti¹ suttapadaṃ ānetvā **“yathā”**ti-ādinā nidassanaṃ saṃsandati. **“Tasmā”**ti-ādi nigamaṇaṃ.

Visesato kāyo, vedanā ca assādassa kāraṇanti tappahānatthaṃ tesu taṇhāvattḥūsu oḷārikasukhumesu asubhadukkhabhāvadassanāni mandatikkhapaññehi taṇhācaritehi sukarānīti tāni tesam̐ “visuddhimaggo”ti vuttāni. Tathā “niccaṃ attā”ti abhinivesavatthutāya diṭṭhiyā visesakāraṇesu cittadhammesu aniccānattatādassanāni sarāgādivasena, saññāphassādivasena, nīvaraṇādivasena ca nātippabhedātippabhedagatesu tesu tappahānatthaṃ mandatikkhapaññāṇaṃ diṭṭhicaritānaṃ sukarānīti tesam̐ tāni “visuddhimaggo”ti vuttāni. Ettha ca yathā cittadhammānampi

1. Saṃ 3. 88 piṭṭhe.

taṇhāya vatthubhāvo sambhavati, tathā kāyavedanānampi diṭṭhiyāti satipi nesaṃ catunnampi taṇhādiṭṭhivatthubhāve yo yassa sātisaṃpaccayo, taṃ dassanattamaṃ visesaggahaṇaṃ katanti daṭṭhabbaṃ.

Tikkhapaññasamathayāniko oḷārikārammaṇaṃ pariggaṇhanto tatta aṭṭhatvā jhānaṃ samāpajjitvā vuṭṭhāya vedanaṃ pariggaṇhātīti vuttaṃ “**oḷārikārammaṇe asaṇṭhahanato**”ti. Vipassanāyānikassa pana sukhome citte, dhammesu ca cittaṃ pakkhandatīti cittadhammānupassanānaṃ mandatikkhapaññāvipassanāyānikānaṃ visuddhimaggatā vuttā.

Tesaṃ tatthāti ettha **tattha**-saddassa “**pahānatthan**”ti etena yojanā. Parato **tesaṃ tatthāti** etthāpi eseva nayo. Pañca kāmaguṇā savisesā kāye labbhantīti visesena kāyo kāmoghassa vatthu, bhavesu sukhaḡgahaṇavasena bhavassādo hotīti bhavoghassa vedanā vatthu, santatighanaggahaṇavasena visesato citte attābhiniveso hotīti diṭṭhoghassa cittaṃ vatthu, dhammesu vinibbhogassa dukkarattā, dhammānaṃ dhammamattatāya duppaṭivijjhattā ca sammoho hotīti avijjoghassa dhammā vatthu, tasmā tesu tesaṃ pahānatthanāṃ cattārova vuttā.

Evamaṃ kāyādīnaṃ kāmoghādivatthubhāvakathaneneva kāmayogakāmāsavādīnampi vatthubhāvo dīpito hoti oghehi tesaṃ atthato anaññattā. Yadaggena ca kāyo kāmoghādīnaṃ vatthu, tadaggena abhijjhākāyaganthassa vatthu. “Dukkāya vedanāya paṭighānusayo anusetī”ti dukkhadukkhavipariṇāmadukkhasaṅkhāraddockhabhūtā vedanā visesena byāpādakāyaganthassa vatthu. Citte niccaggahaṇavasena sassa tassa attano sīlena suddhīti-ādīparāmasanaṃ hotīti sīlabbataparāmāsassa cittaṃ vatthu. Nāmarūpaparicchedena bhūtaṃ bhūtato apassantassa bhavavibhavadīṭṭhisāṅkhāto idaṃsaccābhiniveso hotīti tassa dhammā vatthu. Kāyassa kāmupādānavatthutā vuttanayāva. Yadaggena hi kāyo kāmoghassa vatthu, tadaggena kāmupādānassapi vatthu atthato abhinnattā. Sukhavedanassādasena paralokanirapekkho “natthi dinnan”ti-ādikaṃ¹ parāmāsaṃ uppādetīti diṭṭhupādānassa vedanā

1. Dī 1. 51; Ma 1. 362; Ma 2. 64, 182; Ma 3. 72, 99; Saṃ 2. 169; Abhi 1. 241; Abhi 2. 389 piṭṭhesu.

vatthu. Cittadhammānaṃ itarupādānavatthutā
tatiyacatutthaganthayojanāyaṃ vuttanayā eva. Kāyavedanānaṃ
chandadosāgativatthutā kāmoghabyāpādakāyaganthayojanāyaṃ vuttanayā
eva. Santatighanaggahaṇavasena sarāgādicitte sammoho hotīti mohāgatiyā
cittaṃ vatthu. Dhammasabhāvānavabodhe bhayaṃ hotīti bhayāgatiyā
dhammā vatthu.

Āhārasamudayā kāyassa samudayo, phassasamudayā vedanānaṃ
samudayo¹, saṅkhārapaccayā viññānaṃ, viññānapaccayā nāmarūpanti²
vacanato kāyādīnaṃ samudayabhūtā
kabalīkārapphassamaṇcetanāvīññānāhārā kāyādiparijānanena pariññātā
hontīti āha “**catubbidhāhārapariññatthan**”ti. **Pakaraṇanayoti**
nettīpakaraṇavasena Suttantaṣaṃvaṇṇanāyayo.

Saraṇavasenāti kāyādīnaṃ, kusalādidhammānaṃ upadhāraṇavasena.
Saranti gacchanti nibbānaṃ etāyāti satīti imasmiṃ atthe ekatte ekasabhāve
nibbāne samosaraṇaṃ samāgamo **ekattasamosaraṇaṃ**. Etadeva hi dassetuṃ
“**yathā hī**”ti-ādi vuttaṃ.

Ekanibbānapavesahetubhūto vā samānatāya eko satipaṭṭhānasabhāvo
ekattaṃ, tattha samosaraṇaṃ **ekattasamosaraṇaṃ**, taṃsabhāgatāva,
ekanibbānapavesahetubhāvaṃ pana dassetuṃ “**yathā**”ti-ādimāha. Etasmiṃ
atthe saraṇekattasamosaraṇāni saheva satipaṭṭhānekabhāvassa kāraṇattena
vuttānīti daṭṭhabbāni, purimasmiṃ visuṃ. **Saraṇavasenā**ti vā
gamanavasenāti atthe sati tadeva gamanaṃ samosaraṇanti, samosaraṇe vā
sati-saddatthavasena avuccamāne dhāraṇatāva satīti sati-saddatthantarābhāvā
purimaṃ satibhāvassa kāraṇaṃ, pacchimaṃ ekabhāvassāti
nibbānasamosaraṇepi sahitāneva tāni satipaṭṭhānekabhāvassa kāraṇāni
vuttāni honti. “Cuddasavidhena, navavidhena, soḷasa vidhena,
pañcavidhena”ti idaṃ upari pāḷiyam³ āgatānaṃ ānāpānapabbādīnaṃ vasena
vuttaṃ, tesāṃ pana anantarabhedavasena, tadanugatabhedavasena ca
bhāvanāya anekavidhatā labbhatiyeva, catūsu disāsu
uṭṭhānakabhaṇḍasadisatā kāyānupassanādi
taṃtaṃsatipaṭṭhānabhāvanānubhāvassa daṭṭhabbā.

1. Saṃ 3. 161 piṭṭhe.

2. Ma 3. 109; Khu 1. 77; Abhi 2. 142 piṭṭhādīsu.

3. Dī 2. 231 piṭṭhādīsu.

Kathetukamyatāpucchā itarāsaṃ pucchānaṃ idha asambhavato, niddesādivasena desetukamyatāya ca tathā vuttattā. **“Idhā”**ti vuccamānapaṭipattisampādakassa bhikkhuno sannissayadassanaṃ, so cassa sannissayo sāsanaṭo añño natthīti vuttaṃ **“idhāti imasmim sāsane”**ti.

Dhamma -pa- lapanametam tesam attano

sammukhābhimukhabhāvakaraṇattham, tañca dhammassa sakkaccasavanattham. **“Gocare bhikkhave caratha sake pettike visaye”**ti-ādi¹ vacanato bhikkhugocārā ete dhammā, yadidaṃ kāyānupassanādayo. Tattha yasmā kāyānupassanādiṭṭhiyā bhikkhu hoti, tasmā **“kāyānupassī viharatī”**ti-ādinaṃ bhikkhum dasseti bhikkhumhi taṃniyatoti āha **“paṭipattiyā bhikkhubhāvadassanato”**ti. Sattucariyānuvidhāyakattā, sakalasāsanasampannigāhakatā ca **sabbappakārāya anusāsaniyā bhājanabhāvo**. **Tasmim gahiteti** bhikkhumhi gahite. Bhikkhuparisāya jeṭṭhabhāvato rājagamaṇāyena itarā parisāpi atthato gahitāva hotīti āha **“sesā”**ti-ādi. Evaṃ paṭhamam kāraṇam vibhajitvā itarampi vibhajitum **“yo ca iman”**ti-ādi vuttaṃ.

Samam careyyāti kāyādivisamacariyam pahāya kāyādīhi samam careyya. Rāgādivūpasamena **santo**, indriyadamena **danto**, catumagganiyamena **niyato**, seṭṭhacaritāya **brahmacārī**, sabbattha kāyadaṇḍādi-oropana **nidhāya daṇḍam**. Ariyabhāve ṭhito **so** evarūpo bāhitapāpasamitapāpabhinnakilesatāhi **“brāhmaṇo, samaṇo, bhikkhū”**ti ca vedītabbo.

“Ayañceva kāyo, bahiddhā ca nāmarūpan”ti-ādīsu khandhapañcakaṃ, tathā **“sukhañca kāyena paṭisaṃvedetī”**ti-ādīsu² **“yā tasmim samaye kāyassa passaddhi paṭippassaddhi”**ti-ādīsu ca vedanādayo cetasikā khandhā kāyoti vuccantīti tato visesanattham **“kāyete rūpakāye”**ti āha. **Kesādīnañca dhammānantī** kesādīsaññitānaṃ bhūtopādādhammānaṃ. Evaṃ **“cayaṭṭho sarīraṭṭho kāyaṭṭho”**ti saddanayena kāya-saddam dassetvā idāni niruttinayenapi taṃ dassetum **“yathā cā”**ti-ādi vuttaṃ. **Āyantīti** uppajjanti.

1. Dī 3. 48; Saṃ 3. 128 piṭṭhesu.

2. Ma 1. 214, 231; Vi 1. 5 piṭṭhesu.

Asammissatoti vedanādayopi ettha sitā, ettha paṭibaddhāti kāye vedanādi-anupassanāpasaṅgepi āpanne tato asammissatoti attho. Samūhavisayatāya cassa kāya-saddassa, samudāyupādānatāya ca asubhākārassa “**kāye**”ti ekavacanam, tathā ārammaṇādivibhāgena anekabhedabhinnampi cittam cittabhāvasamaññaena ekajjham gahetvā “**citte**”ti ekavacanam, vedanā pana sukhādibhedabhinnā visum visum anupassitabbāti dassentena “**vedanāsū**”ti bahuvacanena vuttā, tatheva ca niddeso pavattito, dhammā ca paropaṇṇāsabhedā, anupassitabbākārena ca anekabhedā evāti tepi bahuvacanavaseneva vuttā.

Avayavīgāhasamaññātidhāvanasārādānābhinivesanisedhanattham kāyam āṅgapaccaṅgehi, tāni ca kesādīhi, kesādike ca bhūtopādāyarūpehi vinibbhujjanto “**tathā na kāye**”ti-ādimāha. Pāsādādinagarāvayavasamūhe avayavīvādinopi avayavīgāham na karonti, “nagaram nāma koci attho atthi”ti pana kesañci samaññātidhāvanam siyāti itthipurisā disamaññātidhāvane nagananidassanam vuttam. Āṅgapaccāṅgasamūho, kesalomādisamūho, bhūtopādāyasamūho ca yathāvuttasamūho, tabbinimutto kāyopi nāma koci natthi, pageva itthi-ādayoti āha “**kāyo vā itthi vā puriso vā añño vā koci dhammo dissati**”ti. “**Koci dhammo**”ti iminā sattaṅgāvimāsi paṭikkhipati, avayavī pana kāyapaṭikkhepeneva paṭikkhittoti. Yadi evam katham kāyādisamaññātidhāvanānīti āha “**yathāvuttadhamma -pa- karonti**”ti. Tathā **tathā**ti kāyādi-ākārena.

Yam passatīti yam itthim, purisam vā passati. Nanu cakkhunā itthipurisa dassanam natthīti? Saccametam, “itthim passāmi, purisam passāmi”ti pana pavattasaññāya vasena “yam passati”ti vuttam, micchādassanena vā diṭṭhiyā **yam passati, na tam diṭṭham** tam rūpāyatanam na hotīti attho viparītaggāhavasena micchāparikkappitarūpattā. Atha vā **tam** kesādibhūtopādāyasamūhasaṅkhātam **diṭṭham, na** hoti, acakkhuvīññānaviññeyyattā **diṭṭham** vā **tam na** hoti. **Yam diṭṭham, tam na passatī**ti yam rūpāyatanam kesādibhūtopādāyasamūhasaṅkhātam diṭṭham, tam paññācakkhunā bhūtato na passatīti attho. **Apassam bajjhateti** imam attabhavam yathābhūtam paññācakkhunā apassanto

“etaṃ mama, esohamasmi, eso me attā”ti kilesabandhanena bajjhati.

Na aññadhammānupassīti na aññasabhāvānupassī, asubhādito aññākārānupassī na hotīti attho. “**Kiṃ vuttaṃ hotī**”ti-ādinā tamevattham pākaṭam karoti. **Pathavīkāyanti** kesādikoṭṭhāsapathaviṃ dhammasamūhattā “kāyo”ti vadati, lakkhaṇapathavimeva vā anekappabhedam sakalasarāgataṃ, pubbāpariyabhāvena ca pavattamānam samūhavasena gahetvā “kāyo”ti vadati. “**Āpokāyan**”ti-ādīsupi eseva nayo.

Evam gahetabbassāti “aham maman”ti evam attattaniyabhāvena andhabālehi gahetabbassa.

Idāni sattannaṃ anupassanākārānampi vasena kāyānupassanaṃ dassetuṃ “**apicā**”ti-ādī āradham. Tattha **aniccato anupassatīti** catusamuṭṭhānikakāyam “aniccan”ti anupassati, evam passanto evañcassa aniccākārampi “anupassatī”ti vuccati. Tathābhūtassa cassa niccagāhassa lesopi na hotīti vuttaṃ “**no niccato**”ti. Tathā hesa “niccasaññaṃ pajahatī”ti¹ vutto. Ettha ca “aniccato eva anupassatī”ti evakāro luttaniddiṭṭhoti tena nivattitamattaṃ dassetuṃ “no niccato”ti vuttaṃ. Na cettha dukkhato anupassanādinivattanaṃ āsaṅkitabbaṃ paṭiyogīnivattanaparattā evakārassa, upari desanāruḷhattā ca tāsam. “**Dukkhato anupassatī**”ti-ādīsupi eseva nayo. Ayaṃ pana viseso—aniccassa dukkhattā tameva ca kāyam dukkhato anupassati, dukkhassa anattattā anattato anupassati. Yasmā pana yaṃ aniccaṃ dukkham anattā, na taṃ abhinanditabbaṃ, yañca na abhinanditabbaṃ, na tattha rajjitabbaṃ, tasmā vuttaṃ “**nibbindati, no nandati. Virajjati, no rajjati**”ti. So evam arajjanto rāgam **nirodheti, no samudeti** samudayaṃ na karotīti attho. Evam paṭipanno ca **paṭinissajjati, no ādiyati**. Ayañhi aniccādi-anupassanā tadaṅgavasena saddhiṃ kāyam tannissayakhandhābhisaṅkhārehi kilesānam pariccajanato, saṅkhatadosadassanena tabbiparīte nibbāne tanninnatāya pakkhandanato “pariccāgapaṭinissaggo ceva pakkhandana paṭinissaggo cā”ti vuccati, tasmā tāya samannāgato bhikkhu vuttanayena kilese pariccajati, nibbāne ca pakkhandati, tathābhūto ca nibbattanavasena

1. Khu 9. 406 piṭṭhe.

kilese na ādiyati, nāpi adosadassitāvasena saṅkhatārammaṇaṃ, tena vuttaṃ “paṭinissajjati, no ādiyati”ti. Idānissa tāhi anupassanāhi yesaṃ dhammānaṃ pahānaṃ hoti, taṃ dassetuṃ **“aniccato anupassanto niccasaññaṃ pajahati”**ti-ādi vuttaṃ. Tattha **niccasaññaṃ**ti “saṅkhārā niccā”ti evaṃ pavattaviparītasāññaṃ. Diṭṭhicittavipallāsappahānamukheneva saññāvipallāsappahānanti saññāggahaṇaṃ, saññāsīsena vā tesampi gahaṇaṃ daṭṭhabbaṃ. **Nandinti** sappītikataṇhaṃ. Sesāṃ vuttanayameva.

Viharatīti iminā kāyānupassanāsamaṅgino iriyāpathavihāro vuttoti āha **“iriyatī”**ti, iriyāpathaṃ pavattetīti attho. Ārammaṇakaraṇavasena abhibyāpanato **“tisu bhavesū”**ti vuttaṃ, uppajjanavasena pana kilesā parittabhūmakā evāti. Yadi kilesānaṃ pahānaṃ ātāpananti taṃ sammādiṭṭhi-ādīnampi attheva, ātappa-saddo viya pana ātāpasaddo vīriyeyeva niruḥhoti vuttaṃ **“vīriyassetāṃ nāmaṃ”**ti. Atha vā paṭipakkhappahāne sampayuttadhammānaṃ abhussahanavasena pavattamānassa vīriyassa sātisayaṃ tadātāpananti vīriyameva tathā vuccati, na aññe dhammā. **Ātāpī**ti cāyamikāro pasamsāya, atisayassa vā dīpakoti ātāpīgahaṇe sammappadhānasamaṅgītaṃ dasseti. Sammā, samantato, sāmāñca pajānanto **sampajāno**, asammisato vavatthāne aññadhammānupassitābhāvena sammā aviparītaṃ, sabbākārapajānanena samantato, uparūpari visesāvahabhāvena pavattiyā sāmāṃ pajānantoti attho. Yadi paññāya anupassati, kathaṃ satipaṭṭhānatāti āha **“na hī”**ti-ādi. **Sabbatthikanti** sabbattha bhavaṃ sabbattha līne, uddhate ca citte icchitabbatā. Sabbe vā līne, uddhate ca bhāvetabbā bojjaṅgā atthikā etāyāti **sabbatthikā**. Satiyā laddhupakārāya eva paññāya ettha yathāvutte **kāye** kammaṭṭhāniko bhikkhu **kāyānupassī viharati**. **Anto saṅkhepo** anto oliyano, kosajjanti attho. **Upāyapariggaheti** ettha silavisodhanādi, gaṇanādi, uggahakosallādi ca upāyo, tabbipariyāyato **anupāyo** veditabbo. Yasmā ca upaṭṭhitassati yathāvutta-upāyaṃ na pariccajati, anupāyañca na upādiyati, tasmā vuttaṃ **“muṭṭhassatī -pa- asamattho hotī”**ti. **Tenāti** upāyānupāyānaṃ pariggahaparivajjanesu, pariccāgāpariggahesu ca asamatthabhāvena. **Assa** yogino.

Yasmā satiyevettha satipaṭṭhānaṃ vuttaṃ, tasmāssa sampayuttadhammā vīriyādayo aṅgānti āha “**sampayo gaṅgañcassa dassetvā**”ti. **Aṅga**-saddo cetha kāraṇapariyāyo daṭṭhabbo. Satiggahaṇeneva cetha samādhissāpi gahaṇaṃ daṭṭhabbaṃ tassā samādhikkhandhe saṅgahitattā. Yasmā vā satisīsenāyaṃ desanā. Na hi kevalāya satiyā kilesappahānaṃ sambhavati, nibbānādhigamo vā, nāpi kevalā sati pavattati, tasmāssa jhānadesanāyaṃ savitakkādivacanassa viya sampayogaṅgadassanatāti aṅga-saddassa avayavapariyāyatā daṭṭhabbā. **Pahānaṅgānti** “vivicceva kāmehi”ti-ādīsu¹ viya pahātabbaṅgaṃ **dassetuṃ**. Yasmā ettha lokiyamaggo adhippeto, na lokuttaramaggo, tasmā pubbhāgiyameva vinayaṃ dassento “**tadaṅgavinayena vā vikkhambhanavinayena vā**”ti āha. **Tesaṃ dhammānti** vedanādidhammānaṃ. Tesañhi tattha anadhippetattā “**atthuddhāranayentaṃ vuttan**”ti vuttaṃ. **Tatthāti** vibhaṅge². **Etthāti** “loke”ti etasmiṃ pade.

Avisesena dvīhipi nīvaraṇappahānaṃ vuttanti katvā puna ekekena vuttaṃ pahānavisesaṃ dassetuṃ “**visesenā**”ti āha. Atha vā “vineyya nīvaraṇāni”ti avatvā abhijjhādomanassavinayavacanassa payojanaṃ dassento “**visesenā**”ti-ādīmāha. Kāyānupassanābhāvanāya hi ujuvipaccanīkānaṃ anurodhavirodhādīnaṃ pahānadassanaṃ etassa payojananti. **Kāyasampattimūlakassāti** rūpabalayobbanārogyādisarīrasampadānimitassa. Vuttavipariyāyato **kāyavipattimūlako virodho** veditabbo. **Kāyabhāvanāyāti** kāyānupassanābhāvanāya. Sā hi idha kāyabhāvanāti adhippetā. **Subhasukhabhāvādīnanti ādi**-saddena manuññaniccatādisaṅgaho daṭṭhabbo. **Asubhāsukhabhāvādīnanti** ettha pana **ādi**-saddena amanuññaniccatādīnaṃ. **Tenāti** anurodhādippahānavacanena. “**Yogānubhāvo hi**”ti-ādi vuttassevatthassa pākaṭakaraṇaṃ. Yogānubhāvo hi bhāvanānubhāvo. **Yogasamatthoti** yogamanuyūñjituṃ samattho. Purimena hi “anurodhavirodhavippamutto”ti-ādivacanena bhāvanamanuyuttassa ānisaṃso vutto, dutiyena bhāvanamanuyūñjantassa paṭipatti. Na hi anurodhavirodhādīhi upaddutassa bhāvanā ijjhati.

1. Dī 1. 69; Ma 1. 214, 231, 239; Sam 1. 412; Am 1. 441; Vi 1. 5 piṭṭhesu.

2. Abhi 2. 202 piṭṭhe.

Anupassīti etthāti “anupassī”ti etasmim̐ pade labbhamānāya **anupassanāya** anupassanājotanāya **kammaṭṭhānaṃ vuttanti** evamattho daṭṭhabbo, aññathā “anupassanāya”ti karaṇavacanaṃ na yujjeyya. Anupassanā eva hi kammaṭṭhānaṃ, na ettha ārammaṇaṃ adhippetam̐, yujjati vā. Kāyapariharaṇaṃ vuttanti sambandho. Kammaṭṭhānapariharaṇassa cettha atthasiddhattā “**kāyapariharaṇan**”tveva vuttam̐. Kammaṭṭhānikassa hi kāyapariharaṇaṃ yāvadeva kammaṭṭhānapariharaṇatthanti. Kammaṭṭhānapariharaṇassa vā “ātāpī”ti-ādinā¹ vuccamānattā “**kāyapariharaṇan**”tveva vuttam̐. Kāyaggahaṇena vā nāmakāyassāpi gahaṇaṃ, na rūpakāyasseva, teneva kammaṭṭhānapariharaṇampi saṅgahitaṃ hoti, evañca katvā “viharatīti ettha vuttavihārenā”ti **etthaggahaṇaṇca** samatthitaṃ hoti “kāyānupassī viharatī”ti vihārassa viresetvā vuttattā. “**Ātāpī**”ti-ādi pana saṅkhepato vuttassa kammaṭṭhānapariharaṇassa saha sādhanena vitthāretvā dassanaṃ. **Ātāpenāti** ātāpaggahaṇena. “**Satisampajaññenā**”ti-ādisupi e seva nayo. **Sabbatthakakammaṭṭhānanti** Buddhānussati, mettā, maraṇassati, asubhabhāvanā ca. Idañhi catukkaṃ yoginā parihariyamānaṃ “sabbatthakakammaṭṭhānan”ti vuccati, sabbattha kammaṭṭhānānuyogassārakkhabhūtattā satisampajaññabalena avicchinnassa pariharitabbattā satisampajaññaggahaṇena tassa vuttatā vuttā. **Satiyā vā samatho** vutto tassā samādhikkhandhena saṅgahitattā.

Vibhaṅge² pana attho vuttoti yojanā. **Tenāti** saddatthaṃ anādiyitvā bhāvatthasseva vibhajanavasena pavattena vibhaṅgapāṭhena² saha. **Aṭṭhakathānayo**ti saddatthassāpi vivaraṇavasena yathārahaṃ vutto atthasamvaṇṇanāyayo. **Yathā samsandatīti** yathā atthato, adhippāyato ca avilomento aññadatthu samsandati sameti, evaṃ **veditabbo**.

Vedanādīnaṃ puna vacaneti ettha nissayapaccayabhāvavasena cittadhammānaṃ vedanāsannissitattā, pañcavokārabhave arūpadhammānaṃ rūpapaṭibaddhavuttito ca vedanāya kāyādi-anupassanāppasaṅgepi āpanne tato asammissato vavatthānadassanatthaṃ, ghanavinibbhogādidassanatthaṃca dutiyavedanāggahaṇaṃ, tena na vedanāyaṃ kāyānupassī, cittadhammānupassī vā, atha kho

1. Dī 2. 231 piṭṭhe.

2. Abhi 2. 201 piṭṭhe.

vedanānupassī evāti vedanā saṅkhāte vatthusmiṃ
vedanānupassanākārasseva dassenena asammissato vavatthānaṃ dassitaṃ
hoti. Tathā “yasmim samaye sukhā vedanā, na tasmim samaye dukkhā,
adukkhāmasukhā vā vedanā, yasmim vā pana samaye dukkhā,
adukkhāmasukhā vā vedanā, na tasmim samaye itarā vedanā”ti
vedanābhāvasāmaññe avatvā taṃ taṃ vedanaṃ vinibbhujitvā dassanena
ghanavinibbhogo dhuvabhāvaviveko dassito hoti, tena tāsāṃ
khaṇamattāvaṭṭhānadassanena aniccatāya, tato eva dukkhatāya, anattatāya ca
dassanaṃ vibhāvitaṃ hoti. **Ghanavinibbhogādīti ādi**-saddena ayampi attho
veditabbo. Ayañhi vedanāyaṃ vedanānupassī eva, na aññadhammānupassī.
Kiṃ vuttaṃ hoti—yathā nāma bālo amaṇisabhāvepi udakapubbūlake maṇi-
ākārānupassī hoti, na evamayaṃ ṭhitiramaṇīyepi vedayīte, pageva itarasmiṃ
manuññākārānupassī, atha kho khaṇapabhaṅguratāya, avasavattitāya,
kilesāsucipaggharaṇatāya ca aniccānattāsubhākārānupassī,
vipariṇāmadukkhatāya, saṅkhāradukkhatāya ca visesato
dukkhānupassīyevāti. Evaṃ cittadhammesupi yathārahaṃ punavacane
payojanaṃ vattabbaṃ. **Lokiyā eva** sammāsanacārassa adhippetattā.
“Kevalaṃ panidhā”ti-ādinā “idha ettakaṃ veditabbaṃ”ti
veditabbaparicchedaṃ dasseti. **“Esa nayo”**ti iminā yathā cittaṃ, dhammā ca
anupassitabbā, tathā tāni anupassanto citte cittānupassī, dhammesu
dhammānupassīti veditabboti imamatthaṃ atidisati. **Dukkhatoti**
dukkhasabhāvato, dukkhanti anupassitabbāti attho. Sesapadadvayepi eseva
nayo.

Yo sukhaṃ dukkhato addāti yo bhikkhu sukhaṃ vedanaṃ
vipariṇāmadukkhatāya “dukkhā”ti paññācakkhunā addakkhi.
Dukkhamaddakkhi sallatoti dukkhaṃ vedanaṃ pīḷājanato, antotudanato,
dunnīharaṇato ca sallato addakkhi passi. **Adukkhāmasukhanti**
upekkhāvedanaṃ. **Santanti** sukhadukkhāni viya anolārikatāya,
paccayavasena vūpasantasabhāvatāya ca santaṃ. **Aniccatoti** hutvā-abhāvato,
udayavayavantato, tāvakālikato, niccapaṭipakkhato ca “aniccaṃ”ti yo
addakkhi. **Sa ve sammaddaso bhikkhu** ekaṃsena, pariyyattaṃ vā vedanāya
sammāpassanakoti attho.

Dukkhātipīti saṅkhāradukkhatāya dukkhā itipi. **Taṃ dukkhasminti** sabbaṃ taṃ vedayitaṃ dukkhasmiṃ antogadhaṃ pariyāpannaṃ vadāmi saṅkhāradukkhatānātivattanato. **Sukhadukkhatopi cā**ti sukhādīnaṃ t̥hitivipariṇāmaññānasukhatāya, vipariṇāmaṭṭhiti-aññānadukkhatāya ca vuttatā tissopi ca sukhato, tissopi ca dukkhato **anupassitabbā**ti attho. Satta anupassanā heṭṭhā pakāsita eva. **Sesanti** yathāvuttaṃ sukhādivibhāgato sesaṃ sāmisanirāmisādibhedāṃ vedanānupassanāyaṃ vattabbaṃ.

Ārammaṇā -pa- bhedānanti rūpādi-ārammaṇanānattassa nīlādītābbhedassa, chandādi-adhipatinānattassa hīnādītābbhedassa, ñāṇajhānādisahajātanānattassa sasaṅkhārikāsaṅkhārikasavitakkādītābbhedassa, kāmāvacaṇādibhūminānattassa ukkaṭṭhamajjhimādītābbhedassa, kusalādīkammanānattassa devagatisaṃvattaniyatādītābbhedassa, kaṇhasukkavipākanānattassa diṭṭhadhammavedaniyatādītābbhedassa, parittabhūmakādīkiriyaṇānattassa tihetu kādītābbhedassa vasena anupassitabbanti yojanā. **Ādi**-saddena savatthukāvattukādinānattassa puggalattayasādhāraṇādītābbhedassa ca saṅgaho daṭṭhabbo.

Salakkhaṇasāmaññalakkhaṇānanti phusanādītaṃtaṃ lakkhaṇānañceva aniccatādisāmaññalakkhaṇānañca vasenāti yojanā. **Suññatadhammassā**ti anattatāsaṅkhātasuññatāsabhāvassa. Yaṃ vibhāvetuṃ **abhidhamme** “tasmim kho pana samaye dhammā honti, khandhā honti”ti-ādinā¹ suññatāvāradesanā pavattā, taṃ pahīnameva pubbe pahīnattā, tasmā tassa tassa puna pahānaṃ na vattabbaṃ. Na hi kilesā pahīyamānā ārammaṇavibhāgena pahīyanti anāgatānaṃyeva uppajjanārahānaṃ pahātābbattā, tasmā abhiṃjhadīnaṃ ekattha pahānaṃ vatvā itarattha na vattabbamevāti imamatthaṃ dasseti **“kāmañcetthā”**ti-ādinā. Atha vā maggacittakkhaṇe ekattha pahīnaṃ sabbattha pahīnameva hoṭīti visum visum pahānaṃ na vattabbaṃ. Maggena hi pahīnāti vattabbataṃ arahanti. Tattha purimāya codanāya nānāpuggalaparīhāro. Na hi ekassa pahīnaṃ tato aññassa pahīnaṃ nāma hoti. Pacchimāya nānācittakkhaṇīkaparīhāro. **Nānācittakkhaṇeti** hi lokiyamaggacittakkhaṇeti adhippāyo. Pubbabhāgamaggo hi idhādhippeto. Lokiyabhāvanāya ca kāye pahīnaṃ na vedanādīsu

1. Abhi 1. 35 piṭṭhe.

vikkhambhitam hoti. Yadi nappavatteyya, paṭipakkhabhāvanāya
 suppahīnattā tattha sā
 “abhijjhādomanassassa appavattī”ti na vattabbā, tasmā punapi tappahānam
 vattabbameva. **Ekattha pahīnam sesesupi pahīnam hotīti**
 lokuttarasatipaṭṭhānabhāvanam, lokiyabhāvanāya vā sabbattha
 appavattimattam sandhāya vuttam. “Pañcapi khandhā upādānakkhandhā
 loko”ti¹ hi vibhaṅge catūsipi ṭhānesu vuttanti.

Uddesavāraṇṇanāya līnatthappakāsanā.

Kāyānupassanā

Ānāpānappabbavaṇṇanā

374. **Ārammaṇavasenāti** anupassitabbakāyādi-ārammaṇavasena.

Catudhā bhindivāti uddesavasena catudhā bhindivā. **Tato**
 catubbidhasatipaṭṭhānato ekekaṃ satipaṭṭhānam gahetvā kāyam vibhajantoti
 pāṭhaseso.

Kathañcāti ettha **kathanti** pakārapucchā, tena niddisiyamāne
 kāyānupassanāpakāre pucchati. **Ca-saddo** byatireko, tena uddesavārena
 apākaṭam niddesavārena vibhāviyamānam visesaṃ joteti. Bāhirakesupi ito
 ekadesassa sambhavato **sabbappakāra**-ggahaṇam katam
 “**sabbappakārakāyānupassanānibbattakassā**”ti, tena ye ime
 ānāpānappabbādivasena āgatā cuddasappakārā, tadantogadhā ca ajjhātādi-
 anupassanāppakārā, tathā kāyagatāsatisutte² vuttā
 kesādivaṇṇasaṭṭhānakasiṇārammaṇacatukkajjhānappakārā, lokiyādippakārā
 ca, te sabbepi anavasesato saṅgaṇhāti. Ime ca pakārā imasmim yeva sāsane,
 na ito bahiddhāti vuttam “**sabbappakāra -pa- paṭisedhano cā**”ti. Tattha
tathābhāvapaṭisedhanoti sabbappakārakāyānupassanānibbattakassa
 puggalassa aññasāsanassa nissayabhāvapaṭisedhano, etena **idha bhikkhaveti**
 ettha **idha-saddo** antogadha-evasaddatthoti dasseti. Santi hi ekapadānipi
 avadhāraṇāni yathā “vāyubhakkho”ti. Tenāha “**idheva**

1. Abhi 2. 202, 204, 206, 210 piṭṭhesu.

2. Ma 3. 132 piṭṭhe.

bhikkhave samaṇo”ti-ādi. Paripuṇṇasamaṇappakaraṇadhammo hi so puggalo, yo sabbappakārakāyānupassanānibbattako. **Parappavādā**ti paresaṃ aññatitthiyānaṃ nānappakārā vādā titthāyatanāni.

Araññādikasseva bhāvanānurūpasenāsanatāṃ dassetuṃ “**imassahī**”ti-ādi vuttaṃ. Duddamo damathaṃ anupagato goṇo **kūtagoṇo**. Dohanakāle yathā thanehi anavasesato khīraṃ na paggharati, evaṃ dohapaṭibandhinī **kūṭadhenu**. Rūpasaddādike paṭicca uppajjanaka-assādo **rūpārammaṇādiraso**. **Pubbe āciṇṇārammaṇanti** pabbajjato pubbe, anādimati vā saṃsāre paricitārammaṇaṃ. **Nibandheyyā**ti bandheyya. **Satiyā**ti sammadeva kammaṭṭhānassa sallakkhaṇavasena pavattāya satiyā. **Ārammaṇeti** kammaṭṭhānārammaṇe. **Dalḥanti** thiraṃ, yathā satokārissa upacārappanābhedo samādhi ijjhati, tathā thāmagataṃ katvāti attho.

Visesādhigamadiṭṭhadhammasukhavihārapadaṭṭhānanti sabbesaṃ Buddhānaṃ, ekaccānaṃ Paccekabuddhānaṃ, Buddhasāvakaṇaṃ visesādhigamassa aññena kammaṭṭhānena adhiḡatavisesānaṃ diṭṭhadhammasukhavihārasa padaṭṭhānabhūtaṃ.

Vatthuvijjācariyo viya Bhagavā yogīnaṃ anurūpanivāsaṭṭhānupadisaṇato. **Bhikkhu dīpisadiso** araññe ekako viharitvā paṭipakkhanimmathanavasena icchitatthasādhanaṇato. **Phalamuttamanti** sāmāññaphalaṃ sandhāya vadati. **Parakkamajavayoggbhūminti** bhāvanussāhajavassa yoggākaraṇabhūmibhūtaṃ.

Addhānavasena pavattānaṃ assāsapassāsānaṃ vasena dīghaṃ vā assasanto, ittaravasena pavattānaṃ assāsapassāsānaṃ vasena rassaṃ vā assasantoti yojanā. **Evaṃ sikkhatoti** assāsapassāsānaṃ dīgharassatāpajānanaṃ sabbakāyappaṭisaṃvedana-olārikolārikapaṭippassambhanavasena bhāvanaṃ sikkhato, tathābhūto vā hutvā tisso sikkhā pavattayato. **Assāsapassāsanimitteti** assāsapassāsasannissayena upaṭṭhitapaṭibhāganimitte. **Assāsapassāse pariggaṇhāti** rūpamukhena vipassanāṃ abhinivisaṇto, yo “assāsapassāsakammiko”ti vutto. **Jhānaṅgāni pariggaṇhāti** arūpamukhena vipassanaṃ abhinivisaṇto. **Vatthu nāma karajakāyo** cittacetasaṅgānaṃ pavattiṭṭhānabhāvato. **Añño satto vā puggalo vā natthī**ti visuddhidiṭṭhi

“tayidaṃ dhammamattaṃ, na ahetukaṃ, nāpi issarādivisa mahetukaṃ, atha kho avijjādi hetukan”ti addhāttayepi kaṅkhāvitaraṇena **vitinṇakaṅkho**. “Yaṃ kiñci bhikkhu rūpan”ti-ādinā¹ nayena kalāpasammasanavasena **tilakkhaṇaṃ āropetvā**. Udayavayānupassanādivasena **vipassanaṃ vaḍḍhento**.

Anukkamena maggaṭipāṭiyā.

“**Parassa vā assāsapassāsakāye**”ti idaṃ sammasanavāravasenāyaṃ pāḷi pavattāti katvā vuttaṃ, samathavasena pana parassa assāsapassāsakāye appanānimituppatti eva natthi. **Aṭṭhapetvā**ti antarantarā na ṭhapetvā.

Aparāparaṃ sañcaraṇakāloti ajjhatabhiddhādhammesupi nirantaraṃ vā bhāvanāya pavattanakālo **kathito**. **Ekasmim kāle pana idaṃ ubhayaṃ na labbhatī**ti “ajjhataṃ, bahiddhā”ti ca vuttaṃ idaṃ dhammadvayaghaṭitaṃ ekasmim kāle ekato ārammaṇabhāvena na labbhati, ekajjhaṃ ālambitaṃ na sakkāti attho.

Samudeti etasmāti **samudayo**, so eva kāraṇaṭṭhena dhammoti **samudayadhammo**, assāsapassāsānaṃ uppattihetu karajakāyādi, tassa anupassanasīlo **samudayadhammānupassī**, taṃ pana samudayadhammaṃ upamāya dassento “**yathā nāmā**”ti-ādimāha. Tattha **bhastanti** ruttim. **Gaggaraṇā**lanti ukkāpanālim. **Teti** karajakāyādike. Yathā assāsapassāsakāyo karajakāyādisambandhī taṃnimitatāya, evaṃ karajakāyādayopi assāsapassāsakāyasambandhino taṃnimitabhāvenāti “samudayadhammā kāyasmin”ti vattabataṃ labhantīti vuttaṃ “**samudaya -pa- vuccatī**”ti, pakativācī vā **dhamma**-saddo “jātidhammānaṃ”ti-ādīsu² viyāti kāyassa paccayasamavāye uppajjanakapakatikāyānupassī vā “samudayadhammānupassī”ti vutto. Tenāha “karajakāyañcā”ti-ādi. Evañca katvā **kāyasminti** bhummavacanaṃ suṭṭhutaṃ yujjati.

Vayadhammānupassīti ettha ahetukattepi vināsassa yesaṃ hetudhammānaṃ abhāve yaṃ na hoti, tadabhāvo tassa abhāvassa hetu viya voharīyatīti upacārato karajakāyādi-abhāvo assāsapassāsakāyassa vayakāraṇaṃ vutto. Tenāha “**yathā**

1. Ma 1. 297; Ma 2. 84; Ma 3. 67, 69; Am 1. 491; Khu 9. 51 piṭṭhesu.

2. Ma 1. 84; Ma 3. 293; Khu 9. 38 piṭṭhesu.

bhastāyā”ti-ādi. Aym̄ tāvettha paṭhamavikappavasena atthavibhāvanā. Dutiyavikappavasena upacārena vināyeva attho veditabbo.

Ajjhattabahiddhānupassanā viya bhinnavatthuvisayatāya samudayavayadhammānupassanāpi ekakāle na labbhatīti āha **“kālena samudayaṃ kālena vayaṃ anupassanto**”ti. “Atthi kāyo”ti **eva-saddo** luttaniddiṭṭhoti **“kāyova atthi**”ti vatvā avadhāraṇena nivattitaṃ dassento **“na satto**”ti-ādimāha. Tassattho—yo rūpādīsu sattavisattatāya, paresaṅca sajjāpanatṭhena, satvaguṇayogato vā **“satto**”ti parehi parikappito, tassa sattani-kāyassa pūraṇato ca cavanupapajjanadhammatāya galanato ca **“puggalo**”ti, thīyati saṃhaññati ettha gabbhoti **“itthi**”ti, puri pure bhāge seti pavattatīti **“puriso**”ti, āhito ahaṃ māno etthāti **“attā**”ti attano santakabhāvena **“attaniyan**”ti, paro na hotīti katvā **“ahan**”ti, mama santakanti katvā **“mamā**”ti, vuttappakāravanimutto aññoti katvā **“koci**”ti, tassa santakabhāvena **“kassaci**”ti, vikappetabbo koci natthi, kevalaṃ **kāyo eva atthi**ti. Dasahipi padehi attattaniyasuññatameva kāyassa vibhāveti. **Evanti** “kāyova atthi”ti-ādinā vuttappakārena.

Ñāṇapamāṇatthāyāti kāyānupassanāññāṇaṃ paraṃ pamāṇaṃ pāpanatthāya. **Satipamāṇatthāyāti** kāyapariggāhikaṃ satim̄ pavattanasatim̄ paraṃ pamāṇaṃ pāpanatthāya. Imassa hi vuttanayena “atthi kāyo”ti aparāparuppattivasena paccupaṭṭhitā sati bhīyyoso mattāya tattha ñāṇassa, satiyā ca paribrūhanāya hoti. Tenāha **“satisampajaññāṇaṃ vuḍḍhatthāyā**”ti. Imissā bhāvanāya taṇhādiṭṭhiggāhānaṃ ujupaṭi pakkhattā vuttaṃ **“taṇhā -pa-viharati**”ti. Tathābhūto ca loke kiṅcipi “ahan”ti vā “maman”ti vā gahetabbaṃ na passati, kuto gaṇheyyāti¹ āha **“na ca kiṅci**”ti-ādi. **Evampi**ti ettha **pi-saddo** heṭṭhā niddiṭṭhassa tādisassa atthassa abhāvato avuttasamuccayatthoti dassento **“upari atthaṃ upādāyā**”ti āha yathā “anamaso tiracchānagatāyapi, ayampi pārājiko hoti”ti². **Evanti** pana niddiṭṭhākārassa paccāmasanaṃ nigamanavasena katanti āha **“Iminā pana -pa- dasseti**”ti.

1. Gahaṇanti (Ka)

2. Vi 1. 27 piṭṭhe.

Pubbabhāgasatipaṭṭhānassa idha adhippetattā vuttam **“sati dukkhasaccan”**ti. Sā pana sati yasmim attabhāve, tassa samuṭṭhāpikā taṇhā, tassāpi samuṭṭhāpikā eva nāma hoti tadabhāve abhāvato āha **“tassā samuṭṭhāpikā purimataṇhā”**ti yathā **“saṅkhārapaccayā”**ti¹. Tam viññāṇabījatamsantatisambhūto sabbopi lokiyo viññāṇappabandho **“saṅkhārapaccayā viññāṇan”**tveva vuccati suttantanayena. **Appavattīti** appavattinimittam, ubhinnaṃ appavattiyā nimittabhūtoti attho. Na pavattati etthāti vā **appavatti**. **“Dukkhaparijānana”**ti-ādi ekantato catukiccasāghanavaseneva ariyamaggassa pavattīti dassetuṃ vuttam. Avuttasiddho hi tassa bhāvanāpaṭivedho. **Catusaccavasenāti** catusaccakammaṭṭhānavasena. **Ussakkivāti** visuddhiparamparāya āruhitvā, bhāvanam upari netvāti attho. **Niyyānamukhanti** vaṭṭadukkhato nissaraṇūpāyo.

Ānāpānappabbavaṇṇanā niṭṭhitā.

Iriyāpathapabbavaṇṇanā

375. **Iriyāpathavasenāti** iriyanam **iriyā**, kiriyā, idha pana kāyikapayogo veditabbo. Iriyānam patho pavattimaggoti **iriyāpatho**, gamanādivasena pavattā sarīravatthā. Gacchanto vā hi satto kāyena kātabbakiriyam karoti ṭhito vā nisinnō vā nipanno vāti, tesam iriyāpathānam vasena, iriyāpathavibhāgenāti attho. **Puna caparanti** puna ca aparam, yathāvutta-ānāpānakammaṭṭhānato bhiyyopi aññam kāyānupassanākammaṭṭhānam kathemi, suṇāthāti vā adhippāyo. **“Gacchanto vā”**ti-ādi gamanādimattajānanassa, gamanādigatavisesajānanassa ca sādharmaṇavacanam, tattha gamanādimattajānanam idha nādhippetam, gamanādigatavisesajānanam pana adhippetanti tam vibhajitvā dassetuṃ **“tattha kāman”**ti-ādi vuttam. **Sattūpaladdhinti** “satto atthi”ti upaladdhim sattaggāham. **Na pajahati** na pariccajati “aham gacchāmi, mama gamanan”ti gāhasabbhāvato. Tato eva **attasaññam** “atthi attā kārako vedako”ti evam pavattam

1. Ma 3. 109; Khu 1. 77; Abhi 2. 142 piṭṭhādīsu.

vīparītasāññaṃ **na ugghāḍeti**nāpaneti appaṭipakkhabhāvato, ananubrūhana to vā. Evaṃbhūtaṃ cassa kuto kammaṭṭhānādibhāvoti āha “**kammaṭṭhānaṃ vā satipaṭṭhānabhāvanā vā na hoti**”ti. “**Imassa paṇā**”ti-ādi sukkapakkho, tassa vuttavipariyāyena attho veditabbo. Tameva hi atthaṃ vivarituṃ “**idañhi**”ti-ādi vuttaṃ.

Tattha **ko gacchatī**ti sādhanam, kiriyañca avinibbhuttaṃ katvā gamanakiriyāya kattupucchā, sā kattubhāvavasiṭṭha-attapaṭikkhepatthā dhammamattasseva gamanasiddhidassanato. **Kassa gamananti** tamevatthaṃ pariyāyantarena vadati sādhanam, kiriyañca vinibbhuttaṃ katvā gamanakiriyāya akattusambandhī bhāvavibhāvanato. Paṭikkhepatthañhi antonītaṃ katvā ubhayattha kiṃ-saddo pavatto. **Kimkāraṇāti** pana paṭikkhittakattukāya gamanakiriyāya avīparītakāraṇapucchā. Idañhi gamanaṃ nāma attā manasā saṃyujjati, mano indriyehi, indriyāni attehīti evamādimicchākāraṇavinimutta-anurūpapaccayahetuko dhammānaṃ pavatti-ākāraviseso. Tenāha “**tatthā**”ti-ādi.

Na koci satto vā puggalo vā gacchati dhammamattasseva gamanasiddhito, tabbinimuttassa ca kassaci abhāvato. Idāni dhammamattasseva gamanasiddhiṃ dassetuṃ “**cittakiriyāvāyodhātuvipphārenā**”ti-ādi vuttaṃ. Tattha cittakiriyā ca sā vāyodhātuyā vipphāro vipphandanañcāti cittakiriyāvāyodhātuvipphāro, tena. Ettha ca cittakiriyaggahaṇena anindriyabaddhavāyodhātuvipphāraṃ nivatteti, vāyodhātuvipphāraggahaṇena cetanāvaccīviññattibhedam cittakiriyam nivatteti, ubhayena pana kāyaviññattim vibhāveti. “**Gacchatī**”ti vatvā yathā pavattamāne kāye “gacchatī”ti vohāro hoti, taṃ dassetuṃ “**tasmā**”ti-ādi vuttaṃ. **Tanti** gantukāmatāvasena pavattacittam. **Vāyam janetī**ti vāyodhātu-adhikam rūpakalāpaṃ uppādeti, adhikatā cettha sāmattiyato, na pamāṇato. Gamanacittasamuṭṭhitaṃ saha-jātarūpakāyassa thambhanasandhāraṇacalanānaṃ paccayabhūtena ākāravisesena pavattamānaṃ vāyodhātuṃ sandhāyāha “**vāyo viññattim janetī**”ti. Adhippāyasahabhāvī hi vikāro viññatti. Yathāvuta-adhikabhāveneva ca vāyogahaṇam, na vāyodhātuyā eva janakabhāvato, aññathā

viññattiyā upādāyarūpabhāvo durupapādo siyā. **Purato abhinīhāro** puratobhāgena kāyassa pavattanam, yo “abhikkamo”ti vuccati.

“**Eseva nayo**”ti atidesena saṅkhepato vatvā tamattham vivaritam
 “**tatrāpi hī**”ti-ādi vuttam. **Koṭito paṭṭhāyāti** heṭṭhimakoṭito paṭṭhāya
 pādatalato paṭṭhāya. **Ussitabhāvoti** ubbidhabhāvo.

Evam pajānatoti evam cittakiriyavāyodhātuvipphārenea gamanādi
 hotīti pajānato. **Tassa** evam pajānanāya nicchayagamanattham “**evam hoti**”ti
 vicāraṇā **vuccati** loke yathābhūtam ajānantehi micchābhinivesavasena,
 lokavohārasasena vā. **Atthi panāti** attano evam vīmaṁsanavasena
 pucchāvacaanam. **Natthīti** nicchayavasena sattassa paṭikkhepavacaanam.
 “**Yathā panā**”ti-ādi tasseva atthassa upamāya vibhāvanam, tam
 suviññeyyameva.

Nāvā mālutavegenāti yathā acetanā nāvā vātavegena desantaram **yāti**,
yathā ca acetano **tejanam** kaṇḍo **jiyāvegena** desantaram **yāti**, **tathā** acetano
kāyo vātāhato yathāvuttavāyunā nīto desantaram **yāyīti** evam
 upamāsaṁsandanam veditabbam. Sace pana koci vadeyya “yathā
 nāvātejanānam pellakassa purisassa vasena desantaragamanam, evam
 kāyassāpī”ti, hotu, evam icchito vāyamattho yathā hi nāvātejanānam
 saṁhatalakkhaṇasseva purisassa vasena gamanam, na asaṁhatalakkhaṇassa,
 evam kāyassāpīti, kā no hāni, bhīyopi dhammamattatāva paṭiṭṭham labhati,
 na purisavādo. Tenāha “**yantasuttavasena**”ti¹ādi.

Tattha **payuttanti** heṭṭhā vuttanayena gamanādikiriyāvasena paccayehi
 payojitam. **Ṭhātīti** tiṭṭhati. **Etthāti** imasmim loke. **Vinā hetupaccayeti**
 gantukāmatācittatāsaṁmuṭṭhānavāyodhātu-ādihetupaccayehi vinā. **Tiṭṭheti**
 tiṭṭheyya. **Vajeti** vajeyya gaccheyya ko nāmāti sambandho. Paṭikkhepattho
 cetha **kim**-saddoti hetupaccayavirahena

1. Yantam suttavaseneva (Aṭṭhakathāyam)

ṭhānagamanapaṭikkhepamukhena sabbāyapi dhammappavattiyā paccayādhiṇavuttitāvibhāvanena attasuññatā viya aniccadukkhatāpi vibhāvitāti daṭṭhabbā.

Paṇihitoti yathā yathā paccayehi pakārehi nihito ṭhapito. **Sabbasaṅgāhikavacananti** sabbesampi catunnaṃ iriyāpathānaṃ ekajjhaṃ saṅgaṇhanavacanāṃ, pubbe visuṃ visuṃ iriyāpathānaṃ vuttatā idaṃ nesāṃ ekajjhaṃ gahetvā vacananti attho. Purimanayo vā iriyāpathappadhāno vuttoti tattha kāyo appadhāno anunipphādīti idha kāyaṃ padhānaṃ, apadhānañca iriyāpathaṃ anunipphādīṃ katvā dassetuṃ dutiyanayo vuttoti evampettha dvinnāṃ nayānaṃ viseso veditabbo. **Ṭhitoti** pavatto.

Iriyāpathapariggaṇhanampi iriyāpathavato kāyasappa pariggaṇhanāṃ tassa avatthāvisesabhāvatoti vuttaṃ “**iriyāpathapariggaṇhanena kāyekaṃyānupassī viharatī**”ti. Tenevettha rūpakkhandhaseneva samudayādayo uddhaṭā. Esa nayo sesavāresupi. **Ādināti** ettha **ādi**-saddena yathā “taṇhāsamudayā kammāsamudayā āhārasamudayā”ti nibbattilakkhaṇaṃ passantopi rūpakkhandhassa udayaṃ passatīti ime cattāro ākāra saṅgayhanti, evaṃ “avijjānirodhā”ti-ādayopi pañca ākāra saṅgahitāti daṭṭhabbā. Sesāṃ vuttanayameva.

Iriyāpathapabbavaṇṇanā niṭṭhitā.

Catusampajaññapabbavaṇṇanā

376. **Catusampajaññavasenāti** samantato pakārehi, pakaṭṭhaṃ vā savisesāṃ jānātīti sampajāno, sampajānassa bhāvo sampajaññaṃ, tathāpavattaṃ ñāṇaṃ, hatthavikārādibhedabhinnattā cattāri sampajaññāni samāhaṭāni catusampajaññaṃ, tassa vasena. “**Abhikkante**”ti-**ādīni sāmāññaphale**¹ **vaṇṇitāni**, na puna vaṇṇetabbāni, tasmā taṃtaṃsamvaṇṇanāya līnatthappakāsanāpi tattha vihitanayeneva gahetabbā. “Abhikkante paṭikkante sampajānakārī hotī”ti-ādivacanato abhikkamādigata catusampajañña² pariggaṇhanena rūpakāyasappa samudayadhammānupassitādi adhippetoti āha “**rūpakkhandhasseva samudayo ca vayo**”

1. Dī-Ṭṭha 1. 165 piṭṭhe. Dī-Ṭī 1. 242 piṭṭhepi passitabbaṃ.

2. Catusaccasampajañña (Ka)

ca **nīharitabbo**”ti. Rūpadhammānaṃyeva hi pavatti-ākāravisesā abhikkamādayoti. Sesam vuttanayameva.

Catusampajaññapabbavaṇṇanā niṭṭhitā.

Paṭikkūlamanasikārapabbavaṇṇanā

377. **Paṭikkūlamanasikāravasenā**¹ jigucchāṇiyatāya paṭikkūlameva paṭikkūlaṃ, yo paṭikkūlasabhāvo paṭikkūlākāro, tassa manasi karaṇavasena. Antarenāpi hi bhāvavācinam saddam bhāvattho viññāyati yathā “paṭassa sukkan”ti. Yasmā **Visuddhimagge**² **vuttaṃ**, tasmā tattha, taṃsaṃvaṇṇanāyaṅca³ vuttanayena “imameva kāyan”ti-ādīnaṃ attho veditabbo.

Vatthādīhi pasibbakākārena bandhitvā kataṃ āvāṇaṃ **putoḷi**. Nānākārā ekasmiṃ ṭhāne sammissāti ettāvatā nānāvaṇṇanaṃ kesādīnaṃ upameyyatā. **Vibhūtakāloti** paṇṇattim samatikkamitvā kesādīnaṃ asubhākārassa upaṭṭhitakālo. Iti-saddassa ākāratthataṃ dassento “evan”ti vatvā taṃ ākāraṃ sarūpato dassento “**kesādipariggaṇhanenā**”ti-ādīmāha. Kesādīsaññitānaṃhi asucibhāvānaṃ paramaduggandhajegucchapaṭikkūlākārassa samudayato anupassanā idha kāyānupassanāti. Sesam vuttanayameva.

Paṭikkūlamanasikārapabbavaṇṇanā niṭṭhitā.

Dhātumanasikārapabbavaṇṇanā

378. **Dhātumanasikāravasenā**ti pathavīdhātu-ādīkā catasso dhātuyo ārabha pavattabhāvanāmanasikāravasena, catudhātuvavatthānavasenāti attho. Dhātumanasikāro, dhātukammaṭṭhānaṃ, catudhātuvavatthānanti hi atthato ekam. **Goghātakoti** jīvikatthāya gunnaṃ ghātako. **Antevāsikoti** kammakaraṇavasena tassa samīpavāsī taṃ nissāya

1. Paṭikkūlamanasikāravasena (Aṭṭhakathāyaṃ)

2. Visuddhi 1. 241 piṭṭhe.

3. Visuddhi-Ṭī 1. 305 piṭṭhe.

jīvanako. **Vinivijjhivā**ti ekasmiṃ ṭhāne aññamaññaṃ vinivijjhivā.
Mahāpathānaṃ vemajjhaṭṭhānasāṅkhāte catunnaṃ mahāpathānaṃ tāya eva
 vinivijjhanaṭṭhānatāya vemajjhasāṅkhāte. Yasmā te cattāro mahāpathā
 catūhidisāhi āgantvā tattha samohitā viya honti, tasmā taṃ ṭhānaṃ
 catumahāpathaṃ, tasmim **catumahāpathe**. Ṭhita-saddo “ṭhito vā”ti-ādīsu¹
 ṭhānasāṅkhāta-iriyāpathasamaṅgitāya, ṭhāsaddassa vā gatinivatti-atthātāya
 aññattha ṭhapetvā gamanaṃ sesa-iriyāpathasamaṅgitāya bodhako, idha pana
 yathā tathā rūpakāyassa pavatti-ākārabodhako adhippetoti āha “**catunnaṃ
 iriyāpathānaṃ yena kenaci ākārena ṭhitattā yathāṭhitaṃ**”ti. Tattha **ākārenā**
 ṭhānādinā rūpakāyassa pavatti-ākārena. Ṭhānādayo hi iriyāpathasāṅkhātāya
 kiriyāya patho pavattimaggoti “iriyāpatho”ti vuccantīti vuttovāyamattho.
Yathāṭhitaṃti yathāpavattaṃ, yathāvuttaṭṭhānamevettha paṇidhānanti
 adhippetanti āha “**yathāṭhitattā ca yathāpaṇihitaṃ**”ti. “**Ṭhitaṃ**”ti vā kāyassa
 ṭhānasāṅkhāta-iriyāpathasamāyogaparidīpanaṃ, “**paṇihitaṃ**”ti tadañña-
 iriyāpathasamāyogaparidīpanaṃ. “**Ṭhitaṃ**”ti vā kāyasāṅkhātānaṃ
 rūpadhammaṃ tasmim tasmim khaṇe sakiccavasena
 avaṭṭhānaparidīpanaṃ, **paṇihitaṃ**ti paccayavasena tehi tehi paccayehi
 pakārato nihitaṃ paṇihitaṃti evampettha attho veditabbo. **Paccavekkhatī**
 pati pati avekkhati, ñāṇacakkhunā vinibbhujjitvā visuṃ visuṃ passati.

Idāni vuttamevatthaṃ bhāvatthavibhāvanavasena dassetuṃ “**yathā
 goghātakassā**”ti-ādi vuttaṃ. Tattha **posentassā**ti maṃsūpacayaparibrūhanāya
 kuṇḍakabhatakkappāsatti-ādīhi saṃvaḍḍhentassa. **Vadhitaṃ matanti**
 himsitaṃ hutvā mataṃ. **Matanti** ca matamattaṃ. Tenevāha “**tāvadevā**”ti.
Gāvīti saññā na antaradhāyatīti yāni aṅgapaccāṅgāni yathāsanniviṭṭhāni
 upādāya gāvīsamaññā matamattāyapi gāvīyā tesāṃ taṃsannivesassa
 avinaṭṭhattā. Viliyanti bhijjanti vibhujjantīti bilā, bhāgā va-kārassa ba-
 kāraṃ, ikārassa ca ikāraṃ katvā. **Bīlasoti** bilāṃ bilāṃ katvā. **Vibhajitvā**
 aṭṭhisāṅghātato maṃsaṃ vivecetvā, tato vā vivecitaṃ maṃsaṃ bhāgaso
 katvā. Tenevāha “**maṃsasaññāpavattati**”ti. **Pabbajitassāpi**
 apariggahitakammaṭṭhānassa. **Ghanavinibbhoganti**
 santatisamūhakiccaghanānaṃ vinibbhujjanaṃ vivecanaṃ.

1. Dī 1. 85; Am 2. 22 piṭṭhesu.

Dhātuso paccavekkhatoti ghanavinibbhogakaraṇena dhātum dhātum pathavī-ādihātum visum visum katvā paccavekkhantassa. **Sattasaññāti** attānudiṭṭhivasena pavattā sattasaññāti vadanti, vohārasena pavattasattasaññāyapi tadā antaradhānaṃ yuttameva yāthāvato ghanavinibbhogassa sampādanato. Evañhi sati yathāvutta-opammatthena upameyyattho aññadatthu saṃsandati sameti. Tenevāha “**dhātuvaseneva cittaṃ santiṭṭhati**”ti. **Dakkhoti** cheko taṃtamsamaññāya kusalo “yathājāte sūnasmim naṅguṭṭhakhuravisāṇādivante aṭṭhimaṃsādi-avayavasamudāye avibhatte gāvīsamaññā, na vibhatte. Vibhatte pana aṭṭhimaṃsādi-avayavasamaññā”ti jānanako. **Catumahāpatho viya catu-iriyāpatho** gāvīyā ṭhitacatumahāpatho viya kāyassa pavattimaggabhūto catubbidho iriyāpatho. Yasmā **visuddhimagge**¹ **vitthārītā**, tasmā tattha, taṃsaṃvaṇṇanāyañca² vuttanayena veditabbā. Sesam vuttanayameva.

Dhātumanasikārapabbavaṇṇanā niṭṭhitā.

Navasivathikapabbavaṇṇanā

379. Sivathikāya apaviddha-uddhumātakādipaṭisaṃyuttānaṃ odhiso pavattānaṃ kathānaṃ, tadabhidheyyānañca uddhumātakādi-asubhabhāgānaṃ sivathikapabbānīti saṅgītikārehi gahitasamaññā. Tenāha “**sivathikapabbehi vibhajitun**”ti. Maritvā ekāhātikkantaṃ **ekāhamataṃ**. **Uddham jīvitapariyādānāti** jīvitakkhayato upari maraṇato paraṃ. **Samuggatenāti** samuṭṭhitena. **Uddhumātattāti** uddham uddham dhumātattā sūnattā. Setarattehi viparibhinnaṃ vimissitaṃ nīlaṃ **vinīlaṃ**, purimavaṇṇavipariṇāmaḥūtaṃ vā nīlaṃ **vinīlaṃ**. **Vinīlameva vinīlakanti** ka-kārena padavaḍḍhanaṃ anathantarato yathā “pītaṃ lohitaṃ”ti³. **Paṭikkulattāti** jigucchaniyattā. **Kucchitaṃ vinīlanti vinīlakanti** kucchanatto vā ayaṃ ka-kāroti dassetuṃ vuttaṃ yathā “pāpako kittisaddo abbhuggacchatī”ti⁴. **Paribhinnaṭṭhānehi** kākakaṅkādihi. **Vissandamānapubbanti** vissavantapubbaṃ, taṃ taṃ paggharantapubbanti attho. **Tathābhāvanti** vissandamānapubbabhāvaṃ.

1. Visuddhi 1. 342 piṭṭhe. 2. Visuddhi-Ṭī 1. 425 piṭṭhe. 3. Abhi 1. 162 piṭṭhe.
4. Dī 3. 196; Am 2. 221; Vi 3. 322; Khu 11. 184 piṭṭhesu.

So **bhikkhū**ti yo “passeyya sarīraṃ sivathikāya chaḍḍitan”ti vutto, so bhikkhu. **Upasamharati** sadisataṃ. “**Ayampi kho**”ti-ādi upasamharaṇā kāradassanaṃ. **Āyū**ti rūpajīvitindriyaṃ, arūpajīvitindriyaṃpanettha viññāṇagatikameva. **Usmāti** kammajatejo. **Evam pūtikasabhāvoyevāti** evaṃ ativiya duggandhajegucchapaṭikkūlapūtikasabhāvo eva, na āyu-ādīnaṃ avigame viya mattasoti adhippāyo. Ediso bhavissatīti **evambhāvī**ti āha “**evam uddhumātādibhedo bhavissatī**”ti.

Luñcitvā luñcitvāti uppāṭetvā uppāṭetvā. **Sāvasesamaṃsalohita yuttanti** sabbaso akhādītattā tahaṃ tahaṃ sesena appāvasesena maṃsalohitena yuttaṃ. “Aññena hatthaṭṭhikan”ti avisesena hatthaṭṭhikānaṃ vippakīṇṇatā jotitāti anavasesato tesam vippakīṇṇataṃ dassento “**catusaṭṭhibhedampī**”ti-ādimāha.

Terovassikānīti tirovassaṃ gatāni, tāni pana saṃvaccharaṃ vītivattāni honṭīti āha “**atikkantasamvaccharānī**”ti. Purāṇatāya ghanabhāvavigamena vicuṇṇatā idha pūtibhāvoti so yathā hoti, taṃ dassento “**abbhokāse**”ti-ādimāha. **Terovassikānevāti** saṃvaccharamattātikkantāni eva. Khajjamānatādivasena dutiyasivathikapabbādīnaṃ vavathāpitattā vuttaṃ “**khajjamānatādīnaṃ vasena yojanā kātabbā**”ti.

Navasivathikapabbavaṇṇanā niṭṭhitā.

Imāneva dveti avadhāraṇena appanākammaṭṭhānaṃ tattha niyameti aññapabbesu tadabhāvato. Yato hi eva-kāro, tato aññattha niyameti, tena pabbadvayassa vipassanākammaṭṭhānatāpi appaṭisiddhā daṭṭhabbā aniccatādidassanato. Saṅkhāresu ādīnavavibhāvanāni sivathikapabbānīti āha “**sivathikānaṃ ādīnavānupassanāvasena vuttattā**”ti. Iriyāpathapabbādīnaṃ appanāvahatā pākaṭā evāti “**sesāni dvādasapī**”ti vuttaṃ. Yaṃ panettha atthato avibhattaṃ. Taṃ suviññeyyameva.

Kāyānupassanāvaṇṇanā niṭṭhitā.

Vedanānupassanāvaṇṇanā

380. **Sukhaṃ vedananti** ettha sukhayatīti **sukhā**. Sampayuttadhamme kāyañca laddhassāde karotīti attho. Suṭṭhu vā khādati, khanati vā kāyikaṃ, cetasikañcābādhananti **sukhā**. “Sukaraṃ okāsadānaṃ etissāti **sukhā**”ti apare. Vedayati ārammaṇarasam anubhavatīti **vedanā**. **Vedayamānoti** anubhavamāno. “**Kāman**”ti-ādīsu yaṃ vattabbaṃ, taṃ iriyāpathapabbe vuttanayameva. Sampajānassa vediyanaṃ **sampajānavediyanaṃ**.

Vatthu-ārammaṇāti rūpādi-ārammaṇā. Rūpādi-ārammaṇañhettha vedanāya pavattiṭṭhānatāya “vatthū”ti adhippetam. **Assāti** bhaveyya. Dhammavinimuttassa kattu abhāvato dhammasseva kattubhāvaṃ dassento “**vedanāva vedayati**”ti āha. **Vohāramattaṃ hoti**”ti etena “sukhaṃ vedanaṃ vedayamāno sukhaṃ vedanaṃ vedayāmī”ti idaṃ vohāramattanti dasseti.

Nitthunantoti balavato vedanāvegassa nirodhane ādīnavaṃ disvā tassa avasaradānavasena nitthunanto. Vegasandhāraṇehi atimahantaṃ dukkhaṃ uppajjatīti aññampi vikāraṃ uppādeyya, tena thero **aparāparaṃ parivattati**. **Vīriyasamathaṃ yojetvāti** adhvāsanaṃ vīriyassa adhimattattā tassa hāpanavasena samādhinā samarasatāpādanena vīriyasamathaṃ yojetvā. **Saha paṭisambhidāhi**ti lokuttarapaṭisambhidāhi saha. Ariyamaggakkaṇe hi paṭisambhidānaṃ asamahavasena adhigamo, atthapaṭisambhidāya pana ārammaṇakaraṇavasenapi. Lokiyānampi vā sati uppattikāle tattha samatthataṃ sandhāyāha “**saha paṭisambhidāhi**”ti. **Samasīsīti** vārasamasīsī hutvā, paccavekkhaṇavārassa anantaravāre parinibbāyīti attho.

Yathā ca sukhaṃ, evaṃ dukkhanti yathā “sukhaṃ ko vedayati”ti-ādīnā sampajānavediyanaṃ sandhāya vuttaṃ, evaṃ dukkhampi. Tattha dukkhayatīti **dukkhā**, sampayuttadhamme, kāyañca piḷeti vibādhatīti attho. Duṭṭhuṃ vā khādati, khanati kāyikaṃ, cetasikañca sātanti **dukkhā**. “Dukkaraṃ okāsadānaṃ etissāti **dukkhā**”ti apare. **Arūpakammaṭṭhānanti** arūpapariggahaṃ, arūpadhammamukhena vipassanā bhinivesanti attho. **Na pākataṃ hoti** phassassa, cittassa ca avibhūtākārattā. Tenāha “**andhakāraṃ viya khāyati**”ti. “**Na pākataṃ hoti**”ti

ca idaṃ tādise puggale sandhāya vuttaṃ, tesam ādito vedanāva vibhūtatarā hutvā upaṭṭhāti. Evañhi yaṃ vuttaṃ **sakkapañhavaṇṇanādīsu** “phasso pākaṭo hoti, viññāṇaṃ pākaṭaṃ hoti”¹, taṃ avirodhitaṃ hoti. Vedanāvasena kathiyamānaṃ kammaṭṭhānaṃ pākaṭaṃ hotīti yojanā. **“Vedanānaṃ uppattipākaṭatāyā”**ti ca idaṃ sukhadukkhavedanānaṃ vasena vuttaṃ. Tāsañhi pavatti oḷārikā, na itarāya. Tadubhayaggahaṇamukhena vā gahetabbattā itarāyapi pavatti viññūnaṃ pākaṭā evāti “vedanānaṃ”ti avisesaggahaṇaṃ daṭṭhabbaṃ. **Sakkapañhe¹ vuttanayeneva veditabbo**, tasmā tattha vattabbo atthaviseso tattha līnatthappakāsaniyaṃ vuttanayeneva gahetabbo.

Pubbe “vatthum ārammaṇaṃ katvā vedanāva vedayati”ti vedanāya ārammaṇādhiṇavuttitāya ca anattatāya ca pajānaṃ vuttaṃ, idāni tassā aniccatādipajānaṃ dassento **“ayaṃ aparopi pajānaṃ pariyāyo”**ti āha. Yathā ekasmiṃ khaṇe cittadvayassa asambhavo ekajjhaṃ anekantapaccayābhāvato, evaṃ vedanādvayassa viṣiṭṭhārammaṇavuttito cāti āha **“sukhavedanākkhaṇe dukkhāya vedanāya² abhāvato”**ti. Nidassanamattañcetaṃ tadā upekkhāvedanāyapi abhāvato, tena sukhavedanākkhaṇe bhūtapubbānaṃ itaravedanānaṃ hutvā-abhāvapajānaṇena sukhavedanāyapi hutvā-abhāvo nāto eva hotīti tassā pākaṭabhāvameva dassento **“imissā ca sukhāya vedanāya ito paṭhamaṃ abhāvato”**ti āha, eteneva ca tāsampi vedanānaṃ pākaṭabhāvo dassitoti daṭṭhabbaṃ. Tenāha **“vedanā nāma aniccā adhuvā vipariṇāmadhammā”**ti. **Aniccaggahaṇena** hi vedanānaṃ viddhamsanabhāvo dassito viddhaste aniccatāya suviññeyyattā. **Adhuvaggahaṇena** pākaṭabhāvo tassa asadābhāvitādibhāvanato. **Vipariṇāmaggaṇena** dukkhabhāvo tassa aññathattadīpanato, tena sukhāpi vedanā dukkhā, pageva itarāti tissannampi vedanānaṃ dukkhatā dassitā hoti. Iti “yadaniccaṃ dukkhaṃ, taṃ ekantato anattā”ti tīsupi vedanāsu lakkhaṇattayapajānaṇā jotitāti daṭṭhabbaṃ. Tenāha **“itiha tattha sampajāno hoti”**ti.

1. Dī-Ṭṭha 2. 314 piṭṭhe.

2. Dukkavedanāya (Aṭṭhakathāyaṃ)

Idāni tamattham suttena¹ sādhetum “**Vuttampi cetan**”ti-ādimāha. Tattha **neva tasmim samaye dukkham vedanam vedetīti** tasmim sukhavedanāsamaṅgisamaye neva dukkham vedanam vedeti niruddhattā, anuppannattā ca yathākkamaṃ atītānāgatānaṃ. Paccuppannāya pana asambhavo vutto eva. Sakiccakkaṇamattāvaṭṭhānato **aniccā**. Samecca sambhuyya paccayehi katattā **saṅkhatā**. Vatthārammaṇādipaccayaṃ paṭicca uppannattā **paṭiccasamuppannā**. Khayavayapalujjananirujjhanapakatitāya **khayadhammā -pa- nirodhadhammāti** daṭṭhabbā.

Kilesehi āmasitabbato **āmisam** nāma, pañca kāmagaṇā ārammaṇakaraṇavasena saha āmischīti **sāmisam**. Tenāha “**pañcakāmagaṇāmisaniṣṣitā**”ti.

Ito paranti “atthi vedanā”ti evamādipāḷim sandhāyāha “**kāyānupassanāyaṃ vuttanayamevā**”ti.

Vedanānupassanāvaṇṇanā niṭṭhitā.

Cittānupassanāvaṇṇanā

381. Sampayogavasena pavattamānena saha rāgenāti **sarāgam**. Tenāha “**lobhasahagatan**”ti. **Vītarāganti** ettha kāmam sarāgapadapaṭiyoginā vītarāgapadena bhavitabban, sammasanacārassa pana adhippetattā tebhūmakasseva gahaṇanti “**lokiyakusalābyākatan**”ti vatvā “**idam panā**”ti-ādinā tameva adhippāyaṃ vivarati. **Sesāni** dve dosamūlāni, dve mohamūlānīti **cattāri akusalacittāni**. Tesañhi rāgena sampayogābhāvato nattheva sarāgatā, taṇnimittakatāya pana siyā taṃsahitakāle soti nattheva vītarāgatāpīti dukavinimuttatā evettha labbhatīti āha “**neva purimapadam na pacchimapadam bhajanti**”ti. Yadi evam padesikaṃ pajānanam āpajjatīti? Nāpajjati, dukantarapariyāpannattā tesam. Ye pana “paṭipakkhabhāve agayhamāne sampayogāhāvo evettha pamāṇam ekacca-abyākatānam viyā”ti icchanti, tesam matena sesākusalacittānampi dutyapadasaṅgaho

1. Ma 2. 168 piṭṭhe.

veditabbo. Dutiyadukepi vuttanayena attho veditabbo. Akusalamūlesu saha moheneva vattatīti samohanti āha “**vicikicchāsahagatañceva uddhaccasahagatañcā**”ti. Yasmā cettha “saheva mohenāti samohan”ti purimapadāvadhāraṇampi labbhatiyeva, tasmā vuttaṃ “**yasmā panā**”ti-ādi. Yathā pana atimūḷhatāya paṭipuggalikanayena savisesamohavantatāya “momūhacittan”ti vattabbatovicikicchā-uddhaccasahagatadvayaṃ visesato “samohan”ti vuccati, na tathā sesākusalacittānīti “**vaṭṭantiyevā**”ti sāsāṅkam vadati. Sampayogavasena thinamiddhena anupatitaṃ anugatanti **thinamiddhānupatitaṃ**, pañcavidhasasaṅkhārikākusalacittāṃ saṅkucitacittāṃ, **saṅkucitacittāṃ nāma** ārammaṇe saṅkocanasena pavattanato. Paccayavisesavasena thāmajātena uddhaccena sahatatāṃ saṃsaṭṭhanti **uddhaccasahagataṃ**, aññathā sabbampi akusalacittāṃ uddhaccasahagatamevāti. **Pasaṭacittāṃ** nāma ārammaṇe savisesaṃ vikkhepavasena visaṭabhāvena pavattanato.

Kilesavikkhambhanasamatthatāya vipulaphalatāya ca dīghasantānatāya ca mahantabhāvaṃ gataṃ, mahantehi vā uḷāracchandādīhi gataṃ paṭipannanti **mahaggataṃ**, taṃ pana rūpārūpabhūmigataṃ tato mahantassa loke abhāvato. Tenāha “**rūpārūpāvacaran**”ti. Tassa cettha paṭiyogī arittamevāti āha “**amahaggatanti kāmāvacaran**”ti. Attānaṃ uttaritūṃ samatthehi saha uttarehīti **sa-uttaraṃ**. Tappaṭipakkhena **anuttaraṃ**. Tadubhayaṃ upādāyupādāya veditabbanti āha “**sa-uttaranti kāmāvacaran**”ti-ādi. Paṭipakkhavikkhambhanasamatthena samādhinā sammadeva āhitāṃ **samāhitaṃ**. Tenāha “**yassā**”ti-ādi. **Yassāti** yassa cittassa. Yathāvuttena samādhinā na samāhitanti **asamāhitaṃ**. Tenāha “**ubhayasamādhiraḥitaṃ**”ti. Tadaṅgavimuttiyā **vimuttaṃ** kāmāvacarakusalacittāṃ, vikkhambhanavimuttiyā **vimuttaṃ** mahaggatacittanti tadubhayaṃ sandhāyāha “**tadaṅgavikkhambhanavimuttīhi vimuttaṃ**”ti. Yattha tadubhayavimutti natthi, taṃ ubhayavimuttirahitanti gayhamāne lokuttaracittepī siyāsāṅkāti tannivattanatthaṃ “**samuccheda -pa- okāsova natthi**”ti āha. Okāsabhāvo ca sammasanacārassa adhippetattā veditabbo. Yaṃ panettha atthato avibhattaṃ, taṃ heṭṭhā vuttanayattā uttānameva.

Cittānupassanāvaṇṇanā niṭṭhitā.

Dhammānupassanā

Nīvaraṇapabbavaṇṇanā

382. Pahātabbādīdhammavibhāgadassanavasena pañcadhā dhammānupassanā niddiṭṭhāti ayamatto pālito eva viññāyatīti tamatthaṃ ulliṅgento “**pañcavidhena dhammānupassanaṃ kathetun**”ti āha. Yadi evaṃ kasmā nīvaraṇādivaseneva niddiṭṭhanti? Vineyyajjhāsayato. Yesañhi veneyyānaṃ pahātabbadhammesu paṭhamaṃ nīvaraṇāni vibhāgena vattabbāni, tesāṃ vasenettha Bhagavatā paṭhamaṃ nīvaraṇesu dhammānupassanā kathitā. Tathā hi kāyānupassanāpi samathapubbaṅgamā desitā, tato pariññeyyesu khandhesu, āyatanesu ca bhāvetabbesu bojjhaṅgesu, pariññeyyādivibhāgesu saccesu ca uttarā desanā, tasmā cettha samathabhāvanāpi yāvadeva vipassanattā icchitā. Vipassanāpadhānā, vipassanābahulā ca satipaṭṭhānadesanāti tassā vipassanābhinivesavibhāgena desitabhāvaṃ vibhāvento “**apicā**”ti-ādimāha. Tattha khandhāyatanadukkhasaccavasena missakapariggahakathanāṃ daṭṭhabbāṃ. **Saññāsaṅkhārakkhandhapariggahampīti pi-saddena** sakalapañcupādānakkhandhapariggahaṃ sampiṇḍeti itaresāṃ tadantogadhattā.

“Kaṇhasukkadhammānaṃ yuganandhatā natthī”ti pajānanakāle abhāvā “**abhiṇhasamudācārasena**”ti vuttaṃ. **Sarṇvijjamānanti** attano santāne upalabbhamānaṃ. **Yathāti** yenākārena, so pana “**kāmacchandassa uppādo hotī**”ti vuttattā kāmacchandassa kāraṇākārova, atthato kāraṇamevāti āha “**yena kāraṇenā**”ti. **Ca-saddo** vakkhamānatthasamuccayatto.

Tatthāti “yathā cā”ti-ādinā vuttapade. **Subhampīti** kāmacchandopi. So hi attano gahaṇākārena “**subhan**”ti vutto, tenākārena pavattanakassa aññassa kāmacchandassa nimittattā “**nimittan**”ti ca. Itthaṃ, itthākārena vā gayhamānaṃ rūpādi **subhārammaṇaṃ**. Ākaṅkhitassa hitasukhassa pattiyaṃ anupāyabhūto manasikāro **anupāyamanasikāro**. **Tanti** ayonisomanasikāraṃ. **Tatthāti** tasmim sabbhāgahetubhūte, ārammaṇabhūte ca duvidhe subhanimitte. **Āhāro**ti paccayo attano phalaṃ āhāratīti katvā.

Asubhanti asubhajjhānaṃ uttarapadalopena, taṃ pana dasasu aviññāṇaka-asubhesu ca kesādīsu saviññāṇaka-asubhesu ca pavattaṃ daṭṭhabbaṃ. Kesādīsu hi saññā “asubhasaññā”ti **Girimānandasutte**¹ vuttā. Ettha ca catubbidhassa ayonisomanasikārassa, yonisomanasikārassa ca gahaṇaṃ niravasesadassanattaṃ katanti daṭṭhabbaṃ, tesu pana asubhesu “subhan”ti, “asubhan”ti ca manasikāro idhādhippeto, tadanukūlattā pana itarepīti.

Ekādasasu asubhesu paṭikkūlakārassa uggaṇhanaṃ, yathā vā tattha uggaṇhanimittaṃ uppajjati, tathā paṭipatti **asubhanimittassa uggaho**. Upacārappanāvahāya asubhabhāvanāya anuyuñjanā **asubhabhāvanānuyogo**. “Bhojane mattaññuno mitāhārassa thinamiddhābhibhavābhāvā otāramalabhamāno kāmaccchando pahīyati”ti vadanti, ayameva ca attho niddesepe vuccati. Yo pana bhojanassa paṭikkūlataṃ, tabbipariṇāmassa tadādhārassa tassa ca upanissayabhūtassa ativiya jegucchataṃ, kāyassa ca āhāraṭṭhitikattaṃ sammadeva jānāti, so sabbaso bhojane pamāṇassa jānanena **bhojanemattaññū** nāma. Tādisassa hi kāmaccchando pahīyateva.

Asubhakammikatissatthero dantaṭṭhidassāvī. **Pahīnassāti** vikkhambhanavasena pahīnassa. Ito paresupi evarūpesu ṭhānesu eseva nayo. Abhidhammapariyāyena² sabbopi lobho kāmaccchandanivaraṇanti āha “**arahattamaggenā**”ti.

Paṭighampi purimuppannaṃ **paṭighanimittaṃ** parato uppajjanakassa paṭighassa kāraṇanti katvā.

Mejjati siniyhatīti **mitto**, hitesī puggalo, tasmim mitte bhavā, mittassa vā esāti mettā, hitesitā, tassā **mettāya**. **Appanāpi upacāropi vaṭṭati** sādharmaṇavacanabhāvato. “**Cetovimuttī**”ti vutte **appanāva** vaṭṭati appanaṃ appattāya paṭipakkhato suṭṭhu muccanassa abhāvato. **Tanti** yonisomanasikāraṃ. **Tatthāti** mettāya. **Bahulaṃ pavattayatoti** bahulikāravato.

1. Am 3. 343 piṭṭhe.

2. Abhi 1. 232, 248 piṭṭhādīsu.

Sattesu mettāyanassa hitūpasamhārassa uppādanam pavattanam **mettānimittassa uggaho**, paṭhamuppanno mettāmanasikāro parato uppajjanakassa kāraṇabhāvato mettāmanasikārova **mettānimittam**. Kammameva sakam etesanti **kammassakā**, sattā, tabbhāvo **kammassakatā**, kammadāyādatā. Dosamettāsu yāthāvato ādīnavānisamsānam paṭisaṅkhānam vīmaṃsā idha **paṭisaṅkhānam**. Mettāvihārikalyāṇamittavantatā idha **kalyāṇamittatā**. **Odissaka-anodissakadisāpharaṇānanti**¹ atta-atipiyasahāyamajjhattaverivasena odissakatā, sīmāsambhede kate anodissakatā. Ekādīdisāpharaṇavasena disāpharaṇatā mettāya uggahaṇe veditabbā. Vihāraracchāgāmādivasena vā odissakadisāpharaṇam. Vihārādi-uddesarahitam puratthimādidisāvasena anodissakadisāpharaṇanti evam dvidhā² uggahaṇam sandhāya “**odissaka-anodissakadisāpharaṇānan**”ti vuttam. **Uggahoti** ca yāva upacārā daṭṭhabbo. Uggahitāya āsevanā **bhāvanā**. Tattha sabbe sattā, pāṇā bhūtā, puggalā, attabhāvapariyāpannāti etesaṃ vasena pañcavidhā, ekekasmim averā hontu, abyāpajjhā, anīghā, sukhi attānam pariharantūti catudhā pavattito vīsatividhā anodissakapharaṇā mettā. Sabbā itthiyo, purisā, ariyā, anariyā, devā, manussā, vinipātikāti sattodhikaraṇavasena pavattā sattavidhā, aṭṭhavīsatividhā vā, dasahi disāhi disodhikaraṇavasena pavattā dasavidhā, ekekāya vā disāya sattādi-itthādi-averādibhedena asītādhikacatusatappabhedā ca odhiso pharaṇā veditabbā.

Yena ayonisomanasikārena arati-ādikāni uppajjanti, so arati-ādīsu ayonisomanasikāro. Tena nipphādetabbe hi idam bhummam. Esa nayo itoparesupi. Ukkaṅṭhitā pantasenāsanesu, adhikusaladhammesu ca uppajjanabhāvāriṇcanā. **Kāyavinamanāti** karajakāyassa virūpenākārena namanā. **Līnākāro**ti saṅkocāpatti.

Kusaladhammapaṭipattiyā paṭṭhapanasabhāvatāya, tappaṭipakkhānam visanasabhāvatāya ca **ārambhadhātu**-ādito pavattavīriyanti āha “**paṭhamārambhavīriyan**”ti. Yasmā paṭhamārambhamattassa kosajjavidhamanam,

1. Odhisaka-anodhisakadisāpharaṇānam (Ma-Ṭṭha 1. 287 piṭṭhe.)

2. Evam vā dvidhā (Ka)

thāmagamañca natthi, tasmā vuttaṃ “**kosajjato nikkhantatāya tato balavataran**”ti. Yasmā pana aparāparuppattiyā laddhāsevanam uparūpari visesaṃ āvahantaṃ ativiya thāmagatameva hoti, tasmā vuttaṃ “**param param thānam akkamanato tatopi balavataran**”ti.

Atibhojane nimittaggāhoti atibhojane thinamiddhassa nimittaggāho, ettake bhutte taṃ bhojanaṃ thinamiddhassa kāraṇaṃ hoti, ettake na hotīti thinamiddhassa kāraṇākāraṇāgāho hotīti attho. Byatirekavasena cetam vuttaṃ, tasmā “ettake bhutte taṃ bhojanaṃ thinamiddhassa kāraṇaṃ na hoti”ti bhojanemattaññutā ca atthato dassitāti daṭṭhabbam. Tenāha “**catupañca -pa- na hoti**”ti. **Divā sūriyālokanti** divā gahitanimittam sūriyālokaṃ rattiyam **manasi karontassāpīti** evamettha attho veditabbo. Dhutaṅgānam vīriyanissitattā vuttaṃ “**dhutaṅganissitasappāyakathāyapī**”ti.

Kukkuccampi katākatānusocanavasena pavattamānam cetaso avūpasamāvahatāya uddhaccena samānalakkhaṇamevāti “**avūpasamo nāma avūpasantākāro, uddhaccakukkuccamevetam atthato**”ti vuttaṃ.

Bahussutassa ganthato, atthato ca sutādīni vicārentassa tabbahulavihārino atthavedādīpaṭilābhasabbhāvato vikkhepo na hotīti, yathāvidhipaṭipattiyā, yathānurūpapatikārappavattiyā ca katākatānusocanañca na hotīti “**bāhusaccenapi -pa- uddhaccakukkuccam pahiyati**”ti āha. Yadaggena bāhusaccena uddhaccakukkuccam pahiyati, tadaggena paripucchakatāvinayapakataññutāhipi taṃ pahiyatīti daṭṭhabbam. Vuddhasevitā ca vuddhasīlitaṃ āvahatīti cetovūpasamakarattā uddhaccakukkuccappahānakārī vuttā. Vuddhattam pana anapekkhitvā kukkuccavinodakā vinayadharā kalyāṇamittā vuttāti daṭṭhabbā. Vikkhepo ca pabbajitānam yebhuyyena kukkucca hetuko hotīti “kappiyākappiyaparipucchābahulassā”ti-ādinā vinayanayeneva paripucchakatādayo niddiṭṭhā. **Pahīne uddhaccakukkuceti** niddhāraṇe bhummaṃ. **Kukkuccassa** domanassasahagatattā **anāgāmimaggena āyatim anuppādo** vutto.

Tiṭṭhati pavattati etthāti **ṭhānīyā** vicikicchāya ṭhānīyā **vicikicchāṭhānīyā**, vicikicchāya kāraṇabhūtā dhammā, tiṭṭhatīti vā **ṭhānīyā**, vicikicchā ṭhānīyā etissāti **vicikicchāṭhānīyā**, atthato vicikicchā eva. Sā hi purimuppannā parato uppajjanakavicikicchāya sabhāgahetutāya asādhāraṇakaraṇaṃ.

Kusalākusalāti kosallasambhūtaṭṭhena kusalā, tappaṭipakkhato akusalā. Ye akusalā, te **sāvajjā**, **asevitabbā**, **hīnā** ca. Ye kusalā, te **anavajjā**, **sevitabbā**, **paṇītā** ca. Kusalā vā hīnehi chandādīhi āradhāhīnā, paṇītehi **paṇītā**. **Kaṇhā**ti kālakā cittassa apabhassarabhāvakaraṇā. **Sukkā**ti odātā cittassa pabhassarabhāvakaraṇā. Kaṇhābhijātihetuto vā **kaṇhā**. **Sukkā**bhijātihetuto **sukkā**. Te eva **sappaṭibhāgā**. Kaṇhā hi ujuvipaccanīkatāya sukkasappaṭibhāgā, tathā sukkāpi itarehi. Atha vā kaṇhasukkā ca sappaṭibhāgā ca **kaṇhasukkasappaṭibhāgā**. Sukhā hi vedanā dukkhāya vedanāya sappaṭibhāgā, dukkhā ca vedanā sukhāya vedanāya sappaṭibhāgāti.

Kāmaṃ bāhusaccaparipucchakatāhi sabbāpi aṭṭhavatthukā vicikicchā pahīyati, tathāpi ratanattayavicikicchāmūlikā sesavicikicchāti katvā āha “**tīṇi ratanāni ārabbhā**”ti. Ratanattayaguṇāvabodhe “satthari kaṅkhatī”ti-
ādi¹vicikicchāya asambhavoti. Vinaye pakataññutā “sikkhāya kaṅkhatī”ti vuttāya vicikicchāya pahānaṃ karotīti āha “**vinaye ciṇṇavasībhāvassāpi**”ti. **Okappaniyasaddhā saṅkhāta-adhimokkhabahulassāti** saddheyyavattuno anupavisanasaddhāsaṅkhāta-adhimokkhena adhimuccanabahulassa, **adhimuccanañca** adhimokkhuppādanamevāti daṭṭhabbaṃ, saddhāya vā ninnapoṇatā-adhimutti **adhimokkho**.

Samudayavayāti samudayavayadhammā. **Subhanimitta-asubhanimittādīsūti** “subhanimittādisu asubhanimittādīsū”ti **ādi**-saddo paccemaṃ yojetabbo. Tattha paṭhamena **ādi**-saddena paṭighanimittādīnaṃ saṅgaho, dutiyena mettācetovimutti-ādīnaṃ. Sesamettha yaṃ vattabbaṃ, taṃ vuttanayameva.

Nīvaraṇapabbavaṇṇanā niṭṭhitā.

1. Abhi 1. 208, 225, 233, 245, 250, 251; Abhi 2. 379 piṭṭhesu.

Khandhapabbavaṇṇanā

383. Upādānehi ārammaṇakaraṇādivasena upādātābbā vā khandhā upādānakkhandhā.

Iti rūpanti ettha **iti**-saddo idaṃ-saddena samānatthoti adhippāyenāha “**idaṃ rūpaṃ**”ti. Tayidaṃ sarūpaggaḥaṇabhāvato anavaśesapariyādānaṃ hotīti āha “**ettakaṃ rūpaṃ, na ito paraṃ rūpaṃ atthī**”ti. **Itīti** vā pakāratthe nipāto, tasmā “**iti rūpaṃ**”ti iminā bhūtopādādivasena yattako rūpassa pabhedo, tena saddhiṃ rūpaṃ anavaśesato pariyādiyivā dasseti. **Sabhāvatoti** ruppanasabhāvato, cakkhādivaṇṇādisabhāvato ca. **Vedanādisupīti** ettha “ayaṃ vedanā, ettakā vedanā, na ito paraṃ vedanā atthīti sabhāvato vedanaṃ pajānātī”ti-ādinā, **sabhāvatoti** ca “anubhavanasabhāvato, sātādisabhāvato cā”ti evamādinā yojetabbaṃ. Sesam vuttanayattā suviññeyyameva.

Khandhapabbavaṇṇanā niṭṭhitā.

Āyatanapabbavaṇṇanā

384. **Chasu ajjhatikabāhiresūti** “chasu ajjhattikesu chasu bāhiresū”ti “chasū”ti padaṃ paccekaṃ yojetabbaṃ. Kasmā panetāni ubhayāni chaḷeva vuttāni? Chaviññānakāyupattidvārārammaṇavavathhānato. Cakkhuvīññānavīthiyā pariyāpannassa hi viññānakāyassa cakkhāyataneva upattidvāraṃ, rūpāyataneva ca ārammaṇaṃ, tathā itarāni itaresaṃ, chaṭṭhassa pana bhavaṅgamanasaṅkhāto manāyatanevadeso upattidvāraṃ, asādhāraṇaṅca dhamāyayanaṃ ārammaṇaṃ. Cakkhatīti **cakkhu**, rūpaṃ assādeti, vibhāveti cāti attho. Suṇātīti **sotaṃ**. Ghāyatīti **ghānaṃ**. Jīvitanimittatāya raso **jīvitaṃ**, taṃ jīvitamavhāyatīti **jīvhā**. Kucchitānaṃ sāsavadhammānaṃ āyo upattidesoti **kāyo**. Munāti ārammaṇaṃ vijānātīti **mano**. Rūpayati vaṇṇavikāraṃ āpajjamānaṃ hadayaṅgatabhāvaṃ pakāsetīti **rūpaṃ**. Sappati attano paccayehi harīyati sotaviññeyyabhāvaṃ gamīyatīti **saddo**. Gandhayati attano vatthum sūcetīti

gandho. Rasanti taṃ sattā assādentīti **raso.** Phusīyatīti **phoṭṭhabbam.** Attano sabhāvaṃ dhārentīti **dhammā.** Sabbāni pana āyānaṃ tananādi-atthena **āyatanāni.** Ayamettha saṅkhepo, vitthāro pana **visuddhimaggasaṃvaṇṇanāyaṃ**¹ vuttanayeneva veditabbo.

Cakkhuñca pajānātīti² **ettha cakkhu** nāma pasādacakkhu, na sasambhāracakkhu, nāpi dibbacakkhu-ādikanti āha “**cakkhupasādan**”ti. Yaṃ sandhāya vuttam “yaṃ cakkhu catunnam mahābhūtānam upādāya pasādo”ti³. **Ca-saddo** vakkhamānatthasamuccayattho.

Yathāvasarasalakkhaṇavasenāti aviparītassa attano rasassa ceva lakkhaṇassa ca vasena, rūpesu āviñchanakiccassa ceva rūpābhighātārahabhūtappasādalakkhaṇassa ca daṭṭhukāmatānidānakamma samuṭṭhānabhūtappasādalakkhaṇassa ca vasenāti attho. Atha vā **yathāvasarasalakkhaṇavasenāti** yathāvasarasavasena ceva lakkhaṇavasena ca, **yāthāvasarasoti** ca aviparītasabhāvo veditabbo. So hi rasīyati aviraddhapaṭivedhavasena assādīyati ramīyatīti “raso”ti vuccati, tasmā salakkhaṇavasenāti vuttam hoti. **Lakkhaṇavasenāti** aniccādisāmaññalakkhaṇavasena.

“Cakkhuñca paṭicca rūpe ca uppajjati cakkhuviññāṇan”ti-ādīsu⁴ samuditāniyeva rūpāyatanāni cakkhuviññāṇupattihetu, na visum visunti imassa atthassa jotanattham “rūpe cā”ti puthuvacanaggahaṇam, tāya eva ca desanāgatiyā kāmam idhāpi “rūpe ca pajānātī”ti vuttam, rūpabhāvasāmaññena pana sabbam ekajjham gahetvā **bahiddhā catusamuṭṭhānikarūpañcāti** ekavacanavasena attho. **Sarasalakkhaṇavasenāti** cakkhuviññāṇassa visayabhāvakiccassa vasena ceva cakkhupaṭihananalakkhaṇassa vasena cāti yojetabbam.

Ubhayaṃ paṭiccāti cakkhum upanissayapaccayavasena paccayabhūtam, rūpe ārammaṇādhipati-ārammaṇūpanissayavasena paccayabhūte ca paṭicca. Kāmam ayaṃ Suttantasamvaṇṇanā, nippariyāyakathā nāma abhidhammasannissitā evāti Abhidhammanayeneva saṃyojanāni dassento “**kāmarāga -pa-**

1. Visuddhi 2. 112 piṭṭhe; Visuddhi-Ṭī 2. 170 piṭṭhādīsupi passitabbam.

2. Dī 2. 240; Ma 1. 79 piṭṭhesu.

3. Abhi 1. 157 piṭṭhe.

4. Ma 1. 158, 326; Ma 3. 328, 332, 333; Saṃ 1. 300, 302; Saṃ 2. 261; Abhi 4. 248, 249 piṭṭhādīsu.

avijjāsaṃyojanan”ti āha. Tattha kāmesu rāgo, kāmo ca so rāgo cāti vā **kāmarāgo**. So eva bandhanaṭṭhena **saṃyojanam**. Ayañhi yassa saṃvijjati, taṃ puggalaṃ vaṭṭasmim saṃyojete bandhati iti dukkhena sattam, bhavādike vā bhavantarādīhi, kammunā vā vipākaṃ saṃyojete bandhatīti **saṃyojanam**. Evaṃ paṭighasaṃyojanādīnampi yathārahaṃ attho vattabbo. **Srasalakkhaṇavasenā**ti ettha pana sattassa vaṭṭato anissajjanasaṅkhātassa attano kiccassa ceva yathāvuttabandhanasaṅkhātassa lakkhaṇassa ca vasenāti yojetabbam.

Bhavassādadiṭṭhissādanivattanattham **kāmassādaggahaṇam**. **Assādayatoti** abhiramantassa. **Abhinandatoti** sappītikataṇhāvasena nandantassa. Padadvayenāpi balavato kāmarāgassa paccayabhūtā kāmarāguppatti vutā. Esa nayo sesesupi. **Aniṭṭhārammaṇeti** ettha “āpāthagate”ti. Vibhattivipariṇāmanavasena “āpāthagatan”ti padaṃ ānetvā sambandhitabbam. **Etam ārammaṇanti** etam evaṃsukhumam evaṃdubbibhāgam ārammaṇam. **“Niccām dhuvan”**ti idam nidassanamattam. “Ucchijjissati vinassissatīti gaṇhato”ti evamādīnampi saṅgaho icchitabbo. Paṭhamāya sakkāyadīṭṭhiyā anurodhavasena **“satto nu kho”**ti itarāya anurodhavasena **“sattassa nu kho”**ti vicikicchato. Attattaniyādigāhānugatā hi vicikicchā diṭṭhiyā asati abhāvato. **Bhavam patthentassā**ti “īdise sampattibhave yasmā amhākaṃ idam iṭṭham rūpārammaṇam sulabham jātam, tasmā āyatimpi ediso, ito vā uttaritaro sampattibhavo bhavyeyā”ti bhavam nikāmentassa. **Evarūpanti** evarūpaṃ rūpaṃ. Taṃsadise hi tabbohāravasenevaṃ vuttam. Bhavati hi taṃsadisesu tabbohāro yathā “sā eva tittirī, tāni eva osadhānī”ti. **Usūyatoti** usūyam issam uppādayato. **Aññassa maccharāyatoti** aññena asādhāraṇabhāvakaraṇena macchariyam karoto. **Sabbeheva** yathāvuttehi navahi saṃyojanehi.

Tañca kāraṇanti subhanimittapaṭighanimittādivibhāgam iṭṭhāniṭṭhādirūpārammaṇaṇceva tajjāyonisomanasikāraṇcāti tassa tassa saṃyojanassa kāraṇam. Avikkhambhitāsamūhatabhūmiladdhuppannatam sandhāya **“appahīnatthēna uppānassā”**ti vuttam. Vattamānuppannatā samudācāraggaṇeneva gahitā. **Yena kāraṇenā**ti yena vipassanāsamathabhāvanāsāṅkhātēna

kāraṇena. Tañhi tassa tadaṅgavasena ceva vikkhambhanavasena ca pahānakāraṇam. Issāmacchariyānaṃ apāyagamanīyatāya paṭhamamaggavajjhatā vuttā. Yadi evaṃ “tiṇṇaṃ saṃyojanānaṃ parikkhayā sotāpanno hoti”¹ti¹ suttapadaṃ kathanti? Taṃ suttantapariyāyena vuttaṃ. Yathānulomasāsanā hi suttantadesanā, ayaṃ pana abhidhammanayena saṃvaṇṇanāti nāyaṃ dosoti. **Oḷārikassāti** thūlassa, yato abhiṇhasamuppattipariyuṭṭhānatibbatāva hoti. **Aṇusahagatassāti** vuttappakārābhāvena aṇubhāvaṃ sukhumbhāvaṃ gatassa. Uddhaccasaṃyojanassapettha anuppādo vutttoyevāti daṭṭhabbo yathāvuttasaṃyojanehi avinābhāvato. Ekatthatāya sotādīnaṃ sabhāvasarasalakkhaṇavasena pajānanā, tappaccayānaṃ saṃyojanānaṃ uppādādīpajānanā ca vuttanayeneva veditabbāti dassento “**eseva nayo**”ti atidisati.

Attano vā dhammesūti attano ajjhattikāyatanadhammesu, attano ubhayadhammesu vā. Imasmim pakkhe **ajjhattikāyatanapariggaṇhanenāti** ajjhattikāyatanapariggaṇhanamukhenāti attho. Evañca anavasesato sapaṇasantānesu āyatanānaṃ pariggaho siddho hoti. **Parassa vā dhammesūti** etthāpi eseva nayo. **Rūpāyatanassāti** aḍḍhekādasappabhedassa rūpasabhāvassa āyatanassa rūpakkhandhe “vuttanayena nīharitabbo”ti ānetvā sambandhitabbaṃ. **Sesakhandhesūti** vedanāsaññāsāṅkhārakkhandhesu. **Vuttanayenāti** iminā atidesena rūpakkhandhe “āhārasamudayā”ti viññāṇakkhandhe “nāmarūpasamudayā”ti sesakhandhesu “phassasamudayā”ti imaṃ viśesaṃ vibhāveti, itaraṃ pana sabbattha samānanti khandhapabbe viya āyatanapabbepi lokuttaranivattanaṃ pāḷiyaṃ gahitaṃ natthīti vuttaṃ “**lokuttaradhammā na gahetabbā**”ti. Sesam vuttanayameva.

Āyatanapabbavaṇṇanā niṭṭhitā.

Bojjhaṅgapabbavaṇṇanā

385. **Bujjhanakasattassāti** kilesaniddāya paṭibujjhanakasattassa, ariyasaccānaṃ vā paṭivijjhanakasattassa. **Aṅgesūti** kāraṇesu, avayavesu

1. Am 1. 560 piṭṭhe.

vā. Udayavayañānuppattito paṭṭhāya sambodhipaṭipadāyaṃ ṭhito nāma hotīti āha “**āraddhavipassakato paṭṭhāya yogāvacaroti sambodhī**”ti. Suttantadesanā nāma pariyāyakathā, ayañca satipaṭṭhānadesanā lokiyamaggavasena pavattāti vuttam “yogāvacaroti sambodhī”ti, aññathā “ariyasāvako”ti vadeyya.

“**Satisambojjhaṅgaṭṭhānīyā**”ti padassa attho “vicikicchāṭṭhānīyā”ti ettha vuttanayena veditabbo. **Tanti** yonisomanasikāram. **Tatthāti** satiyam, nipphādetabbe cetam bhummam.

Sati ca sampajaññañca **satisampajaññam**. Atha vā satippadhānam abhikkantādisatthakabhāvapariggaṇhanaññaṃ **satisampajaññam**. Tam sabbattha satokārībhāvāvahattā satisambojjhaṅgassa uppādāya hoti. Yathā paccanīkadhammappahānam, anurūpadhammasevanā ca anuppannānam kusalānam dhammānam uppādāya hoti, evam satirahitapuggalavivajjanā, satokārīpuggalasevanā, tattha ca yuttappayuttatā satisambojjhaṅgassa uppādāya hotīti imamattham dasseti “**satisampajaññam**”ti-ādinā. **Tissadattatthero** nāma, yo bodhimaṇḍe suvaṇṇasalākaṃ gahetvā “aṭṭhārasasu bhāsāsu katarabhāsāya dhammam kathamī”ti parisam pavāresi. **Abhayattheroti** Dattābhayattheramāha.

Dhammānam, dhammesu vā vicayo **dhammavicayo**, so eva sambojjhaṅgo, tassa **dhammavicayasambojjhaṅgassa**. “**Kusalākusalā dhammā**”ti-ādīsu yaṃ vattabbam, tam heṭṭhā vuttanayameva. Tattha **yonisomanasikārabahulīkāroti** kusalādīnam taṃtaṃsabhāvasarasalakkaṇādīkassa yāthāvato avabujjhanavasena uppanno ñāṇasampayuttacittuppādo. So hi aviparītamanasikāratāya “yonisomanasikāro”ti vutto, tadābhogatāya āvajjanāpi taggatikā eva, tassa abhiṇham pavattanam bahulīkāro. **Bhiyyobhāvāyāti** punappunam bhāvāya. **Vepullāyāti** vipulabhāvāya. **Pāripūriyāti** paribrūhanāya.

Paripucchakatāti pariyogohetvā pucchakabhāvo. Ācariye payirupāsivā pañcapi nikāye saha aṭṭhakathāya pariyogāhetvā yaṃ yaṃ tattha gaṇṭhiṭṭhānabhūtam, tam tam “idam bhante katham, imassa ko attho”ti

khandhāyatanādi-atthaṃ pucchantassa dhammavicayasambojjhaṅgo uppajjati. Tenāha “**khandhadhātu -pa- bahulatā**”ti. **Vatthūnaṃ visadabhāvakaraṇanti** ettha cittacetāsikānaṃ pavattiṭṭhānabhāvato sarīraṃ, tappaṭibaddhāni cīvarāni ca “vatthūnī”ti adhippetāni, tāni yathā cittassa sukhāvahāni honti, tathā karaṇaṃ tesāṃ visadabhāvakaraṇaṃ. Tena vuttaṃ “**ajjhattikabāhirānaṃ**”ti-ādi. **Ussannadosanti** vātādi-ussannadosaṃ. **Sedamalamakkhitanti** sedena ceva jallikāsaṅkhātena sarīramalena ca makkhitaṃ. **Ca**-saddena aññaṃpi sarīrassa, cittassa ca pīlavahaṃ saṅgaṇhāti. **Senāsaṇaṃ vāti vā**-saddena pattādīnaṃ saṅgaho daṭṭhabbo. **Avisade** sati, visayabhūte vā. Kathaṃ bhāvanamanuyuttassa tāni visayo? Antarantarā pavattanakacittuppādavasenevaṃ vuttaṃ. Te hi cittuppādā cittekaggatāya aparisuddhabhāvāya saṃvattanti. **Cittacetāsikesu** nissayādiṭṭhāyabhūtesu. **Ñāṇampīti pi**-saddo sampiṇḍanatto, tena na kevalaṃ taṃ vatthuyeva, atha kho tasmīṃ aparisuddhe ñāṇampi aparisuddhaṃ hotīti nissayāparisuddhiyā taṃnissitāparisuddhi viya visayassa aparisuddhatāya visayino aparisuddhiṃ dasseti.

Samabhāvakaraṇanti kiccato anūnādhikabhāvakaraṇaṃ.

Saddheyavattusmiṃ paccayavasena adhimokkhaḥkicassa paṭutarabhāvena, paññāya avisadatāya, vīriyādīnaṃca sithilatādīnā saddhindriyaṃ balavaṃ hoti. Tenāha “**itarāni mandāni**”ti. **Tatoti** tasmā saddhindriyassa balavabhāvato, itaresaṅca mandattā. Kosajjapakke patitūṃ adatvā sampayuttadhammānaṃ paggaṇhanaṃ anubalappadānaṃ **paggaho**, paggahova kiccaṃ **paggahakiccaṃ**, “kātuṃ na sakkoti”ti ānetvā sambandhitabbaṃ. Ārammaṇaṃ upagantvā ṭhānaṃ, anissajjanaṃ vā **upaṭṭhānaṃ**. Vikkhepaṭikkhepo, yena vā sampayuttā avikkhittā honti, so **avikkhepo**. Rūpagataṃ viya cakkhunā yena yāthāvato visayasabhāvaṃ passati, taṃ **dassanakiccaṃ**. **Kātuṃ na sakkoti** balavatā saddhindriyena abhibhūtattā. Sahajātadhammesu hi indaṭṭhaṃ kārentānaṃ sahapavattamānānaṃ dhammānaṃ ekarasatāvaseneva atthasiddhi, na aññathā. **Tasmāti** vuttamevatthaṃ kāraṇabhāvena paccāmasati. **Tanti** saddhindriyaṃ. **Dhammasabhāvapaccavekkhaṇenāti** yassa saddheyassa vatthuno uḷāratādiguṇe adhimuccanassa sātisaṃvattiyā

saddhindriyaṃ balavaṃ jātaṃ, tassa paccayapaccayuppannatādivibhāgato yāthāvato vīmaṃsanena. Evañhi evaṃdhammatānayaena sabhāvasarasato pariggayhamāne savipphāro adhimokkho na hoti “ayaṃ imesaṃ dhammānaṃ sabhāvo”ti parijānavasena paññābyāpārassa sātisayattā. Dhuriyadhammesu hi yathā saddhāya balavabhāve paññāya mandabhāvo hoti, evaṃ paññāya balavabhāve saddhāya mandabhāvo hotīti. Tena vuttaṃ **“taṃ dhammasabhāvapaccavekkhaṇena -pa- hāpetabban”**ti. **Tathā amanasikārenā**ti yenākārena bhāvanamanuyuñjantassa saddhindriyaṃ balavaṃ jātaṃ, tenākārena bhāvanāya ananuyuñjanatoti vuttaṃ hoti. Idha duvidhena saddhindriyassa balavabhāvo attano vā paccayavisesena kiccuttariyato, vīriyādīnaṃ vā mandakiccatāya. Tattha paṭhamavikappe hāpanavidhi dassito. Dutiyakappe pana yathā manasi karoto vīriyādīnaṃ mandakiccatāya saddhindriyaṃ balavaṃ jātaṃ, tathā amanasikārena, vīriyādīnaṃ paṭukiccabhāvāvahena manasikārena saddhindriyaṃ tehi samarasam karontena hāpetabbanṃ. Iminā nayena sesindriyesupi hāpanavidhi veditabbo.

Vakkalitheravatthūti so hi āyasmā saddhādhimuttatāya katādhikāro satthu rūpakāyadassanappasuto eva hutvā viharanto satthārā “kiṃ te vakkali iminā pūtikāyena diṭṭhena, yo kho vakkali dhammaṃ passati, so maṃ passati”ti-ādinā¹ ovaditvā kammatthāne niyojitopi taṃ ananuyuñjanto paṇāmito attānaṃ vinipātetuṃ papātaṭṭhānaṃ abhiruhi, atha naṃ satthā yathānisinnova obhāsam vissajjanena attānaṃ dassetvā—

“Pāmojjabahulo bhikkhu, pasanno buddhasāsane.

Adhigacche padaṃ santaṃ, saṅkhārūpasamaṃ sukhaṃ”ti²—

gāthaṃ vatvā “chi vakkali”ti āha. So tena amateneva abhisitto haṭṭhatuṭṭho hutvā vipassanaṃ paṭṭhapesi. Saddhāya balavabhāvato vipassanāvīthim na otarati, taṃ ñatvā bhagavā tassa indriyasamattapaṭipādanāya kammatthānaṃ sodhetvā adāsi. So satthārā

1. Saṃ 2. 98; Dī-Ṭṭha 1. 23; Am-Ṭṭha 1. 195; Dhammapada-Ṭṭha 2. 380;

Paṭisaṃ-Ṭṭha 2. 52; Abhi-Ṭṭha 1. 385; Theragāthā-Ṭṭha 2. 58 piṭṭhesu.

2. Khu 1. 68 piṭṭhe Dhammapade.

dinnanaye ṭhatvā vipassanaṃ ussukkāpetvā maggappaṭipāṭiyā arahattaṃ pāpuṇi. Tenetaṃ vuttaṃ “vakkalittheravatthu cetttha nidassanaṃ”ti. **Etthāti** saddhindriyassa adhimattabhāve sesindriyānaṃ sakiccākaraṇe.

Itarakiccabhedanti upaṭṭhānādikiccavisesaṃ. **Passaddhādīti ādi**-saddena samādhi-upekkhāsambojjhaṅgānaṃ saṅgaho daṭṭhabbo **hāpetabbanti** yathā saddhindriyassa balavabhāvo dhammasabhāvapaccavekkhaṇena hāyati, evaṃ vīriyindriyassa adhimattatā passaddhi-ādibhāvanāya hāyati samādhipakkhiyattā tassā. Tathā hi samādhindriyassa adhimattataṃ kosajjapātato rakkhantī vīriyādibhāvanā viya vīriyindriyassa adhimattataṃ uddhaccapātato rakkhantī ekaṃsato hāpeti. Tena vuttaṃ **“passaddhādibhāvanāya hāpetabban”**ti. **Soṇattherassa vatthūti** sukumārasonattherassa vatthu¹. So hi āyasmā satthu santike kammaṭṭhānaṃ gaheṭvā sītavane viharanto “mama sarīraṃ sukhumālaṃ, na ca sakkā sukheṇeva sukhaṃ adhigantuṃ, kilamētvāpi samaṇadhammo kātabbo”ti taṃ ṭhānacaṅkamameva adhiṭṭhāya padhānāmanuyuñjanto pādālesu phoṭesu uṭṭhitesupi vedanaṃ ajjupekkhitvā daḥhavīriyaṃ karonto accāraddhavīriyatāya visesaṃ nibbattetuṃ nāsakkhi. Satthā tattha gantvā vīṇūpamovādena ovaditvā vīriyasamatāyojanavīthiṃ dassento kammaṭṭhānaṃ sodhetvā gijjhakūṭaṃ gato. Theropi satthārā dinnanayena vīriyasamataṃ yojetvā bhāvento vipassanaṃ ussukkāpetvā arahatte paṭiṭṭhāsi. Tena vuttaṃ **“soṇattherassa vatthu dassetabban”**ti. **Sesesupīti** satisamādhipaṇṇindriyesupi.

Samatanti saddhāpaṇṇānaṃ aññamaññaṃ anūnānadhikabhāvaṃ, tathā samādhivīriyānaṃ. Yathā hi saddhāpaṇṇānaṃ visuṃ visuṃ dhuriyadhamabhūtānaṃ kiccato aññamaññaṃ nātivattanaṃ visesato icchitabbaṃ, yato nesaṃ samadhuratāya appanā sampajjati, evaṃ samādhivīriyānaṃ kosajjuddhaccapakkhikānaṃ samarasatāya sati aññamaññūpatthambhanato sampayuttadhamānaṃ antadvayapātābhāvena sammadeva appanā ijjhati. **“Balavasaddho”**ti-ādi byatirekamukhena vuttasseva atthassa samatthanaṃ. Tassattho—yo balavatiyā saddhāya samannāgato avisadaññaṇo, so mudhappasanno hoti, na aveccappasanno. Tathā hi **avatthusmiṃ pasīdati** seyyathāpi titthiyasāvakā.

1. Vi 3. 267; Am-Ṭṭha 1. 181; Theragāthā-Ṭṭha 2. 229; Apadāna-Ṭṭha 2. 199 piṭṭhesu vitthāro.

Kerāṭikapakkhanti sāṭṭheyyapakkhaṃ **bhajati**. Saddhāhīnāya paññāya atidhāvanto “deyyavattupariccāgena vinā cittuppādamattenapi dānamayaṃ puññaṃ hotī”ti-ādīni parikappeti hetupatirūpakehi vañcito, evambhūto ca sukkhatakkaviluttacitto paṇḍitānaṃ vacanaṃ nādiyati saññattim na gacchati. Tenāha “**bhesajjasamuṭṭhito viya rogo atekiccho hotī**”ti. Yathā cettha saddhāpaññānaṃ aññamaññaṃ visamabhāvo na atthāvaho, anattāvahova, evaṃ samādhivīriyānaṃ aññamaññaṃ visamabhāvo na atthāvaho anattāvahova, tathā na avikkhepāvaho, vikkhepāvahovāti. **Kosajjaṃ abhibhavati**, tena appanaṃ na pāpuṇātīti adhippāyo. **Uddhaccaṃ abhibhavati**ti etthāpi eseva nayo. **Tadubhayanti** saddhāpaññādvayaṃ, samādhivīriyadvayaṃca. **Samaṃ kātābanti** samarasam kātābbaṃ.

Samādhikammikassāti samathakammaṭṭhānikassa. **Evanti** evaṃ sante, saddhāya thokaṃ balavabhāve satīti attho. **Saddahantoti** “pathavī pathavīti manasikaraṇamattena kathaṃ jhānuppattī”ti acintetvā “addhā sammāsambuddhena vuttavidhi ijjhissatī”ti saddahanto saddhaṃ janento. **Okappentoti** ārammaṇaṃ anupavisitvā viya adhimuccanavasena avakappento pakkhandanto. **Ekaggatā balavatī vaṭṭatīti** samādhippadhānattā jhānassa. **Ubhinnanti** samādhipaññānaṃ. Samādhikammikassa samādhino adhimattatāya paññāya adhimattatāpi icchitabbāti āha “**samatāyapī**”ti, samabhāvenāpīti attho. **Appanāti** lokiyappanā. Tathā hi “**hotiyevā**”ti sāsāṅkaṃ vadati. Lokuttarappanā pana tesam samabhāveneva icchitā. Yathāha “samathavipassanaṃ yuganandhaṃ bhāvetī”ti¹.

Yadi visesato saddhāpaññānaṃ, samādhivīriyānaṃca samatāva icchitā, kathaṃ satīti āha “**sati pana sabbattha balavatī vaṭṭatī**”ti. **Sabbatthāti** līnuddhaccapakkhikesu pañcasu indriyesu. Uddhaccapakkhikekadese gaṇhanto “**saddhāvīriyapaññānaṃ**”ti āha. Aññathā pīti ca gaṇhettā siyā. Tathā hi “**kosajjapakkhikena samādhinā**”icceva vuttaṃ, na “passaddhisamādhī-upekkhāhī”ti. Sāti sati. Sabbesu rājakammesu niyutto **sabbakammiko**. **Tenāti** tena sabbattha icchitabbatṭhena kāraṇena. **Āha** aṭṭhakathāyaṃ. Sabbattha niyuttā **sabbatthikā** sabbattha līne, uddhate ca citte icchi tabbattā,

1. Am 1. 475; Khu 9. 288, 289, 290, 291 piṭṭhesu.

sabbe vā line, uddhate ca citte bhāvetabbā bojjaṅgā atthikā etāyāti **sabbatthikā**. **Cittanti** kusalaṃ cittaṃ. Tassa hi sati paṭisaraṇaṃ parāyaṇaṃ appattassa pattiyaṃ anadhigatassa adhigamāya. Tenāha “**ārakkhapaccupaṭṭhānā**”ti-ādi.

Khandhadibhede anogaḷhapaññānanti pariyattibāhusaccavasenapi khandhāyatanādīsu appaṭiṭṭhitabuddhīnaṃ. Bahussutasevanā hi sutamayaññāvahā. Taruṇavipassanāsamaṅgīpi bhāvanāmayaññe ṭhitattā ekamsato paññavā eva nāma hotīti āha “**samapaññāsa -pa-puggalasevanā**”ti. Ñeyyadhammassa gambhīrabhāvavasena tapparicchedakaññassa gambhīrabhāvaggahaṇanti āha “**gambhīresu khandhādīsu pavattāya gambhīrapaññāyā**”ti. Tañhi ñeyyaṃ tādīsāya paññāya caritabbato **gambhīraññācariyaṃ**, tassā vā paññāya tattha pabhedato pavatti gabbhīraññācariyā, tassā paccavekkhaṇāti āha “**gambhīrapaññāya pabhedapaccavekkhaṇā**”ti. Yathā sativepullappatto nāma arahā eva, evaṃ paññāvepullappattotipi so evāti āha “**arahattamaggena bhāvanāpāripūrī hotī**”ti. **Vīriyādīsupi** eseva nayo.

“Tattaṃ ayokhilaṃ hatthe gamentaṃ”ti-ādinā¹
vuttapañcavidhabandhanakammakāraṇā niraye nibbattasattassa yebhuyyena sabbapaṭṭhamāṃ karontīti, Devadūtasuttādīsu tassa ādito vuttattā ca āha “**pañcavidhabandhanakammakāraṇato paṭṭhāyā**”ti. **Sakaṭavahanādikāleti ādi-**saddena tadaññamanussehi, tiracchānehi ca vibādhiyamānakālāṃ saṅgaṇhāti. “**Ekam Buddhantaran**”ti idaṃ aparāparaṃ petesu eva uppajjanakasattavasena vuttaṃ, ekaccānaṃ vāpetānaṃ ekaccatiracchānānaṃ viya tathā dīghāyukatāpi siyāti tathā vuttaṃ. Tathā hi “kālo nāgarājā catunnaṃ buddhānaṃ sammukhībhāvaṃ labhitvā ṭhito metteyyassapi bhagavato sammukhībhāvaṃ labhissatī”ti vadanti, yaṃ tassa kappāyukatā vuttā.

Ānisaṃsadassāvīnoti “vīriyāyatto eva sabbo lokuttaro, lokiyo ca visesādhigamo”ti evaṃ vīriye ānisaṃsadassanasīlassa. **Gamanavīthinti** sapubbabhāgaṃ nibbānagāminipaṭipadaṃ, saha vipassanāya

1. Ma 3. 204, 221; Am 1. 139 piṭṭhesu.

ariyamaggapaṭipāṭi, sattavisuddhiparamparā vā. Sā hi bhikkhuno vaṭṭaniyyānāya gantabbā paṭipadāti katvā **gamanavīthi** nāma.

Kāyadaḷhībahuloti yathā tathā kāyassa daḷhīkammappasuto. **Piṇḍanti** raṭṭhapiṇḍam. Paccayadāyakānaṃ attani kārassa attano sammāpaṭipattiyā mahapphalabhāvassa karaṇena piṇḍassa bhikkhāya paṭipūjanā **piṇḍāpacāyanam**.

Nīharantoti pattathavikato nīharanto. **Tam saddam sutvāti** tam upāsikāya vacanaṃ attano vasaṇapaṇṇasāladvāre ṭhitova pañcābhiññatāya dibbasotena sutvā. Manussasampatti, dibbasampatti, nibbānasampattīti imā **tisso sampattiyo**. **Dātuṃ sakkhissasīti** tayi katena dānamayena, veyyāvaccamayena ca puññakammena khattavisesabhāvūpagamanena aparāparam devamanussasampattiyo, ante nibbānasampattiñca dātuṃ sakkhissasī”ti thero attānaṃ pucchati. **Sitam karontovāti** “akiccheneva mayā vaṭṭadukkham samatikkantaṃ”ti paccavekkhaṇāvasāne sañjātapāmojjavasena sitam karonto eva.

Vipṭapaṭipannanti jātidhammakuladhammādilaṅghanena asammapaṭipannaṃ. **Evam** yathā asammapaṭipanno putto tāya eva asammapaṭipattiyā kulasantānato bāhiro hutvā pitu santikā dāyajjassa na bhāgī, **evam**. **Kusītopi** tena kusītabhāvena asammapaṭipanno satthu santikā laddhabba-ariyadhanadāyajjassa na bhāgī. **Āraddhavīriyova labhati** sammāpaṭipajjanato. Uppajjati vīriyasambojjhaṅgoti yojanā, evam sabbattha.

Mahāti silādīhi guṇehi mahanto vipulo anaññasādhāraṇo. Tam panassa guṇamahattaṃ dasasahassilokadhātukampanena loke pākaṭanti dassento “**satthuno hī**”ti-ādimāha.

Yasmā satthusāsane pabbajitassa pabbajjūpagamena sakyaputtassa bhāvo sampajāyati, tasmā buddhaputtabhāvaṃ dassento “**asambhinnāyā**”ti-ādimāha.

Alasānaṃ bhāvanāya nāmamattampi ajānantānaṃ kāyadaḷhībahulānaṃ yāvadatthaṃ bhuñjitvā seyyasukhādi-anuyuñjanakānaṃ tiracchānakathikānaṃ puggalānaṃ dūrato vajjanā **kusītapuggalaparivajjanā**. “Divasaṃ caṅkamena

nisajjāyā”ti-ādinā¹ bhāvanāraddhavasena āraddhavīriyaṇaṃ
 dalhaparakkamānaṃ kālana kālanaṃ upasaṅkamaṇā
āraddhavīriyapuggalasevanā. Tenāha “**kucchim pūretvā**”ti-ādi.
Visuddhimagge² pana jātimahattapaccavekkhaṇā,
 sabrahmacārīmahattapaccavekkhaṇāti idaṃ dvayaṃ na gahitaṃ,
 thinamiddhavinodanā, sammappadhānapaccavekkhaṇatāti idaṃ dvayaṃ
 gahitaṃ. Tattha ānisaṃsadassāvitāya eva **sammappadhānapaccavekkhaṇā**
 gahitā hoti lokiyalo kuttaravisesādhigamassa vīriyāyattatādassanabhāvato.
Thinamiddhavinodanaṃ tadadhimuttatāya eva gahitaṃ hoti, vīriyuppādane
 yuttappayuttassa thinamiddhavinodanaṃ atthasiddhameva. Tattha
 thinamiddhavinodanakusītapuggalaparivajjana-
 āpaṭipakkhavidhamanapaccayūpasamhāravasena,
 apāyabhayapaccavekkhaṇādayo samuttejanavasena vīriyasambojjhaṅgassa
 uppādakā datṭhabbā.

Purimuppannā pīti parato uppajjanakapītiyā
 visesakāraṇasabhāghahetubhāvato “**pītiyeva pītisambojjhaṅgatṭhānīyā**
dhammā”ti vuttā, tassā pana bahuso pavattiyā puthuttaṃ upādāya
 bahuvacananiddeso. Yathā sā uppajjati, evaṃ paṭipatti **tassā**
uppādakamanasikāro.

“Buddhānussatī”ti-ādisu vattabbaṃ **visuddhimagge**³ vuttanayeneva
 veditabbaṃ.

Buddhānussatiyā upacārasamādinīṭṭhattā vuttaṃ “**yāva upacārā**”ti.
Sakalasarīraṃ pharamānoti pītisamuṭṭhānehi paṇītarūpehi sakalasarīraṃ
 pharamāno. Dhammaguṇe anussarantassāpi yāva upacārā sakalasarīraṃ
 pharamāno pītisambojjhaṅgo uppajjatīti yojanā, evaṃ sesa-anussatīsu.
 Pasādanīyasuttantapaccavekkhaṇāyañca yojetabbaṃ tassāpi
 vimuttāyatanabhāvena taggatikkattā. Saṅkhārānaṃ sappadesavūpasamepi
 nippadesavūpasame viya tathā⁴ paññāya pavattito bhāvanāmanasikāro
 kilesavikkhambhanasamattho hutvā upacārasamādhim āvahanto
 tathārūpapītisomanassasamannāgato pītisambojjhaṅgassa uppādāya hotīti
 āha “**samāpattiyā -pa- paccavekkhantassāpi**”ti. Tattha “**vikkhambhitā**
 kilesā”ti pāṭho. Te hi na samudācarantīti. **Iti**-saddo kāraṇattho, yasmā na
 samudācaranti, tasmā taṃ nesaṃ asamudācāraṃ paccavekkhantassāti

1. Ma 1. 341; Ma 3. 54; Saṃ 2. 323; Khu 7. 294 piṭṭhesu.

2. Visuddhi 1. 191 piṭṭhe.

3. Visuddhi 1. 129 piṭṭhe.

4. Yathā (Ka)

yojanā. Na hi kilese paccavekkhantassa bojḥhaṅguppatti yuttā. Pasādanīyesu ṭhānesu pasādasinehābhāvena thusasamahadayatā lūkhatā, sā tattha ādaragāravākaraṇena viññāyatīti āha “**asakkaccakiriyāya saṁsūcitalūkhabhāve**”ti.

Kāyacittadarathavūpasamalakkhaṇā passaddhi eva yathāvuttabodhi-
aṅgabhūto passaddhisambojḥhaṅgo, tassa **passaddhisambojḥhaṅgassa** evaṁ
uppādo hotīti yojanā.

Paṇītabhojanasevanatāti paṇītasappāyabhojanasevanatā. **Utu-
iriyāpathasukhaggahaṇena** sappāya-utu-iriyāpathaggahaṇaṁ daṭṭhabbāṁ.
Tañhi tividhampi sappāyaṁ seviyamānaṁ kāyassa kallatāpādanavasena
cittassa kallataṁ āvahantaṁ duvidhāyapī passaddhiyā kāraṇaṁ hoti.
Ahetukaṁ sattesu labbhamānaṁ sukhadukkanti ayameko anto,
issarādivisamahetukanti pana yaṁ dutiyo. Ete ubho ante anupagamma
yathāsakaṁ kammaṇā hotīti ayaṁ majjhimā paṭipatti. Majḥhatto payogo
yassa so **majḥhattapayogo**, tassa bhāvo **majḥhattapayogatā**. Ayañhi pahāya
sāraddhakāyataṁ passaddhakāyatāya¹ kāraṇaṁ hontī pasaddhidvayaṁ
āvahati, eteneva
sāraddhakāyapuggalaparivajjanapassaddhakāyapuggalasevanānaṁ
tadāvahanaṁ samvaṇṇitāti daṭṭhabbāṁ.

Yathāsamāhitākārasallakkhaṇavasena gayhamāno purimuppanno
samatho eva **samathanimittaṁ**. Nānārammaṇe paribbhamāna vividhaṁ
aggāṁ etassāti **byaggo**, vikkhepo. Tathā hi so anavaṭṭhānāro,
bhantatāpaccupaṭṭhāno ca vutto, ekaggatābhāvato byaggapaṭipakkhoti
abyaggo, samādhi. So eva nimittanti pubbe viya vattabbāṁ. Tenāha
“**avikkhepaṭṭhena ca abyagganimittan**”ti.

Vatthuvisadakiriyā, indriyasamattapaṭipādanā ca paññāvahā vuttā,
samādhānāvahāpi tā honti samādhānāvahabhāvene va paññāvahabhāvatoti
vuttaṁ “**vatthuvisada -pa- veditabbā**”ti.

Karaṇabhāvanākosallānaṁ avinābhāvato, rakkhanākosallāssa ca
taṁmūlakattā “**nimittakusalatā nāma kasīṇanimittassa**

1. Pahānasāraddhakāyatāya taṁpassaddhakāyatāya (Ka)

uggahaṇakusalatā”icceva vuttaṃ. **Kasiṇanimittassā**ti ca nidassanamattaṃ daṭṭhabbaṃ. Asubhanimittassāpi hi yassa kassaci jhānuppattinimittassa uggahaṇakosallaṃ nimittakusalatā evāti. **Atisithilavīriyatādīhīti ādi**-saddena paññāpayogamandataṃ, pamodavekallaṅca saṅgaṇhāti. **Tassa paggaṇhananti** tassa līnassa cittassa dhammavicayasambojjhaṅgādisamuṭṭhāpanena layāpattito samuddharaṇaṃ. Vuttaṅhettaṃ Bhagavatā—

“Yasmiṅca kho bhikkhave samaye līnaṃ cittaṃ hoti, kālo tasmim samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāya. Taṃ kissa hetu, līnaṃ bhikkhave cittaṃ, taṃ etehi dhammehi susamuṭṭhāpayāṃ hoti. Seyyathāpi bhikkhave puriso parittaṃ aggim ujjālitukāmo assa, so tattha sukkhāni ceva tiṇāni pakkhipeyya, sukkhāni gomayāni pakkhipeyya, sukkhāni kaṭṭhāni pakkhipeyya, mukhavātaṅca dadeyya, na ca paṃsukena okireyya, bhabbo nu kho so puriso parittaṃ aggim ujjālitunti. Evaṃ bhante”¹.

Ettha ca yathāsakaṃ āhārasena dhammavicayasambojjhaṅgādīnaṃ bhāvanāsamuṭṭhāpanāti veditabbā, sā anantaraṃ vibhāvitā eva.

Āraddhavīriyatā dīhīti

ādi-saddena paññāpayogabalavataṃ, pamodubbilāvanaṅca saṅgaṇhāti. **Tassa niggaṇhananti** tassa uddhatassa cittassa samādhisambojjhaṅgādisamuṭṭhāpanena uddhatāpattito nisedhanaṃ. Vuttampi cettaṃ Bhagavatā—

“Yasmiṅca kho bhikkhave samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya. Taṃ kissa hetu, uddhataṃ bhikkhave cittaṃ, taṃ etehi dhammehi suvūpasamayaṃ hoti. Seyyathāpi bhikkhave puriso mahantaṃ aggikkhandhaṃ nibbāpetukāmo assa, so tattha allāni ceva tiṇāni -pa- paṃsukena ca okireyya, bhabbo nu kho so puriso mahantaṃ aggikkhandhaṃ nibbāpetunti. Evaṃ bhante”².

1. Saṃ 3. 99 piṭṭhe.

2. Saṃ 3. 100 piṭṭhe.

Etthāpi yathāsakaṃ āhārasena passaddhisambojjhaṅgādīnaṃ bhāvanāsamuṭṭhāpanāti veditabbā, tattha passaddhisambojjhaṅgassa bhāvanā vuttā eva. Samādhisambojjhaṅgassa anantaraṃ vakkhati.

Paññāpayogamandatāyāti paññābyāpārassa appabhāvena. Yathā hi dānaṃ alobhapadhānaṃ, sīlaṃ adosapadhānaṃ, evaṃ bhāvanā amohapadhānā. Tattha yadā paññā na balavatī hoti, tadā bhāvanā pubbenāparaṃ visesāvahā na hoti, anabhisāṅkhato viya āhāro purisassa yogino cittassa abhiruciṃ na janeti, tena taṃ nirassādaṃ hoti, tathā bhāvanāya sammadeva avīthipaṭipattiyā upasamasukhaṃ na vindati, tenāpi cittaṃ nirassādaṃ hoti. Tena vuttaṃ “**paññāpayoga -pa- nirassādaṃ hoti**”ti. Tassa saṃveguppādanaṃ, pasāduppādanañca tikicchananti taṃ dassento “**aṭṭha saṃvegavatthūni**”ti-ādimāha. Tattha jātijarābyādhimaraṇāni yathārahaṃ sugatiyaṃ, duggatiyañca hontīti tadaññameva pañcavidhabandhanādikhuppipāsādi aññamaññaṃ vibādhanādihetukaṃ apāyadukkaṃ daṭṭhabbaṃ, tayidaṃ sabbaṃ tesāṃ tesāṃ sattānaṃ paccuppannabhavanissitaṃ gahitanti atīte, anāgate ca kāle vaṭṭamūlakadukkhaṃ visuṃ gahitāni. Ye pana sattā āhārūpajīvino, tattha ca uṭṭhānaphalūpajīvino, tesāṃ aññehi asādhāraṇaṃ jīvikādukkhaṃ aṭṭhamāṃ saṃvegavatthu gahitanti daṭṭhabbaṃ. **Ayaṃ vuccati samaye sampahaṃsanāti** ayaṃ bhavanācittassa sampahaṃsitabbasamaye vuttanayena saṃvegajananavasena ceva pasāduppādanavasena ca sammadeva pahaṃsanā, saṃvegajananapubbakapasāduppādanena tosanāti attho.

Sammāpaṭipattim āgammāti līnuddhaccavirahena, samathavīthipaṭipattiyā ca sammā avisamaṃ sammadeva bhāvanāpaṭipattim āgamma. “**Alīnaṃ**”ti-ādisu kosajjapakkhikānaṃ dhammānaṃ anadhimattatāya **alīnaṃ**, uddhaccapakkhikānaṃ anadhimattatāya **anuddhataṃ**, paññāpayogasampattiyā, upasamasukhādhigamena ca **anirassādaṃ**, tato eva **ārammaṇe samappavattaṃ samathavīthipaṭipannaṃ**. Tattha alīnatāya paggahe, anuddhatatāya niggāhe, anirassādatāya sampahaṃsane na byāpāraṃ āpajjati. Alīnānuddhatatā hi ārammaṇe samappavattaṃ, anirassādatāya samathavīthipaṭipannaṃ, samappavattiyā vā **alīnaṃ anuddhataṃ**. Samathavīthipaṭipattiyā **anirassādanti** daṭṭhabbaṃ. **Ayaṃ vuccati samaye ajjupekkhanatāti** ayaṃ ajjupekkhitabbasamaye bhāvanācittassa pagghanigghahasampahaṃsanesu

abyāvaṭatāsaṅkhātāṃ paṭipakkhaṃ abhibhuyya pekkhanā vuccati. Paṭipakkhavikkhambhanato, vipassanāya adhiṭṭhānabhāvūpagamanato ca upacārajjhānampi samādhānakiccanipphattiyā puggalassa samāhitabhāvasādhanamevāti tatha samadhurabhāve nāha “**upacāraṃ vā appanaṃ vā**”ti.

Upekkhāsambojjhaṅgaṭṭhānīyā dhammāti ettha yaṃ vattabbaṃ, taṃ heṭṭhā vuttanayānusārena veditabbaṃ. Anurodhavirodhavippahānavasena majjhattabhāvo upekkhāsambojjhaṅgassa kāraṇaṃ tasmiṃ sati sijjhanato, asati ca asijjhanato. So ca majjhattabhāvo visayavasena duvidhoti āha “**sattamajjhattatā saṅkhāramajjhattatā**”ti. Tadubhaye ca virujjhaṇaṃ passaddhisambojjhaṅgabhāvanāya eva dūrīkatanti anurujjhanasseva pahānavidhiṃ dassetuṃ “sattamajjhattatā”ti-ādi vuttaṃ. Tenāha “**sattasaṅkhāraḷāyanapuggalaparivajjanatā**”ti. Upekkhāya hi visesato rāgo paṭipakkho. Tathā cāha “upekkhā rāgabahulassa visuddhimaggo”ti¹. **Dvīhākārehī**ti kammassakatāpaccavekkhaṇaṃ, attasuññatāpaccavekkhaṇanti imehi dvīhi kāraṇehi. **Dvīhevāti** avadhāraṇaṃ saṅkhyāsamānatādassanattaṃ. Saṅkhyā evettha samānā, na saṅkhyeyyaṃ sabbathā samānanti. **Assāmikabhāvo** anattaniyatā. Sati hi attani tassa kiñcanabhāvena cīvaraṃ, aññaṃ vā kiñci attaniyaṃ nāma siyā, so pana koci nathevāti adhippāyo. **Anaddhaniyanti** na addhānakkhamaṃ na ciraṭṭhāyi, ittaraṃ aniccanti attho. **Tāvakālikanti** tasseva vevacanaṃ.

Mamāyatīti mamattaṃ karoti “mamā”ti taṇhāya pariggayha tiṭṭhati.

Mamāyantāti mānaṃ dabbaṃ karontā.

Ayaṃ satipaṭṭhānadesanā pubbhāgamaggavasena desitāti pubbhāgiya bojjhaṅge sandhāyāha “**bojjhaṅgapariggāhikā sati dukkhasaccaṃ**”ti. Sesāṃ vuttanayattā suviññeyyameva.

Bojjhaṅgapabbavaṇṇanā niṭṭhitā.

Paṭhamabhāṇavāraṇṇanā niṭṭhitā.

1. Visuddhi 1. 314 piṭṭhe.

Catusaccapabbavaṇṇanā

386. **Yathāsabhāvatoti** aviparītasabhāvato. Bādhanakkhaṇato yo yo vā sabhāvo yathāsabhāvo, tato, ruppanādi kakkhaḷādisabhāvatoti attho. **Janikaṃ samuṭṭhāpikanti** pavattalakkhaṇassa dukkhassa janikaṃ nimittalakkhaṇassa samuṭṭhāpikaṃ. **Purimataṇhanti** yathāpariggahitassa dukkhassa nibbattito puretaraṃ siddhaṃ taṇhaṃ. Siddhe hi kāraṇe tassa phaluppatti. Ayaṃ dukkhasamudayo pajānātīti yojanā. **Ayaṃ dukkhanirodhoti** etthāpi eseva nayo. **Ubhinnaṃ appavattinti** dukkhaṃ, samudayo cāti dvinnaṃ appavattinimittaṃ, tadubhayaṃ na pavatti etāyāti **appavatti**, asaṅkhatā dhātu. Dukkhaṃ dukkhasaccaṃ pari jānāti pariññābhisamayavasena paricchindaṭṭīti dukkhaṃ pari jānāno, ariyamaggo, taṃ **dukkhaṃ pari jānānaṃ**. Sesapadadvayepi iminā nayena attho veditaḅbo.

Dukkhasaccaniddesavaṇṇanā

388. **Evaṃ vuttāti** evaṃ uddesavasena vuttā. **Sabbasattānaṃ pariyādānavacanaṃ** byāpanicchāvasena āmedītaniddesabhāvato. **Sattanikāyeti** sattānaṃ nikāye, sattaḅhaṭṭe sattasamūheti attho. Devamanussādibhedāsu hi gaṭṭisu bhummadevādikhattiyādihatti-ādikhuppipāsikāditaṃtaṃjātivisiṭṭho sattasamūho sattanikāyo. Nippariyāyato khandhānaṃ paṭhamābhiniḅbatti jāṭīti katvā “jananaṃ jāṭī”ti vatvā svāyaṃ uppādavikāro aparinipphanno yesu khandhesu icchitaḅbo, te teneva saddhiṃ dassetuṃ “**savikārānaṃ**”ti-ādi vuttaṃ. **Savikārānanti** uppādasāṅkhātena vikārena savikārānaṃ. Jāti-ādīni hi tīṇi lakkhaṇāni dhammānaṃ vikāravisesāti. “**Upasaggamaṇḅḅitavevacanaṃ**”ti iminā kevalaṃ upasaggena padavaḅḅhanaṃ katanti dasseti. **Anupavittākhārenāti** aṇḅakosaṃ, vatthikosaṅca ogāhanākārena. **Nibbattisaṅkhātenāti** āyatanānaṃ pāripūrisaṃsiddhisāṅkhātena.

Atha vā **jananaṃ jāṭīti** aparipuṇṇāyatanāṃ jātimāha. **Sañjātīti** sampuṇṇāyatanāṃ. Sampuṇṇā hi jāti sañjāti. **Okkamaṇḅḅithena okkantaṭṭīti**

aṇḍajalābujavasena jāti. Te hi aṇḍakosaṃ, vatthikosañca okkamantā pavisantā viya paṭisandhiṃ gaṇhanti. **Abhinibbattanaṭṭhena abhinibbattīti** samsedaja-opapātikavasena. Te hi pākāṭā eva hutvā nibbattanti. Abhibyattā nibbatti **abhinibbatti**. “Jananam jāti”ti-ādi āyatanavasena, yonivasena ca dvīhi dvīhi padehi sabbasatte pariyādiyivā jātiṃ dassetuṃ vuttaṃ. “Tesam tesam sattānaṃ -pa- abhinibbattī”ti sattavasena vuttattā **sammutikathā**. **Pātubhāvoti** ettha **iti-saddo** ādi-attho, pakārattho vā, tena “āyatanānaṃ paṭilābho”ti imassa padassa saṅgaho daṭṭhabbo. Ayampi hi paramatthakathāti. **Ekavokārabhavādīsūti** ekacatupañcavokārabhavesu. **Tasmim̐** khandhānaṃ pātubhāve **sati**. **Āyatanānaṃ paṭilābhoti** ekacatuvoḥārabhavesu dvinnam̐ dvinnam̐ āyatanānaṃ vasena, sesesu rūpadhātuyam̐ paṭisandhikkhaṇe uppajjamānānaṃ pañcannaṃ, kāmādhātuyam̐ vikalāvikalindriyānaṃ vasena sattannaṃ, navannaṃ, dasannaṃ, puna dasannaṃ, ekādasannañca āyatanānaṃ vasena saṅgaho daṭṭhabbo. **Pātubhavantāneva**, na kutoci āgatāni. **Paṭiladdhāni nāma honti** sattasantānassa tassa samvijjamānattā. **Āyatanānaṃ paṭilābhoti** vā āyatanānaṃ attalābho veditabbo.

389. **Sabhāvaniddeso**ti sarūpaniddeso. Sarūpañhetam̐ jīṇṇatāya, yadidaṃ “jarā”ti, “vayohānī”ti vā. Jīraṇameva **jīraṇatā**, jīrantassa vā ākāro **tā-saddena** vuttoti āha “**ākārabhāvaniddeso**”ti. **Khaṇḍitadantā khaṇḍitā nāma** uttarapadalopena. Yassa vikārassa vasena satto “khaṇḍito”ti vuccati, tam̐ **khaṇḍiccam̐**. Tathā palitāni assa santīti “palito”ti vuccati, tam̐ **pāliccam̐**. Valittacatāya vā vali taco assāti **valittaco**.

Phalūpacārenāti phalavohārena.

390. Cavanameva **cavanatā**, cavantassa vā ākāro **tā-saddena** vutto. **Khandhā bhijjantīti** ekabhavapariyāpannassa khandhasantānassa pariyosānabhūtā khandhā bhijjanti, teneva bhedenā nirodhanam̐ **adassanam̐ gacchanti**, **tasmā bhedo antaradhānam̐** maraṇam̐. **Maccumaraṇanti** maccusañkhātā ekabhavapariyāpannajīvitindriyupacchedabhūtā maraṇam̐. Tenāha “**na khaṇīkamarāṇan**”ti.

“Maccu maraṇaṃ”ti samāsaṃ akatvā yo “maccū”ti vuccati bhedo, yañca maraṇaṃ pāṇacāgo, idaṃ vuccati maraṇanti visuṃ sambandho na na yujjati. **Kālakiriyā**ti maraṇakālo, anatikkaṃaṇiyattā visesena “kālo”ti vuttoti tassa kiriyā, atthato cutikhandhānaṃ bhedappattiyeva, kālassa vā antakassa kiriyāti yā loke vuccati, sā cuti, maraṇanti attho. **Ayaṃ sabbāpi sammutikathāva** “yaṃ tesāṃ tesāṃ sattānaṃ”ti-ādinā sattavasena vuttattā. **Ayaṃ paramatthakathā** paramatthato labbhamānānaṃ rupanādisabhāvānaṃ dhammānaṃ vinassanajotanābhāvato.

Attāti bhavati ettha cittanti **attabhāvo**, khandhasamūho, tassa, **nikkhepo** nikkhipanaṃ, pātanaṃ vināsoti attho. Aṭṭhakathāyaṃ pana “**marāṇaṃ pattassā**”ti-ādinā nikkhepahetutāya patanaṃ “nikkhepo”ti phalūpacārena vuttanti dasseti. “Khandhānaṃ bhedo”ti pabandhavasena pavattamānassa dhammasamūhassa vināsajotanāti ekadesato paramatthakathā, “jīvitindriyassa upacchedo”ti panettha na koci vohāralesopīti āha “**jīvitindriyassa upacchedo pana sabbākārato paramatthato marāṇaṃ**”ti. Evaṃ santepi yassa khandhabhedassa pavattattā “tisso mato, phusso mato”ti vohāro hoti, so bhedo khandhappabandhassa anupacchinnatāya “sammutimaraṇaṃ”ti vattabbataṃ arahatīti āha “**etadeva sammutimaraṇantipi vuccati**”ti. Tenāha “**jīvitindriyupacchedameva hī**”ti-ādi. Sabbaso pabandhasamucchedo hi samucchedamaraṇanti.

391. **Byasanenā**ti anathena. “Dhammapaṭṭisambhidā”ti-ādīsu¹ viya **dhamma**-saddo hetupariyāyoti āha “**dukkhakāraṇenā**”ti. Socananti lakkhitabbatāya **socanalakkhaṇo**. Socitassa socanakassa puggalassa, cittassa vā bhāvo **socitabhāvo**. **Abbhantare**ti attabhāvassa anto. Attano lūkhasabhāvatāya **sosento**. Thāmagamanena samantato sosanavasena **parisosento**.

392. “**Ādissa ādissa devanti paridevanti etenāti ādevo**”ti ādevana-saddaṃ katvā assumocanādivikāraṃ āpajjantānaṃ

1. Abhi 2. 307 piṭṭhe.

tabbikārāpattiyā so saddo kāraṇabhāvena vutto. **Taṃ taṃ vaṇṇanti** taṃ taṃ guṇaṃ. **Tassevāti** ādevaparidevasseva. **Bhāvaniddesāti** “ādevitattaṃ paridevitattan”ti bhāvaniddesā.

393. Nissayabhūto kāyo etassa atthīti **kāyikaṃ**. Tenāha “**kāyapasādavattjukan**”ti. Dukkaraṃ khamanaṃ etassāti **dukkhamaṇaṃ**, so eva attho sabhāvoti **dukkhamaṇaṭṭho**, tena. Sātavidhuratāya **asātaṃ**.

394. Cetasi bhavanti **cetasikaṃ**, taṃ pana yasmā cittaṇa samaṃ pakārehi yuttaṃ, tasmā āha “**cittasampayuttaṃ**”ti.

395. Sabbavisayaapaṭipattinivāraṇavasena samantato sīdanaṃ **saṃsīdanaṃ**. Uṭṭhātumpi asakkuṇeyyatākaraṇavasena atibalavaṃ, virūpaṃ vā sīdanaṃ **visīdanaṃ**. **Cittakilamathoti** visīdanaṃkārena cittassa parikhedo. **Upāyāso**, sayam na dukkho dosattā, saṅkhārakkhandhapariyāpannadhammantarattā vā. Ye pana domanassameva “upāyāso”ti vadeyyuṃ, te “upāyāso tihi khandhehi ekenāyatanena ekāya dhātuyā sampayutto, ekena khandhena ekenāyatanena ekāya dhātuyā kehici sampayutto”ti¹ imāya pāḷiyā paṭikkhipitabbā. **Upa**-saddo bhusatthoti āha “**balavataraṃ āyāso upāyāso**”ti. Dhammamattatādīpano **bhāvaniddeso** dhammato aññassa kattu-abhāvajotano, asati ca kattari tena kattabbassa, pariggahetabbassa ca abhāvo evāti āha “**attattaniyābhāvadīpakā bhāvaniddesā**”ti.

398. **Jātidhammānanti** ettha **dhamma**-saddo pakatipariyāyoti āha “**jātisabhāvanān**”ti, jāyanapakatikānanti vuttaṃ hoti. Maggabhāvanāya maggabhāvanicchāhetukatā icchitabbāti tādisaṃ icchaṃ nivattento “**vinā maggabhāvanān**”ti āha. Aparo nayo **na kho panetanti** yaṃ etaṃ “aho vata mayaṃ na jātidhammā assāma, na ca vata no jāti āgaccheyyā”ti evaṃ pahīnasamudayesu ariyesu vijjamānaṃ ajātidhammattaṃ, parinibbutesu ca vijjamānaṃ jātiyā anāgamaṇaṃ icchitaṃ, taṃ icchantassāpi maggabhāvanāya vinā

1. Abhi 3. 46 piṭṭhe.

appattabbato, anicchantassāpi bhāvanāya pattabbato na icchāya pattabbaṃ nāma hotīti evamettha attho daṭṭhabbo. Vakkhamānatthasampiṇḍanattho pi-saddoti āha “**upari sesāni upādāya pikāro**”ti. **Yanti** hetu-atthe karaṇe paccattavacananti āha “**yenapi dhammenā**”ti. Hetu-attho hi ayaṃ **dhamma-saddo**, alabbhaneyyabhāvo ettha hetu veditabbo. **Tanti** vā icchitassa vatthuno alabbhanaṃ, evamettha “**yampīti yenapī**”ti vibhattivipallāsenā attho vutto. Yadā pana **yaṃ-saddo** “icchan”ti etaṃ apekkhati, tadā alābhavisiṭṭhā icchā vuttā hoti. Yadā pana “na labhati”ti etaṃ apekkhati, tadā icchāvisiṭṭho alābho vutto hoti, so pana atthato añño dhammo natthi, tathāpi alabbhaneyyavatthugatā icchāva vuttā hoti. **Sabbatthāti** “jarādhammānan”ti-ādinā āgatesu sabbavāresu.

Samudayasaccaniddesavaṇṇanā

400. **Punabbhavakaraṇaṃ punobbhavo** uttarapadalopaṃ katvā manosaddassa viya purimapadassa okārantatā daṭṭhabbā. Atha vā sīlanatṭhena **ika-saddena** gamitatṭhattā kiriyāvācakassa saddassa adassanaṃ daṭṭhabbaṃ yathā “asūpabhakkhanasīlo āsūpiko”ti. **Sammohavinodaniyaṃ** pana “punabbhavaṃ deti, punabbhavāya saṃvattati, punappunaṃ bhava nibbattetīti ponobbhavikā”ti¹ attho vutto, so “taddhitā”ti² bahuvacananiddesato, vicittatā vā taddhitavuttiyā, abhidhānalakkhaṇatā vā taddhitānaṃ tesupi atthesu ponobbhavika-saddasiddhi sambhaveyyāti katvā vutto. Tattha kammunā sahajātā punabbhavaṃ deti, asahajātā kammahāyabhūtā punabbhavāya saṃvattati, duvidhāpi punappunaṃ bhava nibbattetīti daṭṭhabbā. Nandanaṭṭhena, rañjanaṭṭhena ca **nandīrāgo**, yo ca nandīrāgo, yā ca taṇhāyanaṭṭhena taṇhā, ubhayameṭaṃ ekatthaṃ, byañjanaṃeva nānanti taṇhā “**nandīrāgena saddhim atthato ekattameva gatā**”ti vuttā. Tabbhāvatto hettha **saha-saddo** “sanidassanā dhammā”ti-ādīsu³ viya. Tasmā **nandīrāgasahagatāti** nandīrāgabhāvaṃ gatā sabbāsupi avatthāsu nandīrāgabhāvassa apaccakkhāya vattanatotī attho. Rāgasambandhena **uppannassāti** vuttaṃ. Rūpārūpabhavarāgassa visuṃ vuccamānattā kāmabhava eva bhavapatthanuppatti vuttāti veditabbā.

1. Abhi-Ṭṭha 2. 104 piṭṭhe.

2. Pāṇinī 4. 1. 76 suttāṃ.

3. Abhi 1. 4 piṭṭhe.

Tasmim̄ tasmim̄ piyarūpe paṭhamuppattivasena **“uppajjati”**ti vuttaṃ, punappunam̄ pavattivasena **“nivasati”**ti. Pariyuṭṭhānānusayavasena vā uppattinivesā yojetabbā. **Sampattiyanti** manussasobhagge, devatte ca. **Attano cakkhunti** savatthukam̄ cakkhum̄ vadati, sapaśādam̄ vā maṃsapiṇḍam̄. **Vippassannam̄ pañcapasādanti** parisuddhasuppasannanīlapītalohitakaṇha-odātavaṇṇavantam̄. **Rajatapanālikam̄ viya** chiddam̄ abbhantare odātattā. **Pāmaṅgasuttam̄ viya** ālambakaṇṇabaddham̄. Tuṅgā uccā dīghā nāsikā **tuṅganāsā**, evam̄ **laddhavohāram̄** attano **ghānam̄**. “Laddhavohārā”ti vā pāṭho, tasmim̄ sati tuṅgā nāsā yesam̄ te **tuṅganāsā**, evam̄ **laddhavohārā** sattā attano **ghānanti** yojanā kātabbā. **Jivham̄ -pa- maññanti** vaṇṇasaṅghānato, kiccatto ca. **Kāyam̄ -pa- maññanti** ārohapariṇāhasampattiyā. **Manam̄ -pa- maññanti** atītādi-atthacintanasamattham̄. **Attanā paṭiladdhāni** ajjhatañca sarīragandhādīni, bahiddhā ca vilepanagandhādīni. **Uppajjamānā uppajjatīti yadā uppajjamānā hoti, tadā ettha uppajjatīti** sāmāññena gahitā uppādakiriyā lakkhaṇabhāvena vuttā, visayavisiṭṭhā ca lakkhitabbabhāvena. Na hi sāmāñnavisesehi nānattavohāro na hotīti. **Uppajjamānāti** vā anicchito uppādo hetubhāvena vutto, uppajjatīti nicchito phalabhāvena yadi uppajjamānā hoti, ettha uppajjatīti.

Nirodhasaccaniddesavaṇṇanā

401. “Sabbāni nibbānavevacanānevā”ti vatvā tamattham̄ pākaṭataram̄ kātuṃ **“nibbānañhi”**ti-ādi āradham̄. Tattha **āgammāti** nimittam̄ katvā. Nibbānahetuko hi taṇhāya asesavirāganirodho. Khayagamanavasena **virajjati**. Appavattigamanavasena **nirujjhati**. Anapekkhatāya cajanavasena, hānivasena vā **cajīyati**. Puna yathā nappavattati, tathā dūrakhipanavasena **paṭinissajjīyati**. Bandhanabhūtāya mocanavasena **muccati**. Asam̄kilesavasena **na allīyati**. Kasmā panetaṃ nibbānam̄ ekam̄ eva samānam̄ nānānāmehi vuccatīti? Paṭipakkhanānatāyāti dassento **“ekameva hī”**ti-ādimāha. Saṅkhatadhammavidhurasabhāvattā nibbānassa nāmānīpi guṇanemittikattā saṅkhatadhammavidhurāneva hontīti vuttaṃ **“sabbasaṅkhatānam̄ nāmapaṭipakkhavasenā”**ti. Asesam̄ virajjati taṇhā etthāti asesavirāgoti. Esa nayo sesesupi. Ayam̄ pana viseso—natthi etassa uppādo,

na vā etasmim̄ adhigate puggalassa uppādoti **anuppādo**, asaṅkhatadhammo. “**Appavattan**”ti-ādīsupi iminā nayena attho veditabbo. **Āyūhanam̄** samudayo, tappaṭipakkhavasena **anāyūhanam̄**.

Taṅhā appahīne sati yattha uppajjati, pahāne pana sati tattha tatthevassā abhāvo sudassitoti āha “**tattheva abhāvam̄ dassetun**”ti. **Apaññattinti** apaññāpanam̄, “titta-alābu atthī”ti vohārābhāvam̄ vā. Titta-alābuvalliyā appavattim̄ icchanto puriso viya ariyamaggo, tassa tassā appavattininnacittassa mūlacchedanam̄ viya maggassa nibbānārammaṇassa taṅhāya pahānam̄, tadappavatti viya taṅhāya appavattibhūtam̄ nibbānam̄ daṭṭhabbam̄.

Dutiya-upamāyam̄ dakkhiṇadvāram̄ viya nibbānam̄, coraghātakā viya maggo. Dakkhiṇadvāre ghātītāpi corā pacchā “aṭaviyam̄ corā ghātītā”ti vuccanti, evam̄ nibbānam̄ āgamma niruddhāpi taṅhā “cakkhādīsū niruddhā”ti vuccati tattha kiccakaraṇābhāvatoti daṭṭhabbam̄. Purimā vā upamā maggena niruddhāya “piyarūpasātarūpesu niruddhā”ti vattabbatādassanattam̄ vuttā, pacchimā nibbānam̄ āgamma niruddhāya “piyarūpasātarūpesu niruddhā”ti vattabbatādassanattam̄ vuttāti ayam̄ etāsam̄ viseso.

Maggasaccaniddesavaṇṇanā

402. **Aññamaggapaṭikkhepanatthanti** titthiyehi parikkappitassa maggassa dukkhanirodhagāminipaṭipadābhāvapaṭikkhepanattham̄, aññassa vā maggabhāvapaṭikkhepo **aññamaggapaṭikkhepo**, tadattham̄. “**Ayan**”ti pana attano “tesu ca bhikkhūsu ekaccānam̄ paccakkhabhāvato āsannapaccakkhavacanam̄. **Ārakattā**ti niruttinayena ariyasaddasiddhimāha. **Ariyabhāvakarattā**ti ariyakaraṇo **ariyoti** uttarapadalopena, puggalassa ariyabhāvakarattā ariyam̄ karotīti vā **ariyo**, ariyaphalapaṭilābhakarattā vā ariyam̄ phalam̄ labhāpeti janētīti **ariyo**. Purimena cettha attano kiccavasena pacchimena phalavasena ariyanāmalābho vuttoti daṭṭhabbo. Catusaccapaṭivedhāvaham̄ kammaṭṭhānam̄ **catusaccakammaṭṭhānam̄**, catusaccam̄ vā uddissa pavattam̄ bhāvanākammam̄ yogino sukhavisesānam̄ ṭhānabhūtanti **catusaccakammaṭṭhānam̄**. Purimāni dve

saccāni vaṭṭaṃ pavattihetubhāvato. **Pacchimāni vivatṭaṃ** nivattitadadhigamupāyabhāvato. **Vatṭe kammaṭṭhānābhiniveso** sarūpato pariggahasabbhāvato. **Vivatṭe natthi** avisayattā, visayatte ca payojanābhāvato. Purimāni dve saccāni uggaṇhitvāti sambandho. Kammaṭṭhānapāḷiyā hitadatthasallakkaṇaena vācuggatakaraṇaṃ **uggaho**. Tenāha “**vācāya punappunaṃ parivattento**”ti. **Itṭhaṃ kantanti** nirodhamaggesu ninnabhāvaṃ dasseti, na abhinandaṇaṃ, tanninnabhāvoyeva ca tattha kammakaraṇaṃ daṭṭhabbaṃ.

Ekapaṭivedhenevāti ekañāneva paṭivijjhanena. **Paṭivedho** paṭighātābhāvena visaye nissaṅgacārasaṅkhātāṃ nibbijjhanāṃ. **Abhisamayo** avirajjhivā visayassa adhigamasāṅkhāto avabodho. “Idaṃ dukkhaṃ, ettakaṃ dukkhaṃ, na ito bhiiyo”ti paricchinditvā jānanaṃ vuttanayena paṭivedhoti **pariññāpaṭivedho**, tena. Idañca yathā tasmim̃ ñāṇe pavatte pacchā dukkhassa sarūpādiparicchede sammoho na hoti, tathā pavattiṃ gahetvā vuttāṃ, na pana maggañāṇassa “idaṃ dukkhaṃ”ti-ādinā¹ pavattanato. Pahīnassa puna appahātabbatāya pakatṭhaṃ hānaṃ cajanāṃ samucchindanaṃ, pahānameva vuttanayena paṭivedhoti **pahānapaṭivedho**, tena. Ayampi yasmiṃ kilese appahīyamāne maggabhāvanāya na bhavitabbaṃ, asati ca maggabhāvanāya yo uppajjeyya, tassa kilesassa paṭighātāṃ karontassa anuppattidhammataṃ āpādentassa ñāṇassa tathāpavattiyaṃ paṭighātābhāvena nissaṅgacāraṃ upādāya evaṃ vutto. **Sacchikiriyā** paccakkhakarāṇaṃ anussavākāraparivitakkādike muñcitvā sarūpato āramaṇakarāṇaṃ “idaṃ taṃ”ti yathāsabhāvato gahaṇaṃ, sā eva vuttanayena paṭivedhoti **sacchikiriyāpaṭivedho**, tena. Ayaṃ panassa āvaraṇassa asamucchindanaṃ ñāṇaṃ nirodhaṃ ālambitūṃ na sakkoti, tassa samucchindanaṃ taṃ sarūpato vibhāventameva pavattatīti evaṃ vutto. **Bhāvanā** uppādanā, vaḍḍhanā ca. Tattha paṭhamamagge uppādanaṭṭhena, dutiyādīsū vaḍḍhanaṭṭhena, ubhayatthāpi vā ubhayatthāpi veditabbaṃ. Paṭhamamaggepi hi yathārahaṃ vuṭṭhānagāminiyāṃ pavattaṃ pari jānānādiṃ vaḍḍhento pavattoti vaḍḍhanaṭṭhena bhāvanā sakkā viññātūṃ. Dutiyādīsūpi appahīnakilesappahānato, puggalantarabhāvasādhanato ca uppādanaṭṭhena bhāvanā sakkā viññātūṃ, sā eva vuttanayena paṭivedhoti **bhāvanāpaṭivedho**, tena.

1. Ma 2. 437; Ma 3. 85 piṭṭhesu.

Ayampi hi yathā nāṇe pavatte pacchā maggadhammānaṃ sarūpaparicchede sammoho na hoti, tathā pavattimeva gahetvā vutto.

Tiṭṭhantu tāva yathādhigatā maggadhammā, yathāpavattesu phaladhammesupi ayaṃ yathādhigatasaccadhammesu viya vigatasammohova hoti. Tenevāha “diṭṭhadhammo pattadhammo viditadhammo pariyoḡāḷhadhammo”¹. Yato sacassa dhammatāsaṃcoditā yathādhigatasaccadhammālamaniyo maggavīthito parato maggaphalapahīnāvasiṭṭhakilesanibbānānaṃ paccavekkhaṇā pavattanti, dukkhasaccadhammāpi sakkāyadiṭṭhi-ādayo. Ayaṅca atthavaṇṇanā “**pariṇṇābhisamayenā**”²ti-ādisupi vibhāvetabbā. **Ekābhisamayena abhisametī**ti etthāha vitaṇḍavādī “ariyamaggañāṇaṃ catūsu saccesu nānābhisamayavasena kiccakaraṇaṃ”⁴ti, so abhidhamme⁴ odhisokathāya saññāpetabbo. Idāni tameva ekābhisamayāṃ vitthāravasena vibhāvetuṃ “**eva massā**”²ti-ādi vuttaṃ. “Pubbabhāge -pa- paṭivedho hoti”²ti kasmā vuttaṃ, nanu paṭivedho pubbabhāgiyo na hotīti? Saccametaṃ nippariyāyato, idha pana uggahādivasena pavatto avabodho pariyaṃyato tathā vutto. Paṭivedhanimittatā vā uggahādivasena pavattaṃ dukkhādisu pubbabhāge nāṇaṃ “paṭivedho”²ti vuttaṃ, na paṭivijjhanasabhāvaṃ. **Kiccatoti** pubbabhāgehi dukkhādināṇehi kātabbakiccassa idha nipphattito, imasseva vā nāṇassa dukkhādippakāsanakiccato, pariṇṇāditoti attho. **Ārammaṇapaṭivedhoti** sacchikiriyāpaṭivedhamāha. **Sāti** paccavekkhaṇā. **Idhāti** imasmim̄ thāne. Uggahādisu vuccamānesu **na vuttā** anavasaraṭṭā. Adhigame hi sati tassā siyā avasaro.

Tameva hi anavasaraṃ dassetuṃ “**imassa cā**”²ti-ādi vuttaṃ. **Pubbe pariggahatoti** kammaṭṭhānapariggahato pubbe. Uggahādivasena saccānaṃ pariggaṇhanaṃhi pariggaho. Tathā tāni pariggaṇhanato manasikāraḍaḷhatāya pubbabhāgiyā dukkhapariṇṇādayo hontiyevāti āha “**pariggahato paṭṭhāya hoti**”²ti. **Aparabhāgeti** maggakkhaṇe. **Duddasattāti** attano pavattikkhaṇavasena pākāṭānipi pakatiñāṇena sabhāvarasato daṭṭhuṃ asakkuṇeyyattā. Gambhīreneva ca bhāvanāñāṇena, tathāpi matthakappattena ariyamaggañāṇeneva yāthāvato passitabbatā

1. Vi 3. 17; Dī 1. 102; Ma 2. 43 piṭṭhesu.

2. Abhi 4. 87 piṭṭhe.

gambhīrāni. Tenāha “**lakkhaṇapaṭivedhato pana ubhayampi gambhīran**”ti. Itarāni asaṃkiliṭṭhasaṃkilesikatāya accantasukhappattāya anuppattibhavatāya, anuppannapubbatāya ca pavattivasena apākaṭattā ca paramagambhīrattā, tathā paramagambhīrañāneva passitabbatāya pakatiñāneva daṭṭhum na sakkuṇeyyānīti **duddasāni**. Tenāha “**itaresaṃ panā**”ti-ādi. **Payogoti** kiriyā, vāyāmo vā. Tassa mahantatarassa icchitabbataṃ, dukkarataratañca upamāhi dasseti “**bhavaggaggahaṇatthan**”ti-ādinā. **Paṭivedhakkhaṇeti** ariyassa maggassa catusaccasampaṭivedhakkhaṇe. **Ekameva taṃ ñāṇanti** dukkhādīsu pariññādikicasādhanavasena ekameva taṃ maggañāṇaṃ **hoti**.

Imesu tīsu ṭhānesūti imesu viramitabbatāvasena jotitesu tīsu kāmabyāpādavihiṃsāvitakkavatthūsu. Viṣum viṣum **uppannassa** tividha **akusalasaṅkappassa**. **Padapacchedatoti** ettha gatamaggo “padan”ti vuccati, yena ca upāyena kāraṇena kāmavitakko uppajjati, so tassa gatamaggoti tassa pacchedo ghāto padapacchedo, tato padapacchedato. Anuppattidhammatāpādanaṃ **anuppattisādhanam**, tassa vasena. Maggakiccasādhanena **maggaṅgaṃ pūrayamāno ekova** tividhakiccasādhano **kusalasaṅkappo uppajjati**. Tividhākusalasaṅkappasamucchedanameva hettha tividhakiccasādhanam daṭṭhabbam. Iminā nayena “**imesu catūsu ṭhānesū**”ti-ādīsupi attho veditabbo.

Musāvādā veramaṇi-ādayoti ettha yasmā **sikkhāpadavibhaṅge**¹ viraticetanā, sabbe sampayuttadhammā ca sikkhāpadānīti āgatānīti tattha padhānānaṃ viraticetanānaṃ vasena “viratīyopi honti cetanāyopī”ti² **sammohavinodaniyam** vuttaṃ, tasmā keci, “ādi-saddena na kevalaṃ pisuṇavācā veramaṇi-ādīnaṃyeva saṅgaho, atha kho tādisānaṃ cetanānampi saṅgaho”ti vadanti, taṃ pubbhāgavasena vuccamānattā yujjeyya, musāvādādīhi viramaṇakāle vā viratīyo, subhāsītādivācābhāsanādi kāle ca cetanāyo yojetabbā, maggakkhaṇe pana viratīyova icchitabbā cetanānaṃ amaggaṅgattā. Ekasa ñāṇassa dukkhādīñāṇatā viya, ekāya viratīyā musāvādādiviratibhāvo viya ca ekāya cetanāya sammāvācādīkiccattayasādhanasabhāvābhāvā sammāvācādībhāvāsiddhito, taṃsiddhiyam aṅgattayatāsiddhito ca.

1. Abhi 2. 299 piṭṭhe.

2. Abhi-Ṭṭha 2. 365 piṭṭhe.

Bhikkhussa ājīvahetukam kāyavacīduccaritam nāma ayoniso āhārapariyesanahetukameva siyāti āha “**khādanīya -pa- duccharitan**”ti. Kāyavacīduccaritaggaḥaṇaṇca kāyavacīdvāreyeva ājīvapakopo, na manodvāreti dassanattam. Tenāha “**imesuyeva sattasu ṭhānesū**”ti.

Anuppannānanti asamudācāravasena vā ananubhūtārammaṇavasena vā anuppannānam. Aññathā hi anamatagge saṁsāre anuppannā pāpakā akusalā dhammā nāma na santi. Tenāha “**ekasmim bhave**”ti-ādi. Yasmiṁ bhave ayam imam vīriyam ārabhati, tasmim **ekasmim bhave. Janetīti** uppādeti. Tādisam chandam kurumāno evam chandam janeti nāma. **Vāyāmarṁ karotīti** payogam parakkamam karoti. **Vīriyam pavattetīti** kāyikacetasikavīriyam pakārato vatteti. **Vīriyena cittaṁ paggahitam karotīti** teneva sahaṭṭāvīriyena cittaṁ ukkhipento kosajjapātato nisedhanena paggahitam karoti. **Padahanam pavattetīti** padhānam vīriyam karoti. Paṭipāṭiyā panetāni cattāri padāni āsevanābhāvanābahulīkammaṣācaccakiriyāhi yojetabbāni.

Uppānnapubbānanti sadisavohārena vuttam. Bhavati hi tam sadisesu tabbohāro yathā “sā eva tittiri, tāni eva osadhāni”ti. Tenāha “**idāni tādisē**”ti. **Uppannānanti** “anuppannā”ti avattabbatam āpannānam. **Pahānāyāti** pajahanatthāya. **Anuppannānam kusalānanti** ettha kusalāti uttarimanussadhammā adhippetā, tesaṅca **uppādo** nāma adhigamo paṭilābho, tappaṭikkhepena **anuppādo** appaṭilābhoti āha “**appaṭiladdhānam paṭhamajjhānādīnan**”ti. “Ṭhitiyā vīriyam ārabhati”ti vutte na khaṇaṭhiti adhippetā tadattham vīriyārabbhena payoṇābhāvato, atha kho pabandhaṭhiti adhippetāti āha “**punappunam uppattipabandhavasena ṭhitatthan**”ti. **Sammussanam** paṭipakkhadhammasena adassanamupagamananti tappaṭikkhepena sammussanam **asammosoti** āha “**asammosāyāti avināsanatthan**”ti. **Bhiyyobhāvo** punappunam bhavanam, so pana uparūpari uppattīti āha “**uparibhāvāyā**”ti. **Vepullam** abhiṇṇhappavattiyā paguṇabalavabhāvāpattīti vuttam “**vepullāyāti vipulabhāvāyā**”ti, mahantabhāvāyāti attho. **Bhāvanāya paripūraṇatthanti** jhānādibhāvanāparibrūhanattham.

Catūsu ṭhānesūti anuppannākusalānuppādanādīsu catūsu ṭhānesu.
Kiccasādhanavasenāti catubbidhassapi kiccassa ekajjhaṃ nipphādanavasena.

Jhānāni pubbhāgepi maggakkhaṇepi nānāti yadipi samādhi-upakārakehi
 abhiniropanānumajjanasampiyāyanabrūhanasantasukhasabhāvehi vitakkādīhi
 sampayogabhedato bhāvanātisayappavattānaṃ catunnaṃ jhānānaṃ vasena
 sammāsamādhi vibhatto, tathāpi vāyāmo viya
 anuppannākusalānuppādanādicatuvāyāmakiccaṃ, sati viya ca
 asubhāsukhāniccānattesu kāyādīsu subhādisaññāppahānacatusatikiccaṃ, eko
 samādhi catujhānasamādhikiccaṃ na sādhetīti pubbhāgepi
 paṭhamajjhānasamādhi eva maggakkhaṇepi, tathā pubbhāgepi
 catutthajjhānasamādhi eva maggakkhaṇepīti attho. **Nānamaggavasenāti**
 paṭhamamaggādīnānamaggavasena jhānāni nānā. **Dutiyādayopi** maggā
dutiyādīnaṃ jhānānaṃ. **Ayaṃ panassāti** ettha maggabhāvena catubbidhampi
 ekattena gahetvā “assā”ti vuttaṃ, **assa** maggassāti attho. **Ayanti** pana ayaṃ
 jhānavasena sabbasadisabbāsadisekaccasadisatāvīseso.

Pādakajjhānaniyamena hotīti idha pādakajjhānaniyamam dhuraṃ katvā
 vuttaṃ, yathā cettha, evaṃ **sammohavinodaniyampi**¹. **Aṭṭhasālīniyam**² pana
 vipassanāniyamo vutto sabbavādāvirodhato, idha pana
 sammasitajjhānapuggalajjhāsavādanivattanato pādakajjhānaniyamo vutto.
 Vipassanāniyamo pana sādharāṇatā idhāpi na paṭikkhittoti daṭṭhabbo. Aññe
 ca ācariyavādā parato vakkhamānā vibhajitabbāti yathāvuttameva tāva
 pādakajjhānaniyamam vibhajanto āha “**pādakajjhānaniyamena tāvā**”ti.
Paṭhamajjhāniko hoti, yasmā āsannapadeso vuṭṭhitasamāpatti maggassa
 attano sadisabhāvaṃ karoti bhūmivaṇṇo viya godhāvaṇṇassa.
Paripuṇṇāneva hontīti aṭṭha, satta ca hontīti attho. **Satta honti**
 sammāsaṅkappassa abhāvato. **Cha honti** pītisambojjhaṅgassa abhāvato.
 Maggaṅgabojjhaṅgānaṃ sattachabhāvaṃ atidisati “**esa nayo**”ti. **Arūpe**
catukkapañcakajjhānaṃ -pa- **vuttaṃ** aṭṭhasālīniyanti adhippāyo. Nanu tattha
 “arūpe tikacatukkajjhānaṃ uppajjati”ti³ vuttaṃ, na
 “catukkapañcakajjhānaṃ”ti? Saccametam, yesu pana saṃsayo atthi, tesam

1. Abhi-Ṭṭha 2. 112 piṭṭhe. 2. Abhi-Ṭṭha 1. 272 piṭṭhe. 3. Abhi-Ṭṭha 1. 274 piṭṭhe.

uppattidassanena, tena atthato “catukkapañcakajjhānaṃ uppajjati”ti vuttameva hotīti evamāhāti veditabbaṃ. Samudāyañca apekkhitvā “**tañca lokuttaram, na lokiyan**”ti āha “avayavekattaṃ līngasamudāyassa visesakam hotī”ti. Catutthajjhānameva hi tattha lokiyaṃ uppajjati, na catukkaṃ, pañcakaṃ vāti. **Ettha kathanti** pādakajjhānassa abhāvā kathaṃ daṭṭhabbanti attho. **Tamjhanikāvassa tattha tayo maggā uppajjanti**, tajjhānikaṃ paṭhamaphalādiṃ pādakaṃ katvā uparimaggabhāvanāyāti adhippāyo. Tikacatukkajjhānikaṃ pana maggaṃ bhāvetvā tattha uppanassa arūpacatutthajjhānaṃ, tajjhānikaṃ phalañca pādakaṃ katvā uparimaggabhāvanāya aññajjhānikāpi uppajjantīti, jhānaṅgādiniyāmikā pubbābhisankhārasamāpattipādakaṃ, na sammāsittabbāti phalassāpi pādakatā daṭṭhabbā.

Keci panāti moravāpīmahādattatheraṃ sandhāyāha. Puna **kecīti** Tipiṭakacūlābhayatheraṃ. Tatiyavāre **kecīti** “pādakajjhānameva niyameṭi”ti evaṃvādinam tipiṭakacūlanāgattherañceva anantaram vutte dve ca there ṭhapetvā itare there sandhāya vadati.

403. Sasantatipariyāpannānaṃ dukkhasamudayānaṃ appavattibhāvenapariggayhamāno nirodhopi sasantatipariyāpanno viya hotīti katvā vuttaṃ “**attano vā cattāri saccāni**”ti. **Parassa vāti** etthāpi eseva nayo. Tenāha Bhagavā “imasmiṃ yeva byāmamatte kaḷevare sasaññimhi samanake lokañca paññāpemi, lokasamudayañca paññāpemi, lokanirodhañca paññāpemi, lokanirodhagāminipaṭipadañca paññāpemi”ti¹. Kathaṃ pana ādikammiko nirodhamaggasaccāni pariggaṇhātīti? Anussavādisiddhamākāraṃ pariggaṇhāti. Evañca katvā lokuttarabojjhaṅge uddissāpi pariggaho na virujjhati. **Yathāsambhavatoti** sambhavānurūpaṃ, ṭhapetvā nirodhasaccaṃ sesasaccavasena samudayavayāti veditabbāti attho.

Catusaccapabbavaṇṇanā niṭṭhitā.

Dhammānupassanāvaṇṇanā niṭṭhitā.

1. Saṃ 1. 61; Aṃ 1. 357 piṭṭhesu.

404. “Aṭṭhikasaṅkhalikaṃ samaṃsan”ti-ādikā satta sivathikā aṭṭhikakammaṭṭhānatāya itarāsaṃ uddhumātakādīnaṃ sabhāvenevāti navannaṃ sivathikānaṃ appanākammaṭṭhānatā vuttā. **Dveyevāti** ānāpānaṃ, dvattiṃsākāroti imāni dveyeva. **Abhinivesoti** vipassanābhiniveso, so pana sammasaniyadhammapariggaho. Iriyāpathā, ālokitādayo ca rūpadhammānaṃ avatthāvisesamattatāya na sammasanupagā viññatti-ādayo viya. Nīvaraṇabojjhaṅgā ādito na pariggahetabbāti vuttam **“iriyāpatha -panajāyati”**ti. Kesādi-apadesena tadupādānadhammā viya iriyāpathādi-apadesena tadavatthā rūpadhammā pariggayhanti, nīvaraṇādīmukhena ca taṃsampayuttā, taṃnissayadhammāti adhippāyena Mahāsivatthero ca iriyāpathādīsipi **“abhiniveso jāyati”**ti avoca. **“Atthi nu kho me”**ti-ādi pana sabhāvato iriyāpathādīnaṃ ādikammikassa anicchitabhāvadassanaṃ. Apariññāpubbikā hi pariññāti.

Kāmaṃ “idha bhikkhave bhikkhū”ti-ādīnā uddesaniddesesu tattha tattha bhikkhuggahaṇaṃ kataṃ taṃpaṭipattiyā bhikkhubhāvadassanatthaṃ, desanā pana sabbasādhāraṇāti dassetuṃ “yo hi koci bhikkhave”icceva vuttam, na bhikkhuyevāti dassento **“yo hi koci bhikkhu vā”**ti-ādimāha. Dassanamaggena ñātamariyādaṃ anatikkamitvā jānantī sikhāpattā aggamaggapaññā **aññā nāma**, tassa phalabhāvato aggaphalampīti āha **“aññāti arahattan”**ti.

Appatarepi kāle sāsanassa niyyānikabhāvaṃ dassentoti yojanā. **Niyyātentoti** nigamento.

Mahāsatiṭṭhānasuttavaṇṇanāya līnatthappakāsanā.

10. Pāyāsirājaññasutta

406. Bhagavatā evaṃ gahitanā mattāti yojanā. Yasmā rājaputtā loke “kumāro”ti voharīyanti. Ayañca rañño kittimaputto, tasmā āha “**rañño -pa-sañjānimsū**”ti.

Assāti therassa. **Puññāni karonto** kappasatasahassaṃ devesu ceva manussesu ca uppajjitvā **visesaṃ nibbattetuṃ nāsakki** indriyānaṃ aparipakkattā. **Tatiyadivaseti** pabbataṃ āruḥhadivasato tatiye divase.

Tesaṃ sāvakabodhiyā niyatatāya, puññasambhārassa ca sātisayattā vinipātaṃ agantvā **ekaṃ buddhantaraṃ -pa- anubhavantānaṃ**. **Devatāyāti** pubbe saha dhammacārinīyā suddhāvāsadevatāya.

“Kuladārikāya kucchimhi uppannā”ti vatvā tamevassa uppannabhāvaṃ mūlato paṭṭhāya dassetuṃ “**sā cā**”ti-ādi vuttaṃ. Tattha **sāti** kuladārikā. **Ca-**saddo byatirekattho, tena vuccamānaṃ visesaṃ joteti. **Kulagharanti** patikulagehaṃ. **Gabbhanimittanti** gabbhassa saṅghitabhāvanimittam. Satipi visākhāya ca sāvattivāsikulapariyāpannatte tassā tattha padhānabhāvadassanattham “**visākhañcā**”ti vuttaṃ yathā “brāhmaṇā-āgatā vāsiṭṭhopi āgato”ti. **Devatāti** idhapi sā eva suddhāvāsadevatā. **Pañheti** “bhikkhu bhikkhu ayaṃ vammiko”ti-ādinā¹ āgate pannarasapañhe.

Setabyāti itthilingavasena **tassa nagarassa nāmaṃ**. **Uttarenāti** ena-saddayogena “setabyan”ti upayogavacanaṃ pāḷiyam vuttaṃ. Atthavacanena pana uttarasaddaṃ apekkhitvā **setabyatoti** nissakkappayogo kato. **Anabhisittakarājāti** khattiyajātiko abhisekaṃ appatto.

Pāyāsirājaññavatthuvaṇṇanā

407. **Diṭṭhiyeva diṭṭhigatanti** gata-saddena padavaḍḍhanamāha, diṭṭhiyā vā gatamattaṃ **diṭṭhigataṃ**, ayāthāvaggāhitāya gantabbabhāvato diṭṭhiyā

gahaṇamattaṃ, kevalo micchābhīnivesoti attho, taṃ pana diṭṭhigataṃ tassa ayonisomanasikārādivasena uppajjitvā paṭipakkhasammukhībhāvābhāvato, anurūpāhāralābhato ca samudācārappattaṃ jātanti pāliyaṃ “uppannaṃ hoti”ti vuttaṃ. **Taṃ taṃ kāraṇaṃ apadisitvā**ti tato idhāgacchanakassa, ito tatta gacchanakassa ca apadisanato “tatta tattheva sattānaṃ ucchiḷjanato”ti evamādi taṃ taṃ kāraṇaṃ paṭirūpakāṃ apadisitvā.

408. Āpannānadhīppetatthavisaye ayaṃ **purā-saddapayogoti āha “purā-pa-saññāpetīti yāva na saññāpetī”**ti.

(1) Candimasūriya-upamāvaṇṇanā

411. Yathā candimasūriyā uḷāravipulobhāsātāya aññena obhāseṇa anabhibhavanīyā, evamayampi paññā-obhāsenāti dassento “**candima-pa-aññenā**”ti-ādimāha. **Ādīhīti ādi-saddena** “kittake ṭhāne ete pavattenti, kittakaṃ ca ṭhānaṃ nesaṃ ābhā pharati”ti evamādimpi codanaṃ saṅgaṇhāti. **Paliveṭṭhetuṃ**ti ābandhissati, anuyuñjissatīti attho. **Nibbeṭṭhetuṃ** taṃ vissajjetuṃ. **Tasmāti** yasmā yathāvuttaṃ codanaṃ nibbeṭṭhetuṃ na sakkoti, tasmā. Attano anicchitaṃ saṅghātaṇaṃ pakkhaṃ paṭijānanto “parasmim loke, na imasmin”ti-ādimāha.

Kathaṃ panāyaṃ natthikadiṭṭhi “devo”ti paṭijānātīti tatta kāraṇaṃ dassetuṃ “**bhagavā panā**”ti-ādi vuttaṃ. “Devāpi devattabhāveneva ucchiḷjanti, manussāpi manussattabhāveneva ucchiḷjanti”ti evaṃ vā assa diṭṭhi, evañca katvā “devā te, na manussā”ti vacanañca na virujjhati. Evaṃ **candeti** candavimāne na ca cande vā kathiyante.

412. Ābādho etesaṃ atthīti **ābādhikā**. Dukkhaṃ sañjātaṃ etesanti **dukkhitā**. Saddhāya ayitabbā **saddhāyikā**, saddhāya pavattiṭṭhānabhūtā. Tenāha “**ahaṃ tumhe**”ti-ādi. Paccayo pattiyaṇaṃ¹ etesu atthīti **paccayikā**.

1. Pati-ayanaṃ (?)

(2) Cora-upamāvaṇṇanā

413. **Uddisitvāti** upecca dassetvā. **Kammakāraṇikasattesūti** nerayikānaṃ saṅghātanakasattesu. **Kammamevāti** tehi tehi nerayikehi katakammameva. **Kammakāraṇaṃ karotīti** āyūhanānurūpaṃ taṃ taṃ kāraṇaṃ karoti, tathā dukkhaṃ uppādetīti attho. **Nirayapālāti** ettha **iti-saddo ādi**-attho, tena tатtha sabbaṃ nirayaKaṇḍapāḷim¹ saṅgaṇhāti. Evaṃ suttato¹ nirayapālānaṃ atthibhāvaṃ dassetvā idāni yuttitopi dassetuṃ “**manussaloke**”ti-ādi vuttaṃ. Tатtha nerayike niraye pāḷenti tato niggantun appadānavasena rakkhantīti **nirayapālā**. Yaṃ panettha vattabbaṃ, taṃ **papañcasūdanīṭikāyaṃ**² gahetabbaṃ.

(3) Gūthakūpapurisa-upamāvaṇṇanā

415. **Nimmajjathāti** niravasesato majjatha sodhetha. Taṃ pana tassa tassa gūthassa tathā sodhanaṃ apanayanaṃ hotīti āha “**apanethā**”ti.

Asucīti asuddho, sopana yasmā manavaḍḍhanako manoharo na hoti, tasmā āha “**amanāpo**”ti. Asucisaṅkhātaṃ asucibhāgataṃ attano sabhāvataṃ gato pattoti **asucisaṅkhātoti** āha “**asucikoṭṭhāsabhūto**”ti. **Duggandhoti** duṭṭhagandho aniṭṭhagandho, so pana na yo koci, atha kho pūtigandhoti āha “**kuṇapagandho**”ti. **Jigucchitabbayuttoti** hīḷitabbayutto. **Paṭikūlo** ghānindriyassa paṭikūlarūpo. **Ubbādhatīti** uparūpari bādhati. **Manussānaṃ gandho -pa- bādhati** ativiya asucisabhāvattā, asucimhiyeva jātasamvaddhanabhāvato, devānañca ghānapasādassa tikkhavisadabhāvato.

416. **Dūre nibbattā** paranimmitavasavatti-ādayo.

419. **Sundaradhammeti** sobhanagaṇe. **Sugatisukhanti** sugati ceva tappariyāpannaṃ sukhañca.

1. Ma 3. 214 piṭṭhe. 2. Majjhimāgamaṭikāyaṃ bālapaṇḍitasuttasamvaṇṇanā passitabbā.

(6) Gabbhinī-upamāvaṇṇanā

420. Puññakammato eti uppajjatīti **ayo**, sukhaṃ. Tappaṭipakkhato **anayo**, **dukkhaṃ**. **Apakkanti** na siddhaṃ na niṭṭhānappattaṃ. **Na paripācenti** na niṭṭhānaṃ pāpenti. **Na upacchindanti** attavinipātassa sāvajjabhāvato. **Āgamentīti** udikkhanti. **Nibbisanti** yassa pana taṃ kammaphalaṃ nibbisanto niyuñjanto, **nibbisanti** vā nibbesaṃ vetanaṃ paṭikaṅkhanto bhatapuriso yathā.

421. **Ubbhinditvāti** upasaggena padavaḍḍhanamattanti āha “**bhinditvā**”ti.

(7) Supinaka-upamāvaṇṇanā

422. “**Nikkhamantaṃ vā pavisantaṃ vā jīvan**”ti idaṃ tassa ajjhāsayasasena vuttaṃ. So hi “sattānaṃ supinadassanakāle attabhāvato jīvo bahi nikkhamitvā taṃtaṃārāmarāmaṇeyyakadassanādivasena ito cito ca paribbhamitvā punadeva attabhāvaṃ anupavisatī”ti evaṃ pavattamicchāgāhavipallattacitto. Athassa thero khuddakāya āṇiyā vipulaṃ āṇiṃ nīharanto viya jīvasamaññāmukhena ucchedadiṭṭhiṃ nīharitukāmo “api nu tā tuyhaṃ jīvaṃ passanti pavisantaṃ vā nikkhamantaṃ vā”ti āha. Yattha pana tathārūpā jīvasamaññā, taṃ dassento “**cittācāraṃ jīvanti gahetvā āhā**”ti vuttaṃ.

423. **Veṭhetvāti** vekhadānasaṅkhepena veṭhetvā. **Cavanakāleti** cavanassa cutiyā pattakāle, na cavamānakāle. **Rūpakkhandhamattamevāti** katipayarūpadhammasaṅghātamattameva. Utusamuṭṭhānarūpadhammasamūhamattameva hi tadā labbhati, matta-saddo vā visesanivatti-attho, tena kammajāditisantatirūpavisesaṃ nivatteti. **Appavattā hontīti** appavattikā honti, na upalabbhatīti attho. Viññāṇe pana jīvasaññī, tasmā “**viññāṇakkhandho gacchatī**”ti āha, tattha anupalabbhanatoti adhippāyo.

(8) Santatta-ayogūla-upamāvaṇṇanā

424. **Vūpasantatejanti** vigatusmaṃ.

425. **Āmatoti** ettha ā-saddo āmisa-saddo viya upaḍḍhapariyāyoti āha “**addhamato**”ti, **āmatoti** vā īsaṃ

darathena¹ usmanā yuttamaraṇo marantoti attho. Mīyamāno hi avigatusmo hoti, na mato viya vigatusmo. Tenāha “**marituṃ āraddho hotī**”ti. Tathā rūpassa **odhunanam** nāmassa orato parivattanamevāti āha “**orato karoṭhā**”ti. Orato kātukāmassa pana saṃparivattanam sandhunanam, tam pana parato karaṇanti āha “**parato karoṭhā**”ti. Paramukham katassa ito cito parivattanam **niddhunananti** āha “**aparāparam karoṭhā**”ti. Indriyāni aparibhinnānti adhippāyena “**tañcāyatanam na paṭisamvedetī**”ti vuttam.

(9) Saṅkhadhama-upamāvaṇṇanā

426. Saṅkham dhamati, dhamāpetīti vā **saṅkhadhamo**. **Upalāpetvāti** uparūpari saddayogavasena sallāpetvā, saddayuttam katvāti attho. Tam pana atthato dhamanamevāti āha “**dhamitvā**”ti.

(10) Aggikajaṭila-upamāvaṇṇanā

428. Āhito aggi etassa atthīti **aggiko**, svāssa aggikabhāvo yasmā aggihutamālāvedisampādanehi ceva idhumabarihissappitelūpaharaṇehi balipupphadhūmagandhādi-upahārehi ca tassa payirupāsanāya icchito, tasmā vuttam “**aggiparicārako**”ti. **Āyurū pāpuṇāpeyyanti** yathā cirajīvī hoti, evam āyurū pacchimavayam pāpeyyum. **Vaḍḍhim gameyyanti** sarīravayave, guṇāvayave ca phātim pāpeyyam. **Araṇīyugaḷanti** uttarāraṇī, adharāraṇīti araṇīdvayam.

429. **Evanti** “bālo pāyāsirājaṇṇo”ti-ādippakārena. **Tayāti** theram sandhāya vadati. **Vuttayuttakāraṇamakkhalakkaṇenāti** vuttayuttakāraṇassa makkhanasabhāvena. **Yugaggāhalakkaṇenāti** samadhuraggahaṇalakkhaṇena. **Palāsenāti** palāsetīti palāso, parassa guṇe uttaritare ḍamsitvā viya chaḍḍento attano guṇehi same karotīti attho. Samakaraṇaraso hi palāso, tena palāsenā.

1. Darena darathena (Ka)

(11) Dve satthavāha-upamāvaṇṇanā

430. **Haritakapattanti** haritabbapattaṃ, appapattanti attho. Tenāha “antamaso”ti-ādi. **Sannaddhadhanukalāpananti** ettha **kalāpananti** tūṇīramāha, tañca sannayhato dhanunā vinā na sannayhatīti āha “**sannaddhadhanukalāpan**”ti. **Āsittodakāni vaṭumānīti** gamanamaggā ceva taṃtaṃnudakamaggā ca sammadeva devena phuṭṭhattā taṃtaṃ taṃtaṃ paggharita-udakasandamāna-udakā. Tenāha “**paripuṇṇasalilā maggā ca kandarā cā**”ti.

Yathābhatenāti sakaṭesu yathāṭṭhapitena, yathā “amma ito karohī”ti vutte ṭṭhapesīti attho karaṇakiriyāya kiriyāsāmaññavācībhāvato. Tasmā **yathāropitena, yathāgahitenāti attho** vutto.

(13) Akkhadhuttaka-upamāvaṇṇanā

434. **Parājayagūḷanti** yena guḷena, yāya salākāya ṭṭhitāya ca parājayo hoti, taṃ adassanaṃ gamento **gilati**. **Pajjohananti** pakārehi juhanakammaṃ. Taṃ pana balidānavasena karīyatīti āha “**balikammaṃ**”ti.

(14) Sāṇabhārika-upamāvaṇṇanā

436. **Gāmapattanti** gāmo eva hutvā āpajjitabbaṃ, suññabhāvena anāvasitabbaṃ. Tenāha “**vuṭṭhitagāmapadeso**”ti. **Gāmapadanti** yathā purisassa pādanikkhattaṭṭhānaṃ adhigataparicchedaṃ “padan”ti vuccati, evaṃ gāmaṃvāsīhi āvasitaṭṭhānaṃ adhigatanivutthāgāraṃ “gāmapadan”ti vuttaṃ. Tenāha “**ayamevattho**”ti. **Susannaddhoti** sukkena gahetvā gamanayogyatāvasena suṭṭhu sajjito. Taṃ pana susajjanaṃ suṭṭhu bandhanavasenevāti āha “**subaddho**”ti.

Āyādīnampi lohābhāve satipi loha-saddo sāsane tambalohe niruḷhoti āha “**lohanti tambalohan**”ti.

Saraṇagamanavaṇṇanā

437. **Abhiraddhoti** ārādhitacitto, sāsanassa ārādhitacittatā pasīdanavasenāti āha “**abhippasanno**”ti. **Pañhupaṭṭhānānī**ti pañhesu upaṭṭhānāni mayā pucchitatthesu tumhākaṃ vissajjanavasena ñāṇupaṭṭhānāni.

Yaññakathāvaṇṇanā

438. **Sarṃghātanti sarṃ-saddo** padavaḍḍhanamattanti āha “**ghātan**”ti. **Vipākaphalenāti** sadisaphalena. **Mahapphalo na hotiti** gavāḍipāṇaghātena upakkiliṭṭhabhāvato. **Guṇānisarṃsenāti** uddayaphalena. **Ānubhāvajutiyāti** paṭipakkhavigamanajanitena sabhāvasaṅkhātena tejena. **Ānubhāvajutiyāti** paṭipakkhavigamanajanitena sabhāvasaṅkhātena tejena. **Na mahājutiko hoti** aparisuddhabhāvato. **Vipākaviḍḍhātāyāti** vipākaphalassa vipulatāya, pāripūriyāti attho. **Duṭṭhukhetteti** usabhādidosehi dūsitakhette, taṃ pana vappābhāvato asāraṃ hotīti āha “**nissārakhette**”ti. **Dubbhūmeti** kucchitabhūmibhāge, svāssa kucchitabhāvo asāratāya vā siyā ninnatādidosavasena vā. Tattha paṭhamo pakkho paṭhamapadena dassitoti itaraṃ dassento “**visamabhūmibhāge**”ti āha. Daṇḍābhighātādinā **chinnabhinnāni**. **Pūtīnīti** gomayalepadānādisukhena asukkhāpitattā pūtibhāvaṃ gatāni. Tāni pana yasmā sāravantāni na honti, tasmā vuttaṃ “**nissārāni**”ti. **Vātātapahatānīti** vātena ca ātapena ca vinaṭṭhabījasāmatthiyāni. Tenāha “**pariyādinnatejāni**”ti. Yaṃ yathājātavīhi-ādīgatena taṇḍulena aṅkuruppādanayogyabījasāmatthiyaṃ, taṃ **taṇḍulasāro**, tassa **ādānaṃ** gahaṇaṃ tathā-uppajjanameva. **Etāni** pana bījāni **na tādīsāni** khaṇḍādidosavantatāya. Dhārāya khette **anuppavesanaṃ** nāma vassanameva, taṃ paṭikkhepavasena dassento āha “**na sammā vasseyyā**”ti. **Aṅkuramūlapattādīhīti** cettha aṅkurakandādīhi **uddhaṃ vuddhiṃ**, mūlajaṭṭhādīhi **heṭṭhā viruḷhiṃ**, pattapupphādīhi **samantato ca vepullanti** yojanā.

Aparūpaghātenāti paresaṃ vibādhanena. **Uppannapaccayatoti** nibbattitaghāsacchādanādideyyadhammato. Gavāḍighātenapi hi tattha paṭiggāhakānaṃ ghāso saṅkīyati. “**Aparūpaghātītāyā**”ti idaṃ silavantatāya

kāraṇavacanaṃ. **Guṇāṭirekanti** guṇāṭirittam, silādilokuttaraguṇehi viṣiṭṭhanti attho. **Vipulāṭi** saddhāsampadādivasena uḷāra.

Uttaramāṇavavattuvaṇṇanā

439. Atha kho tehi sakuṇḍakehi taṇḍulehi siddham bhattam uttaṇḍulameva hotīti āha “**uttaṇḍulabhattan**”ti. **Bilaṅgam** vuccati āraṇālam bilaṅgato nibbattanato, tadeva kaṅḅjiyato jātanti **kaṅḅjiyam**, tam dutiyam etassāti **bilaṅgadutiyam**, tam “**kaṅḅjikadutiyam**”ti ca vuttam. **Dhorakānīti** dhoviyāni. Yasmā thūlatarānīpi “**thūlānī**”ti vattabbatam arahanti, tasmā “**thūlānī cā**”ti vuttam. **Guḷadasānīti** suttānam thūlatāya, kaṅḅjikassa bahalatāya ca piṇḍitadasāni. Tenāha “**puṅḅjapuṅḅja -pa- dasānī**”ti. **Anuddisatīti** anu anu katheti.

440. **Asakkaccanti** na sakkaccam anādarakāram, tam pana kammaphalasaddhāya abhāvena hotīti āha “**saddhāvīrahitān**”ti. **Acittikanti** cittikārapaccupaṭṭhāpanavasena na cittikatam. Tenāha “**cittikāvīrahitan**”ti-ādi. Cittikārahitam vā **acittikatam**, yathā katam paresam vimhayāvaham hoti, tathā akatam. Cittassa uḷārapaṇītabhāvo pana asakkaccadānēna bādhitō. **Apaviddhanti** chaḍḍaniyadhammam viya apaviddham katvā, etena tasmim dāne gāravākaraṇam vadati. **Serīsakam nāmāti** “serīsakan”ti evamnamakam. **Tucchanti** parijanaparicchedavīrahato rittam.

Pāyāsīdevaputtavaṇṇanā

441. **Tassānubhāvenāti** tassa dānassa ānubhāvena. **Sirīsaruḅkhoti** pabhassarakhandhaviṭṭapasākḅhāpalāśasampanno manuṅḅnadassano dibbo sirīsaruḅkko. **Aṭṭhāsīti** phalassa kammasarikkhatam dassento **vimānadvāre** nibbattitvā aṭṭhāsī. **Pubbāciṅṅnavasenāti** purimajātiyam tattha nivāsaparicasanavasena. Na kevalam pubbāciṅṅnavasēna, atha kho utusukhumavasēnapīti dassento “**tattha kirassa**¹ **utusukham hotī**”ti āha.

1. Tam kirassa (Aṭṭhakathāyam)

Soti uttaro māṇavo. Yadi asakkaccaṃ dānaṃ datvā pāyāsi tattha nibbatto, pāyāsissa paricārikā sakkaccaṃ dānaṃ datvā kathaṃ tattha nibbatāti āha “**pāyāsissa panā**”ti. **Nikantivasenā**ti pāyāsimhi sāpekkhāvasena, pubbepi vā tattha nivutthapubbatāya. **Disācārikavimānanti** ākāsaṭṭhaṃ hutvā disāsu vicaraṇakavimānaṃ, na rukkhapabbatasikharādisambandhaṃ. **Vattani-aṭaviyanti** vimānavīthiyanti.

Pāyāsirājaññasuttavaṇṇanāya līnatthappakāsanā.

Niṭṭhitā ca mahāvaggaṭṭhakathāya līnatthappakāsanā.

Mahāvaggaṭṭikā niṭṭhitā.

Mahāvaggaṭīkāya

Saṁvaṇṇitapadānaṁ anukkamaṇīkā

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akaniṭṭhagāmī	276	Ajjhosānaṁ	98
Akaraṇīyā	124	Aññamaggapaṭikkhepo	342
Akāco	229	Aññāṇaṭṭho	85
Akkharaṁ	272	Aṭṭiyāmi	283
Akhaṇḍāni	134	Aṭṭhakulikā	124
Agatim	283	Aṭṭhaṅgulubbedhā	15
Aggaññā	285	Aṭṭhadantakehi	189
Aggatalaṁ	36	Aṭṭhasataṁ	258
Aggiko	354	Aṭṭhāne	232
Aggupatṭhāko	13	Aṭṭhipakkhā	95
Aggo	30	Aṭṭhisīsā	42
Agghaṁ	227	Aḍḍhayojanaṁ	123
Aggho	35	Aṇusahagate	88
Aghā	26	Atantibaddhā	179
Aghāvino	182	Atappako	58
Aṅgaṁ	35, 193	Atipāyissanti	122
Aṅgesu	323	Atītaṁ	263
Acittīkataṁ	357	Atulaṁ	35
Accantakhāre	26	Attagatikāva	146
Accantaniṭṭhā	274	Attanomaṭi	168
Acchandikā	65	Attabhāvo	338
Ajātaṁ	46	Attassaraṇā	146
Ajāmige	223	Atthikā	200
Ajjhāsayaṇaṭṭhā	16	Adaṇḍo	255
Ajjhesanā	62	Adassanaṭṭho	85
Ajjhotthataṭṭho	149	Adiṭṭhehi	49

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Addhaniyaṃ	16	Anipphanṇo	210
Adhammikā	9	Aniyamena	149
Adhikaraṇaṃ	99	Aniyyānikam	22
Adhigataṭṭhānaṃ	183	Anirassādaṃ	334
Adhigamasaddhā	128	Anukampāya	125
Adhiṭṭhitā	148	Anukkamaṃ	53
Adhipannassa	282	Anucariyaṃ	247
Adhimuttikālakiriyā	20	Anucchavikattā	177
Adhimokkho	319	Anuṭṭhānaseyyaṃ	176
Adhivacanaṃ	107	Anuttaro	230
Adhivāseṇi	178	Anuddhataṃ	334
Adhivāsesi	144	Anudhammaṃ	151
Anacchariyaṃ	205	Anudhammā	151
Anacchariyā	60	Anudhāriyamāne	29
Anattani	211	Anupavisati	81
Anaddhaniyaṃ	335	Anupubbī	148
Ananussutesu	224	Anupubbūpasantassa	56
Anantaṃ	239	Anuppannaṃ	346
Anapaloketvā	145	Anuppannesu	284
Anabhisambhavanīyo	206	Anuppādo	342
Anabhisittakarājā	350	Anubuddhiyā	169
Anādīnavadassāvino	267	Anubrūhanaṃ	60
Anāmantetvā	145	Anuyantā	196
Anāyūhanaṃ	342	Anusandhi	108
Anāruḷhaṃ	203	Anekaśākhaṃ	29
Anāvilā	239	Anodhijinassa	267
Aniccā	313	Antakaro	165
Aniccānupassanā	130	Antako	150
Anicchitaṃ	124	Antanteneva	172
Aniṭṭhaṃ	258	Antarāmagge	266

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Antepurassa	195	Appicchatāya	167
Antevāsiko	307	Appiyaṁ	258
Anto	18	Appiye	257
Antonimuggaposīni	64	Appeti	96
Andhakārā	261	Appesakkhā	230
Anvāvaṭṭanā	212	Apphoṭanaṁ	31
Anvāsatto	12	Abbhavalāhakā	9, 242
Apagatakālakam	70	Abyaggo	332
Apacayāya	167	Abhabbā	241
Apadesā	165	Abhi-uggacchi	226
Apanujja	221	Abhiṇhaṁ	141
Apanetvā	28	Abhinibbatti	337
Apanesi	177	Abhiniviṭṭhassa	48
Apabbājitattā	74	Abhinivisanti	274
Apabyūlho	145	Abhiniveso	259
Apariniṭṭhitāva	177	Abhinīlanetto	41
Aparihāniyā	125	Abhinīharamāno	220
Apalibuddhattā	41	Abhibhāyatanam	159
Apaviddham	357	Abhibhu	159
Apāyā	91	Abhiraddho	356
Apāraṅgāya	178	Abhisaṅkharāṇam	85
Appamāṇā	155	Abhisaṅkharāṇasabhāvam	54
Appamādo	186	Abhisambhosi	225
Apparajam	62	Abhisitto	226
Apparajakkhajātikā	62	Abhisekasiṅcako	190
Appalābho	256	Abhīrukā	35
Appavatti	303	Ayapaṭṭakam	41
Appassādā	69	Ayo	122, 353
Appahīnaṭṭhena	109	Ayoghanam	56
		Arajantassa	268

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Ariyadhammaṃ	211	Asamāhitam	314
Ariyavaṃsā	285	Asuci	352
Ariyo	342	Asubhe	212
Arocako	191	Asurakāyaṃ	72
Alaggo	29	Asevitabbaṃ	272
Alīnaṃ	334	Asesavirāgo	341
Allīyati	341	Assaddhā	65
Avabhāsati	82	Aho vatassa	257
Avaloketha	144		
Avassayo	67	[Ā]	
Avikkhepalakkhaṇo	129	Ākulā	123
Avikkhepo	325	Āgamaṇīyasaddhā	127
Avijahito	15	Ācayāya	167
Avijjāsamudayā	53	Ācariyaṃ	155
Avijjāsīsena	112	Ācariyavādo	168
Avidvā	228	Ācārapaññatti	177
Avinibbhogo	86	Ācikkhissanti	151
Avipākajinassa	267	Ājānitukāmo	276
Avirādhitam	122	Āṇiyā	192
Avivittā	181	Āṇiyo	139, 218
Avissaṭṭhakammantā	233	Ātāpī	294
Avītikkamo	270	Ādānaṃ	99
Avekkhitvā	239	Ādāsaṃ	142
Asaṃkiṇṇā	285	Ādikalyāṇaṃ	285
Asaṃvutā	26	Ādiccabandhunaṃ	277
Asaṃsaṭṭho	212	Ādīnavo	69
Asanaṃ	122	Ādhipateyyaṃ	173
Asantuṭṭhiyā	167	Ānubhāvajutiya	356
Asabalāni	134	Ānubhāvo	122
Asamapekkhanaṃ	268	Āpajja	82

Padānukkamo	Piṭṭhaṅko	Padānukkamo	Piṭṭhaṅko
[Ā]		[Ā]	
Ābaddhaṃ	18	Āhacca	164
Ābādhikaṃ	46	Āhāro	143
Ābādhikā	351	[I]	
Ābhogo	212	Ijḡhanaṭṭhena	208
Ābhoggavaṅkaṃ	45	Ijḡhanassa	155
Āmato	353	Iṭṭhaṃ	258
Āmisaṃ	313	Iṭṭhānaṃ	263
Āyatanāni	321	Iṭṭhe	268
Āyanti	291	Iṭṭho	69
Āyu	310	Idappaccayatā	59
Āyūhanaṃ	85	Iddhānubhāvena	156
Āraḡaṅṭakaṃ	201	Iddhipahonakatāya	208
Āraggena	37	Iddhipādo	208
Āraddhaṃ	128	Iddhimanto	240
Ārammaṇaṃ	67	Iddhivikubbanatāya	208
Ārādhitasāsane	188	Iddhivisavitāya	208
Ālāpo	158	Idhalokatthaṃ	71
Āluḡeti	281	Iriyā	303
Āvaṭṭanaṃ	178	Iriyāpatho	303
Āvaṭṭanti	178	Issarā	244
Āvaṭṭetvā	201	Issariyamattāya	138
Āvaraṇena	232	[U]	
Āvaraṇato	124	Ukkaṅṭhitā	22
Āvaritā	228	Ukkuṭṭhiṃ	254
Āvārento	177	Ukkipāpentā	126
Āviṅṅhanarajjuyamaṃ	192	Uggahaṇaṃ	84
Āvi	131	Uggaho	286, 343
Āvudhadaṅḡo	255	Ugghāḡeti	304
Āsanaṃ	218		
Āsā	205		

Padānukkamo	Piṭṭhaṅko	Padānukkamo	Piṭṭhaṅko
[U]		[U]	
Uccāletvā	253	Upanisā	215
Uccāvacaṃ	275	Upanissayakoṭiyā	97
Ucchindissāmi	122	Upapatti	284
Ujumaggo	230	Upapattīsu	204
Uṭṭhapetvā	167	Upalāpetvā	354
Uṭṭhehi	66	Upavhayantā	241
Uṇhavalāhakā	242	Upasantadassano	205
Uṇhīsamatthake	200	Upasantapatiso	205
Utusampanno	31	Upasanto	83
Uttaṇḍulaṃ	10	Upasamalakkhaṇo	129
Uttarasīhapañjarasadise	195	Upādānakkhandhā	63, 320
Uttarisāṭakaṃ	83	Upāyato	211
Uttaro	11	Upāyamanasikārā	48
Uttāniṃ	151	Upāyo	211
Utrastaṃ	284	Uposathaṃ	12
Udakaṃ	222	Uposathikassa	193
Udakatumbakaṃ	201	Uppatitvā	269
Udakayantāni	44	Uppalinī	64
Udakavaṭṭiyo	29	Uppādaṭṭhiti	89
Udakena	29	Uppādo	89
Udagacitte	70	Ubbādhati	352
Uddisitvā	352	Ubbiggamaṃ	284
Uddhaccasahagataṃ	314	Ubhayanidānaṃ	257
Uddhumātattā	309	Umāpupphaṃ	162
Upatṭhānaṃ	325	Uyyānaṃ	45
Upaḍḍhakappo	115	Ullaṅghitvā	233
Upatthambhanaṃ	127	Ullokapadumāni	176
Upaddave	286	Usūyato	322
Upadhi	59	Ussakkitvā	303
Upanaccantiyā	250	Ussaṅkhā	38

Padānukkamo	Piṭṭhaṅko	Padānukkamo	Piṭṭhaṅko
[U]		[O]	
Ussannadosaṃ	325	Okappanaṃ	128
Ussannussannattā	223	Okappento	328
Ussādentō	83	Okāsādhigamo	212
Ussāhaṃ	177	Okiranti	176
Ussitabhāvo	305	Ogacchamānaṃ	196
Ussukkaṃ	246	Ojaṃ	275
Usmā	310	Otāretabbāni	166
Uḷumpam	139	Otāro	179
[E]		Ottappamāno	217
Ekamsabyākaraṇīyo	168	Ottappī	128
Ekakā	128	Ottharituṃ	234
Ekaggacitto	215	Odhāpayamānaṃ	195
Ekaṅgaṇāni	30	Odhijino	267
Ekacchannā	176	Obhāsaṭṭhena	51
Ekato	106	Orambhāgiyāni	140
Ekattaṃ	239, 290	Oruddhamānaso	283
Ekantavādā	273	Olīyamānako	126
Ekayāgupānamattampi	26	Osakkāpetuṃ	188
Ekaladdhikā	273	Osannavīriyā	144
Ekasañchannā	11	Osarati	254
Ekācārā	273	Osīdamatte	233
Ekābaddhāni	164	Osīdamāne	123
Ekāhamataṃ	309	Ossajji	154
Ekuppādo	86	Ossaṭṭho	147
Enti	127	Ohitaṃ	38
Esanataṇhā	98	Ohīyitvā	182
Esikatthambho	193	Oḷārikaṃ	88
Esitataṇhā	98	[Ka]	
Eḷamūgo	256	Kaṅḷiyam	357
		Kaṭṭhattharaṇaṃ	201

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kaḍḍhati	275	Karuṇājhānamaggo	230
Kaṇṇikapariyantato	197	Karerimaṇḍapo	1
Kaṇṇikamañcabandhanam	254	Kalāpaṃ	355
Kaṇṇikūpagam	253	Kalāpo	182
Kaṇhā	319	Kallacitte	70
Kaṇho	150	Kahāpaṇam	253
Katakālam	46	Kākassarāpi	41
Katapuñño	180	Kāmatanḥā	99
Katayogassa	83	Kāmarāgo	322
Katavihāro	148	Kāyakalaho	99
Kathitam	166	Kāyavinamanā	317
Kadariyā	223	Kāyavipattiyā	198
Kaniṭṭhabhātā	83	Kāyikaṃ	339
Kantati	219	Kāyūpapannassa	83
Kantanakavāto	219	Kāyo	320
Kantānam	263	Kālakassa	244
Kanto	69	Kiccato	344
Kapallakapūvam	155	Kiñcanam	282
Kapisīsā	42, 171	Kilamatho	27
Kappasaṇṭhānakālasmiṃ	6	Kīlā	69
Kappassa	115	Kucchivedikā	219
Kamanīyo	195	Kujjhanam	228
Kammakāraṇikasattesu	352	Kuñcikamuddikaṃ	192
Kammajam	259	Kuṇṭhā	3
Kammaniyāmo	25	Kumbham	218
Kammaratā	127	Kulagharam	350
Kammavipākajam	43	Kulaparivattam	182
Kammassakā	317	Kulavamso	15
Kammāvaraṇena	64		
Karaṇam	99		

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ga]	
Kulasaṅgahatthāya	81	Gaggaraṇāḷim	301
Kulāni	137	Gaggarassarā	159
Kullaṁ	139	Gaggarāyamānā	171
Kusītapuggalaparivajjanā	330	Gaṅgāyaṁ	123
Kusīto	330	Gacchanto	114
Kūṭagoṇo	300	Gaṇṭhibaddhaṁ	90
Kūṭadhenu	300	Gaṇḍo	275
Kevalaparipuṇṇaṁ	285	Gaṇḥanti	274
Keḷāyitā	257	Gatāgataṭṭhānaṁ	269
Koṭṭhaggaṁ	182	Gatāse	235
Koṭṭhāsehi	100	Gati	17, 34, 67
Kosajjāya	167	Gatiyo	34
[Kha]		Ganthamānāva	177
Khacitvā	190	Ganthitā	250
Khaṇikasamāpatti	145	Gandhadāmāni	190
Khaṇḍaṁ	134	Gandhantare	73
Khaṇḍiccaṁ	21, 337	Gandhabbarājā	218
Khanti	74	Gandhabbā	95
Khandhajāti	95	Gandhārako	286
Khandhapaṭipāṭiyā	3	Gandho	321
Khamateva	193	Gabbhakāle	182
Khayadhammā	111	Gabbhanimittaṁ	350
Khayanto	280	Gamanavīthim	329
Khalaggaṁ	182	Gambhīrañāṇacariyaṁ	329
Khalabhaṇḍaggaṁ	182	Gambhīravitthataṁ	139
Khāṇuko	138	Gambhīro	58, 84
Khāraḱajāto	219	Garukaṁ	17
Khārī	218	Gāmapadaṁ	355
Khipitakaṁ	191	Gāḷhaṁ	252
Khīyaṇaṁ	228		

Padānukkamo	Piṭṭhaṅko	Padānukkamo	Piṭṭhaṅko
[Ga]		[Ca]	
Gijjham	122	Catumahāpathe	308
Gijjhakūṭo	122	Caturantā	34
Giñjakāvasatho	140	Catusampajaññavasena	306
Gihigatāni	126	Cāturantāya	196
Guṇā	198	Candanacitakā	189
Guṇātirekam	357	Cande	351
Guṇānisamaṅsena	356	Cammapakkhā	95
Guḷakajātaṃ	90	Cammena	37
Guḷadasāni	357	Caraṇasīlā	151
Gehasitaṃ	263	Caranti	274
Go	225	Calanaṭṭhena	275
Goghātako	307	Calimsu	234
Gotrabhuto	177	Cavanakāle	353
Gopānasivaṅkaṃ	45	Cavanatā	337
Govindiyābhisekena	225	Cārittaṃ	185
Govindo	225	Cāletvā	193
[Gha]		Citā	149
Ghaṭakā	194	Cittakallatā	235
Ghanavinibbhogaṃ	308	Cittakilamatho	339
Gharavatthūni	138	Cittacalanā	179
Ghānaṃ	320	Cittikataṃ	35
[Ca]		Cittutrāso	227
Cakkabandho	146	Cirappaṭīkāham	250
Cakkhum	341	Cutigantabbaṃ	17
Cakkhu	51, 320	Cullakaddhānaṃ	187
Cakkhudhammo	51	Cetasikaṃ	339
Cakkhupathasmiṃ	206	Cetiyacārikā	179
Cakkhubhaṇḍaṃ	41	[Cha]	
Caṅgavāre	174	Chaḍḍetabbāni	167
Cajīyati	341	Chattavedikā	219

Padānukkamo	Piṭṭhaṅko	Padānukkamo	Piṭṭhaṅko
[Cha]		[Ña]	
Challim	167	Ñāṇatejēna	156
Chijjimsu	31	Ñātakaraṇaṭṭhena	51
Chajjitvā	26	Ñātatthacariyā	20
Chinnapātaṃ	178	Ñāyassa	285
Chinnaṇaṭṭumakā	5	Ñāyo	184, 284
Chinnassarā	41, 159	[Tha]	
[Ja]		Ṭhapanīyo	168
Jaññā	98	Ṭhānāni	81
Janapadatthāvariyaṭṭatto	34	Ṭhānīyā	319
Janapadino	79	Ṭhitattaṃ	238
Janeti	304	[Ta]	
Jarāturaṃ	45	Takkaro	135
Jarādhammo	270	Taṇḍulasāro	356
Jalajathalajamālaṃ	200	Tatthagāminī	258
Jallaṃ	39	Tanukatanukā	141
Jātarūpaṃ	270	Tanukāni	44
Jātikhayantadassī	280	Tantaṃ	90
Jātidhammo	270	Tantākulajātā	90
Jātiyā	163	Tantiṃ	14
Jigīsāno	249	Tapasā	284
Jinakāḷasuttaṃ	177	Tapo	74
Jiniṃsu	275	Taruṇasakko	268
Jivhā	320	Talunā	37
Jīraṇatā	337	Tāṇaṃ	67
Jīvitapariyādānā	309	Tāḷacchiggalena	122
Jutimanto	240	Tāḷāvacaraṃ	187
Jeṭṭhikaṭṭhāne	74	Tikhiṇaṃ	249
Jetavanasadise	188	Tiṇṇaṃ	238
Jotipālaṃ	225		

Padānukkamo	Piṭṭhaṅko	Padānukkamo	Piṭṭhaṅko
[Ta]		[Da]	
Tiṇṇavicikiccho	223	Daṇḍo	247
Titikkhā	74	Danto	291
Tiporisaṅgā	193	Damo	200
Tiracchānayanim	72	Dasikatantaṃ	189
Tirento	154	Dassaniyā	197
Tuṅganāsā	341	Dassiyamānā	101
Tucchaṃ	357	Daharakāle	146
Tumbasīsā	42	Daḷhaṃ	300
Tulaṃ	153	Dānaggaṃ	200
Tepiṭakaṃ	151	Dānamukhaṃ	74
Temāsikaṃ	266	Dāyo	252
Terovassikāneva	310	Dāsamanussā	202
[Tha]		Diṭṭhaṃ	235
Thaddhamacchariyaṃ	228	Diṭṭhadhammikā	172
Thanudaraṃ	249	Diṭṭhi	135
Thinamiddhānupatitaṃ	314	Diṭṭhigataṃ	350
Thirabhāvappattā	126	Dibbaṃ	69
Thūlehi	39	Dibbasampattiṃ	69
[Da]		Dibbānubhāvata	241
Dakkhanti	60	Disācārikavimānaṃ	358
Daṇḍaṃ	123	Dīghapiṅgalo	170
Daṇḍa-ukkāya	116	Dīghehi	39
Daṇḍagatikaṃ	45	Dīpo	146
Daṇḍapaṭisaraṇaṃ	45	Dukūlacumbaṭake	34
Daṇḍaparāyaṇaṃ	45	Dukūladupaṭṭaṃ	190
Daṇḍabali	253	Dukkathitaṃ	214
Daṇḍamaṇikā	171	Dukkhaparijānaṃ	336
Daṇḍādānaṃ	99	Dukkhamanaṭṭho	339
Daṇḍāvacaro	275	Dukkhā	311
		Dukkhitāṃ	46

Padānukkamo	Piṭṭhaṅko	Padānukkamo	Piṭṭhaṅko
[Da]		[Dha]	
Dukkhītā	351	Dhammanissitaṃ	272
Duggandho	352	Dhammapadaṃ	115
Duṭṭhukhette	356	Dhammarājā	34
Dutiyatatiyesu	12	Dhammavicayo	324
Duddasattā	344	Dhammavinītā	217
Duddīpanā	261	Dhammasākacchā	158
Duppaññā	65	Dhammasīsaṃ	173
Dubbharatāya	167	Dhammā	321
Dubbhūme	356	Dhammādāsaṃ	142
Dullabhadassanaṃ	35	Dhammikathāya	138
Denti	123	Dhammikā	131
Devaghaṭā	235	Dhammiko	34
Devacārikakolāhalaṃ	18	Dhammī	2
Devabhāvāya	95	Dharamāne	184
Devarājāno	241	Dhātu	273
Devānubhāvaṃ	25	Dhātiyo	42
Devo	153	Dhātupāsanatthaṃ	191
Desanā	184	Dhātumanasikāravasena	307
Desessanti	151	Dhāraṇaṃ	84
Doṇaṃ	218	Dhīro	223
Dvelhakaṃ	186	Dhurapattāni	83
[Dha]		Dhuravāte	170
Dhanadaṇḍo	255	Dhūmakālikaṃ	126
Dhammakkhānaṃ	20	Dhorakāni	357
Dhammacakkhuṃ	70	[Na]	
Dhammacaraṇabhāvo	46	Naccantā	193
Dhammadhātu	18	Nandiṃ	294
Dhammaniyāmena	142	Nandi	37
Dhammaniyāmo	25	Nandīrāgasahagatā	340

Padānukkamo	Piṭṭhaṅko	Padānukkamo	Piṭṭhaṅko
	[Na]		[Na]
Namuci	150	Nibbuto	58
Nāgaggāho	138	Nimīlanam	44
Nāgarājā	218	Nimittam	7
Nāgasadahavāsikā	241	Nimittabhūtāni	36
Nāgāpalokitam	164	Nimittāni	101
Nātikiyā	204	Nimmajjatha	352
Nānattakāyā	114	Niyyāti	135
Nānattasaññino	115	Niyyātento	349
Nānābhāvo	163	Niyyānamukham	303
Nābhiparicchinnā	36	Niyyānikā	183
Nābhimukhaparikkhepapaṭṭo	36	Nirayam	72
Nāmanvayena	243	Nirayapālā	352
Nāmarūpaparicchedo	84	Nirutti	107
Nikkaddamā	170	Niruddham	263
Nikkhamantesu	7	Nirodhadhammā	111
Nikkhepo	338	Nilīnā	239
Niggumbe	94	Nisento	25
Nijjate	94	Nissasanti	22
Niṭṭhaṅgatā	204	Nīlamaṇi	143
Niṭṭhunanto	311	Nīlavammikehi	143
Niddosā	135	Nekkhammaṃ	264
Nidhikumbho	17	Nettāni	235
Nippattim	5	Nemiparikkhepassa	195
Nibaddham	253	Nemimaṇikā	37
Nibaddhavattam	201		[Pa]
Nibaddhupaṭṭhākabhāvam	12	Paṃsvāgārakīlam	202
Nibbānam	284	Pakatiyā	27
Nibbānagamanatṭhena	281	Pakkuthati	83
Nibbisam	353		

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Paggayha	131	Paṭinissaṭṭhā	59
Paggahakiccaṃ	325	Paṭipāṭibhattaṃ	222
Paggahalakkhaṇo	129	Paṭipādessāmi	147
Paṅgulā	3	Paṭipūjā	139
Pacalāyantānaṃ	283	Paṭippassaddhaṃ	18
Paccati	10	Paṭibaddha-aṅgulantaro	37
Paccayato	49	Paṭibhāneyyake	188
Paccayikā	351	Paṭilābhachando	257
Paccavekkhati	308	Paṭivijjhamāno	11
Paccāgamana-cārikaṃ	148	Paṭivijjhitvā	37
Paccupaṭṭhapetvā	124	Paṭividdho	57
Pacchānipātini	198	Paṭivedhakkhaṇe	345
Pajānanaṭṭhena	51	Paṭivedho	343
Pajjohanaṃ	355	Paṭisaṅkhānaṃ	317
Pañcakuṇḍaliko	218	Paṭisaṅkhānalakkhaṇo	129
Pañcasikho	206	Paṭisanthāradhammaṃ	180
Pañjarasmiṃ	283	Paṭisammajjitvā	81
Pañhupaṭṭhānāni	356	Paṭisaraṇe	34
Pañho	168	Paṭisallīnassa	48
Paññatti	107	Paṭṭana-gāmaṃ	123
Paññāpanaṃ	184	Paṭhamapadagaṇṭhikā	15
Paññāpessanti	151	Paṇihitaṃ	308
Paññāvisaye	11	Paṇihito	306
Paṭikkūlattā	309	Paṇītaṃ	74
Paṭigataṃ	46	Paṇīto	58
Paṭighanimittaṃ	316	Paṇḍito	107
Paṭighāto	4	Paṇhi	36
Paṭigho	102	Paṭiṭṭhā	67
Paṭiccasamuppādo	59	Paṭiṭṭhānaṭṭhena	148
Paṭinissajjīyati	341	Paṭiṭṭhitagaṇo	125

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pattakaṃ	247	Paricārake	204
Pattaggahaṇattham	83	Paricchedo	8
Pathato	211	Paritassanaḷivitaṃ	74
Pathamanasikāro	211	Parittaṃ	8, 108
Padahanam	346	Parittena	115
Paduminiyam	233	Paridevo	282
Padussanaṭṭhena	275	Paripucchakatā	324
Padeso	184	Paripucchanam	84
Padhānam	16	Paripuṇṇajāṅgho	38
Panāḷi	194	Paripūram	194
Panujja	238	Paribhogachando	257
Pannapalāso	219	Paribhogabhājanam	201
Papañcam	17	Parimajji	267
Papañcasaññā	274	Pariyatti	128
Papañcā	258	Pariyantakārī	127
Pabbhārasīsā	42	Pariyāyo	94
Pamattabandhu	150	Pariyuṭṭhitacitto	149
Pamāṇam	16, 168	Pariyesanachando	257
Pamuñcantu	66	Pariyesanā	98, 270
Pamudā	212	Parivaṭṭesi	143
Payuttaṃ	305	Parisuddham	285
Parajjhāsayena	238	Pariharanti	224
Paranisedhanattham	99	Palāsena	354
Parappavādā	300	Paliveṭṭhessati	351
Paramam	74	Paleti	119
Paralokaṃ	62	Pavattā	172
Paravisamvādanam	228	Pavattitā	2
Paravediyā	227	Pavanam	235
Parājayaguḷam	355	Pavāḷam	286
Parāyaṇam	67	Pavicayalakkhaṇo	129

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Paviṭṭhāni	176	Piṇḍāpacāyanam	330
Pavivekāya	167	Pitā	282
Pavuṭṭhajāti	243	Pidhānam	272
Paveṇī	15	Pidhānāya	272
Paveṇīkatham	126	Pipphalikam	201
Pasannacitte	70	Piham	265
Pasayhākārassa	124	Piyā	257
Pasādasaddhā	128	Piyehi	163
Pasādāvahattā	198	Pisācena	179
Pasādo	272	Pisuṇesi	253
Passam	36	Pīḷanaṭṭhena	275
Pahūtajivho	41	Puññatejēna	156
Pahūtapaññam	238	Puññasiriyā	224
Pahonti	286	Puññānubhāvena	197
Pātabbayāgu	188	Puṭavedikā	219
Pāpamittā	127	Putoḷi	307
Pāpasampavaṅkā	127	Puttabhariyam	270
Pāpimā	150	Puttena	27
Pāpo	188	Puthukakāle	182
Pāmokkhadevā	243	Puthubhūtam	152
Pāraṅgataṃ	238	Puthulehi	40
Pāricariyakkhamā	123	Pupphāni	73
Pāripūriyā	271, 324	Pubbacariyā	20
Pāliccam	21, 337	Pubbanimittāni	21
Pāvāya	188	Pubbabhāgavīriyena	145
Pāsāṇe	253	Pubbayogo	20
Pāsāṇo	138	Pubbasannivāsena	254
Piṅchavaṭṭi	83	Puratthābhimukho	27
Piṭṭhipāde	38	Purimataṇham	97
Piṇḍam	330	Purohito	225

Padānukkamo	Piṭṭhaṅko	Padānukkamo	Piṭṭhaṅko
[Pa]		[Ba]	
Pūjā	139	Bahupāyāsā	69
Pūtikā	228	Bahussuto	128
Pūṭigandho	155	Bārāṇasisambhavaṃ	162
Pūtīni	356	Bāhabandho	146
Pettivisaṃ	72	Bāhujaññaṃ	152
Pemaṇiyassaro	43	Bindu	207
Pesitacittā	179	Bindubinduvasena	21
Pokkharaṃ	247	Bimbisārasamāgamo	158
Poṅkhānupoṅkhaṃ	122	Bilaṅgadutiyaṃ	357
Porāṇā	285	Bīlaso	308
Posentassa	308	Bījaggaṃ	182
[Pha]		Bībhaccheti	193
Pharaṇalakkhaṇo	129	Bujjhati	52
Pharuso	144	Bujjhanakasattassa	323
Phalasīsā	42	Buddhaguṇavibhavasirīṃ	11
Phusanto	260	Buddhacariyā	20
Phoṭṭhabbaṃ	321	Buddhavīthi	234
[Ba]		Buddhāpadeso	165
Bandhavā	282	Bojjhaṅgo	129
Bandhāpetvā	232	Bojjhā	284
Balabherīṃ	125	Bodhi	163
Balavāghātajāto	123	Bodhipallaṅko	15
Balānurūpena	191	Bodhisatto	19
Baliṃ	123	Byaggo	332
Balikammaṃ	355	Byañjanaṃ	272
Bahalabahalā	141	Byatto	107, 180
Bahujanakantatāya	32	Byasanena	338
Bahudukkhā	69	Byākaritvā	283
		Byādhidhammo	270
		Byāpajjhaṃ	255

Padānukkamo	Piṭṭhaṅko	Padānukkamo	Piṭṭhaṅko
[Ba]		[Ma]	
Brahmakāyikā	115	Maggaṭṭhena	288
Brahmacārī	291	Maggañāṇe	216
Brahmapārisajjā	115	Magganīyatṭhena	281
Brahmapurohitā	115	Maggo	52
[Bha]		Macchariyaṁ	99
Bhaggavibhaggā	29	Maccharūpena	254
Bhañjivā	74	Macchavilolikā	171
Bhattapāti	202	Majjanam	228
Bhattavaḍḍhitakaṁ	161	Majjhattapayogata	332
Bhanti	224	Majjhimena	115
Bhayānakaṁ	244	Mañjuka	188
Bharitabhāvassa	33	Mañjughoso	41
Bhavaṅgassa	176	Mañjussaro	42
Bhavataṇhā	99	Maṇi	286
Bhavanetti	140	Maṇikaraṇḍesu	192
Bhavo	99, 225	Maṇikā	194
Bhastam	301	Maṇiphalake	147
Bhātaro	241	Maṇimayā	218
Bhāradhā	226	Mattaññutā	76
Bhāvanā	317, 343	Madapamatto	223
Bhāsantaram	159	Maddati	149
Bhikkhusaṅghasamiti	241	Madhurassaro	42
Bhijjivā	123	Madhusākam	227
Bhittiniyūhāni	44	Manasikāro	212
Bhinnassarāpi	41	Manāpānaṁ	263
Bhiyyobhāvo	346	Manāpehi	163
Bhuttānaṁ	202	Manāpo	69
Bhummā	239	Mano	320
Bhusāgārake	171	Manoramānaṁ	263
		Mantāyaṁ	230

Padānukkamo	Piṭṭhaṅko	Padānukkamo	Piṭṭhaṅko
[Ma]		[Ma]	
Mandaṃ	249	Muttājālake	197
Mamaṅkāro	228	Muducitte	70
Mamāyati	335	Muniṃ	238
Mamāyantā	335	Muyhanaṃ	228
Mamāyitā	257	Murumurāpetvā	179
Maraṇadhammo	270	Muhuttajāto	29
Malassa	74	Mūḷhassa	267
Mallapāsāṇaṃ	83	Mettaṃ	131
Mahagghaṃ	35	Mettānimittam	317
Mahapphalā	135	Medhāvī	180
Mahā-okāse	165	Morahatthato	37
Mahāgaṇe	266	Mosavajjam	228
Mahāgovindo	225	[Ya]	
Mahāparinibbānaṃ	122	Yakkhaggāho	191
Mahābrahmuno	115	Yakkhadāsake	192
Mahāmattā	123	Yakkhā	95
Mahāsamayo	234	Yaṭṭhikoṭigamaṇaṃ	3
Mahicchatāya	167	Yamunavāsino	241
Mānaṇaṃ	139	Yavalakkhaṇaṃ	37
Mānenti	124	Yasassino	240
Māpenti	138	Yogakkhemo	274
Māpesuṃ	178	[Ra]	
Māyāvino	240	Rajataṃ	270
Mittadubbhaṇaṃ	228	Rajatapubbuḷakaṃ	42
Mitto	316	Rajanaṃ	70
Milāyantu	192	Rajanīyo	195
Micchelvā	247	Rajo	39
Muṭṭhi	146	Raṇjetuṃ	193
Mutaṃ	235		
Muttā	286		

Padānukkamo	Piṭṭhaṅko	Padānukkamo	Piṭṭhaṅko
[Ra]		[La]	
Ratanaṃ	34	Līnākāro	317
Ratanadāmāni	190	Luñcitvā luñcitvā	310
Ratijanaṇaṭṭhena	34	Lubbhanaṃ	228
Rattaññā	285	Leṇaṃ	67
Rasaggasaggī	40	Lokatthacariyā	20
Raso	321	Lokantarikā	26
Rasmi	16	Loko	63
Rassehi	39	Lobhābhībhūtā	241
Rahogatassa	48	Lobho	179
Rājā	106	Lomapakkhā	95
Rājāyuttā	195		
Rājiddhiyā	122	[Va]	
Rāhu	15	Vaṃsaññā	285
Rucaggati	15	Vaggu	195
Rūpaṃ	320	Vaggussaro	42
Rūpakammaṭṭhānaṃ	259	Vaje	305
Rūpasaññā	161	Vajjidhammaṃ	123
Rūpasaññī	161	Vajjirājāno	122
Rūpiṃ	108	Vañcanikā	240
Reṇuvaṭṭi	219	Vaṭaṃsako	37
Rocinī	15	Vaṭṭani-aṭaviyaṃ	358
		Vaṭṭissati	134
[La]		Vaṭṭetvā	37
Lakkhaṇāni	36	Vaḍḍhitappamaṇāni	161
Lahukaṃ	8	Vaḍḍhitā	148
Laḷimsu	43	Vaṇippatho	138
Laḷitaṃ	43	Vaṇṇabhaṇanaṃ	285
Lābho	222	Vaṇṇavanto	240
Lāmakabhāvo	69	Vaṇṇavasena	162
Liṅgāni	101	Vaṇṇā	220

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vaṇṇena	224	Vicikicchāṭhānīyā	319
Vatthum	28	Vijambhanti	22
Vatthunissitā	261	Vijānanasabhāvaṃ	54
Vadhitam	308	Vijānantam	260
Vayadhammā	111	Vijāniya	115
Valittaco	337	Vijitāvī	34
Valli	109	Vijjhitabbā	252
Vasabharājā	203	Viññātam	235
Vassiko	44	Viññupasatthāni	134
Vahanto	52	Viññeyyo	207
Vācanaṃ	286	Vinayo	166
Vācākalaho	99	Vināseti	274
Vājikā	124	Vinicchayaṃ	120
Vājo	124	Vinicchayamahāmatṭā	123
Vātaṭāṅkā	190	Vinicchayo	98
Vātaṅgāḥakā	242	Vinipatitattā	91
Vātavasena	7	Vinipātikā	115
Vāṭātapahatāni	356	Vinibbedhena	196
Vāho	218	Vinibbhogo	86
Vāmūrū	249	Vinīlam	309
Vāyaṃ	304	Vinīvaraṇacitte	70
Vāyi	31	Vipaṅcitanñū	64
Vāvaṭā	26	Vipariṇatam	263
Vāsavo	242	Vipariṇatā	202
Vālabījanī	37	Viparivattitvā	26
Vālasaṅghātayantam	192	Viparītavuttitāya	257
Vikkhambhetvā	145	Vipassisaṃ	283
Vikkhipati	122	Vipākavipphāratāya	356
Vigato	111	Vippakiriṃsu	189
Viggaho	99	Vippamutto	56

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vippasannā	239	Visīdanam	339
Vipphārikataro	115	Visuddhim	286
Vibhajissanti	151	Vissajjanachando	257
Vibhavataṇhā	99	Vissajji	153
Vibhavo	99	Vissandamānapubbari	309
Vibhāvino	196	Vissarati	116
Vibhūtakālo	307	Vissāso	179
Vimati	186	Vihatena	179
Vimuttaṃ	314	Vihāyanti	77
Vimutto	117	Vītamalaṃ	70
Viyattā	151	Vīmaṃsā	159
Virajaṃ	70	Vīriyavantatāya	66
Virajjati	341	Vīriyārambhāya	167
Virajjanti	59	Vuddhi	104
Virāgāya	167	Vuddhippattam	152
Virāgo	85, 86	Vuddhiyeva	135
Virājeti	251	Vusitavataṃ	221
Virādhanā	277	Vūpasantatejaṃ	353
Viruḷhi	104	Vūpasamo	187
Virocanā	224	Veṭhakā	247
Vilāto	46	Veṇaggam	182
Vivaṭṭacchadā	36	Veṇikaraṇam	182
Vivaṭo	217	Veṇḍudevata	242
Vivarissanti	151	Vedayitasabhāvaṃ	54
Vivādo	99	Vepāko	199
Vivicchā	228	Vepullaṃ	104
Visajja	139	Vemattam	16
Visaññogāya	167	Veram	173
Visabhāgarogo	144	Vehapphalā	116
Visāradā	151	Vokiṇṇam	111

Padānukkamo	Piṭṭhaṅko	Padānukkamo	Piṭṭhaṅko
[Va]		[Sa]	
Vokkamissatha	103	Saṅgaṇikāya	167
Vosānaṃ	123	Saṅgamma	144
Vossajjitvā	225	Saṅgītikārakā	191
Voharanti	274	Saccappaṭivedho	128
Vohārikā	123	Sacchikiriyā	343
[Sa]		Sajjito	40
Samkilissanāṃ	69	Sañjāti	336
Samkilesadhammo	270	Saññate	139
Samyamessāmi	283	Saññogāya	167
Samyojanaṃ	322	Saṇateva	47
Samvare	173	Saṇṭhanti	39
Samvego	179	Satavāravihatassa	198
Samsaṭṭho	211	Satisampajaññaṃ	324
Samsandati	249	Saterā	171
Samsaraṇaṃ	140	Sattanikāye	336
Samsibbitvā	174	Sattamadivase	191
Samsīdanaṃ	339	Sattamāsajāto	28
Sa-uttaraṃ	314	Sattasahassā	240
Sa-upaniso	215	Satti	37
Sakaṭaṃ	181	Sattiyo	190
Sakuṇikā	90	Sattussado	39
Sakkāraṃ	124	Saddantaraṃ	234
Sakkhisāvako	184	Saddahanto	328
Saṅkīyanti	286	Saddo	320
Saṅkhatā	313	Saddhāyikā	351
Saṅkhadhamo	354	Santārammaṇaṃ	58
Saṅkhā	38	Santo	58, 291
Saṅkhāro	208	Santhari	137
Saṅkhiṇāti	274	Santhāgāraṃ	227
		Sandassesi	71

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sandhāretuṃ	124	Samuggatena	309
Sandhāvanam	140	Samujjalam	11
Sandhunanam	354	Samudayo	301
Sannāhagavacchikaṃ	190	Samosaraṇam	100
Sannidhichando	257	Sampajānāti	143
Sannipātabahulā	123	Sampajāno	294
Sannipātabheriyā	123	Sampattibhavaloko	63
Sannivesakkhamo	196	Sampattiyam	341
Sannisīvesu	47	Samparāyikā	172
Sabbakaniṭṭho	197	Sampasādane	224
Sabbakammiko	328	Sampādanā	277
Sabbatthikā	294, 329	Sambahulavāro	14
Sabbadhammatā	34	Sambojjhaṅgo	129
Sabbapāliphullā	176	Sambhavam	154
Sabbapāliphullo	219	Sambhāro	215
Sabbotukam	200	Sammanti	59
Samannāhāro	212	Sayamparisāya	205
Samabhāvakaraṇam	325	Saraṇca	244
Samayo	234	Saraṇaṭṭhena	288
Samavaṭṭitakkhandho	40	Sarati	143
Samavepākiniyā	199	Sarāgam	313
Samasamaphalā	172	Sarāgāya	167
Samāgamo	158	Sarāgo	85, 86
Samādahaṃsu	235	Sarīsapā	95
Samādhipakkhā	18	Salaḷamayagandhakuṭiyam	251
Samānetuṃ	90	Salaḷāgāram	1
Samāpannadevatā	234	Sallāpo	158
Samāhitam	314	Savanam	84
Samitattā	75	Savanīyo	207
Samiddham	152	Sahajātakotiṭṭhā	97

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sahassāram	194	Sukhā	311
Sāttham	285	Sukhī	223
Sādhukīlītam	190	Sukhumattā	116
Sādhessati	185	Sugatisukham	352
Sāmaṃ	277	Suṅkaṃ	123
Sārathi	45	Suciṃ	74
Sārappattā	181	Sutaṃ	235
Sāruppaṃ	258	Suttānulomaṃ	168
Sālindaṃ	81	Suddhaṃ	103
Sāvakā	2	Suddhāvāsā	45, 234
Sāvajjaṃ	213	Sundaradhamme	352
Sāvesi	248	Sundarā	62
Sāsanayuttikovide	284	Supaññattā	208
Sāhasikā	34	Supaṇṇavātaṃ	83
Sikkheyyāma	229	Supinako	190
Siniddhaṃ	44	Supothitena	179
Sindhavakulato	197	Suppaṭividdhā	18
Sirīsarukkho	357	Suppavattitaṃ	66
Silāthambhasadisā	178	Subhagavane	77
Sīlavā	137	Subharatāya	167
Sīlasampannā	27	Subhārammaṇaṃ	315
Sīhaseyyaṃ	175	Subhikkhā	181
Sīhasopānaṃ	219	Subhojanarasapuṭṭhassa	83
Sīhahanu	40	Sumucchitassa	193
Sīhāsaṇaṃ	219	Sumutto	207
Sukkā	319	Surasāni	11
Sukkhavipassako	117	Suvaṇṇaṃ	286
Sukhaṃ	69	Suvaṇṇakaṭṭhi	15
Sukhavāsattamaṃ	27	Suvaṇṇayaṭṭhiphālehi	15
Sukhavinicchayaṃ	98	Suvaṇṇahatthipādāni	15

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Suvibhattāneva	194	Sotthim	284
Susikkhitāya	132	Sovaṇṇamayam	247
Sūkaramaddavam	169	Sovaṇṇamayā	193
Sūrā	35	Sovattiko	37
Sūlasadisā	39	Sosento	338
Setambarukkho	11	[Ha]	
Sedamalamakkhitam	325	Hanu	40
Sedā	21	Harati	200
Seyyā	176	Harāyāmi	283
Seḷanam	31	Haritakapattam	355
Sokadhammo	270	Haritūpalittāya	25
Soko	281	Hāpetabbari	327
Sotam	320	Hirimanā	128